



New Testament

Alur Language

Alur - Bible - New Testament

Matayo	3	
Marko	61	
Luka	97	
Yohana	158	
Tic Mi Jukwenda	205	
Jurumi	263	
1 Jukorinto	288	
2 Jukorinto	313	
Jugalatia	329	
Juefeso	338	
Jufilipi	347	
Jukolosai	353	
1 Jutesaloniki	359	
2 Jutesaloniki	365	
1 Timoteo	368	
2 Timoteo	375	
Tito	380	
Filemon	383	
Juebrania	385	
Yakobo	403	
1 Petro	410	
2 Petro	417	
1 Yohana	422	
2 Yohana	428	
3 Yohana	429	
Yuda	430	
Lembanyutha	432	

Alur - Bible - New Testament

Matayo

Matayo 1

- ¹Kitabu mi thekwaru pa Yesu Kristu, wod Daudi, wod Ibrahim.
- ²Ibrahim uuyolo Isak; Isak ke nyolo Yakobo; Yakobo ke nyolo Yuda ku utumin mire;
- ³man Yuda nyolo Perez man Zera kor Tamar; Perez ke nyolo Hezron; Hezron ke nyolo Aram;
- ⁴Aram ke nyolo Aminadab; Aminadab ke nyolo Nahacon; Nahacon ke nyolo Salmon;
- ⁵Salmon ke nyolo Boaz kor Rahab; Boaz ke nyolo Obed kor Ruth; Obed ke nyolo Yese;
- ⁶Yese ke nyolo Daudi m'ubimo. Daudi ke nyolo Suleman kor dhaku ma yang' p'Uria;
- ⁷Suleman ke nyolo Rehoboam; Rehoboam ke nyolo Abia; Abia ke nyolo Asa;
- ⁸Asa ke nyolo Yehocafat; Yehocafat ke nyolo Yoram; Yoram ke nyolo Uzia;
- ⁹Uzia ke nyolo Yotham; Yotham ke nyolo Ahaz; Ahaz ke nyolo Hezekia;
- ¹⁰Hezekia ke nyolo Manase; Manase ke nyolo Amon; Amon ke nyolo Yosia;
- ¹¹Yosia ke nyolo Yekonia ku utumin mire nindo ma gidak Babeli.
- ¹²Yo ng'ei dak ma Babeli Yekonia nyolo Cealtiel; Cealtiel ke nyolo Zerubabel;
- ¹³Zerubabel ke nyolo Abihud; Abihud ke nyolo Eliakim; Eliakim ke nyolo Azor;
- ¹⁴Azor ke nyolo Sadok; Sadok ke nyolo Ahim; Ahim ke nyolo Eliud;
- ¹⁵Eliud ke nyolo Eleazar; Eleazar ke nyolo Matan; Matan ke nyolo Yakobo;
- ¹⁶Yakobo ke nyolo Yusuf ma cwar Mariamu, m'unyolo Yesu, ma julwong'o Kristu.
- ¹⁷Kum kumeno thekwaru ceke m'ugambre kum Ibrahim utundo kum Daudi gi thekwaru apar wi ang'wen; m'ugambre de kum Daudi utundo kum dak ma Babeli de gi thekwaru apar wi ang'wen; m'ugambre kum dak ma Babeli de utundo kum Kristu gi thekwaru apar wi ang'wen.
- ¹⁸Nwang'u nyol pa Yesu Kristu bedo kumae; Kinde ma min mire ma Mariamu Yusuf umaku benyome, ka fodi gibino karacelo ngo junwang'u egamu ic ku Tipo Maleng'.

¹⁹Yusuf de ma cware, kum en e ng'atu ma pwe, eyenyo ngo nia enyai lewic i wie i wang' dhanu, e ie pido ya ekethe cen ling'.

²⁰Ento ka ie pido kum lembe maeni, nen, malaika pa Rwoth uwok i bang'e ku wang' lek ewacu kumae, Yusuf, i wod Daudi, lworokud unegi nigamu Mariamu ma dhaku peri i beng'i: kum maeno m'egamu i ie en e pa Tipo Maleng'.

²¹Man ebinyolo nyathin ma nico; e ibilwong'o nyinge Yesu; kum en e ng'atu ma bilaru dhanu pare kud i dubo migi.

²²Nie maeni ceke timbre, kara lembe ma yang' Rwoth uyero ku dhu jubila timbre kakare, m'uwacu kumae,

²³Nen, nyaku ma sumba ma ng'won bibedo ku ic, man ebinyolo nyathin ma nico, Man gibilwong'o nyinge Imanuel; thelebene, ka juloke, Mungu wakugi.

²⁴Yusuf uai ku wang' nindo pare, etimo de calu malaika pa Rwoth ung'olo ire, e egamu cege gire;

²⁵man eng'eye ngo ma fodi k'enyolo nyathin ma nico ngo: man elwong'o nyinge Yesu.

Matayo 2

¹Nie kinde ma junyolo Yesu i Bethlehem mi Yahudi i ceng' p'ubimo ma Herode, nen, Jurieko m'uai yo nyangu gibino Yerusalem giwacu kumae,

²Ng'atu ma junyolo ni Ubimo mi Juyahudi e, eni kani? kum waneno cero pare yo nyangu, wabino de nirwo ire.

³E ka Herode m'ubimo winjo maeni, cwinye ng'abre, en ku Yerusalem ceke bende.

⁴E kan ecoko julam ma dongo ceke karacelo ku jugorcik mi dhanu bende, epenjogi pi ka ma jubinyolo ie Kristu.

⁵E giwacu ire kumae, I Bethlehem mi Yahudi: kum egore kumeno ni kum jubila,

⁶In i Bethlehem, ng'om pa Yuda, In i nok ki ngo i kind juker pa Yuda: Kum jabim biai i beng'i, M'ebibedo jakwac mi dhanu para Israel.

⁷Herode lund ulwong'o Jurieko nyalwe man epenjogi cu pi kanindo ma cero wok i ie.

⁸Man eorogi Bethlehem, ewacu kumae, Wuci wuyeny cu pi nyathin ma nok; ka wunwang'e de, wukel lembene ira, kara an bende abin arwo i bang'e.

⁹E gin, ka gidaru winjo lem p'ubimo, gicidho migi; man nen, cero, ma gineno yo nyangu, ucidho i wang'gi, maram ebino ecungo ko ka wi nyathin ma nok.

¹⁰E ka gineno cerone, anyong'a negogi ku mutoro ma dit apila.

¹¹E gibino i ot man gineno nyathin ma nok ku Mariamu ma min mire; e gipodho piny girwo ire; man gigonyo piny migi m'akana githiero ire giramia, mola ma kwar kud udok ma ng'wice ng'ar man mo ma ng'wice ng'ar.

¹²E ka Mungu poyogi ku wang' lek ya ku gidok ba Herode, giai gidok thugi ku yo ku mange.

¹³Nie ka gidaru ai, nen, malaika pa Rwoth uwok ba Yusuf ku wang' lek, ewacu kumae, Ai malu iting' nyathin ma nok ku min mire, man iring i Misiri, ibed kuca de ka fok'ayero iri ngo: kum Herode biyeny nyathin ma nok maeno enyotho.

¹⁴Man eai malu eting'o nyathin ma nok de ku min mire ku diwor, eciho de i Misiri;

¹⁵man ebedo kuca rama Herode tho ko: kara gin ma yang' Rwoth uwacu ku dhu jubila timbre kakare, m'uwacu kumae, Alwong'o woda kud i Misiri.

¹⁶Ka Herode lund uneno nia Jurieko gicaye, kwinyo ma apila nege, man eoro dhanu uciho uneg nyithindho ma co ceke ma gini i Bethlehem, cil ku m'i kieune ceke, ma oro migi ario ku ma fodi de, calu kanindo m'epenjo cu ba Jurieko.

¹⁷E maeno lund utimbre kakare m'uyere ni kum Yeremia ma jabila m'uwacu kumae,

¹⁸Dwal uwinjre i Rama, Ywak ku can ma dit, Rahel m'ubeywagu nyithindhe; Ekwero juk de, kum gimbe.

¹⁹Ento ka Herode tho, nen, malaika pa Rwoth uwok ku wang' lek ba Yusuf i Misiri, m'uwacu kumae,

²⁰Ai malu iting' nyathin ma nok ku min mire de, man idok i ng'om Israel: kum ju m'uyeny gineg nyathin ma nok githo.

²¹E eai malu eting'o nyathin ma nok ku min mire de, man ebino i ng'om Israel.

²²Ento kan ewinjo nia Arkelao bebimo wi Yahudi ka Herode ma won mire, lworo make nidok kuca; e en ma Mungu poye ku wang' lek, edong' eciho i ng'et Galilaya,

²³man ebino ebedo i adhura ma julwong'o Nazareti; kara gin m'uyere ku dhu jubila timbre kakare, nia jubilwong'e Janazareti.

Matayo 3

¹Man ceng' maeno Yohana ma Jabaputisi bino, ku yero i yamba mi Yahudi, ewacu kumae,

²Wulok cwinywu; kum ker mi polo ni ceng'ni.

³Kum maeni en e ng'atu ma Isaya ma jabila yero pire ewacu kumae, Dwand ng'atu acel m'ukok akoka i yamba, Wuyik yo pa Rwoth, Wudwok yo pare atira.

⁴Nwang'u Yohanane bedo ku kendi pare mi yuk ngamia, ku del mir adila i piere; cemo pare de en e bonyo ku kic m'i thim.

⁵E dhanu mi Yerusalem, ku mi Yahudi ngung', ku mi ng'om ceke ma ng'et Yordan gilund gicidho i bang'e;

⁶gimaku baputisi de i bang'e i kulo Yordan, ma gituco ko lemdubo migi de.

⁷Ento kan eneno dupa mi Jufarisayo ku Jusadukayo de gibebino ba baputisi pare, ewacu igi kumae, Wu nyikwai thwol, ng'a m'upoyowu nipiei ni kwinyo ma bibino?

⁸Ka kumeno wuceg nyingwu m'uromo ku lokocwiny:

⁹man iwu kud upid nia wuwac i iwu giwu kumae, Wabedo kud Ibrahim ni wegwa: kum awacu iwu, nia Mungu copo ting'o nyithindho ni Ibrahim ku kidi maeni.

¹⁰Meni cil kawono lei uvuto ther ulag yen: ka kumeno ku ba yen ceke m'ucego nyinge ma ber ungo jung'ole piny, jubole de i mac.

¹¹Amio iwu baputisi i pi mi lokocwiny: ento ng'atu m'ulubo ng'eya ebeto ku tego ma sagu an, ma wara pare aromo ngo ya ayei: ebimio baputisi iwu i Tipo Maleng' i mac bende:

¹²udheru pare ni i cinge, man e bililo laru pare mii; man ebicoko nganu pare i dero, ento ebiwang'u cunge ku mac ma negre ngo.

¹³Yesu lund uai Galilaya ebino Yordan ba Yohana, nimaku baputisi i bang'e.

¹⁴Ento Yohana yenyo ecere, ewacu kumae, An e ma can baputisi m'amak i beng'i nega, e idong' ibino i bang'a?

¹⁵Ento Yesu loko lembe ewacu ire kumae, Yi maeni kawono: kum emaku piny iwa kumeno ya waketh bedopwe ceke timbre kakare. E elund eyie.

¹⁶Yesu de, kan emaku baputisi, eai malu tho kud i pi: nen, polo yabre ire, man eneno Tipo Mungu beloro calu akuru, ebino de i wie;

¹⁷man nen, dwal uai i polo, uwacu kumae, Meni Woda ma jamerna, ma mutoro nega i kume.

Matayo 4

¹Tipo lund utelo wi Yesu malu i yamba kara wonabali mul ie.

²E kan eweko cam ceng' pier ang'wen ku diwor de, yo ku ng'eye kec unege.

³Man jaidhe bino ewacu ire de kumae, Tek in i Wod Mungu, ng'ol nia kidi maeni dok ni kwen.

⁴Ento eloko lembe ewacu kumae, Egore kumae, Dhanu bibedo ni kum kwen kende ngo, ento ku lembe ceke m'uai dhu Mungu.

- ⁵Wonabali lund utere i adhura ma leng'; ekethe de wi usimbru hekalu,
- ⁶man ewacu ire kumae, Tek in i Wod Mungu, redhri piny: kum egore kumae, Ebing'olo ni malaika pare piri: man, Gibitheng'i malu i cing'gi, Kara tiendi kud ucwanjre kum kidi.
- ⁷Yesu wacu ire kumae, Egore kendo kumae, Kud imul i Rwoth Mungu peri.
- ⁸Kendo, wonabali tere malu wi got ma wiu hai, man enyutho ire ker ceke m'i ng'om, ku dwong'ne de;
- ⁹man ewacu ire kumae, Gin maeni ceke abimio iri, tek ibipodho piny irwo de i bang'a.
- ¹⁰Yesu lund uwacu ire kumae, Ai kakeni, Jok: kum egore kumae, Rwo ni Rwoth Mungu peri, man itim ire kende.
- ¹¹Wonabali lund uweke; man nen, malaika gibino gitimo ire.
- ¹²Nwang'u kan ewinjo nia jumaku Yohana, eai ecihho Galilaya;
- ¹³e kan eai Nazareti, ebino ebeto de Kapernaum, ma ni dhu nam, i kieu Zabulon ku Naftalim:
- ¹⁴kara lembe ma yang' Isaya ma jabila yero timbre kakare, m'ewacu kumae,
- ¹⁵Ng'om Zabulon ku ng'om Naftalim, Yo ba nam, loka Yordan, Galilaya mi Thekdhanumange.
- ¹⁶Dhanu m'ubedo i mudho Gineno der ma dit, Man ni ju m'ubedo i ng'om ku tipo mi tho, Der udhenjre igi.
- ¹⁷Ugambre i nindo maeno Yesu kwong'o yero, man ewacu kumae Wulok cwinywu; kum ker mi polo ni ceng'ni.
- ¹⁸E kan ebewotho dhu nam Galilaya, eneno utumego ario, Simon ma julwong'o Petro, kud Andrea m'umin mire, m'ubebolo voi i nam; kum gi junam.
- ¹⁹Man ewacu igi kumae, Wulub ng'eya, abidwokowu ni junam mi dhanu.
- ²⁰E giweko voi ndhu ndhu nica, man gilube.
- ²¹E kan eai kakeca ecihho eneno utumego ario mange, Yakobo ma wod Zebedayo, ku Yohana m'umin mire, gini i yei ku Zebedayo ma weggi, gibeyiko voi migi; e elwong'ogi.
- ²²E ndhu ndhu nica giweko yei ku weggi de, man gilubo ng'eye.
- ²³E Yesu cidho i Galilaya ceke ndri ndri, ku ponjo i kacokri migi, ku yero lembanyong'a mi ker de, man ku keyo tho ceke m'unyang' i kum ma kwonde tung' tung' ku tho mange ceke ma kwonde tung' tung' m'i kind dhanu.

²⁴E pire yik cil i Cami ceke: man gikelo dhanu ma kumgi lith ceke i bang'e, m'ubedo ku tho m'unyang' i kum ma kwonde tung' tung' ku gin ma sendojo, ku weg pajogi, ku weg thimbu de, ku ju m'ubedo ku tho ma nego kum nding'; man ekeyo kumgi.

²⁵E udul dhanu ma dit gilubo ng'eye ma giai Galilaya man Dekapoli ku Yerusalem man Yahudi ku ma loka Yordan bende.

Matayo 5

¹E kan eneno udul dhanu, eidho malu wi got: kan ebedo piny de, julubne gibino i bang'e:

²ealu dhoge eponjogi de, ewacu kumae:

³Mugisa ni jucan mi tipo: kum ker m'i polo en e migi.

⁴Mugisa ni ju ma can unegogi: kum gibijukri.

⁵Mugisa ni ju m'ubedo mol: kum ng'om bidoko aba migi.

⁶Mugisa ni ju ma kec ku rieu de benegogi kum bedopwe: kum gibiyeng'.

⁷Mugisa ni ju ma kisa negogi: kum gihinwang'u kisa.

⁸Mugisa ni ju ma adundegi leng': kum gihineno Mungu.

⁹Mugisa ni ju ma thego juwagi: kum jubilwong'ogi wot Mungu.

¹⁰Mugisa ni ju ma junyayu ragedo i kumgi kum bedopwe: kum ker m'i polo en e migi.

¹¹Mugisa iwu ka dhanu bicayuwu, man gibinyayu ragedo i kumwu, man gibiyero gin ma rac ma kwonde tung' tung' i kumwu ma en e ndra, ni kuma.

¹²Anyong'a negwu, ku mutoro ma dit de: kum sukulia mu e dit i polo: kum ginyayu ragedo kum jubila m'ular uwok iwu bende.

¹³Wun wu kadu m'i ng'om: ento tek kadu midone rwinyo, jubidwoko midone kud ang'o? e ber ungo kendo pi gin moko, ento pir aoya re junyone de ku tielo.

¹⁴Wun wu der m'i ng'om. Adhura ma juketho wi ungulu got pandre ngo.

¹⁵Kadok thala jucwinyo ngo, ma nia jukethe the katoko, ento wi there re; erieny de ni dhanu ceke ma ni i ot.

¹⁶Cil kumeno wek der mu urieny i wang' dhanu; kara ginen tic mu ma ber, giyung Wegwu de ma ni i polo.

¹⁷Kud wuwac nia nyo abino nyotho cik anyooha kadi jubila: abino nyotho anyooha ngo, endre niketho etimbre kakare.

¹⁸Kum awacu iwu andha kumae, Cil ma polo ku ng'om ukadhu woko, nyiguta acel kadi ng'et nyiguta acel de bikadhu woko ki ngo kud i cik, ma fodi gin ceke kutimbre kakare ngo.

¹⁹Ka kumeno ng'atu ma tek bikadhu ku wi cik acel ma nyathigi maeni, ebiponjo dhanu de kumeca, jubilwong'e nyathigi i ker m'i polo: ento ng'atu ma tek bitimo man ebiponjogi de, jubilwong'e dwong' i ker m'i polo.

²⁰Kum awacu iwu, nia tek bedopwe mu sagu mi jugorcik ku Jufarisayo de ngo, wubimondo i ker m'i polo tak de ngo.

²¹Wuwinjo nia ewacre ni ju ma con kumae, Kud ineg nek; man ng'atu ma tek binego nek ebibedo ceng'ni lembapoka:

²²ento awacu iwu, nia ku ba dhanu nzu ng'atu ma tek ng'ecwiny binege kum umin ma there mbe ebibedo ceng'ni lembapoka; man ng'atu ma tek biwacu ni umin mire kumae, Raka, thelebene kumae, In ma kiti mbe e, ebibedo ceng'ni dilo; man ng'atu ma tek biwacu kumae, In i jakasegu, ebibedo ceng'ni gehena mi mac.

²³Ka kumeno tek ibethiero giramia peri dhu pemblam, ipoi kakeca nia lembe moko ni i umeru i kumi,

²⁴wek giramia peri keca wang' pemblam, icidhi, wular wupot kindwu wukud umeru, e kan ilund ibin ithier giramia peri.

²⁵Rip kindwu ku jamon peri tho, kinde ma wuni kude i gengi; kara jamon peri kud umii ni japoklembe, japoklembe de mii ni asikari, man juboli i odkol.

²⁶Andha awacu iri kumae, Ibiai keca ki ngo, ma fodi k'iculo wang' sente kubang'e pet ungo.

²⁷Wuwinjo nia yang' ewacre kumae, Kud igier gier:

²⁸endre awacu iwu, nia ku ba dhanu nzu m'uneno dhaku kud awanya ma rac i kume nwang'u edaru giero gier kude ku yo i adunde.

²⁹Man tek weng'i ma yor acwic uketho ikier, wodhe woko, baye cen kud i kumi: kum en e kuloka iri nia wathkumi acel urwiny, man kumi dho re ma ku jubol i gehena.

³⁰Man tek cingi ma yor acwic uketho ikier, thume woko, baye cen de kud i kumi: kum en e kuloka iri nia wathkumi acel urwiny, kumi dho re ma ku jubol i gehena.

³¹E ewacre bende kumae, Ng'atu ma tek biriemo cege, wek emi ire waraga mi riem:

³²ento awacu iwu, nia ku ba dhanu nzu m'uriemo cege, ma k'erieme kum tarwang' ungo, nwang'u edwoke ni won gier: man ng'atu ma tek bidong' gome ma jukojurieme woko ca nwang'u egiero gier.

³³Kendo, wuwinjo nia yang' ewacre ni dhanu ma con kumae, Kud ikwongri, ento itim kwong' peri ni Rwoth:

³⁴ento awacu iwu kumae, Kud ikwong' kwong' ki; kadi ku polo, kum en e komker pa Mungu;

³⁵kadi ku ng'om, kum en e kom mi tiende; kadok Yerusalem, kum en e adhura p'Ubimo ma dwong'.

³⁶Kadok ku wii de kud ikwong' kwong', kum icopo ketho yukwii acel udok tar kadi col de ngo.

³⁷Ento wek wec mu bed kumae, Eyo, eyo; Ungo, ungo; man gin m'usagu maeni nwang'u en e pa ng'atu ma rac.

³⁸Wuwinjo nia yang' ewacre kumae, Wang' ndhu ku wang', lak ke ndhu ku lak;

³⁹ento awacu iwu kumae, Kud wudhunj ni ng'atu ma rac: ento ng'atu ma tek upadu thengi ma yor acwic, lok ire ma yo kucel bende.

⁴⁰Man tek ng'atu moko yenyo eredh titi i wii, man ewodh simisi peri, wek ire jabia peri bende.

⁴¹Man ng'atu ma tek bicweli ya wucidh wukude ungolo acel, dong' wucidh wukude ungolo ario.

⁴²Mi ni ng'atu m'ukwayu i beng'i, man, kud ilok ng'ei ni ng'atu m'uyenyo banja i beng'i.

⁴³Wuwinjo nia yang' ewacre kumae, Mar wedu, dag jadegini:

⁴⁴endre awacu iwu kumae, Wumar judegiwu, wurwo de pi ju m'unyayu ragedo i kumwu;

⁴⁵kara wubed wot Wegwu ma ni i polo: kum eketho ceng' pare dongo wi judubo ku jubero bende, man ekonjo koth wi ju ma pwe ku wi ju ma pwe ngo bende.

⁴⁶Kum tek wumaru ju m'umaruwu, sukulia mu ang'o? cil weg ajok gitimo kumeno ngo?

⁴⁷Man tek wumotho juwedwu kendgi, nwang'u wutimo ang'o ma sagu jumange? cil Thekdhanumange gitimo kumeno ngo?

⁴⁸Ka kumeno wubed ndhu cu, calu Wegwu ma ni i polo bedo ndhu cu.

Matayo 6

¹Wukuru ya kud wutim bedopwe mu i wang' dhanu, kara ginengi: tek kumeno sukulia mu mbe ba Wegwu ma ni i polo.

²Ka kumeno kinde m'imio giramia kud ikudh agwara i weng'i, calu weg ambili timo i kacokri kud i gengi de, kara ginwang' dwong' ba dhanu. Awacu iwu andha kumae, Gidaru maku sukulia migi.

- ³Ento kan imio giramia, kud iwek cingi ma yor acam ung'ei gin ma cingi ma yor acwic ubetimo:
- ⁴kara mic m'imio bed nyaling': man Wuru m'uneno ku ka ma nyaling' ebimio sukulia iri.
- ⁵Man ka wurwo kud wubed calu weg ambili: kum gimaru rwo ma gicungo ko i kacokri ku i akarayo de, kara dhanu nengi. Awacu iwu andha kumae, Gidaru maku sukulia migi.
- ⁶Ento in, kan irwo, mond i kusika peri, e kan iciko dhugola i wii, irwo ni Wuru ma eni i ka ma nyalwe, Wuru de m'uneno ku ka ma nyalwe ebimio sukulia iri.
- ⁷Kan iberwo de kud iyer lembe acel wang' udul kpa mananu, calu Thekdhanumange timo: kum giwacu nyo dwandgi biwinjre kum wec migi ma dit.
- ⁸Ka kumeno kud wubed calu jono: kum Wegwu ng'eyo gin ma cande benegowu, ma fodi wukupenje ngo.
- ⁹Ka kumeno wurwo kumae, Wegwa ma ni i polo, Nyingi bed leng'.
- ¹⁰Ker peri bin, Yeny m'iyenyo utimbre i ng'om calu etimbre i polo.
- ¹¹Mi iwa tin kwen mwa ma ku ba rupiny.
- ¹²Wek iwa banja mwa, calu wan bende waweko mi jubanja mwa.
- ¹³Kud iterwa i abidhe ento ilarwa ni ng'atu ma rac.
- ¹⁴Kum tek wuweko kier mi dhanu, Wegwu ma ni i polo biweko mu bende.
- ¹⁵Ento tek wuweko kier mi dhanu ngo, kadok Wegwu de biweko kier mu ngo.
- ¹⁶Mange ke ka wuweko cam, kud wubed, calu dhanu ma weg ambili, ku weng'wu mi can: kum giranju wang'gi, kara dhanu ginen nia giweko cam. Andha awacu iwu kumae, Gidaru maku sukulia migi.
- ¹⁷Ento in, kan iweko cam, wir wi, man ilog weng'i;
- ¹⁸kara wekocam peri kud unen ni dhanu, ento ni Wuru ma ni i ka ma nyalwe: e Wuru, m'uneno ku ka ma nyalwe, ebimio sukulia iri.
- ¹⁹Kud wukan piny m'akana mu i ng'om, ka m'ukoko ku munyali de gicamu i ie, ka ma jukwo gituro i ie gikwalu ko:
- ²⁰ento wukan piny m'akana mu i polo ka m'ukoko kadi munyali de gicamu i ie ngo, ka ma jukwo de gituro i ie ngo kadi gikwalu de ngo:
- ²¹kum ka ma piny peri m'akana ni i ie, adundeni bende bibedo keca.
- ²²Thala mi kum en e nyingwang': ka kumeno tek nying weng'i cungo acel, kumi ceke bicare ku der.

- ²³Ento tek nying weng'i bedo rac, kumi ceke bicido ku mudho. Ka kumeno tek der ma ni ii bedo mudho, meca mudho sagre dit apila!
- ²⁴Ng'atu moko mbe ma copo timo ni judongo ario: kum ebidagu acel, ebidong' maru mucelo; kadi ebimoko bang' acel, man ebicayu mucelo. Wucopo timo ni Mungu ku ni lonyo de ngo.
- ²⁵Ka kumeno awacu iwu kumae, Cwinywu kud uring pi kwo mu, nia girang'o ma wubicamu, kadi girang'o ma wubimadhu; kadok pi kumwu, nia girang'o ma wubikendo. Kwo sagu cam ungo, kum de sagu kendi ngo?
- ²⁶Wunen winyo m'i lietho, ya gicoyo ngo, kadok akaya de gikayu ngo, gicoko i dero de ngo; e Wegwu ma ni i polo kakugi ku cam. Wun wusagugi hai ngo?
- ²⁷Ng'a ma i kindwu de ma tek cwinye ringo copo medo bot acel ni kadongo pare?
- ²⁸Cwinywu beringo nedi kum kendi? Dong' iwu pid pi thiuboko m'i thim, maram gidongo ko; gitimo tic ungo, kadok acwia de gicwio ngo:
- ²⁹ento awacu iwu, nia cil Suleman i dwong' pare ceke eronjre calkud alcel mi maeni de ngo.
- ³⁰Ento tek Mungu ronyo lum m'i thim kumeno, ma nuti tin, man urwo de jubaye i mac, e ebironyowu ma sagu dit ungo, E wun ma jioyic mu noki?
- ³¹Ka kumeno cwinywu kud uringi, ma nia wuwac kumae, Wabicamu ang'o? kadi, Wabimadhu ang'o? kadi, Jubironyowa kud ang'o?
- ³²Kum gin maeni ceke Thekdhanumange giyenyo; kum Wegwu ma ni i polo ng'eyo nia can gin maeni ceke benegowu.
- ³³Ento ma kwong'a wuyeny ker pare, ku bedopwe pare; man gin maeni ceke bimedre iwu.
- ³⁴Ka kumeno cwinywu kud uring pir urwo: kum urwo biringo ku cwinye gire. Dubo ma tin uromo ku tin.

Matayo 7

- ¹Kud wupok lembe, kara ku jupok lembe mu.
- ²Kum ku lembapoka ma wupoko, jubipoko ko lembe mu: man ku mukero ma wuporo ko, jubiporo ko iwu bende.
- ³Man ineno nyathi ng'ili m'i wang' umeru nedi, endre ii pido pi riu ma ni i weng'i giri ngo?
- ⁴Kadi ibiwacu nenedi ni umeru kumae, Wek akab ng'ili woko kud i weng'i; man nen, riu ni i weng'i ini?
- ⁵In i won ambili, ilar ikab riu kud i weng'i in; e ibilund neno cu nikabu ng'iline kud i wang' umeru.

⁶Gin ma leng' kud wumi ni gwogi, kadok tigo mu de kud wubai wang' kul, gimaru nyonogi the tiendgi, man gilokri giyecowu.

⁷Wukwai, man ebimire iwu; wuyeny, e wubinwang'u; wudwong', e ebiyabre iwu:

⁸kum ku ba dhanu ma kwayu enwang'u; man ng'atu ma yenyo enyudo; ng'atu ma dwong'o de ebiyabre ire.

⁹Kadi ng'atu ma kani m'i kindwu, ma, tek wode bikwaye ku lungu kwen, ebimio ire kidi:

¹⁰kadi tek ekwaye ku rec, ebimio ire thwoli?

¹¹Ka kumeno tek wun, ma wu rac, wung'eyo mio giramia ma ber ni nyithindho mu, Wegwu ma ni i polo bimio gin ma ber ma sagu ngo ni ju m'ukwaye?

¹²Ka kumeno gin ceke ma tek wuyenyo ya dhanu gitim iwu, e wun wutim igi kumeca: kum maeni en e cik ku jabila.

¹³Wumond ku dhugang' ma diny: kum dhugang' ubedo lac, yo de bedo her, ma tundo kanyoth, gi dupa de ma gimondo i ie kud i yoje.

¹⁴Kum dhugang' ubedo diny, yo de bedo likili, ma tundo i kwo, ju ma lam de e ma ginwang'e.

¹⁵Wukuru ni jubila mi ndra, m'ubino i beng'wu ku kendi mi rombe, ento ku yor i igi gin urndi m'uwor.

¹⁶Wubing'eyogi ku nying'gi. Dhanu gipono nying ulok ku kum ukudho, kadi nying ulam de kum ucoki?

¹⁷Kumeno ku ba yen ceke ma ber ecego nyinge ma ber; ento yen ma rac ecego nyinge ma rac.

¹⁸Yen ma ber copo cego nyinge ma rac ungo, kadok yen ma rac de copo cego nyinge ma ber ungo.

¹⁹Ku ba yen ceke ma cego nyinge ma ber ungo jung'ole piny, jubole de i mac.

²⁰Ka kumeno wubing'eyogi ni nying'gi.

²¹Ku ba dhanu nzu ma giwacu ira kumae, Rwoth, Rwoth, gibimondo i ker m'i polo ngo; ento ng'atu m'utimo yeny ma Vwa ma i polo yenyo re.

²²Dupa biwacu ira i ceng' maeca kumae, Rwoth, Rwoth, waewo ku nyingi ngo, wawodho pajogi de ngo ku nyingi, man ke tic ma tek de dupa watimo ku nyingi ngo?

²³E abilund tuco igi kumae, Fodi ang'eyowu ki ngo: wuai kud i vuta, wu ju m'utimo camuco.

²⁴Ka kumeno ku ba dhanu ceke m'uwinjo lem para maeni, etimogi de, jubipore ku jarieko, m'ugomo ot pare wi cana:

²⁵koth de cwi, pi ma dit de coro ng'om, yamu de koto, e gidhongo ot maeno; ento epodho ngo: kum jugome wi cana.

²⁶Man ku ba dhanu ceke m'uwinjo lem para maeni, etimogi de ngo, jubipore ku jakasegu, m'ugomo ot pare wi kwio:

²⁷koth de cwi, pi de coro ng'om, yamu de koto, man gidhongo ot maeno; e erungre: rungrene de e dit.

²⁸Man etimbre ka Yesu daru lembe maeni, i udul dhanu wang' lii kum ponji pare:

²⁹kum eponjogi calu ng'atu m'ubedo ku ng'ol, calu jugorcik migi de ngo.

Matayo 8

¹E kan eai wi got eloro piny, udul dhanu ma dit gilubo ng'eye.

²Man nen, ng'atu ma won joi ubino i bang'e, erwo ire de, ewacu kumae, Rwoth, tek iyenyo, icopo dwoka leng'.

³Man erieyo cinge, emulo ko kume, ewacu kumae, Ayenyo; dong' kumi dok leng'. E eni eni joi pare lony.

⁴Man Yesu wacu ire kumae, Nen kud iyer ni ng'atu moko ki; ento cidhi, nyuthri ni julam, iwodh giramia de ma Musa ng'olo, ni lembatuca igi.

⁵E ka Yesu mondo i Kapernaum, jego acel ubino i bang'e, ekwaye,

⁶ewacu kumae, Rwoth, jatic para vuto i ot ku tho ma nego kum dhanu nding', man esende dit.

⁷Ewacu ire kumae, Abibino abikeyo kume de.

⁸Man jego loko lembe ire kumae, Rwoth, aromo ngo ya imond i ot para; ento dong' iwac lembe kende ci, e kum jatic para bikei.

⁹Kum an bende an a ng'atu ma the ng'ol, man asikari de anuti kudo i tienda: e awacu ni ng'atu maeni kumae, Cidhi, e ecidho; man ni mange kumae, Bin, e ebino; man ni jamiru para kumae, Tim mae, e etimo.

¹⁰E ka Yesu winjo maeni, ie wang' lii, ewacu de ni ju m'ulubo ng'eye kumae, Awacu iwu andha kumae, Fodi anwang'u yioyic ma rokeni ngi ngo, ungo, i Israel de ngo.

¹¹Man awacu iwu, nia dupa biai yo nyangu ku yo reto bende, man gibibedo piny gikud Ibrahimgi, man Isak, ku Yakobo, i ker m'i polo:

¹²ento wot mi ker jubibayu cen i mudho ma woko: ywak ku kayu lak de bibedo nuti.

¹³Man Yesu wacu ni jego kumae, Cidhi; dong' etimbre iri, calu iyio. E kum jatic de kei i saa nica.

- 14**Man ka Yesu mondo i ot pa Petro, eneno dhamaru Petro vuto ku tho ma cego kum.
- 15**Egam emulo cinge, e cekum uweke; man eai malu, etimo ire de.
- 16**E ka piny udoko uthieno, gikelo weg pajogi dupa i bang'e: man ewodho pajogi woko ku lembe acel, ekeyo kum weg tho de ceke:
- 17**kara lembe ma yang' Isaya ma jabila yero timbre kakare, m'ewacu kumae, Eting'o mulima mwa en, man ecoko tho mwa i kume.
- 18**Nie ka Yesu neno udul dhanu ma dit utieke, e eng'olo nia giai gici lokaca.
- 19**E jagorcik moko bino, ewacu ire de kumae, Japonji, abilubo ng'ei ka ma tek icidho i ie ceke.
- 20**E Yesu wacu ire kumae, Kaki bedo ku odng'om, winyo ma kor polo de gibedo ku odgi; ento Wod dhanu bedo ku kamoko ngo m'ejeng ie wie.
- 21**Mange ma kind julubne wacu ire kumae, Rwoth, wek alar aci yik vwa.
- 22**Ento Yesu wacu ire kumae, Lub ng'eya; wek ju m'utho giyik ju m'utho migi gigi.
- 23**E kan eidho i yei, julubne gilubo ng'eye.
- 24**Man nen, wavuvu ma dit utuk i nam, m'uketho mukura umo yei: ento en ebenindo.
- 25**Man gibino i bang'e, gicewe de, giwacu kumae, Bodhwa, Rwoth; waberwinyo.
- 26**Man ewacu igi kumae, Lworo benegowu nedi, wun ma wunok i yioyici? Elund eai malu, man ejuko yamu ku nam; e piny ucungo ndhu ti.
- 27**Dhanu de igi wang' lii, giwacu kumae, Ng'atuni e dhanu manedi, ma cil yamu ku nam de giwore e?
- 28**E kan ewok lokaca i ng'om mi Jugadareni, weg pajogi ario girombo gikugi, ma giai kud i odliel, gi ngoi dit, ketho ng'atu moko mbe ma copo kadhu kud i yojuno.
- 29**Man nen, gikok akoka, giwacu kumae, Wabedo kud ang'o wakudu, in i Wod Mungu? ibino kuni nisendowa ma fodi kanindone kutundo ngo?
- 30**Nwang'u ku bor cen kud i kumgi udul kul dupa gibecamu.
- 31**Pajogi de gikwaye, giwacu kumae, Tek iwodhowa woko, orwa cen i udul kul.
- 32**Ewacu igi de kumae, Wucidhi. E giai woko, gimondo de i kul: man nen, udul bo konjri piny ku ka ma lung' i nam, man githung' i pi.
- 33**E ju m'ukwayugi giringo, gicidho i adhura, giyero lembe ceke de, ku gin m'uwok i kum weg pajogi de.
- 34**Man nen, dhanu ceke ma i adhura gibino rombo ku Yesu: ka ginene de, gikwaye ya eai kud i kieu migi.

Matayo 9

- ¹Man emondo i yei, ekadhu ko lokani, ebino de i adhura ma thugi ma dhe.
- ²Man nen, gikelo ng'atu ma won tho ma nego kum nding' i bang'e, m'evuto wi kavuto: e Yesu m'uneno yioyic migi ewacu ni won tho ma nego kum nding' kumae, Wodo, cwinyi bed tek: dubo peri wekre woko.
- ³Man nen, jugorcik moko giwacu kud i igi kumae, Ng'atuni yanyu Mungu.
- ⁴E Yesu m'ung'eyo pidoic migi ewacu kumae, Adundewu bepido gin ma rac nedo?
- ⁵Kum makani ma yot ma sagu, wacu kumae, Dubo peri wekre woko; kadi wacu kumae, Ai malu, iwothi?
- ⁶Ento kara wung'ei nia Wod dhanu bedo ku ng'ol wi ng'om m'eweko ko dubo woko (elund ewacu ni won tho ma nego kum nding' kumae), Ai malu, ting' kavuto peri, ici ba ot peri.
- ⁷Man eai malu, ecidho ba ot pare de.
- ⁸Ento kan udul dhanu gineno maeni, lworu makugi, e giyungo Mungu, ma mio ng'ol ma kumeni ni dhanu.
- ⁹Man ka Yesu bekadhu ku kakeca, eneno ng'atu acel, ma nyinge Matayo, m'ubedo ka ma jujoko ie ajok: ewacu ire de kumae, Lub ng'eya. E eai malu, elubo ng'eye.
- ¹⁰Etimbre de, kinde m'ebedo dhu cam i ot, nen, weg ajok ku judubo de dupa gibino gibedo piny giku Yesugi man julubne.
- ¹¹E ka Jufarisayo gineno maeni, giwacu ni julubne kumae, Japonji mu ke gibecamu giku weg ajok ku judubo de nedo?
- ¹²Ento kan ewinjo maeni, ewacu kumae, Ju ma kumgi leng' can jakeikum negogi ngo, ento ju ma kumgi lith re.
- ¹³Ento wucidh wung'ei ka thelembe nini, ayenyo kisa, lam re ngo: kum abino lwong'o weg bedopwe ngo, endre judubo.
- ¹⁴Julub Yohana gilund gibino i bang'e, giwacu kumae, Nedi waku Jufarisayo waweko cam wang' udul, ento julubni giwoko cam ungo?
- ¹⁵Yesu wacu igi kumae, Juwagi won ambadha can copo negogi, ma fodi ginuti giku won ambadhagi? ento ceng' biwok, ka jubikabu won ambadha woko kud i bang'gi, ka gibilund weko cam.
- ¹⁶Ng'atu moko mbe de ma ketho kurembo bongu ma nyen wang' kendi m'uti; kum maeno ma juketho ya eum wang'e, eyeco kendi, wang'e de doko rac ma sagu.

- 17**Kadi dhanu de mbe ma piko pigulok ma nyen i usaupigulok m'uti: tek gipiko usaupigulok yec, man pigulok oi, usau de nyothie: ento gipiko pigulok ma nyasa i usaupigulok ma nyen, e gin ario gibedo bo.
- 18**E kinde m'eyero gin maeni igi, nen, jabim moko bino, erwo de i bang'e, ewacu kumae, Kawono nyara en e avu: ento ibin iketh cingi i kume, man ebibedo kwo.
- 19**E Yesu ai malu, man elubo ng'eye, giku julubne.
- 20**Man nen, dhaku, ma rimo pare cwir udoko rundi apar wi ario, ebino yor i ng'eye, emulo dhu kendi pare de:
- 21**kum ewacu kumae yor i ie, Tek amulo kendi pare kende ci, e kuma bikei.
- 22**Ento Yesu lokre enene de man ewacu kumae, Nyara, cwinyi bed tek; yioyic peri bodhi. E dhaku both ndhu ugambre i saa nica.
- 23**E ka Yesu bino i ot pa jabim, eneno ju m'ukudho bilo, ku njuru dhanu m'ubeyakni,
- 24**ewacu kumae, wudok cen: kum nyaku tho ngo, ento enindo aninda. E gidong' ging'iere hai.
- 25**Ento ka julalu njuru dhanu woko, emondo, emaku cinge; e nyaku ai malu.
- 26**E lembene yik i ng'om maeno ceke.
- 27**E ka Yesu ai ku kakeca, dhanu ario m'abinga gilubo ng'eye, gikok akoka, giwacu kumae, Bed ku kisa i kumwa, in i wod Daudi.
- 28**E kan emondo i ot, dhanu m'abinga gibino i bang'e: e Yesu wacu igi kumae, Wuyio nia eni timbre ira? Giwacu ire kumae, Eyo, Rwoth.
- 29**Elund emulo wang'gi, ewacu kumae, Dong' etimbre iwu calku yioyic mu.
- 30**E wang'gi yabre. Man Yesu ng'olo igi ma tek, ewacu kumae, Wunen ng'atu moko kud ung'ei maeni.
- 31**Ento gicidho, girweyo pire mba mba i ng'om maeno ceke.
- 32**E kinde ma giwok woko, nen, jukelo ng'atu acel m'ajuba ma won pajogi de i bang'e.
- 33**Ka juwodho pajogi woko, e ng'atu m'ajuba weco: e i udul dhanu wang' lii, giwacu kumae, Fodi jukuneno gin ma kumeno ki ngo i Israel.
- 34**Ento Jufarisayo giwacu kumae, Ewodho pajogi ni kum jadit mi pajogi.
- 35**Man Yesu cidho i adhura ceke ku ba pacu de ceke, ku ponjo i kacokri migi, ku yero lembanyong'a mi ker de, man ku keyo rno ceke ma kwonde tung' tung' m'unyang' i kum ku tho mange ceke ma kwonde tung' tung'.

³⁶Ento kan eneno udul dhanu, ngisi nege i kumgi, kum givoc gilal de, calu rombe ma jakwac umbe kugi.

³⁷Elund ewacu ni julubne kumae, Mwoka bedo dit andha ere jutic gi lam.

³⁸Ka kumeno wukwai Rwoth mi mwoka, ya eor jutic i mwoka pare.

Matayo 10

¹Man elwong'o julubne apar wi ario i bang'e, man emio igi ng'ol wi tipo m'ucido, ma giwodh kogi woko, man gikei ko kwond tho ceke m'unyang' i kum ku kwond tho ceke mange de.

²Nwang'u nying' jukwenda apar wi ario gi eni: Ma kwong'ane, Simon, ma julwong'o Petro, man Andrea m'umin mire; Yakobo ma wod Zebedayo, man Yohana m'umin mire;

³Filipo, man Bartolomayo; Thoma, man Matayo ma won ajok: Yakobo ma wod Alfayo, man Thadayo;

⁴Simon ma Jakananayo, man Yuda Iskariote, m'ucibe bende.

⁵Yesu oro juapar wi ario maeni, man eng'olo igi, ewacu kumae, Kud wucidh i yo moko mi Thekdhanumange, man kud wumond i adhura moko nii Jusamaria:

⁶ento ma sagu wucidh ba rombe m'urwinyo m'i ot pa Israel.

⁷Ka wucidho de, wuyer, wuwac kumae, Ker m'i polo dHINGO.

⁸Wukei kum weg tho, wuketh ju m'utho cer, wulony weg joi, wuwodh pajogi woko: wumaku k'abamba, dong' wumi k'abamba.

⁹Kud wutwek mola ma kwar, kadok mola ma tar de, kadok mola i gbethe mu:

¹⁰kulubu de ngo mi woth mu, kadok jabia de ario, kadi wara, kadi uluth; kum jatic uromo ku cemo pare.

¹¹Man i adhura kadi i pacu ceke ma tek wubimondo i ie, wuyeny ng'atu m'uromo i ie; wubed keca de maram wuai ko woko.

¹²Ka wumondo de i ot, wumothe.

¹³Man tek ode romo, wek kwicwiny mu bin i wie: ento tek eromo ngo, wek kwicwiny mu dwog i beng'wu.

¹⁴Ng'atu ma tek bijolowu ngo, kadi m'uwinjo lembe mu ngo, ka wuai kud i oduca kadi adhura nica, wukir utur m'i tiendwu woko.

¹⁵Andha awacu iwu kumae, I ceng' mi pokolembe, pokolembe mi ng'om Sodom ku Gomora bibedo ber ma sagu mir adhura maeno.

¹⁶Nen, aorowu calu rombe i kind urudi: ka kumeno wubed riu parni thwol, wubed ming' de pamir akuru.

- 17Ento wukuru ni dhanu: kum gibimiowu i dilo, i kacokri migi de gibifodowu;
- 18eyo man gibiterowu i wang' jubim ku ju m'ubimo de pira, ni lembatuca igi ku Thekdhanumange de.
- 19Ento ka jumiowu, cwinywu kud uring maram wubiweco ko kadi pi lembe de ma wubiweco: kum gin ma wubiyero bimire iwu i saa nica.
- 20Kum wuweco wun ungo, ento Tipo pa Wegwu e m'ubeweco i iwu.
- 21Umego de biting'o umin wang' tho, won nyathin de biting'o nyathi pare: nyithindho de gibijai kum junyodo migi, e gibiketho juneggi.
- 22Man dhanu ceke gibidaguwu kum nyinga: ento ng'atu m'uciro cil i kajikne, ng'atuni e ma biboth.
- 23Ento ka ginyayu ragedo i kumwu i adhura maeni, wuring i mange: kum andha awacu iwu kumae, Wubikadhu ku i adhura pa Israel ungo, ka fodi Wod dhanu kubino ngo.
- 24Jalub sagu japonji pare ngo, kadok jamiru de sagu rwodhe ngo.
- 25Eromo ni jalub ya ebed calu japonji pare, jamiru de calu rwodhe. Tek gilwong'o won ot Beelzebul, gibilwong'o wat pare kumeno ma sagu dit!
- 26Ka kumeno kud wulworgi: kum gin moko mbe ma umbre, ma binyuthre ngo; ma kandre de, ma bing'eire ngo.
- 27Gin m'ayero iwu i piny ma col wuyer i der: gin ma wuwinjo de i ithwu, wuyere wi ot.
- 28Man kud wulwor ju ma nego kum, ento ng'eyong'ec re negre igi ngo: ento ma sagu wulwor ng'atu ma copo nyotho ng'eyong'ec ku kum de i gehena.
- 29Kira ario juloko ku sente ngo? man acel m'i kindgi mbe ma bipodho i ng'om ma Wego mbe:
- 30ento cil yukwiwu ceke kwandre.
- 31Ka kumeno kud wulwor: wun wu ber ma sagu kira dupa.
- 32Ka kumeno ku ba dhanu nzu ma bituca i wang' dhanu, an bende abituce i wang' Vwa ma ni i polo.
- 33Ento ng'atu ma tek bikwera i wang' dhanu, an bende abikwere i wang' Vwa ma ni i polo.
- 34Iwu kud uwac nyo abino bolo kwicwiny i ng'om: abino bolo kwicwiny ungo, ento palamularu re:
- 35Kum abino poko kind nico ku won mire, nyaku ke giku min mire, dhaku ke ku wang'umire:

- ³⁶man ke judegi pa ng'atu moko bibedo wat pare ma dhe.
- ³⁷Ng'atu m'umaru won kadi rnin ma sagu an eromo kuda ngo; ng'atu m'umaru wode kadi nyare de ma sagu an eromo kuda ngo.
- ³⁸Ng'atu m'uting'o yen m'athara pare ngo elubo ng'eya de, romo kuda ngo.
- ³⁹Ng'atu m'unwang'u kwo pare ebirwinye; man ng'atu m'urwinyo kwo pare pira ebinwang'e.
- ⁴⁰Ng'atu m'ujolowu nwang'u ejolo an, man ng'atu m'ujolo an nwang'u ejolo ng'atu m'uora.
- ⁴¹Ng'atu m'ujolo jablia i nying' jabila ebimaku sukulia pa jabila: ng'atu m'ujolo ng'atu ma pwe i nying' ng'atu ma pwe ebimaku sukulia pa ng'atu ma pwe.
- ⁴²Ng'atu ma tek bimio kikombe mi pi ma ng'ic ni ng'atu acel m'i kind nyithindho ma thindho maeni ya emadhi, i nying' jalub, awacu iwu andha sukulia pare birwinyo ire ki ngo.

Matayo 11

- ¹Etimbre de ka Yesu daru ciko julubne apar wi ario, eai kakeca kara eci ponji eyer lembanyong'a de i adhura migi.
- ²Nwang'u ka Yohana winjo pi tic pa Kristu kud i odkol, eciko lembe dhu julubne
- ³man ewacu ire kumae, In i ng'atu m'ubebino, kadi wakur ng'atu mange?
- ⁴Man Yesu loko lembe ewacu igi kumae, Wuci yer ni Yohana pi gin ma wuwinjo ku ma wuneno de:
- ⁵ju ma abinga maku nenopiny, weg abala bende gibewotho, weg joi de kumgi lony, ju ma ithgi dhing' bende giwinjo, ju m'utho ndhu de gicer, jucan bende jubeyero igi lembanyong'a ma juboth ko.
- ⁶Man ng'atu ma tek binwang'u gin moko mbe i ia m'uketho ekier, mugisa ire.
- ⁷Man ka joni gicidho migi, Yesu maku penjo udul dhanu pi Yohana kumae, Wucidho woko i yamba nineno ang'o? undodi acel m'uyengre ku yamu?
- ⁸Ento wucidho woko nineno ang'o? ng'atu m'uronjre ku kendi ma yomi? Nen, ju m'ukendo kendi ma yom gini i udi mir ubimo.
- ⁹Ento wucidho woko mir ang'o? nineno jabila pa Mungu? Eyo, awacu iwu, man m'usagu jabila dit.
- ¹⁰Maeni ng'atu, ma yang' pire gore kumae, Nen, aoro jakwenda para i weng'i, Ma biyiko yo peri i weng'i.
- ¹¹Andha awacu iwu kumae, Kud i kind dhanu ma mon unyolo ng'atu moko mbe m'uwok ma dit ma sagu Yohana ma Jabaputisi: ento ng'atu ma en e nok i ker m'i polo e ma dit ma sage.

12Ugambre i ceng' pa Yohana ma Jabaputisi cil ku kawono de ker m'i polo rombo ku tego, dhanu ma jukero de ggame ku kero.

13Kum jubila ceke ku cik de giewo cil kum Yohana.

14Man tek wuyio wujol maeni, maeni en e Elia, ma bibino.

15Ng'atu m'ubedo ku ithe m'ewinjo ko, wek ewinji.

16Ento abiporo dhanum'utuk maeni kud ang'o? Epore ku nyithindho m'ubedo i katali, m'ulwong'o juwadi,

17m'uwacu kumae, Wakudho ungbalu iwu, wumiel de ngo; wawero wejawu, e can unegowu de ngo.

18Kum Yohana bino ku camu cemo ngo kadi ku madhu de ngo, man giwacu kumae, En e won pajogi.

19Wod dhanu bino ku camu ku madhu bende, e giwacu kumae, Nen, ng'atu ma jambo kud andrej pigulok, jarimb weg ajok ku judubo de! E riekoko doko pwe ni kum tic pare.

20Elund emaku dhau bang' adhura ka ma tic pare ma tek utimbre i ie dit, kum giloko cwinygi ngo.

21Can i wii, Korazin! can i wii, Bethsaida! kum tek wagi tic mi musana m'utimbre i iwu utimbre i Turo ku Sidon kuno di giloko cwinygi con ku kendo usuba ku vuru.

22Ento awacu iwu, nia pokolemba pa Turo ku Sidon bibedo ber ma sagu mu i ceng' pokolemba.

23In de, Kapernaum, jubiyungi malu i polo? ibicidho piny i Hadeya: kum tek tic ma tek m'utimbre ii utimbre i Sodom, kuno di enuti cil eni.

24Ento awacu iwu nia pokolemba mi ng'om Sodom bibedo yot ma sagu peri, i ceng' pokolemba.

25I nindo maeno Yesu loko lembe ewacu kumae, Afoi, E Vwa, Rwoth m'i polo ku ng'om, nia ipanu gin maeni ni juriekoko ku jung'eilemba bende, inyuthogi de ni mukere:

26eyo, Vwa, kum kumeno enyayu mutoro i weng'i.

27Vwa mio ira gin ceke: ng'atu moko mbe de m'ung'eyo Wod, ndhu Wego re; kadok Wego de ng'atu moko mbe m'ung'eyo, ndhu Wod, man ng'atu ma tek Wod uyenyo enyuthe ire.

28Wubin i bang'a, kewu ceke ma wumulu ku tic ma ter ma pek unurowu, man abimio iwu yom.

29Wuting' mberembere para i wiwu, wumak ponji de i bang'a; kum an a ming' a mol de i adunde: e wubinwang'u yom i ng'eyong'ec mu.

³⁰Kum mberembere para e yot, ter para de foka foka.

Matayo 12

¹I nindo maeno Yesu wotho i podho cam ceng' sabatu; julubne de kec ubenegogi e gimaku jaku jang cam gimwodo de.

²Ento ka Jufarisayo gineno maeni, giwacu ire kumae, Nen, julubni gitimo gin ma cik uyio ngo ya jutim i ceng' sabatu.

³Ento ewacu igi kumae, Wusomo gin ma Daudi timo ngo, ka kec ubenege, ku ju ma ginuti gikugi;

⁴maram emondo ko i ot pa Mungu, ecamu kwen ma athiera de, ma cik uyio ngo ire ecam, kadok ni ju ma ginuti gikugi de, ento ni julam kendgi?

⁵Kadi wusomo ngo i cik, nia i ceng' sabatu julam mi hekalu gikadhu ku wi ceng' sabatu, man gibedo ku dubo ngo?

⁶Ento awacu iwu, nia acel nuti keni ma sagu hekalu.

⁷Ento tek wung'eyo thelembe nini, Ayenyo kisa, lam ungo, kuno di wupoko lembe rac ungo wi ng'atu ma dubo mbe kude.

⁸Kum Wod dhanu en e rwoth rni ceng' sabatu.

⁹Man eai kakeca, emondo de i kacokri migi:

¹⁰man nen, ng'atu ma cinge lindre. Gipenje de, giwacu kumae, Cik uyio jukei kum ceng' sabatu? kara gidote.

¹¹Man ewacu igi kumae, Ng'atu moko m'i kindwu, ma won rombo acel, tek eni de podho i vur i ceng' sabatu, ebimake, ebiwodhe woko de ngo?

¹²Dhanu sagu rombe dit apila! Kum kumeno cik uyio ya jutim tic ma ber ceng' sabatu.

¹³Elund ewacu ni ng'atuno kumae, Riei cingi. E erieyo de; man edoko bo de, calu mucelo.

¹⁴Ento Jufarisayo gicidho woko, gipido lembe de i kume, maram ginyothe ko.

¹⁵E Yesu m'ung'eyo maeni eai ku kakeca: man dupa gilubo ng'eye; e ekeyo kumgi kpo,

¹⁶man eng'olo igi nia ku giketh jung'eye:

¹⁷kara lembe ma Isaya ma jablia yero timbre kakare, m'uwacu kumae,

¹⁸Nen, jatic para m'agoyo wie; Jamerna ma mutoro nego ng'eyong'ec para i kume: Abiketho Tipu para i wie, Man ebiyero lembapoka ni Thekdha numange.

¹⁹Ebidhau ngo, kadi ebikok ma tek de ngo; Kadok ng'atu moko de mbe ma biwinjo dwande i gengi.

- 20** Usi m'unyoc ebituro ngo, Atutu m'udunyo yiro de ebinego ngo, Cil ma fok'eoro lembapoka ni aloci ngo.
- 21** Man i nyinge Thekdhanumange bigeno.
- 22** Julund jukelo ng'atu acel ma won pajogi i bang'e, ma en e abinga ajuba de: e ekeyo kume, kara ng'atu ma ajuba weci enen de.
- 23** Udul dhanu ceke de igi wang' lii, giwacu kumae, Maeni copo bedo wod Daudi?
- 24** Ento ka Jufarisayo winjo lembe maeni, giwacu kumae, Ng'atuni bewodho pajogi en ungo, ento ni kum Beelzebul ma jadit mi pajogi.
- 25** E en m'eng'eyo lembe ma igi bepido ewacu igi kumae, Ku ba ker ceke ma tek upokre gire enyothre; ku bang' adhura ceke de kadi ot de m'upokre gire ebicungo ngo:
- 26** man tek Jok uwodho Jok woko, nwang'u epokre gire; ka ker pare bilund cungo nenedi?
- 27** Tek an awodho pajogi ni kum Beelzebul, wotwu ke giwodhogi woko ni kum ng'a? ka kumeno gibibedo jupoklembe mu.
- 28** Ento tek awodho pajogi ku Tipo pa Mungu, meca ker pa Mungu bino i beng'wu.
- 29** Kadi ng'atu moko copo mondo i ot pa jatego nenedi, eyak piny pare de, tek elar etwio jatego ngo? e kan e bilund nyotho ot pare.
- 30** Ng'atu ma tek wakude ngo nwang'u erony i kuma; man ke ng'atu ma wacoko wakude ngo nwang'u eketho.
- 31** Ka kumeno awacu iwu kumae, Ku ba dubo ku lembacidi ceke biwekre woko ni dhanu; ento lembacidi ma kum Tipo re biwekre ngo.
- 32** Man ng'atu ma tek biyero lembe kum Wod dhanu, ebiwekre woko ire; ento ng'atu ma tek biyero kum Tipo Maleng' re, ebiwekre woko ire ngo, kadok i ng'om maeni, kadi i maeca ma bibino.
- 33** Kadi wuketh yen udok ber, nyinge de dok ber; kadi wuketh yen udok rac, nyinge de dok rac: kum jung'eyo yen ni nyinge.
- 34** Wu nyikwai thwol, wucopo yero gin ma ber nenedi, ma wun wu raci? kum kud i gin m'usagre mir adunde e dhok de yero.
- 35** Ng'atu ma ber wodho gin ma ber woko kud i piny m'akana pare ma ber: ng'atu ma rac de wodho gin ma rac woko kud i piny pare m'akana ma rac.
- 36** Man awacu iwu, nia ku ba lembe ceke ma kite mbe ma dhanu biyero gibitito pire ceng' pokolembe.
- 37** Kum jubigonyo lembe m'i wii ku lembe peri, man jubipoko lembe rac i wii de ku lembe peri.

³⁸Jugorcik kucel ku Jufarisayo gilund giloko lembe ire, giwacu kumae, Japonji, wayenyo wanen giranyutha i beng'i.

³⁹Ento edwoko lembe ewacu igi kumae, Dhanum'utuk ma gi rac ma gi weg gier de gibeyenyo giranyutha; giranyutha moko de mbe ma bimire igi, ndhu giranyutha pa Yona ma jabila:

⁴⁰kum calu Yona bedo ceng' adek ku diewor de i cino rec ma dit; e Wod dhanu de bibedo kumeno ceng' adek ku dieworne de i adunde ng'om.

⁴¹Dhanu mi Nineve bicungo i pokolembe karacelo ku dhanum'utuk maeni, e gibipoko lembe i wie rac; kum joca loko cwinygi kum lembayera pa Yona; man nen, ng'atu ma sagu Yona ni keni.

⁴²Ubimo ma dhaku ma yor ariwa ma yo piny bicungo i pokolembe karacelo ku dhanum'utuk maeni, man ebipoko lembe i wie rac: kum eai i tung' ng'om kara ewinj rieko pa Suleman; man nen, ng'atu ma sagu Suleman ni keni.

⁴³Ento tipo m'ucido, kan eai kud i dhanu, ekadhu ku ka ma pi mbe i ie, m'ebeyenyo yom, enwang'e de ngo.

⁴⁴Elund ewacu kumae, Abidok i ot para m'aai i ie; kan ewok de, enwang'u ie nanu, ebedo ayweya, aruka de.

⁴⁵Elund ecidho, egamu tipo mange abiro i bang'e ma gi rac ma sage, e gimondo i ie gibedo de keca: bedo ma ng'atuno bedo ko macen doko rac ma sagu ma kwong'a. Ebibedo cil kumeno bende ni dhanum'utuk maeni ma gi rac.

⁴⁶Ka fodi ebeweco ni udul dhanu, nen, min giku utumin mire gicungo woko, giyenyo giwec i bang'e.

⁴⁷E ng'atu acel uwacu ire kumae, Nen, meru ku utumeru de gicungo woko, giyenyo giwec i beng'i.

⁴⁸Ento eloko lembe ewacu kumae, ni ng'atu m'uyero ire, Ng'a ma ma? man utumira de gi ng'agi?

⁴⁹E erieyo cinge yo ba julubne, man ewacu kumae, Nen, ma ku utumira!

⁵⁰Kum ng'atu ma tek bitimo yeny ma i Vwa m'i polo yeny, nwang'u en e umira, ku nyamira de, ku ma de.

Matayo 13

¹Ceng' maeno Yesu ai woko kud i ot, ebedo de dhu nam.

²Udul dhanu de ma dit gicokri i bang'e, ketho eidho i yei, ebedo de; udul dhanu ceke de gicungo dhu wath.

³Man eyero igi gin dupa ku lembabola, ewacu kumae, Nen, jacoikodhi cidho nicoyo;

- ⁴e kan ecoyo, kodhi moko podho dhu yo, winyo de gibino gicamugi:
- ⁵mange ke podho i ka ma ie ju kidi, ka ma ng'om ubedo dit i ie ngo: e kawono gicobo, kum ng'om ubedo thuth ungo:
- ⁶e ka ceng' uwok, giwang'; man kum ulaggi mbe, giner woko.
- ⁷Mange ke podho kind ukudho; ukudho de dongo man edeyogi:
- ⁸mange ke podho wi ng'om ma ber, ecego nyinge de, moko acel bang' dak, moko acel bang' pier abusiel, moko acel bang' pier adek.
- ⁹Ng'atu ma ithe nuti, wek ewinji.
- ¹⁰Man julub gibino, giwacu ire kumae, Iyero igi ku lembabola nedi?
- ¹¹Man eloko lembe ewacu igi kumae, Ecibre iwu ya wung'ei giramung'a mi ker m'i polo, endre ecibre ngo igi.
- ¹²Kum ng'atu ma tek ubedo ko, jubimio mange ire, man ebibedo ku muluma: ento ng'atu ma tek ubedo ko ngo, jubikabu woko kud i bang'e cil maeno m'ebedo ko.
- ¹³Ka kumeno ayero igi ku lembabola: kum anena to gineno ere gineno ngo, awinja to giwinjo ere giwinjo ngo, kadok ang'eya de ging'eyo ngo.
- ¹⁴E lembila ma yang' Isaya yero timbre igi kakare, m'uwacu kumae, Awinja re wubiwinjo, ere wubing'eyo ki ngo; Anena de wubineno, ento wubineno ki ngo:
- ¹⁵Kum adunde dhanu maeni doko nwang', Ithgi de dhing', Wang'gi de gimio; Kara ku ginen ku wang'gi, Ku giwinj ku ithgi, Ku ging'ei kud adundegi, Gimaru lokri kendo, Man amaru cangugi.
- ¹⁶Ento mugisa ni weng'wu, kum gineno; ni ithwu de, kum giwinjo.
- ¹⁷Kum andha awacu iwu, nia jubila man dhanu ma pwe de dupa giyenyo ginen gin ma wuneno, ere ginenogi ngo; giyenyo giwinj gin ma wuwinjo, ere giwinjogi ngo.
- ¹⁸Ka kumeno wuwinj lembabola pa jacoikodhi.
- ¹⁹Ka ng'atu moko winjo lembe mi ker, eng'eye de ngo, ng'atu ma rac lund bino, emayu de maeno ma jucoyo i adundene. Maeni en e ma jucoyo dhu yo.
- ²⁰E maeni ma jucoye ka ma ie ju kidi, maeni en e ng'atu m'uwinjo lembe, ejole de pio pio ku mutoro;
- ²¹ento ebeto kud ulage i ie gire ngo, ento ebeto nyangba; man ka masendi kadi ragedo wok kum lembe, e aruca ruca ekier.
- ²²E maeni ma jucoyo kind ukudho, maeni en e ng'atu m'uwinjo lembe; e giki m'i ng'om, kud awondi mi lonyo, gideyo lembene, e ecego nyinge ngo.

- ²³Man maeni ma jucoye i ng'om ma ber ke, maeni en e ng'atu m'uwinjo lembe, man eng'eye; m'ecego nyinge andha, ecego de, moko acel bang' dak, moko acel bang' pier abusi, moko acel bang' pier adek.
- ²⁴Eting'o lembabola mange de i wang'gi ewacu kumae, Ker m'i polo pore ku ng'atu m'ucoyo kodhi ma ber i podho pare:
- ²⁵ento ka dhanu nindo, jadegine bino ecoyo ngoli bende kind nganu, e eciho.
- ²⁶Ento ka nganu twi ecego nyinge de, ngoli bende lund uwok.
- ²⁷Man jumiru pa won ot ubino uwacu ire kumae, Rwoth, icyo kodhi ma ber ungo i podho peri? ngoli ke lund uai kani?
- ²⁸Man ewacu igi kumae, Ng'atu ma jadegi timo maeni en. E jumiru giwacu ire kumae, Ka kumeno iyeny waci wacokgi?
- ²⁹Ento ewacu kumae, Ungo; kinde ma wucoko ngoli, wumaru doyo nganu bende.
- ³⁰Wek gin ario gidong karacelo cil i palacam: man i nindo mi palacam abiwacu ni jukaicam kumae, Wular wucok ngoli, wutwigi de ni wic kara juwang'gi; nganu re e ma wucok i dero para.
- ³¹Eting'o lembabola mange i wang'gi, ewacu kumae, Ker m'i polo e calu kodhi atingli, ma dhanu gamu, ecoyo de i podho pare:
- ³²ma nyathigi andha ma sagu kodhi ceke: ento kan edongo, e dit ma sagu uboko, man edoko ni yen, ketho winyo m'i polo gibino gibedo de wi jange.
- ³³Eyero igi lembabola mange de kumae; Ker m'i polo e calu thobi, ma dhaku gamu, ekane de i mogo katoko adek, maram eyenye ko ceke.
- ³⁴Gin maeni ceke Yesu yero ni udul dhanu ku lembabola; man lembe moko mbe ma k'eyero ku lembabola ngo:
- ³⁵kara lembe ma yang' jabila yero timbre kakare, m'ewacu kumae, Abialu dhoga ku lembabola; Abiweco pi gin m'ugamu pandre cil i thekri mi ng'om.
- ³⁶Elund eweko udul dhanu emondo de i ot: julubne de gibino i bang'e, giwacu kumae, Tuc iwa the lembabola mi ngoli mi podho.
- ³⁷Man eloko lembe ewacu kumae, Ng'atu m'ucoyo kodhi ma ber en e Wod dhanu;
- ³⁸podho ke en e ng'om; kodhi ma ber ke, maeni gi wot mi ker: ngoli ke gi wot ng'atu ma rac;
- ³⁹jadegi ke m'ucoyogi en e wonabali: palacam ke en e kajik mi ng'om; jukaicam ke gi malaika.
- ⁴⁰Ka kumeno calu jucoko ngoli juwang'u de ku mac; ebibedo kumeno i kajik mi ng'om.

- ⁴¹Wod dhanu biero malaika pare man gibicoko kud i ker pare gin ceke m'uketho jukier, ku ju m'udubo lembe bende,
- ⁴²e gibibologi i majubi: ywak ku kayu lak de bibedo nuti.
- ⁴³Weg bedopwe bilund rieny pami ceng' i ker pa Weggi. Ng'atu ma ithe nuti wek ewinji.
- ⁴⁴Ker m'i polo e calu piny m'akana m'upandre i podho: ma ng'atu acel unwang'u ekane de; man kum mutoro pare ecidho eloko jupiny ceke m'ebedo ko, man eng'iewo podho maeno de.
- ⁴⁵Kendo, ker m'i polo e calu ng'atu ma jakuloka m'uyenyo kidi ma beco ma i upal:
- ⁴⁶e kan enwang'u kidi acel ma i upal ma wel pinje lwar, ecidho eloko jupiny ceke m'ebedo ko, man eng'iewe.
- ⁴⁷Kendo, ker m'i polo e calu voi, ma jubolo i nam, man ecoko mi kwond ceke:
- ⁴⁸ma, kan epong', giywayu woko dhu wath; gibedo piny de, man gicoko ma becene i alara, ento ma recone gibayu woko.
- ⁴⁹E ebibedo kumeno i kajik mi ng'om: malaika biwok woko, man gibikoyo judubo ma kind weg bedopwe,
- ⁵⁰e gibibologi i majubi: ywak ku kayu lak de bibedo nuti.
- ⁵¹Wung'eyo gin maeni ceke? Giwacu ire kumae, Eyo.
- ⁵²Man ewacu igi kumae, Ka kumeno ku ba jugorcik nzu ma judwoke jalub mi ker m'i polo e calu ng'atu ma won ot, m'ewodho woko kud i kind piny pare m'akana giki ma nyen ku giki m'uti.
- ⁵³Man etimbre, ka Yesu daru lembabola maeni, eai ku kakeca.
- ⁵⁴Ebino i ng'om ma thugi ma dhe man eponjogi i kacokri rnigi, ketho igi wang' lli, giwacu de kumae, Ng'atuni nwang'u rieko maeni, ku tic ma tek maeni kani?
- ⁵⁵Ng'atuni wod jabodho mi bau ngo? min mire julwong'o Mariamu ngo? utumin ke, Yakobo, ku Yusuf, man Simon, ku Yuda de ngo?
- ⁵⁶Nyimin mire de, kagi ceke wabedo wakugi ngo? Ng'atuni lund unwang'u gin maeni ceke kani?
- ⁵⁷E gikier ni kume. Ento Yesu wacu igi kumae, Yung ma juyungo ko jabila mbe ngo, ento umbe i ng'om ma thugi ma dhe re, man i ot pare ma dhe.
- ⁵⁸Man etimo tic ma tek dupa ngo keca kum yioyic migi m'umbe.

Matayo 14

- ¹I nindo maeno Herode ma jabim uwinjo pi Yesu,

- ²man ewacu ni jutic pare kumae, Meni Yohana ma Jabaputisi; ecer kud i kind ju m'utho; kum kumeno tego maeni betimbre i ie.
- ³Kum Herode maku Yohana, etwie de, man ekethe i odkol pi Herodias, ma ci umin mire ma Filipino.
- ⁴Kum Yohana wacu ire kumae, Cik uyio ngo iri ya ibed kude.
- ⁵Man kan eyenyo enege, elworo udul dhanu, kum gikwane calu jabila.
- ⁶Ento ka ceng' ma yang' junyolo ie Herode tundo, Nyaherodias urniel i kindgi, enyayu mutoro de i Herode.
- ⁷Ketho eng'olo ku kwong' ya ebimio ire gin ceke ma tek ebikwayu.
- ⁸E en, ma min ucung'o lembe i ie, ewacu kumae, Mi ira wi Yohana ma Jabaputisi kuni i atangala.
- ⁹E can umaku ubimo; ento kum kwong' m'ekwong'o, kum ju ma gibedo dhu cam gikugi de, eng'olo nia jumie;
- ¹⁰man eoro jucijuthumo wi Yohana i odkol.
- ¹¹Wiene jukelo i atangala, jumio de ni nyaku: en ke etere ba rnin.
- ¹²Julubne de gibino, giting'o avuje, giyike; gici giwacu ni Yesu.
- ¹³Nie ka Yesu winjo maeni, eai ku kakeca ku yei, ecidho cen ka ma ngele: e kan udul dhanu winjo lembene, giai ku i adhura gilubo toke ku tiendgi.
- ¹⁴E eai woko, eneno udul dhanu de ma dit, man ngisi nege i kumgi, e ekeyo kum weg tho migi.
- ¹⁵E kan uthieno wok julub gibino i bang'e, giwacu kumae, Kakeni ng'om ngele, nindo de daru kadhu: dong' ilal udul dhanu, kara gicidh i pacu, ging'ieu cam igi.
- ¹⁶Ento Yesu wacu igi kumae, Can cidho kamange negogi ngo; wumi igi cam.
- ¹⁷Giwacu ire de kumae, Wabedo ku lungu kwen abic kende kakeni, ku rec ario.
- ¹⁸Man ewacu kumae, Kelgi kuni i bang'a.
- ¹⁹E eng'olo ya udul dhanu gibed piny wi lum; man egamu lungu kwen abic, ku rec ario, eng'ayu wang'e de malu i polo, emio mugisa man eng'weko emio lungu kwen de ba julub, julub ke ni udul dhanu.
- ²⁰E kagi ceke gicamu, giyeng' de: man gicoko dong' kwen m'ang'weka, upong'o katoko apar wi ario.
- ²¹Man dhanu ma gicamu jumaco gi ve rubanga abic, ku mon man nyithindho bende.
- ²²E aruca ruca ecwalu julub ya giidh i yei, gici de lokaca i wang'e, kan edong' elalu udul dhanu.

- ²³Ku yo ng'ei lalu udul dhanu, eidho wi got ka nge nirwo: e ka piny udoko uthieno, ebeto kakeca e kende.
- ²⁴Ento yei re wok i die nam, m'ebesendre ku mukura; kum yamu ai yor i wang'gi.
- ²⁵I kur mir ang'wende mi diwor ebino i bang'gi, m'ebewotho ku wi nam.
- ²⁶Man ka julub ginene m'ebewotho ku wi nam, cwinygi ng'abre, giwacu kumae, En e tipu; man gikok akoka ni lworo.
- ²⁷Ento aruca ruca Yesu weco i bang'gi, ewacu kumae, Cwinywu bed tek; meni an; lworo kud unegwu.
- ²⁸E Petro loko lembe ire ewacu kumae, Rwoth, tek en e in, wac ira abin i beng'i ku wi pi.
- ²⁹Man ewacu kumae, Bin. E Petro gam uloro piny kud i yei, man ewotho ku wi pi ebino ko ba Yesu.
- ³⁰Ento kan eneno yamu, lworo make; e kan emaku mwony ekok, ewacu kumae, Rwoth, lara do.
- ³¹E ndhu ndhu Yesu rieyo cinge, man emake, ewacu ire kumae, E in ma yioyic peri nok, cwinyi bedo jiji nedi?
- ³²E ka giidho malu i yei, yamu cungo.
- ³³Man ju ma gini i yei girwo ire, giwacu kumae, In i Wod Mungu andha.
- ³⁴E ka gikadhu lokaca, gitundo dhu wath, ba Genesareti.
- ³⁵E ka dhanu ma kakeca ging'eye, gioro lembe i ng'om maeni ceke mba mba, man gikelo dhanu ma weg tho ndri i bang'e;
- ³⁶man gikwaye ya gimul dhu kendi pare kende ci: e dhanu ceke m'umulo kumgi kei.

Matayo 15

- ¹Jufarisayo ku jugorcik gilund giai Yerusalem, gibino ba Yesu, giwacu kumae,
- ²Julubni gikadhu ku wi lembe mi kei mi judongo nedi? kum gilogo cing'gi ngo ka gicamu kwen.
- ³Eloko lembe de ewacu igi kumae, Wun bende wukadhu ku wi cik pa Mungu nedi kum lembe mi kei mu?
- ⁴Kum Mungu wacu kumae, Yung wuru ku meru: man, ng'atu m'uyero lembe ma rac kum won kadi min, wek etho athoa.
- ⁵Ento wun re wuwacu kumae, Ng'atu ma tek biwacu ni won kadi min kumae, Maeno ma nwang'u ande bedo iri ni kuloka ni kuma emire ni Mungu;
- ⁶meca ebiyungo won ungo. E wuthiro lembe pa Mungu kum lembe mi kei mu.

- ⁷Wu weg ambili, yang' Isaya ewo piwu dre, m'ewacu ko kumae,
- ⁸Dhanu maeni giyunga ku dendhoggi; Ento adundegi tung' i kuma.
- ⁹Ento girwo i bang'a mananu, Ma giponjo ko cik mi dhanu ni ponji migi.
- ¹⁰Man elwong'o udul dhanu i bang'e, ewacu igi kumae, Wuwinji, man wung'ei:
- ¹¹giki ma mondo i dhok cido i dhanu ngo; ento maeno ma ai kud i dhok, maeno e ma cido i dhanu.
- ¹²Julub gilund gibino, giwacu ire kumae, Ing'eyo nia Jufarisayo ka giwinjo lembe maeni, gikieri?
- ¹³Ento eloko lembe ewacu kumae, Ku ba girapidha ceke ma Vwa m'i polo kupidho en ungo jubifudhe woko.
- ¹⁴Wekgi: gi jutelwidhanu ma gin de gin abinga. Man tek abinga telo wi abinga, gin ario de gibipodho i vur.
- ¹⁵E Petro loko lembe ewacu ire kumae, Tuc iwa the lembabolane.
- ¹⁶Man ewacu kumae, Wun bende kara fodi wumbe ku ng'eyong'eci?
- ¹⁷Wung'eyo ngo, nia gin ma tek umondo i dhok kadhu i ic, jutere de woko i odbari?
- ¹⁸Ento giki ma ai kud i dhok re giai kud i adunde; man gicido i dhanu.
- ¹⁹Kum pidoic ma rac ai ku i adunde, ku negonek, ku gier, ku tarwang', ku kwo, ku cwayu ndra, ku cayucac:
- ²⁰maeni e ma giki ma cido i dhanu; ento camu ku cing' m'aloga ngo re cido i dhanu ngo.
- ²¹E Yesu ai woko ku kakeca, ecidho de i ng'et Turo ku Sidon.
- ²²Man nen, Dhakananaya uai kud i kieu maeno, man ekok akoka, ewacu kumae, Bed ku kisa i kuma, E Rwoth, i wod Daudi: nyara besendre dit ku pajogi.
- ²³Ento eloko lembe acel de ngo ire, Julubne de gibino gikwaye, giwacu kumae, Keth ecidhi; kum ebekok i ng'eiwa.
- ²⁴Ento eloko lembe ewacu kumae, Juora ngo ento ni rombe m'urwinyo m'i ot pa Israel kende.
- ²⁵Ento ebino erwo de ire, ewacu kumae, Rwoth, konya do.
- ²⁶Eloko lembe ire ewacu kumae, Emaku ya jugam kwen mi nyithindho ngo jubol ni gwogi.
- ²⁷Ento ewacu kumae, Eyo, Rwoth: kum cil gwogi gicamu ng'ili m'upodho ku wi mesa pa weggi.

²⁸Yesu lund uloko lembe ewacu ire kumae, E dhaku, yioyic peri bedo dit: dong' etimbre iri cil calu iyenyo. E kum nyare kei i saa nica.

²⁹E Yesu ai kakeca, man ebino ceng'ni ba nam Galilaya; man eidho malu wi got, ebedo de kuca.

³⁰E udul dhanu ma dit de gibino i bang'e, ma gibedo ku weg abala, ku ju ma abinga, ku ju ma ajuba, ku weg abala mi bot, ku ju mange de dupa, man gipielogi piny the tiende; e ekeyo kumgi:

³¹ketho udul dhanu igi wang' lii, ka gineno ju ma ajuba weco, weg abala mi bot de titri, man weg abala mi tielo de wotho, ju ma abinga de neno piny: e giyungo Mungu pa Israel.

³²E Yesu lwong'o julubne i bang'e, ewacu de kumae, Ngisi benega kum udul dhanu, kum gibedo i bang'a kawono ceng' adek man giracama mbe kugi: man ayenyo ngo alagi ku kec, gimaru voc i yo.

³³Julubne de giwacu ire kumae, Wabinwang'u lungu kwen dupa ma kumeni kani i ng'om ngele ma biyeng'o udul dhanu ma dit ma rokeni?

³⁴E Yesu wacu igi kumae, Wutie ku lungu kwen adi? Man giwacu kumae, Abiro, ku rec moko ma thindho.

³⁵Man eng'olo ni udul dhanu ya gibed piny i ng'om;

³⁶man egamu lungu kwen abiro ku rec de; man emio foc, eng'weko ie, emio de ba julub, julub ke mio ni udul dhanu.

³⁷E kagi ceke gicamu, giyeng' de: e gicoko dong' kwen ma jung'weko m'udong', upong'o katoko abiro.

³⁸Man ju m'ucamune jumaco rubanga ang'wen, ku mon man nyithindho bende.

³⁹E elalu udul dhanu, man emondo i yei, ebino de i kieu ng'om mi Magdala.

Matayo 16

¹Jufarisayo ku Jusadukayo de gibino, man gimulo ie gipenje ya enyuth igi giranyutha m'i polo.

²Ento eloko lembe ewacu igi kumae, Ka piny udoko uthieno, wuwacu kumae, Piny bivuto: kum polo bogre.

³Kugweno ke wuwacu kumae, Piny bibedo rac tinuni kum polo bogre piny de mino. Wung'eyo ng'io wang' polo; ento wucopo ng'io giranyutha mi nindo ngo.

⁴Dhanum'utuk ma rac ma gi weg gier de giyenyo giranyutha; giranyutha de bimire ire ngo, ento giranyutha pa Yona re. E ewekogi, acidho.

⁵E julubne gicidho lokaca man wigi wil ku ting'o kwen.

- ⁶E Yesu wacu igi kumae, Wubed ku weng'wu wukuru de ni thobi mi Jufarisayo ku Jusadukayo.
- ⁷E giporo lembe i kindgi gigi, giwacu kumae, En e kum wating'o kwen ungo.
- ⁸E Yesu m'ung'eyo maeni ewacu kumae, E wun ma yioyic mu nok wuporo lembe i kindwu giwu nedi, kum kwen umbe kudu?
- ⁹Fodi wung'eyo ngo, kadi wupoi ngo pi lungu kwen abic ma ni rubanga abic, pi wel katoko bende ma wucoko?
- ¹⁰Kadi lungu kwen abiro ma ni dhanu rubanga ang'wen, pi wel katoko bende ma wucoko?
- ¹¹Wung'eyo ngo nedi ya ayero iwu pi kwen ungo? Ento wukuru ni thobi rni Jufarisayo ku Jusadukayo.
- ¹²Gilund ging'eyo nia ewacu igi ngo ya gikuri ni thobi mi kwen ento pi ponji mi Jufarisayo ku Jusadukayo.
- ¹³Nwang'u ka Yesu bino i ng'et Kaisaria Filipi, epenjo julubne, ewacu kumae, Meno dhanu giwacu ya Wod dhanu en e ng'a?
- ¹⁴Man giwacu kumae, Jumoko wacu kumae, Yohana ma Jabaputisi; jumoko ke, Elia; jumoko ke, Yerernia, kadi ng'atu acel ma kind jubila.
- ¹⁵Ewacu igi kumae, Ento wun ke wuwacu ya an a ng'a?
- ¹⁶E Simon Petro loko lembe ewacu kumae, In i Kristu, Wod Mungu ma kwo.
- ¹⁷E Yesu loko lembe ewacu ire kumae, Mugisa iri, Simon BarYona: kum kum ku rimo nyuthe iri en ungo, ento Vwa ma ni i polo re.
- ¹⁸An bende awacu iri, nia in i Petro, man ke abigomo kanisa para wi cana maeni; e dhugang' mi Hadeya de hiloye ngo.
- ¹⁹Abimio iri kifungula mi ker m'i polo: man gin ma tek ibitwio i ng'om ebibedo atwia i polo; man gin ma tek ibigonyo i ng'om ebigonyo i polo.
- ²⁰Elund eng'olo ni julubne ya ku giwac ni ug'atu moko nia en e Kristu.
- ²¹Ugambre i nindo maeni Yesu maku nyutho ni julubne, nia ekocidho be Yerusalem, ecisendre de ku gin dupa ni kum judongo ku julam ma dongo ku jugorcik, jubinege de, i ceng' mir adege ke ebicer.
- ²²Petro de game, emaku juke de, ewacu kumae, Maeni kud uwok i kumi, Rwoth: maeno biwok i kumi ki ngo.
- ²³Ento elokre, man ewacu ni Petro kumae, Kadh i ng'eya, Jok: kum ibedo ni cudho mi kier ira: kum ii pido pi gin pa Mungu ngo, ento gin mi dhanu re.
- ²⁴Yesu lund uwacu ni julubne kumae, Tek ng'atu moko yenyoye elub ng'eya, dong' ekwere gire, eting' yen m'athara pare de, elub ng'eya.

²⁵Kum ng'atu ma tek uyenyo egwok kwo pare ebirwinye: ng'atu ma tek birwinyo kwo pare de pira ebinwang'e.

²⁶Kum kuloka ang'o ma dhanu binwang'u tek ebilimo ng'om yu ni kuloka ire, ma kwo pare ke rwinyo? kadi girang'o ma dhanu biwilo ku kwo pare?

²⁷Kum Wod dhanu bibino i dwong' pa Won karacelo ku malaika pare; e ebilund mio ni dhanu ceke kubang'gi calku tic pare.

²⁸Awacu iwu andha kumae, Jumoko ma kind ju m'ucungo kakeni bibilo tho ki ngo, ma fodi gikuneno Wod dhanu ngo m'ubebino i ker pare.

Matayo 17

¹Man yo ng'ei ceng' abusiel Yesu gamu Petro, giku Yakobo, man Yohana m'umin mire; man eterogi malu ka nge wi got ma wiu:

²e kite lokre i wang'gi; wang'e de rieny pami ceng', kendi pare de doko tar calu der.

³Man nen, Musa gikud Elia giwok i bang'gi gibeweco gikugi.

⁴Petro de loko lembe, ewacu ni Yesu kumae, Rwoth, en e ber iwa kum wani keni: tek iyenyo, abigomo odbak adek keni; acel iri, acel ni Musa, acel ke ni Elia.

⁵Kinde m'ebeweco, nen, afuru m'urieny uketho tipo i wigi: man nen, dwal uwacu ku i afuru kumae, Meni Woda ma jamerna, ma anyong'a nega i kume; wuwinje.

⁶Ka julubne giwinjo maeni, gipodho arieaba wang'gi, lworu de makugi dit.

⁷E Yesu bino emulo kumgi de man ewacu kumae, Wuai malu, lworu kud unegwu.

⁸E ka ging'ayu wang'gi malu, gineno ng'atu moko ngo, ndhu Yesu kende.

⁹E ka gibeloro piny ku wi got, Yesu ng'olo igi, ewacu kumae, Kud wuyer pi ginmawokiwang' ni ng'atu moko, ma fodi Wod dhanu kucer ungo ku kind ju m'utho.

¹⁰Julubne de gipenje kumae, Ka kumeno jugorcik giwacu nedi nia Elia bikolarbino be?

¹¹Man eloko lembe ewacu kumae, Elia bino andha, man ebidwoko gin ceke:

¹²ento awacu iwu, nia Elia daru bino, endre ging'eye ngo, ento gitimo gin ceke ma giyenyo i kume. Wod dhanu bende bisendre igi kumeca.

¹³Julubne gilund ging'eyo nia eyero igi pi Yohana ma Jabaputisi.

¹⁴Man ka giwok bang' udul dhanu, e ng'atu moko bino i bang'e, erum ire, ewacu kumae,

¹⁵Rwoth, bed ku kisa kum woda: kum en e won thimbu, man ebesendre dit; kum wang' udul epodho i mac, man wang' udul i pi.

- ¹⁶E akele ba jniubni, man gicopo keyo kume ngo.
- ¹⁷Yesu loko lembe ewacu kumae, E dhanum'utuk m'umbe yic ma juco bende, wabibedo wakudu rokani? abisendra kudu rokani? kele i bang'a ku.
- ¹⁸Man Yesu juke; pajogi de ai woko kud i ie: e nyiruno kume kei i saa nica.
- ¹⁹Julubne gilund gibino ba Yesu ka nge, giwacu kumae, Ewodhre woko iwa ngo nedi?
- ²⁰Man ewacu igi kumae, Kum yioyic mu bedo nok: kum awacu iwu andha kumae, Tek wubedo ku yioyic ma ro ku nying atingli, wubiwacu ni got maeni kumae, Ai kakeni ci kuca; e ebiai: gin moko mbe de ma bicopre iwu ngo.
- ²¹Ento wagi maeni ai ungo ndhu ku rwo ku weko cam de.
- ²²E kinde ma gibedo i Galilaya Yesu wacu igi kumae, Jubimio Wod dhanu i cing' dhanu:
- ²³e gibinege, man i ceng' mir adege ebicer. E can ma dit apila makugi.
- ²⁴E ka giwok Kapernaum, ju ma gamu ng'et sente gibino ba Petro, giwacu kumae, Japonji peri rnio ng'et sente ngo?
- ²⁵Ewacu kumae, Eyo. E kan ebino i ot, Yesu kwong'o yero ire, ewacu kumae, Ii bepido nik ang'o, Simoni? ju m'ubimo m'i ng'om gigamu jambng'om kadi ajok de ba ng'a? ba wotgi, kadi bang' umondo?
- ²⁶Kan ewacu ire kumae, Bang' umondo, Yesu wacu ire kumae, Ka kumeno wot gibedo agonya.
- ²⁷Ento kara ku waketh gikier, cidh i nam, ibol gol de, man ijak rec m'ular uwok; kan iyabu dhoge de, ibinwang'u sente; iting' maeno, imi igi kakara wakudi de.

Matayo 18

- ¹I saa nica julub gibino ba Yesu, giwacu kumae, Ka kumeno ng'a ma dwong' ma sagu i ker m'i polo?
- ²Man elwong'o nyathin ma nyanok i bang'e ekethe de i kindgi,
- ³ewacu de kumae, Andha awacu iwu kumae, Tek wulokru ngo, wudoko calu nyithindho ma thindho de ngo, wubimondo i ker m'i polo ki ngo.
- ⁴Ka kumeno ng'atu ma tek bijwigre gire va nyathin ma nyanok maeni, ng'atuni e ma dwong' ma sagu i ker m'i polo.
- ⁵Man ng'atu ma tek bijolo nyathin ma nok acel ma kumeni i nyinga meca ejolo an.
- ⁶Ento ng'atu ma tek biketho acel m'i kind nyithindho ma thindho maeni m'uyia ukier, en e kuloka ire tek jung'abu pom i ng'ute, ka juthung'e ko the nam.

- ⁷Can wi ng'om kum gin ma ketho jukier! kum ebedo kumeno nia gin ma ketho jukier ukoubin be; ento can wi ng'atu maeno ma gin ma ketho jukier uwok ni kume!
- ⁸Man tek cingi kadi tiendi ketho ikieri, thume woko, baye kud i kumi: e ber iri ya imond i kwo kud abala mi bot kadi mi tielo, sagu ma tek ibedo ku cingi ario kadi tielo ario ma jubibolo i mac ma rondo ku rondo.
- ⁹Tek weng'i de ketho ikier, kabe woko, baye cen kud i kumi: en e ber iri ya imond i kwo ku weng'i acel, sagu ma tek ibedo ku weng'i ario ma jubibayu i gehena rni mac.
- ¹⁰Nen nia kud wucai acel m'i kind ju ma thindho maeni: kum awacu iwu, ya malaika migi m'i polo gineno wang' Vwa m'i polo thiri thiri.
- ¹¹Kum Wod dhanu bino nilaru ju m'urwinyo.
- ¹²Wuwacu nyo ang'o? tek ng'atu moko bedo ku rombe dak acel, acel m'i kindgi de kiewo, eweko pier abung'wen wi abung'wen ungo, eciho de wi got, man eyenyo maeno m'ukiewo ngo?
- ¹³Man tek ebedo kumeno nia enwang'e awacu iwu andha, mutoro nege i kume ma sagu mi pier abung'wen wi abung'wen m'ukiewo ngo.
- ¹⁴Kumeno en e yeny ma Wegwu ma ni i polo yenyo ngo, nia acel m'i kind ju ma thindho maeni urwiny.
- ¹⁵Man tek umeru dubo iri, cidh, inyuth ire dubo pare i kindwu wukude kendwu: tek ewinjoi, nwang'u wuripo kindwu wukud umeru.
- ¹⁶Ento tek ewinjoi ngo, gam ng'atu acel kadi ario mange wuci kugi, kara lembe ceke cung i jumulembe ario kadi adek.
- ¹⁷Man tek ekwero winjogi, yere ni kanisa: tek ekwero winjo kanisa bende, wek ebed iri calu Thekdhanumange ku won ajok bende.
- ¹⁸Andha awacu iwu, Gin ceke ma tek wubitwio i ng'om bibedo atwia i polo; gin ceke ke ma tek wubigonyo i ng'om jubigonyo i polo.
- ¹⁹Kendo awacu iwu, nia tek juario m'i ng'om cwinygi ripo pi gin moko ma gikwayu, Vwa m'i polo biketho etimbre igi.
- ²⁰Kum ka ma juario kadi adek gicokri ie karacelo i nyinga, anuti i kindgi kakeca.
- ²¹Petro lund ubino uwacu ire kumae, Rwoth, umira bidubo wang' adi ira, m'awek ire woko? kadok wang' abiro?
- ²²Yesu wacu ire kumae, Awacu iri ngo kumae, Cil wang' abiro; ento kumae, Cil pier abiro wang' abiro.
- ²³Ka kumeno ker m'i polo juporo kud ubimo moko m'uyenyo ekwan wel banja mi jumiru pare.

- ²⁴Man kan emaku kwanu, jukelo ng'atu acel i bang'e, m'ucamu banja pare talanto rubanga apar.
- ²⁵Ento kum ebedo ku gin moko ngo m'ecul, rwoth pare ng'olo ya jung'iewe, ku cege, ku nyithindho, ku gin ceke m'ebedo ko, man ecul wang' banja.
- ²⁶Ka kumeno jatic upodho piny erwo ire, ewacu kumae, Rwoth, twi cwinyi i kuma, man abiculo iri ceke.
- ²⁷E rwoth pa jatic nino, ma ngisi nege, egonye, eweko ire banjane woko.
- ²⁸Ento jamiru maeno ai, man enwang'u acel m'i kind jutic wagi, ma jabanja pare mi denarii dak acel: e emake, man edeyo dwande, ewacu kumae, Cul wang' banjane.
- ²⁹Kum kumeno jatic wadi podho piny epaku ire dhoge de, ewacu kumae, Koitwi cwinyi i kuma do, man abiculo iri.
- ³⁰E eyio ngo: ento ecidho ecwale i odkol, maram ebiculo ko wang' banjane.
- ³¹Kum kumeno ka jutic wadi gineno gin m'utimbre, can umakugi dit apila, man gibino giyero pi gin m'utimbre ni rwoth migi.
- ³²E rwoth pare lund ulwong'e i bang'e, man ewacu ire kumae, In i jatic ma rac, aweko banja maeno ceke iri, kum ipaku dhogi ira:
- ³³in ke emaku ngo itim ku ngisi kum jatic wedu, cil calu atimo ku kisa i kumi?
- ³⁴E kwinyo maku rwoth pare, emie de ni jusend, maram ebiculo banja maeno ceke.
- ³⁵E Vwa m'i polo bende bitimo iwu kumeno, tek wuweko kier rnir umego woko ngo kubeng'wu kubeng'wu ku i adundewu.

Matayo 19

- ¹Etimbre de ka Yesu daru lembe maeni eai kud i Galilaya ebino de i kieu Yahudi ma loka Yordan:
- ²e udul dhanu ma dit gilubo ng'eye; man ekeyo kumgi keca.
- ³Jufarisayo de gibino i bang'e, gimulo ie, giwacu kumae, Cik uyio ni ng'atu moko ya eriem cege kum lembe ceke?
- ⁴Man eloko lembe ewacu kumae, Wusomo ngo, nia ng'atu m'ucwiogi ku kwong'a ecwiogi ni nico ku nyaku,
- ⁵man ewacu kumae, Kum lembe nini nico biweko won ku min, man ebibedo ndhu ku cege; gin ario de gibidoko ni kum aceli?
- ⁶Kum kumeno gibibedo ario kendo ngo, ento ndhu kum acel. Ka kumeno gin ma Mungu ribo karacelo, dong' dhanu kud upok kindgi.

- ⁷Giwacu ire kumae, Ka ke yang' Musa ng'olo ya jumi waraga ma juwodho ko mon mir ang'o, jukethe cen de?
- ⁸Ewacu igi kumae, Musa yio wuwodh mon mu ni kum nwang' cwinywu: ento ugambre ku kwong'a ebedo kumeno ngo.
- ⁹Man awacu iwu kumae, Ng'atu ma tek biwodho cege, ma ku pi tarwang' ungo, eporo mange de nwang'u egiero gier: man ke ng'atu m'upore ma nwang'u juwodhe de nwang'u egiero gier.
- ¹⁰Julubne giwacu ire kumae, Tek lembe pa nico bedo kumeno giku cege, nwang'u gambri kulokane mbe.
- ¹¹Ento eloko igi lembe kumae, Dhanu ceke copo jolo lembe maeni ngo, ento ju m'emire igi re.
- ¹²Kum jumugumba nuti, ma meggi nyolo kogi anyola: jumugumba nuti de, ma dhanu dwokogi en ni jumugumba: jumugumba nuti de, ma gidwokri gigi ni jumugumba kum ker m'i polo. Ng'atu ma lembe nini jole ire, wek ejole.
- ¹³Julund jukelo nyithindho ma thindho i bang'e, kara eketh cinge i kumgi, erwo de: man julub gikwerogi.
- ¹⁴Ento Yesu wacu kumae, Wuwek nyithindho ma thindho, kud wukwergi, ku bino i bang'a: kum ker m'i polo en e mi ju ma wagi kumeno.
- ¹⁵Eketho cinge de i kumgi, e eai kakeca.
- ¹⁶Man nen, ng'atu acel ubino i bang'e man ewacu kumae, Japonji, gin ma ber ang'o m'abitimo, kara abed ku kwo ma rondo ku rondo?
- ¹⁷Man ewacu ire kumae, Nedi ipenja pi maeno ma beri? Ng'atu acel nuti ma en e ber: ento tek iyenyo imond i kwo, wor cik.
- ¹⁸Ewacu ire kumae, Manedi ke? Yesu wacu kumae, Kud ineg nek, Kud igier gier, Kud ikwal kwo, Kud inyuth lembe mi ndra,
- ¹⁹Yung wuru ku meru, man, Imar wedu calu imeri giri.
- ²⁰Jalawobi wacu ire kumae, Gin maeni ceke adaru woro: edong' ang'o ke ma fodi urem ira?
- ²¹Yesu wacu ire kumae, Tek iyenyo ibed ndhu cu, cidhi, ilok maeno m'ibedo ko, imi ni jucan de, man ibibedo ku piny m'akana i polo: ibin de, ilub ng'eya.
- ²²Ento ka jalawobi winjo lembene, eai ma can umake; kum en e ng'atu ma won piny ma dit.
- ²³Yesu wacu ni julubne kumae, Andha awacu iwu kumae, Mondo i ker m'i polo tek ni jalonyo.

- ²⁴Man kendo awacu iwu kumae, Kadhu ku wang' sindani yot ni ngamia, ma sagu mondo i ker pa Mungu ni jalonyo.
- ²⁵E ka julub giwinjo maeni, igi wang' lii apiia, giwacu kumae, Ka kumeno ng'a ma copo bothi?
- ²⁶Yesu neno bang'gi ewacu igi kumae, Maeni copre ngo ku dhanu; ento gin ceke copre ku Mungu.
- ²⁷Petro lund uloko lembe man ewacu ire kumae, Nen, waweko gin ceke, man walubo ng'ei: ka kumeno wabibedo ku girang'o?
- ²⁸E Yesu wacu igi kumae, Andha awacu iwu, Nia wun ma wniubo ng'eya, i nyol ma nyen ka Wod dhanu bijany wi komker mi dwong' pare, wun bende wubijany wi komker apar wi ario, ma wupoko ko lembe ni suru apar wi ario rnir Israel.
- ²⁹Man ku ba dhanu nzu m'uweko udi, kadi umego, kadi nyimego, kadi wego, kadi mego, kadi nyithindho, kadi ng'om pi nyinga, ebinwang'u acel bang' dak man ebicamu pacu mi kwo ma rondo ku rondo.
- ³⁰Ento dhanu dupa ma ma kwong'a bidong' cen; man m'udong' cen bibedo ma kwong'a.

Matayo 20

- ¹Kum ker m'i polo e calu ng'atu ma won ot, m'ucidho woko pir kugweno nigamu jutic m'utim i podho pare mir ulok.
- ²Ka giyio de giku jutic ya ceng' acel denarius, eorogi i podho pare mir ulok.
- ³Ecidho woko de va saa mir adege, man eneno jumange gicungo mananu i katali;
- ⁴man ewacu igi kumae, Wun bende wucidh i podho mir ulok, man gin m'umaku piny abimio iwu. E gicidho i yo migi.
- ⁵E ecidho kendo va saa mir abusiende bende ku mir abung'wende, man etimo kumeca.
- ⁶Man va saa mir apar wi acende ecidho woko, enwang'u jumange de gicungo acunga; man ewacu igi kumae, Wucungo keni ceng' du mananu nedi?
- ⁷Giwacu ire kumae, Kum ng'atu moko mbe ma fodumio iwa tic. Ewacu igi kumae, Wun bende wucidh i podho mir ulok.
- ⁸E ka piny udoko uthieno, rwoth mi podho mir ulok uwacu ni jakurpiny pare kumae, Lwong' jutic, mi igi sukulia migi, theke kum ma cen cil kum ma kwong'a.
- ⁹Ka ju ma jumio igi tic va saa mir apar wi acende gibino, gigamu denarius kubang'gi nzu.
- ¹⁰E ka ma kwong'ane gibino, giwacu nyo gibinwang'u m'usagu; e joni bende gigamu denarius kubang'gi nzu.

- 11** Ka gigamu de, ging'ur kum won ot,
- 12** giwacu kumae, Maeni ma cen gitimo saa acel kende, e idwokogi rom rom ku wan ngi, ma wasendra ku tic ma tek ceng' du ku lietho ceng' ma kec.
- 13** Ento eloko lembe man ewacu ni acel m'i kindgi kumae, Jarimona, atimi rac ungo: wayio wakudi ngo pi denarius?
- 14** Ting' maeno ma peri, ici ko; ayenyo ami ni maeni ma cen, calu amio iri.
- 15** Cik uyio ira ngo ya atim gin m'ayenyo ku para ma dhe? kadi weng'i bedo rac, kum an a beri?
- 16** Kum kumeno m'udong' cen gibibedo ma kwong'a, ma kwong'a de bidong' cen.
- 17** Man ka Yesu beidho malu Yerusalem, egamu julubne apar wi ario ecidho kugi cen, man ewacu igi kumae i yo,
- 18** Nen, waidho malu Yerusalem; Wod dhanu de jubimie ni julam ma dongo ku jugorcik; man gibipoko lembe pare rac de ya etho,
- 19** gibimie de ni Thekdhanumange ya gicaye, gifode de, man gigure: i ceng' mir adege ke ebicer.
- 20** Meg wot Zebedayo ulund ubino i bang'e ku wote, m'eberwo ko ire, ekwayu gin moko de i bang'e.
- 21** Man ewacu ire kumae, Iyenyo ang'o? Ewacu ire kumae, Dong' ing'ol ya wota ario maeni gibin gijany, acel yo ku cingi ma yor acwic, acel ke yo ku cingi ma yor acam, i ker peri.
- 22** Ento Yesu loko lembe, ewacu kumae, Wung'eyo gin ma wukwayu ngo. Wucopo madhu kikombe ma fodi nyanok abimadhu? Giwacu ire kumae, Wacopo.
- 23** Ewacu igi kumae, Kikombe para wubimadhu andha: ento bedo yo ku cinga ma yor acwic, yo ku cinga ma yor acam de, en e para ngo ya ami; ento en e ni ju ma Vwa yiko igi.
- 24** E ka juapar giwinjo maeni, gibedo ku konda kum utumego ario.
- 25** Ento Yesu lwong'ogi i bang'e, man ewacu igi kumae, Wung'eyo nia jubim mi Thekdhanumange girwodho i wigi, man ke judongo migi ging'olo lembe i wigi.
- 26** Ebibedo kumeno ngo i kindwu: ento ng'atu ma tek uyenyo ebed dwong' i kindwu, ebibedo ni jatim iwu;
- 27** man ng'atu ma tek uyenyo ebed ma kwong'a i kindwu ebibedo ni jamiru mu:
- 28** cil calu Wod dhanu bino ya jutim ire ngo, ento kara etim, emi kwo pare de ni gony mi dhanu dupa.
- 29** Man ka giai Yeriko udul dhanu ma dit gilubo ng'eye.

³⁰Man nen, dhanu ario ma abinga gibedo dhu yo, ka giwinjo nia Yesu bekadhu, gikok akoka, giwacu kumae Rwoth, bed ku kisa i kumwa, in i wod Daudi.

³¹Udul dhanu de gijukogi ya gibed ling': ento gikok m'usagu, giwacu kumae, Rwoth, bed ku kisa i kumwa, in i wod Daudi.

³²E Yesu cungo ti, elwong'ogi de, man ewacu kumae, Wuyenyo ya atim ang'o iwu?

³³Giwacu ire kumae, Rwoth, wayenyo nia wang'wa yabre.

³⁴E Yesu, ma ngisi benege, emulo wang'gi: e eni eni gimaku neno piny, man gilubo ng'eye.

Matayo 21

¹Man ka gidhingo Yerusalem, gibino de Bethfage, ba got Zeituni, Yesu lund uoro julub ario,

²ewacu igi kumae, Wucidh i pacu m'i weng'wu, e eni eni wubinwang'u kana m'ubedo atwia, giku nyathine: wugonygi, wukelgi de i bang'a.

³Man tek ng'atu moko wacu lem moko iwu, wubiwacu kumae, Candgi benego Rwoth; e ndhu ndhu ebiorogi.

⁴Nie maeni timbre, kara lembe ma yang' jabila yero timbre kakare, m'ewacu kumae,

⁵Wuyer ni Nyasayuni Nen, Ubimo peri bebino i beng'i, Emol ebewotho de ku wi kana, Wi nyathi kana ma thwone.

⁶Julub gicidho, man gitimo cil calu Yesu ng'olo igi,

⁷e gikelo kana, ku nyathine de, gipedho kendi migi de i wigi; man ejany i wie.

⁸Man udul dhanu kucel ma dit gipedho kendi migi i yo; jumange ke gitong'o jang yen, gipedhogi de i yo.

⁹E udul dhanu ma wi piro, ku ju m'udong' cen de, gikok, giwacu kumae, Hosana ni wod Daudi: mugisa ni ng'atu m'ubino ku nying' Rwoth; Hosana ma malu ngbir.

¹⁰E kan ebino i Yerusalem, adhura bo igi wang' lii, giwacu kumae, Maeni ng'a?

¹¹Man udul dhanu giwacu kumae, Maeni en e jabila, Yesu, ma Nazareti mi Galilaya.

¹²E Yesu mondo i hekalu pa Mungu, man eriemo dhanu ceke m'uloko piny m'ung'iewo ng'ieu de i hekalu, eredho mesa mi juwilsente de, ku kom mi ju m'uloko akuru de;

¹³ewacu igi de kumae, Eгоре kumae, Ot para jubilwong'o odrwo: ento wukethe ni kagonjo mi weg ayeki.

- 14**Ju ma abinga ku ju ma weg abala m'i tielo gibino i bang'e i hekalu; e ekeyo kumgi.
- 15**Ento ka julam ma dongo ku jugorcik gineno gin ma wang'u ijo m'etimo, kud awia m'ubekok akoka i hekalu ma giwacu kumae, Hosana ni wod Daudi; e konda makugi dit,
- 16**man giwacu ire kumae, Iwinjo gin ma joni beyero? E Yesu wacu igi kumae, Eyo: fodi wusomo ngo kumae, Ibedo ku pakupak ma cu ku dhu mukere ku nyithindho ma fodhoth de?
- 17**Man ewekogi, eai kud i adhura ecidho Bethania, e egonjo keca.
- 18**Nie kugweno kan ebedwogo i adhura kec ubenege.
- 19**E kan eneno ulam dhu yo, ebino i bang'e, enwang'u gin moko de mbe i wie, ento ithe kende; man ewacu ire kumae, Dong' nyingi kud ucek i kumi ki cil nja ku nja. E ulam uner ndhu ndhu nica.
- 20**E ka julub ginene, igi wang' lii, giwacu kumae, Ulam uner woko aringa ringa e nenedi?
- 21**E Yesu loko lembe ewacu igi kumae, Andha awacu iwu kumae, Tek wubedo ku yioyic, cwinywu de bedo jiji ngo, wubitimo gin m'utimbre ni ulam kende ngo, ento tek wubiwacu cil ni got maeni, Dong' juting'i jubei de i nam, e ebitimbre.
- 22**Man gin ceke, ma tek wubikwayu i rwo, wuyio de, wubigamu.
- 23**E kinde m'emondo i hekalu, julam ma dongo ku judongo mi dhanu gibino i bang'e kan ebeponjo, man giwacu kumae, Itimo gin maeni ku ng'ol manedi? ng'a m'umio iri ng'ol maeni?
- 24**E Yesu loko lembe, ewacu igi kumae, An bende abipenjawu ku penji acel, ma tek wuyero ira, an bende abiyero iwu pi ng'ol m'atimo ko gin maeni.
- 25**Baputisi pa Yohana, uai kani? uai i polo kadi ba dhanu? E giporo lembe i kindgi gigi, giwacu kumae, Tek wabiwacu kumae, Uai i polo; ebiwacu iwa kumae, Ka kumeho wukwero yie nedi?
- 26**Ento tek wabiwacu kumae, Uai ba dhanu; walworo udul dhanu; kum dhanu ceke giyio nia Yohana en e jabila.
- 27**E giloko lembe ni Yesu, giwacu de kumae, Wang'eyo ngo. En de ewacu igi kumae, Kadok an bende ayero iwu ngo pi ng'ol m'atimo ko gin maeni.
- 28**Ento wuwacu nyo ang'o? Ng'atu moko bedo ku wote ario; ebino de ba ma kayu, ewacu kumae, Woda, ci tim tic i podho mir ulok tinuni.
- 29**Man eloko lembe ewacu de kumae, Ayenyo ngo; ento macen elokre, ecidho de.
- 30**Ebino de ba mir arionde, ewacu de kumeca. Man eloko lembe ewacu kumae, Acidho, rwoth: ere ecidho ngo.

- ³¹Makani ma kind juario m'utimo ka cwiny woni? Giwacu kumae, Ma kwong'ane. Yesu wacu igi kumae, Andha awacu iwu, nia weg ajok ku weg tarwang' gilar gimondo iwu i ker pa Mungu.
- ³²Kum Yohana bino i beng'wu i yo mi bedopwe, wuyie de ngo; ento weg ajok ku weg tarwang' e ma giyie; wun de, ka wuneno maeni, macen wuloko cwinywu ngo, kara wuyie.
- ³³Wuwinj lembabola mange: Ng'atu moko nuti ma won ot, m'upidho podho mir ulok, etwode kud arara de, ekunyo ka ma jubio ie nying ulok bende, man egomo odtra, emie de ni jutipodho, en ke eciidho i ng'om mange.
- ³⁴E ka nindo mi nyinge dHINGO, eoro jumiru pare ba jutipodho, gici gigam nyinge.
- ³⁵E jutipodho gimaku jumiru pare, gifodo ng'atu acel, mange ke ginego, mange ke gicanyu ku kidi.
- ³⁶Kendo, eoro jumiru mange ma sagu ma kwong'a: e gitimo de kumeca i kumgi.
- ³⁷Ento macen edong' eoro wode i bang'gi, ewacu kumae, Gibijwigri ni woda.
- ³⁸Ento jutipodho, ka gineno wode, giweco i kindgi gigi kumae, Meni jacampacu; wubin, dong' wanegue, wagemu camupacu pare.
- ³⁹E gimake, gicwale woko kud i podho mir ulok, ginege de.
- ⁴⁰Ka kumeno ka rwoth rni podho rnir niok bibino, ebitimo ang'o kum jutipodho nino?
- ⁴¹Giwacu ire kumae, Ebinyotho dhanu ma rac maeno ku rac, man ebimio podho mir ulok ni jutipodho mange, ma bimio ire nyinge ku ba nindo migi.
- ⁴²Yesu wacu igi kumae, Fodi wusomo ngo i lembagora pa Mungu kumae, Kidi ma jugomot gikwero, En nini ma judwoke ni wi gul; Maeni ai ba Rwoth, Man en e gin ma wang'u ijo i wang'wa?
- ⁴³Ka kumeno awacu iwu kumae, Jubikabu ker pa Mungu woko kud i beng'wu, jubimie de ni thek ma cego nyingene.
- ⁴⁴Man ke ng'atu m'upodho wi kidi maeni ebing'wekre nziki nziki: ento ng'atu ma tek ebipodho i wie, ebikethe pamir utur.
- ⁴⁵E ka julam ma dongo ku Jufarisayo giwinjo lembabola pare, ging'eyo nia eyero pigi.
- ⁴⁶E ka giyenyo gimake, lwordo makugi ni udul dhanu, kum kud i wang'gi en e jabila pa Mungu.

Matayo 22

- ¹E Yesu loko lembe man eyero igi kendo ku lembabola, ewacu kumae,
- ²Ker m'i polo pore kud ubimo moko, m'utimo agba mir ambadha ni wode,

- ³m'uroro jumiru pare ulwong' ju ma juwaku ni kwend ambadha: e gikwero bino.
- ⁴Eoro jurniru mange kendo, ewacu kumae, Yer ni ju ma juwakugi kumae, Nen, ayiko cemo para; koni dhiang' para ku lim para m'ucwe de junego, gin ceke de bedo ayika: wubin bang' agba mir ambadha.
- ⁵Ento gidwoko lembene ni tara, gicidho de i yo migi, acel ba podho pare, mange kuloka pare;
- ⁶ju m'udong' ke gimaku jumiru pare, man gitimogi rac, ginogogi de.
- ⁷Ento kwinyo maku ubimo; man eoro njuru asikari pare, ninyotho junek nino, ewang'u adhura rnigi de.
- ⁸Elund ewacu ni jumiru pare kumae, Ambadha bedo ayika, ento ju ma juwakugi giromo ngo.
- ⁹Ka kumeno wucidh i akarayo, dhanu ceke de ma wubinwang'u wulwong'gi i agba mir ambadha.
- ¹⁰Jumiru nino gicidho i gengi, gicoko dhanu ceke karacelo ma ginwang'u ju ma pigi rac ku ju ma pigi ber bende: e ambadha dhir ku ju ma julwong'o.
- ¹¹Ento kan ubimo mondo nineno ju ma julwong'ogi, eneno ng'atu acel keca m'ukendo kendi mir ambadha ngo:
- ¹²man ewacu ire kumae, Jarimo, imondo kakeni nenedi m'ikendo kendi mir ambadha ngo e? E dhoge tal kau.
- ¹³Ubimo lund uwacu ni jumiru kumae, Wutwi cinge ku tiende, man wubaye i mudho ma woko; ywak ku kayu lak de bibedo nuti.
- ¹⁴Kum julwong'o dhanu dupa, ento dhanu ma nyanok re ma jugoyo nying'gi.
- ¹⁵Jufarisayo gilund gicidho, man giporo lembe maram gicopo make ko kud uwic kum wec pare.
- ¹⁶Gioro julub migi de i bang'e, Juherodiano, giwacu kumae, Japonji, wang'eyo nia in i ng'atu mandha, man iponjo yo pa Mungu i lemandha, man iparu pi ng'atu moko de ngo: kum ineno dhanu ni wang'gi ngo.
- ¹⁷Ka kumeno wac iwa, Iwacu nyo ang'o? Cik uyio ya jumi ajok ni Kaisari, kadi ungo?
- ¹⁸Ento Yesu ng'eyo dubo migi, man ewacu kumae, Nedi wumulo ia, wu weg ambili?
- ¹⁹Wunyuth ira sente mir ajok. E gikelo ire denarius acel.
- ²⁰E ewacu igi kumae, Ayi maeni en e pa ng'a ku ramblembe de?
- ²¹Giwacu ire kumae, Pa Kaisari. Elund ewacu igi kumae, Ka kumeno wumi ni Kaisari gin pa Kaisari; ni Mungu de gin ma pa Mungu.

- ²²E ka giwinjo maeni, igi wang' lii, man giweke, gicidho.
- ²³Ceng' nica nwang'u Jusadukayo gibino i bang'e gi ju ma wacu ya cer umbe: man gipenje,
- ²⁴giwacu kumae, Japonji, Musa wacu kumae, Tek ng'atu acel utho, ma nyithindho pare mbe, umin mire bigamu dhaku pare, man ebinyayu kodhi ni umin.
- ²⁵Nwang'u umego abiro nuti kudwa: ma kwong'ane gamu dhaku, man etho, man kum kodhi mbe eweko cege ni umin mire;
- ²⁶mir arionde de kumeca, ku mir adegge, cil kum mir abirone de.
- ²⁷Yo ng'eigi ceke de, dhaku tho.
- ²⁸Ka kumeno i cer ebidong' bedo ci ng'a ku kind juabiro? kum kagi ceke gibedo kude.
- ²⁹Ento Yesu loko lembe ewacu igi kumae, Wukier, ma wung'eyo ko lembagora pa Mungu ngo, kadok tego pa Mungu de ngo.
- ³⁰Kum i cer gibigambri ngo, kadi jurnio de ngo ya jugam, ento gibedo calu malaika m'i polo.
- ³¹Ento pi cer mi ju m'utho, fodi wusomo maeno ngo ma Mungu yero iwu, m'ewacu kumae,
- ³²An a Mungu pa Ibrahim, Mungu pa Isak de, man Mungu pa Yakobo? Mungu en e Mungu mi ju m'utho ngo, endre mi ju ma kwo.
- ³³E kan udul dhanu giwinjo maeni, igi wang' lii kum ponji pare.
- ³⁴Ento Jufarisayo, ka giwinjo nia eketho Jusadukayo giling', gicokri karacelo gigi.
- ³⁵E ng'atu acel m'i kindgi, ma en e jaeuthecik, epenje ku penji, emulo ko ie kumae:
- ³⁶Japonji, lembang'ola makani ma dit i ciki?
- ³⁷Man ewacu ire kumae, Mar Rwoth Mungu peri kud adundeni ceke, ku ng'eyong'ec de ceke, man ku pidoii ceke.
- ³⁸Maeni en e lembang'ola ma dwong' ku ma kwong'a de.
- ³⁹Man mir arionde ma calkude e eni, Mar wedu calu in giri.
- ⁴⁰Wi lembang'ola ario maeni cik kpo, ku jubila de lwobre i kume.
- ⁴¹Nie ka Jufarisayo gicokri karacelo, Yesu penjogi ku penji,
- ⁴²ewacu kumae, Iwu pido nik ang'o pi Kristu? e wod ng'a? Giwacu ire kumae, E wod Daudi.
- ⁴³Ewacu igi kumae, Ka kumeno nedi Daudi lwong'e Rwoth i Tipo, m'ewacu kumae,

⁴⁴Rwoth uwacu ni Rwoth para, Jany yo ku cinga ma yor acwic, Maram aketh ko jukwoji the tiendi?

⁴⁵Ka kumeno tek Daudi lwong'e Rwoth, e kan edong' ebedo wode nenedi?

⁴⁶E ng'atu moko mbe ma copo dwoko wang' lembe ire, kadok ng'atu moko ma cwinye tek kum penje ku penji moko mange de mbe ugambre i ceng' maeca.

Matayo 23

¹Yesu lund uyero ni udul dhanu ku julubne,

²ewacu kumae, Jugorcik ku Jufarisayo de gijany wi kom pa Musa:

³ka kumeno gin ceke ma tek giwacu iwu, dong' wutim wuwor de: ento kud wutim calku tic migi; kum giwacu, man gitimo ngo.

⁴Eyo, gitwio ter ma pek ma yeyo tek, gikethogi de wi gok dhanu; ento gin gigi giyenyong' ngo gicorgi ku lwetgi acel.

⁵Ento tic migi ceke gitimo kara dhanu ginen: kum giketho ngisa migi mi lem pa Mungu udok lac, man gikoko dhu kendi migi de,

⁶gimaru ka m'usagu de i agba, ku kom m'usagu i kacokri,

⁷ku moth ma i katali, man ya dhanu lwong'gi kumae, Japonji.

⁸Ento wun re ku julwong'wu Japonji: kum japonji mu en e acel, man wun ceke wun umego.

⁹Man kud wulwong' ng'atu moko ya wegwu i ng'om: kum ng'atu acel e ma Wegwu, en e ng'atu ma ni i polo.

¹⁰Kadok ku julwong'wu judongo: kum ng'atu acel e ma jadit mu, en e Kristu.

¹¹Ento ng'atu ma dit ma sagu wagi i kindwu ebibedo jatim iwu.

¹²Man ng'atu ma tek bitingre gire jubijwige; man ng'atu ma tek bijwigre gire e ma jubiyunge.

¹³Ento can i wiwu, jugorcik ku Jufarisayo, weg ambili! kum wuciko dhu ker m'i polo i wang' dhanu: kum wun giwu wumondo ngo, kadok ju m'ubemondo de wuyio ngo ya gimondi.

¹⁴Can i wiwu, jugorcik ku Jufarisayo, weg ambili! kum wucamu udi mi mon ma coggi tho, cil kinde ma wuguro rwo ma bor: kum kumeno wubinwang'u lembapoka ma rac ma sagu.

¹⁵Can i wiwu, jugorcik ku Jufarisayo, weg ambili! kum wutieko nam ku ng'om de kara wunwang' jalub acel; man kan edoko kumeno, wudwoke ni wod gehena ma sagu wun giwu wang' ario.

¹⁶Can i wiwu, wu jutelwrjo ma wun abinga, ma wuwacu kumae, Ng'atu ma tek bikwong' o kwong' ku hekalu, en e mananu; ento ng'atu ma tek bikwong' o kwong' ku mola ma kwar mi hekalu, en e jabanja.

¹⁷Wu jukusegu abinga de: kum makani ma dit ma sagu, mola ma kwar kadi hekalu ma dwoko mola ma kwar leng'i?

¹⁸Man ke kumae, Ng'atu ma tek bikwong' o kwong' ku pemblam, en e mananu; ento ng'atu ma tek bikwong' o kwong' ku giramia ma ni i wie, en e jabanja.

¹⁹Wun abinga: kum makani ma dit ma sagu, giramia, kadi pemblam ma dwoko giramia leng'i?

²⁰Ka kumeno ng'atu m'ukwong' o kwong' ku pemblam, nwang'u ekwong' o kude, ku gin ceke ma ni i wie de.

²¹Man ng'atu m'ukwong' o kwong' ku hekalu, nwang'u ekwong' o kude, ku ng'atu m'ubedo i ie de.

²²Man ng'atu m'ukwong' o kwong' ku polo, nwang'u ekwong' o ku komker pa Mungu, ku ng'atu m'ujany i wie bende.

²³Can i wiwu, jugorcik ku Jufarisayo, weg ambili! kum wumio apaje mir ukuju, ku thoki, man atingli, man wuweko gin ma pek mi cik, ku pokolembe ma pwe, man kisa, ku yioyic: ento emaku wutim gin maeni, man kud wuwek timo gin maeni de.

²⁴Wujutelwijo ma wun abinga, wuluro jur woko, man wumwonyo ngamia!

²⁵Can i wiwu, jugorcik ku Jufarisayo, weg ambili! kum wulonyo yo ng'ei kikombe ku yo ng'ei atangla, ento kuvuga kud awanya ma rac upong' yor i igi.

²⁶In i Jufarisayo ma abinga, ilar ilony yo i kikombe kud atangla de, kara yo ng'eigi bende dok leng'.

²⁷Can i wiwu, jugorcik ku Jufarisayo, weg ambili! kum wu calu odliel ma jufuyo ku vulo, ma nen ber ku yo woko, ento cogo dhanu m'utho pong' yor i igi, ku sasa ceke.

²⁸Cil kumeno wun bende dhanu nenowu pwe ku yo woko, ento ku yor i iwu wupong' kud ambili man camuco.

²⁹Can i wiwu, jugorcik ku Jufarisayo, weg ambili! kum wugomo odliel mi jubila, man wuruko odliel mi weg bedopwe,

³⁰wuwacu de kumae, Tek wanuti i ceng' ma kwaruwa nuti i ie, kuno di waribra kugi ngo i rimo mi jubila.

³¹Kum kumeno wunyuthiu giwu, ya wu wot ju m'unego jubila.

³²Ka kumeno dong' wupong' mukero pa kwaruwu.

³³Wu thwol, wu nyikwai urobi, wucopo piei ni lembapoka mi gehena nenedi?

³⁴Ka kumeno, nen, aoro jubila i beng'wu, ku jurieko, man jugorcik: jumoko m'i kindgi de wubinego wubigurogi de; jumoko de m'i kindgi wubifodogi i kacokri mu, man wubinyayu ragedo i kumgi ku bang' adhura ku bang' adhura:

³⁵kara rimo ceke ma pwe m'uthwogre wi ng'om, ubed i wiwu ugambre kum rimb Habil ma pwe cil ku rimb Zakaria ma wod Barakia, ma wunego i kind hekalu ku pemblam.

³⁶Andha awacu iwu kumae, Gin maeni ceke bibino i wi dhanum'utuk maeni.

³⁷E Yerusalem, Yerusalem, m'unego jubila, m'ucanyu ju ma juorogi i bang'e de ku kidi! wang' udul ngi ayenyo acok nyithindho peri karacelo, cil calu rnin gweno coko nyithindhe the bombe, e wuyenyo ngo!

³⁸Nen, ot mu juweko iwu ni uvuru.

³⁹Kum awacu iwu kumae, Ugambre kawono wubinena kendo ngo, cil ma wubiwacu ko kumae, Mugisa ni ng'atu m'ubino ku nying Rwoth.

Matayo 24

¹E Yesu ai woko ku i hekalu, ebecidho de i yo pare; man julubne gibino i bang'e ninyutho ire gom mi hekalu.

²Ento eloko lembe ewacu igi kumae, Wuneno gin maeni ceke ngo? andha awacu iwu kumae, Jubiweko kidi acel de ngo keni wi wagi ma jukubibolo piny ungo.

³Kan ebedo de wi got Zeituni, julub gibino i bang'e nyalwe, giwacu kumae, Wac iwa, gin maeni bitimbre awene? man giranyutha mi bino peri en e ang'o, ku mi kajik mi ng'omi?

⁴Man Yesu loko lembe ewacu igi kumae, Wukuru kara ng'atu moko kud uwingwu.

⁵Kum dupa bibino i nyinga, ma gibiwacu kumae, An a Kristu; man gibiwingo dhanu dupa.

⁶Man wubiwinjo pir ali ku rwong ali de; wunen nia cwinywu kud ung'abre: kum gin maeni bikotimbre be; ento nwang'u kajikne fodi.

⁷Kum thek bijai kum thek, ker de ni ker; ndruru de bipodho ku digidi i ka ma nge nge.

⁸Ento gin maeni ceke en e landu wi can.

⁹E gibilund miowu ni masendi, man gibinegowu: thek ceke de bidaguwu kum nyinga.

¹⁰Dhanu dupa de bilund kier, gibimiri de, man gibidagri.

¹¹Jubila mi ndra de dupa gibiwok, man gibiwingo dupa.

¹²Kum camuco de bimedre, mer mi dhanu dupa de bidoko ng'ic.

- ¹³Ento ng'atu ma biciro cil i kajikne, ng'atuno biboth.
- ¹⁴Man lembanyong'a maeni mi ker jubiyero i ng'om ngung' ni lembatuca ni thek ceke; e kajik bilund wok.
- ¹⁵Ka kumeno ka wuneno gin mir adegi mi nyoth, ma yang' Daniel wacu pire, ucungo i kamaleng' (wek ng'atu m'usomo ung'ei),
- ¹⁶wuwek ju ma gini i Yahudi gilund giring ba got:
- ¹⁷dong' ng'atu ma ni wi ot de kud elor piny niwodho jamb ot pare:
- ¹⁸ng'atu ma ni i podho de dong' kud edwog nigamu kendi pare.
- ¹⁹Ento can ni ju ma igi nuti ku ju ma ketho judhoth i ceng' maeno!
- ²⁰Wurwo de ya ringong'wec mu kud ubed i nindo mi koyo, kadok ceng' sabatu:
- ²¹kum i nindo maeno masendi ma dit bibedo nuti, ma wagi maeno fokuwok ungo ugambre i thekri mi ng'om cil ku kawono de, ungo, kadi cil rondo ku rondo de biwok ungo.
- ²²Man tek jukujwigo ceng' maeno ngo, kuno di kum moko mbe m'ubin uboth: ento ni ju ma yang' jugoyo nying'gi re ceng' nino jubijwigo.
- ²³I nindo maeno tek ng'atu moko biwacu iwu kumae, Nen, Kristu nuti keni, kadi, Kae; kud wuyi.
- ²⁴Kum ju ma gi Kristu rni ndra gibiwok, man jubila mi ndra de, man gibinyutho giranyutha ma dit ku musana; kara giwing ko cil ju ma jugoyo wigi de, tek ecopre.
- ²⁵Nen, alar ayero iwu.
- ²⁶Ka kumeno tek giwacu iwu kumae, Nen, eni i langa; kud wuwok woko: Nen, eni i kusika; kud wuyi.
- ²⁷Kum calu lukoth uai yo nyangu, junene de cil yo reto; e bino pa Wod dhanu de bibedo kumeca.
- ²⁸Ka ma tek avu ni i ie acuth bicokri karacelo kakeca.
- ²⁹Ento ndhu ndhu yo ng'ei masendi mi ceng' maeno ceng' bidoko col, dwi de birieny ungo, cero de bioi kud i polo, tego mi polo de biyengre;
- ³⁰e giranyutha pa Wod dhanu bilund wok i polo: e can bilund nego suru ceke m'i ng'om, man gibineno Wod dhanu bebino wi afuru m'i polo ku tego ku dwong' ma dit de.
- ³¹Man ebioro malaika pare ku dwand agwara ma dit, e gibicoko ju ma jugoyo nying'gi karacelo kud i the yamu ang'wen, kud i tung polo kun ku kun de.
- ³²Nie wuponj ng'eyo lembabola ni kum ulam: kmde ma jange doko yom, elodho ithe de, wung'eyo ya cwir ni ceng'ni;

- ³³cil wun bende kumeno, ka wuneno gin maeno ceke, wung'ei ya eni ceng'ni, cil dhugola.
- ³⁴Andha ayero iwu kumae, Dhanum'utuk maeni bikadhu woko ngo, ma fodi gin maeni ceke kutimbre kakare ngo.
- ³⁵Polo ku ng'om bikadhu woko, ento lembe para bikadhu woko ngo.
- ³⁶Ento ceng' nino ku saane de ng'atu moko mbe m'ung'eyo pire, cil ku malaika m'i polo de, kadok Wod, ento Wego kende.
- ³⁷Man ke calu yang' ceng' pa Noa bedo, e bino pa Wod dhanu de bibedo kumeca.
- ³⁸Kum calu i ceng' maeca ma fodi pi ma dit m'uumo ng'om kuwok ungo gibecamu gibemadhu de, gibegambri gibemio de ya jugam, cil i ceng' ma Noa mondo ko i avur,
- ³⁹e ging'eyo ngo maram pi ma dit m'uumo ng'om uwok ko, man eterogi ceke woko, e bino pa Wod dhanu bibedo kumeca.
- ⁴⁰I nindo maeno dhanu ario bibedo i podho; acel ugambre, acel ke dong':
- ⁴¹mon ario de birego rego wi pom: acel ugambre, acel ke dong'.
- ⁴²Ka kumeno wuki: kum wung'eyo ngo ceng' ma Rwoth mu bino i ie.
- ⁴³Ento wung'ei maeni, nia dok won ot ung'eyo ka kur ma jakwo bino i ie, kuno di ekuro, kuno di eyio ngo ya jutur ot pare.
- ⁴⁴Ka kumeno wun bende wubed ayika; kum Wod dhanu bino i saa ma wuwacu nyo ngo.
- ⁴⁵Ka kumeno ng'a ma jamiru mandha ma riek de, ma rwoth pare kethe wi juode, ya emi igi cemo migi i nindone?
- ⁴⁶Mugisa ni jamiru maeno, ma rwoth pare kan ebino binwang'u ebetimo kumeca.
- ⁴⁷Andha awacu iwu, ya ebikethe wi gin ceke m'ebedo ko.
- ⁴⁸Ento tek jamiru ma rac maeno biwacu i adundene kumae, Rwoth para galu:
- ⁴⁹man ebimaku fodo jutic wadi, man ebicamu ku madhu de karacelo ku ju ma mer:
- ⁵⁰e rwoth pa jamiru maeno bibino i ceng' m'ewacu nyo ngo, i saa de m'eng'eyo ngo,
- ⁵¹man ebifode dit, ebiketho maka pare karacelo ku weg ambili: ywak ku kayu lak de bibedo nuti.

Matayo 25

- ¹Ker mi polo jubilund poro ku jumanyir apar ma gi sumba, ma gigamu thala migi, gicidho de nirombo ku cwar mugole.

- ²Juabic m'i kindgi gi jukusegu, abic ke gi jurieko.
- ³Kum ju ma gi jukusegu, ka gigamu thala migi, gigamu ku moje ngo:
- ⁴ento ju ma gi jurieko giting'o mo i upoko migi ku thala migi.
- ⁵Nie kinde ma cwar mugole galu kagi ceke rip rip uterogi e ginindo.
- ⁶Ento i diewor ma ling' jukok akoka kumae, Nen, cwar mugole! Wuwok wung'ole.
- ⁷E jumanyir ma sumba maeno ceke gilund giai malu, gimaku yiko thala migi.
- ⁸Man ju ma gi jukusegu giwacu ni ju ma jurieko kumae, Wumi iwa kum mo mu moko do; kum thala mwa betho.
- ⁹Ento ju ma gi jurieko gidwoko lembe, giwacu kumae, Kuno nyo ebiromo wan wakudu de ngo: maku wuci ba jukuloka, man wung'ieu mu giwu.
- ¹⁰E kinde ma gicidho ning'iewo, cwar mugole wok; e ju ma giyikri gimondo gikugi ba cemo mir ambadha: e juciko dhugola.
- ¹¹Ku ng'eye jumanyir wadi ma sumba de gibino giwacu kumae, Rwoth, Rwoth yab iwa do.
- ¹²Ento eloko lembe, ewacu kumae, Awacu iwu andha, Ang'eyowu ngo.
- ¹³Ka kumeno dong' wuki, kum wung'eyo cenge kadi saane de ngo.
- ¹⁴Kum en e calu ka ng'atu acel ubecidho i ng'om mange, elwong'o jumiru pare ma dhe, emio jupiny pare de igi.
- ¹⁵Ni ng'atu acel emio talanto abic, ni ng'atu mange de ario, ni mange ke acel, kubang'gi nzu ng'atuman calu ma kakore; e ecidho i woth pare.
- ¹⁶Ndhu ndhu nica ng'atu m'ugamu talanto abic ecidho eloko ko talanto abic mange.
- ¹⁷Ng'atu m'ugamu ario bende kumeca eloko ario mange.
- ¹⁸Ento ng'atu m'ugamu acel re ecidho ekunye i ng'om, ekanu sente pa rwoth pare.
- ¹⁹Nie ka nindo ton hai rwoth mi jumiru maeno bino, e gikwanu wel gikugi.
- ²⁰Ng'atu m'ugamu talanto abic ebino ekelo talanto abic mange, ewacu kumae, Rwoth, imio ira talanto abic: nen, aloko talanto abic mange.
- ²¹Rwoth pare loko ire lembe kumae, Itimo dre, i jatic ma ber mandha de: ibedo mandha i gin ma nyanok, abikethi wi gin dupa; mond i mutoro pa rwoth peri.
- ²²Ng'atu m'ugamu talanto ario bende ebino ewacu kumae, Rwoth imio ira talanto ario: nen, aloko talanto ario mange.

- ²³Rwoth pare wacu ire kumae, Itimo dre, i jatic ma ber mandha de: ibedo mandha i gin ma nyanok, abikethi wi gin dupa; mond i mutoro pa rwoth peri.
- ²⁴Ng'atu m'ugamu talanto acel ubino bende ewacu kumae, Rwoth, ang'eyo nia in i ng'atu ma lembe peri tek, ikayu ka ma icoyo i ie ngo, icoko de ka m'imoyo i ie in ungo;
- ²⁵e lworo maka, acidho de akanu talanto peri i ng'om: nen, piny peri ni giri.
- ²⁶Ento rwoth pare loko lembe ewacu ire kumae, In i jatic ma rac ma janyap bende, ing'eyo nia akayu ka m'acoyo an ungo, acoko ka m'aketho i ie an ungo;
- ²⁷ka kumeno maku iketh sente para ba juwil sente, kara kan abino agam gira ku kniokane de.
- ²⁸Ka kumeno wumai talanto woko kud i bang'e, wumi de ni ng'atu ma won talanto apar.
- ²⁹Kum ku ba dhanu ceke ma tek ubedo ko emire ire, man ebibedo ko le: ento ng'atu m'ubedo ko ngo, cil maeno m'ebedo ko de jubimayu woko.
- ³⁰Man wubai jamiru ma kuloka pare mbe i mudho ma woko: ywak ku kayu lak de bibedo nuti.
- ³¹Ento ka Wod dhanu bibino i dwong' pare, ku malaika ceke gikugi, ebilund jany wi komker mi dwong' pare:
- ³²man thek ceke bicokri i wang'e: man ebikoyo kindgi ku juwagi, calu jakwac koyo rombe ku kind diegi;
- ³³man ebiketho rombe yo ku cinge ma yor acwic, diegi ke yo ku cinge ma yor acam.
- ³⁴Ubimo bilund wacu ni ju ma yo ku cinge ma yor acwic kumae, Wubin wu ju ma Vwa dwokowu jumugisa, wucam pacu mi ker m'ubedo ayika iwu ugambre i thekri mi ng'om:
- ³⁵kum nwang'u kec unega, man wumio ira acam; nwang'u rieu unega, man wumio ira giramadha; nwang'u a welo, man wujola;
- ³⁶muneru de, man wuronya; nwang'u kuma lith, man wuliewa; nwang'u ani i odkol, man wubino i bang'a.
- ³⁷Weg bedopwe gibilund loko ire lembe, gibiwacu kumae, Rwoth, waneni awene ma kec ubenegi, ka wamio iri cami? kadi ma rieu benegi, ka wamio iri giramadha?
- ³⁸Waneni de awene m'i welo, ka wajoli? kadi muneru, ka waronyi?
- ³⁹Waneni de awene ma kumi lithi, kadi i odkol, ka wabino i beng'i?

⁴⁰Ubimo de biloko lembe ebiwacu igi kumae, Andha awacu iwu kumae, Kum calu wutime ni ng'atu acel ma kind utumira maeni, cil ni maeni ma gi nyithigiki nwang'u wutime ira.

⁴¹Ebilund wacu ni ju ma ni yo ku cinge ma yor acam bende kumae, Wuai woko kud i vuta, wun ma wubedo akwong'a, i mac ma rondo ku rondo m'ubedo ayika ni wonabali ku malaika pare:

⁴²kum nwang'u kec unega, wumio ira cemo de ngo; nwang'u rieu nega, wumio ira giramadha de ngo;

⁴³nwang'u a welo, wujola de ngo; muneru de, wuronya de ngo; kuma lith, ani i odkol de, wuliewa de ngo.

⁴⁴Gibilund dwoko lembe bende, gibiwacu kumae, Rwoth, waneni awene nwang'u kec ubenegi, kadi rieu, kadi m'i welo, kadi muneru, kadi nwang'u kumi lith, kadi i odkol, ka watimo iri ngo?

⁴⁵Ebilund loko lembe igi, ebiwacu kumae, Andha awacu iwu kumae, kum calu wutime ngo ni ng'atu acel mi kind maeni ma nyithigiki, nwang'u wutime ira ngo.

⁴⁶E joni gibicidho migi i masendi ma rondo ku rondo: ento weg bedopwe i kwo ma rondo ku rondo.

Matayo 26

¹Gini timbre de, ka Yesu daru lembe maeni ceke, ewacu ni julubne kumae,

²Wung'eyo nia yo ng'ei ceng' ario kadhukuwijo bino, e jumio Wod dhanu ya jugure.

³Julam ma dongo ku judongo mi dhanu gilund gicokri karacelo, i pondot pa jalam ma dit, ma julwong'o Kayafa;

⁴man giporo lembe karacelo kara gimak Yesu ku rieko, ginege de.

⁵Ento giwacu kumae, I nindo mir agba re ngo, rop umaru moc i kind dhanu.

⁶Nie kan eni i Bethania, i ot pa Simon ma won joi,

⁷dhaku ma won cupa mi kidi ma tar ma ie ju mo ma pire tek apila, ebino i bang'e, ekonjo moje de i wie, nwang'u ebedo dhu cam.

⁸Ento ka julub gineno maeni, eton i igi, giwacu kumae, Edubo maeni mir ang'o?

⁹Kum mojuni copo loko jupiny dupa, man jumio ni jucan.

¹⁰Ento Yesu m'ung'eyo maeni ewacu igi kumae, Wunyayu can i dhaku maeni nedi? kum etimo tic ma dre i kuma.

¹¹Kum wubedo thiri thiri wuku jucan; ento an re wabedo wakudu thiri thiri ngo.

¹²Kum mo maeni m'ekonjo i kuma, maeni etimo m'eyika ko mi kuny.

- 13**Andha awacu iwu kumae, Ka ma tek lembanyong'a maeni biyere i ie i ng'om yu, maeno bende ma dhaku maeno timo biyere ni poi ma jupoi ko pire.
- 14**Ng'atu acel m'i kind juapar wi ario, ma julwong'o Yuda Iskariote, ulund ucidho ba julam ma dongo,
- 15**man ewacu kumae, Wuyenyo ya wumi ang'o ira kan amie iwu? E giporo ire kum mola ma tar pier adek.
- 16**Ugambre i nindo maeca eyenyo maram ecopo mie ko igi.
- 17**Nie i ceng' ma kwong'a mi kwen ma thobi mbe i ie julub gibino ba Yesu, giwacu kumae, Iyenyo wayik iri ka cemo mi kadhukuwijo kani?
- 18**Man ewacu kumae, Wucidh i adhura ba ng'adi, man wuwac ire kumae, Japonji wacu kumae, Nindo para dhingo; abikwiro kadhukuwijo i ot peri waku julubna.
- 19**Julub gitimo calu Yesu ng'olo igi; e giyiko kadhukuwijo.
- 20**Nwang'u ka piny udoko uthieno, ebedo dhu cam giku julub apar wi ario;
- 21**ka gibecamu de, ewacu kumae, Andha awacu iwu, nia ng'atu acel m'i kindwu biciba.
- 22**E can umakugi dit apila, man gimaku wacu ire kubang'gi kubang'gi kumae, En e ani, Rwoth?
- 23**Eloko lembe de ewacu kumae, Ng'atu ma wagwio bwa wakude i tabu, ng'atuno e ma biciba.
- 24**Wod dhanu cidho, cil calu pire gore: ento can wi ng'atu ma Wod dhanu cible ni kume! E ber ni ng'atuno tek junyole ngo.
- 25**Yuda de, m'ucibe, eloko lembe ewacu kumae, En e ani, Japonji? Ewacu ire kumae, Iwacu.
- 26**Ka gibecamu de, Yesu ting'o kwen, man emio mugisa i wie, eng'wenyo ie de; e emio ni julub, ewacu kumae, Wugam, wucam; maeni kuma.
- 27**Eting'o kikombe de, emio foc, emio igi de, ewacu kumae, Madhe kewu ceke;
- 28**kum maeni rimba mi lembariba, m'uthwogre pi dhanu dupa ni ruc mi dubo.
- 29**Ento awacu iwu kumae, Ugambre kawono abimadhu kum nying ulok maeni ngo, cil i ceng' maeno kan amadhe m'e nyen i ker pa Vwa karacelo kudu.
- 30**E ka giwero wer, giwok woko gicidho wi got Zeituni.
- 31**E Yesu lund uwacu igi kumae, Kewu ceke wubikier ni kuma i diwor maeni: kum egore kumae, Abigoyo jakwac, e rombe mir udul bilal mba.
- 32**Ento ku yo ng'ei cer para, abicidho i nyimwu i Galilaya.

- 33Ento Petro loko lembe ewacu ire kumae, Kadok ceke bikier ni kumi, an re abikier ki ngo.
- 34Yesu wacu ire kumae, Andha awacu iri, nia i diewor maeni, ka fodi kulok kukok ungo, ibikwera wang' adek.
- 35Petro wacu ire kumae, Kadok atho karacelo kudi ngi, abikweri ngo. Julub ceke bende giwacu kumeca.
- 36Yesu gilund gibino gikugi i ka ma julwong'o Gethsemane man ewacu ni julubne kumae, Wubed keni, kinde m'aci rwo kuca.
- 37Man ecidho ku Petro giku wot Zebedayo ario, e can umake cwinye de ng'abre sok.
- 38Elund ewacu igi kumae, Can unego ng'eyong'ec para apila, cil ni tho: wukowubed keni, wakuru de wakudu.
- 39Ecidho yor i wang'gi nyanok, epodho de i wang'e, erwo, ewacu kumae, Vwa, tek ecopre, wek kikombe maeni kadh woko kud i bang'a: ento, calu ayenyo an ungo, endre calu iyenyo in.
- 40Ebino de ba julubne, man enwang'u gibenindo, man ewacu ni Petro kumae, Ei, wacopo kuro wakudu ngo saa aceli?
- 41Wukur wurwo de, kara kud wumond i abidhe: cwiny uyenyo andha, ento kum re bedo ng'ic.
- 42Ecidho cen kendo mir arionde, erwo de, ewacu kumae, Vwa tek maeni copo kadhu woko ngo, tek amadhe ngo, dong' etimbre kacwinyi.
- 43Man ebino kendo, enwang'u gibenindo, kum wang'gi bedo pek.
- 44E ewekogi kendo, man ecidho cen, erwo de mir adege, ewacu kendo lembe ma calacel.
- 45Elund ebino ba julub, man ewacu igi kumae, Wunind asu kawono, wuyom mu: nen, saa ni ceng'ni, Wod dhanu de jucibe i cing' judubo.
- 46Wuai malu, wacidhu: nen, ng'atu m'uciba eni ceng'ni.
- 47Kinde ma fodi ebeweco, nen, Yuda, ma ng'atu acel ma kind juapar wi ario, ubino kud udul dhanu ma dit ma gi weg palamularu ku dul de, ma giai ba julam ma dongo ku judongo mi dhanu.
- 48Nwang'u ng'atu m'ucibe emio igi rieke, ewacu kumae, Ng'atu ma tek abicwio limbe, nwang'u en e en: wumake.
- 49E ndhu ndhu nica ebino ba Yesu, man ewacu kumae, Moth iri, Japonji; e ecwio limbe.

- ⁵⁰Yesu wacu ire kumae, Jarimo, tim gin m'ibino pire. E gilund gibino giketho cing'gi kum Yesu, e gimake.
- ⁵¹Nen, ng'atu acel ma kind ju ma gibedo giku Yesugi erieyo cinge, ewodho palamularu pare, egoyo jamiru pa jalam ma jadis, man etong'o ithe woko.
- ⁵²Yesu lund uwacu ire kumae, Dwok palamularu peri kendo kakare: kum dhanu ceke m'umaku palamularu gibitho ku palamularu.
- ⁵³Kadi iwacu nyo acopo kwayu Vwa ngo, man ebioro ira cil kawono nini udul malaika ma sagu apar wi ario ngo.
- ⁵⁴Ka kumeno lembagora pa Mungu bilund timbre kakare nenedi, nia ekoebed kumeno be.
- ⁵⁵I saa nica Yesu wacu ni udul dhanu kumae, Wubino calu kum won ayeki ku palamularu ku dul de nimaku ko ani? Abedo ku ba rupiny i hekalu abedaponjo, di wumaka ngo do.
- ⁵⁶Ento lembe nini ceke timbre, kara lembagora mi jubila timbre kakare. Julub ceke gilund giweke, giringo.
- ⁵⁷Man ju ma gimaku Yesu gitere ba Kayafa ma jalam ma dit, ka ma jugorcik ku judongo gicokri ie karacelo.
- ⁵⁸Ento Petro lubo ng'eye ku cen, ba pondot pa jalam ma jadis, emondo de i ie, gibedo kud asikari, nineno kajikne.
- ⁵⁹Nwang'u julam ma dongo man dilo ngung' giyenyo lembacuka kum Yesu, kara ginege;
- ⁶⁰e ginwang'e ngo, kadok jumulembe mi ndra gibino dupa. Ento macen juario gibino,
- ⁶¹giwacu kumae, Ng'atuni wacu kumae, Acopo nyotho hekalu pa Mungu, kan agome de ceng' adek.
- ⁶²E jalam ma dit uai malu, ewacu ire kumae, Idwoko lembe moko ngo? girang'o ma joni benyutho piri?
- ⁶³Ento Yesu bedo pare ling'. Jalam ma dit de wacu ire kumae, Aketho ikwong'o ku Mungu ma kwo, ya iwac iwa tek in i Kristu, ma Wod Mungu.
- ⁶⁴Yesu wacu ire kumae, Iwacu: endre awacu iwu kumae, Ugambre kawono wubineno Wod dhanu ujany yo ku cing' ma yor acwic mi Tego, kan ebebino de ku i afuru m'i polo.
- ⁶⁵Jalam ma dit ulund uyeco kendi pare, ewacu kumae, Eyero lembacidi kum Mungu: can jumulembe mange negowa nedi? nen, kawono wuwinjo lembacidi pare:
- ⁶⁶e iwu wacu nyo ang'o? Giloko lembe giwacu kumae, Eromo ku tho.

- ⁶⁷E gimaku ng'ulo lau i wang'e gipade de ku diecing'gi,
⁶⁸giwacu kumae, Eu iwa, in i Kristu: ng'a m'upedi?
⁶⁹Nwang'u Petro bedo woko i pondot: e nyaku bino i bang'e, ewacu kumae, In bende wubedo wuku Yesu ma Jagalilaya.
⁷⁰Ento ekwero i wang'gi ceke, ewacu kumae, Ang'eyo gin m'iwacu no ngo.
⁷¹Kan ecidho woko i pondot, nyaku mange nene, ewacu kumae de ni ju m'ubedo keca, Ng'atuni bende gibedo giku Yesu ma Nazareti.
⁷²Ekwero de kendo ku kwong' kumae, Ang'eyo ng'atuno ngo.
⁷³Yo ng'eye nyanok ju ma gicungo gikugi giwacu ni Petro kumae, Andha in bende in i acel m'i kindgi; kum jung'ei ni wec peri.
⁷⁴Elund emaku yanyu ayany ku kwong'o kwong' de, ewacu kumae, Ang'eyo ng'atuno ngo. E ndhu ndhu nica kulok ukok.
⁷⁵E Petro poi kum lembe ma Yesu wacu kumae, Ka fodi kulok kukok ungo, ibikwera wang' adek. E ewok woko, eywak ku can ma apila.

Matayo 27

- ¹Nie kinde ma piny uru, julam ma dongo ceke ku judongo mi dhanu de giporo lembe kum Yesu kara ginege:
²e gitwie, gicidho kude cen, man gimie ni Pilato ma jabim.
³Ka Yuda, m'ucibe, neno nia jupoko lembe rac i wie, elund elokre, man edwoko kum mola ma tar pier adek ba julam ma dongo ku judongo,
⁴ewacu kumae, Adubo kum acibo rimo m'umbe dubo. Ento giwacu kumae, En e ang'o iwa? cung i dhoge.
⁵Man ekonjo kum mola ma tar i hekalu, eaine woko; ecidh edeire.
⁶Man julam ma dongo gigamu kum mola ma tarne, giwacu kumae, Cik uyio ngo ya jukethgi i kakanpiny, kum en e wel piny mi rimo.
⁷E giporo lembe, gidong' ging'iewo kude podho mi yaca, ma juyiko ie welo.
⁸Kum kumeno podho maeno julwong'o kumae, Podho mi rimo, cil i ceng' maeni.
⁹Lembe ma Yerima ma jabila yero lund utimbre kakare, m'ewacu kumae, Gigamu sente mi mola ma tar pier adek, wel piny pa ng'atu ma juturo wel piny i kume, ma jumoko ma kind nyithi Israel gituro wel piny i kume;
¹⁰man gimie ni podho yaca, calu Rwoth ung'olo ira.
¹¹Nie Yesu cungo wang' jabim: jabim de penje, ewacu kumae, In i Ubimo mi Juyahudi? Yesu wacu ire kumae, Iyero.

- 12**E ka julam ma dongo ku judongo de gigobe, edwoko lembe moko ngo.
- 13**Pilato lund uwacu ire kumae, Iwinjo min lembe dupa ma giyero i kurni no ngo?
- 14**E eloko ire lembe moko ngo, ungo kadok lembe acel de ngo: ketho i jabim uwang' lii apila.
- 15**Nwang'u en e kura pa jabim ya egony jakol acel i agba ni udul dhanu, ng'atu ma giyenyo.
- 16**I nindo maeni nwang'u jakol acel nuti kugi, ma pire yik, ma julwong'o Baraba.
- 17**Ka kumeno ka gicokri karacelo, Pilato wacu igi kumae, Wuyenyo ng'a m'agony iwu? Baraba, kadi Yesu ma julwong'o Kristu?
- 18**Kum eng'eyo nia gimie kum kumira.
- 19**E kinde m'ebedo wi kom mi pokolembe, e cege oro lembe ire, ewacu kumae, Kud irodhii i lembe pa ng'atu ma pwe; kum asendra ku giki dupa tin ku wang' lek i kume.
- 20**Nwang'u julam ma dongo ku judongo giloko pido i udul dhanu kara gikwai Baraba, man ginyoth Yesu.
- 21**Ento jabim uloko lembe ewacu igi kumae, Ng'a ma wuyenyo agony iwu i kind juario maeni? E giwacu kumae, Baraba.
- 22**Pilato wacu igi kumae, Abilund timo ang'o kum Yesu ma julwong'o Kristu? Kagi ceke giwacu kumae, Wek jugure.
- 23**Man ewacu kumae, Nedi, etimo ang'o ma raci? Ento gikok apila kumae, Dong' jugure.
- 24**Kum kumeno ka Pilato neno nia ecopo timo gin moko ngo, ento yakni re m'ubenyai, egamu pi, elogo ko cinge i wang' udul dhanu, ewacu kumae, An ambe ku dubo kum rimb ng'atu ma pwe maeni; wucung i dhoge.
- 25**Dhanu ceke giloko lembe giwacu kumae, Rimbe bed i wiwa, ku nyithindho mwa de.
- 26**Elund egonyo igi Baraba; ento efodo Yesu emie de ya jugure.
- 27**Asikari pa jabim gilund gitero Yesu i Odtiti, man gicoko ungu asikari pet i wang'e.
- 28**E giwodho bongu pare, man gironye ku jabia ma kwar ngbo.
- 29**Man gikiedo jamkermiwic mir ukudho giroyo de i wie, giketho undodi de i cinge ma yor acwic; e girum i wang'e, gicaye ko, giwacu kumae, Moth iri, Ubimo mi Juyahudi!
- 30**Man ging'ulo lau i kume, gigamu undodi gigoyo ko wie.

- 31E ka gidaru caye, giwodho jabia kud i kume, gironye de ku kendi pare, e gipeye gici gigure.
- 32E ka giwok woko, ginwang'u ng'atu acel ma Jakurene, ma nyinge Simon: gicung'e ya gici gikugi, kara eyei yen m'athara pare.
- 33E ka gibino ka ma julwong'o Golgotha, thelebene kumae, Karupokowic,
- 34gimio ire pigulok m'ujebre kud ulecu ya emadhi: kan ebilo de, ekwero madhu.
- 35E ka gidaru gure, gigoyo jara, gipoko ko kendi pare i kindgi;
- 36e gibedo piny gikure keca.
- 37Man giketho agobe pare malu i wie m'ugore kumae, MAENJ YESU M'UBIMO MI JUYAHUDI.
- 38Julund juguro weg ayeki ario gikugi, acel yo ku cinge ma yor acwic, acel ke yor acam.
- 39Ju m'ucikukadhu de gicaye, giyengo wigi,
- 40giwacu kumae, In m'irungo hekalu, kan igome de ceng' adek, bodhii giri: tek in i Wod Mungu, lor piny ku wi yen m'athara.
- 41Julam ma dongo bende ma gicaye kumeca, ku jugorcik man judongo, giwacu kumae,
- 42Elaru jumange; ecopo bodhie gire ngo. En e Ubimo mir Israel; wek elor piny kawono ku wi yen m'athara, e wabiyio ire.
- 43Egeno ni Mungu; wek elare kawono, tek eyenye: kum ewacu kumae, An a Wod Mungu.
- 44Weg ayeki bende ma jugurogi gikugi giredho cac ma kumeno i wie.
- 45Nie ugambre i saa mir abusiende mudho yutho ng'om ngung' cil i saa mir abung'wende.
- 46Ceng'ni saa mir abung'wende Yesu kok ku dwande ma tek, ewacu kumae, Eli, Eli, lama sabakithani? thelebene kumae, Munguna, Munguna, ikuna nedi?
- 47Jumoko m'i kindgi m'ucungo keca, ka giwinje, giwacu kumae, Ng'atuni lwong'o Elia.
- 48E ndhu ndhu nica ng'atu acel m'i kindgi uringo, man egamu ucoi, epiko ie picwa, ekethe de wi undodi, man emio ire emadhi.
- 49Juwagi giwacu kumae, Weki; dong' wanenu tek Elia bino lare.
- 50E Yesu kok kendo ku dwande ma tek, man eweko tipone kadhu.
- 51Man nen, kusika mi bongu m'i hekalu kak dra ugambre i wie cik piny; ng'om de yengre; cana de ng'eny;

- ⁵²odliel de yabre; avu dupa de mi jumaleng' ma ginindo gicer;
- ⁵³E giai woko kud i odliel yo ng'ei cer pare gimondo de i adhura ma leng' man ginyuthri ni dhanu dupa.
- ⁵⁴Nwang'u jego, ku ju ma gibedo gikugi m'ubekuro Yesu, ka gineno digidi, ku gin m'utimbre de, lworu negogi dit apila, giwacu kumae, Andha ng'atuni en e Wod Mungu.
- ⁵⁵Mon de dupa ginuti kakeca ma ginene ku cen, ma gigamu lubo ng'ei Yesu kud i Galilaya, ma gitimo ire:
- ⁵⁶Mariamu Magdalene, ku Mariamu ma meg Yakobo ku Yose, ma min wot Zebedayo gini i kindgi.
- ⁵⁷Ka piny udoko uthieno, ng'atu acei ma jalonyo m'uai Arimathaya bino, ma nyinge Yusuf, ma en bende e jalub Yesu:
- ⁵⁸ng'atuni cidho ba Pilato, ekwayu avuj Yesu de. Pilato lund ung'olo ya jumie.
- ⁵⁹E Yusuf ugamu avuje, eboye de i bongu ma leng' ma nwang',
- ⁶⁰man ekethe i liel m'aroka i cana ma nyen ma pare gire, m'eroko i cana: eng'ielo kidi ma dit de dhugola mi liende, e ecidho.
- ⁶¹Nwang'u Mariamu Magdalene, ku Mariamu mange, gini keca, gibedo kum liel m'aroka i cana.
- ⁶²Nie urwone, ma en e yo ng'ei Yikopiny, julam ma dongo ku Jufarisayo gicokri karacelo ba Pilato,
- ⁶³giwacu kumae, Rwoth, wapo ya jabombi maeno wacu kumae, ma fodi ekwo, Yo ng'ei ceng' adek abicer kendo.
- ⁶⁴Ka kumeno ng'ol ya jukur liel m'aroka i cana krr cil i ceng' adek, julubne maru bino kwale, gimaru wacu ni dhanu kumae, Ecer ku kind ju m'utho: e awondi ma cen bibedo rac ma sagu ma kwong'a.
- ⁶⁵Pilato wacu igi kumae, Wutie ku jukur: wuci wukethe bed krr calu wucopo.
- ⁶⁶Ka kumeno gicidho, man giketho liende bedo krr, gimwono ayi kum kidi, jukur de ginuti gikugi.

Matayo 28

- ¹Nwang'u ka ceng' sabatu dhingo thum, ka piny umaku thumo i ceng' ma kwong'a ma yenga, Mariamu Magdalene ku Mariamu mucelo de gibino neno liel m'aroka i cana.
- ²Man nen, digidi ma dit ubino; kum malaika pa Rwoth uai i polo loro piny, ebino eng'ielo kidi cen, ebedo de i wie.
- ³Malaikane ayine ve lukoth, kendi pare de bedo tar calu vuru:

- ⁴e kum jukur ubemiel ni lworone, man gidoko calu avu dhanu.
- ⁵Malaika loko lembe ewacu de ni mon kumae, Lworo kud unegwu: kum ang'eyo nia wuyenyo Yesu, ma jugure.
- ⁶Embe kenj; kum ecer, cil calu ewacu. Wubin, wunen ka ma Rwoth ukouvuto i ie.
- ⁷E wuci tho tho, wuwac ni julubne kumae, Ecer ku kind ju m'utho; man nen, etelo yo i weng'wu i Galilaya; wubinene kuca: nen, awacu iwu.
- ⁸E giai tho ku kum liel m'aroka i cana ku lworo man mutoro ma dit, e giringo gitero lembe ni julubne.
- ⁹Man nen, girombo giku Yesugi, ewacu kumae, Moth iwu. E gibino gimaku tiende, girwo ire.
- ¹⁰Yesu lund uwacu igi kumae, Kud wulwor: wucidh wuyer ni utumira ya gicidh i Galilaya man gibicinena kuca.
- ¹¹Nie kinde ma gibecidho, nen, kind jukur gibino i adhura, giyero gin ceke m'utimbre de ni julam ma dongo.
- ¹²Ka gicokri giku judongo, man giporo lembe, gimio sente dupa ni asikari,
- ¹³giwacu kumae, Wuwac kumae, Julubne gibino ku diwor, gikwale nwang'u wanindo.
- ¹⁴Man tek lembene tuc i ith jabim, wabiloko pidoie, kara iwu kud upidi.
- ¹⁵Ka kumeno gigamu sente, gitimo de calu juponjogi: man lembe maeni yik tir i kind Juyahudi, cil i ceng' maeni.
- ¹⁶Ento julubne apar wi acel gicidho i Galilaya, ba got ka ma Yesu ng'olo igi.
- ¹⁷E ka ginene, girwo ire; ento jumoko cwinygi bedo jiji.
- ¹⁸Man Yesu bino i bang'gi eweco i bang'gi, ewacu kumae, Ng'ol ceke mire ira m'i polo ku m'i ng'om bende.
- ¹⁹Ka kumeno wucidhi, wuketh thek ceke dok julub, wumi igi baputisi ku nying Wego ku Wod man Tipo Maleng':
- ²⁰wuponjgi ya giwor gin ceke m'ang'olo iwu: man nen, wanuti wakudu thiri thiri, cil i kajik mi ng'om.

Marko

Marko 1

- ¹Thangambere mi lembanyong'a ma juboth ko pa Yesu Kristu, ma Wod Mungu.
- ²Cil calu egore i Isaya ma jabila kumae, Nen, aoro jakwenda para i weng'i, Ma biyiko yo peri;
- ³Dwand ng'atu m'ubekok akoka i yamba kumae, Wuyik yo pa Rwoth, Wutir yo pare;
- ⁴Yohana bino, m'umio baputisi i yamba man eyero pi baputisi mi lokocwiny mi wekodubo.
- ⁵Ng'ommiYahudi ngung' gicidho i bang'e, ku ju ma Yerusalem ceke; man emio igi baputisi i kulo Yordan, ma gituco ko dubo migi.
- ⁶Yohana kendo kendi mi yuk ngamia, ku foto mir adila i piere, man ebedecamu bonyo ku kic m'i thim.
- ⁷Man eyero, ewacu kumae, Ng'atu m'ubino i ng'eya e tek ma saga, ma an aromo ngo ya agung' agony wara pare.
- ⁸Amio baputisi iwu i pi; ento en re ebimio baputisi iwu i Tipo Maleng'.
- ⁹Man etimbre i ceng' maeno, nia Yesu ai Nazareti mi Galilaya, e Yohana mio ire baputisi i Yordan.
- ¹⁰E ndhu ndhu nica kinde m'eai kud i pi, eneno polo kak dra, man Tipo ma calu akuru beloro i wie:
- ¹¹e dwal uai kud i polo kumae, In i Woda ma jamerna, ma mutoro nega i kumi.
- ¹²E aruca ruca nica Tipo cwale i yamba.
- ¹³Ebedo i yamba ceng' pier ang'wen ma Jok ubedubidhe ko; man ebedo karacelo ku yedi m'i thim; e malaika gitimo ire.
- ¹⁴Nie yo ng'ei maku Yohana, Yesu bino Galilaya, m'ebeyero lembanyong'a pa Mungu ma juboth ko,
- ¹⁵ewacu kumae, Nindo timbre kakare, ker pa Mungu de ni ceng'ni: wulok cwinywu, wuyi lembanyong'a ma juboth ko.
- ¹⁶Nie kan eberobo nam mi Galilaya, eneno Simon gikud Andrea m'umin Simon ma gibebolo voi i nam; kum gi junam.
- ¹⁷Yesu wacu igi kumae, Wubin wulub ng'eya, man abidwokowu ni junam mi dhanu.
- ¹⁸E ndhu ndhu nica giweko voi migi, gilubo ng'eye.

- ¹⁹Man ecidho nyangba, e eneno Yakobo ma wod Zebedayo, man Yohana m'umin mire, gin de gini i yei gibeyiko voi.
- ²⁰E ndhu ndhu nica elwong'ogi: e giweko weggi ma Zebedayo dong' i yei ku jutic mi sukulia, man gilubo ng'eye.
- ²¹Gicidho de i Kapernaum; e aruca ruca nica i ceng' sabatu emondo i kacokri eponjo de.
- ²²E igi wang' lii kum ponji pare: kum eponjogi calu ebedo ku ng'ol, calu jugorcik de ngo.
- ²³E ndhu ndhu nica jalacel nuti i kacokri migi ma won tipo m'ucido; ekok akoka,
- ²⁴ewacu kumae, Lembe mwa ang'o wakudu, in i Yesu ma Janazareti? ibino ninyothowa? ang'ei in i ng'adi, ma Ng'atu Maleng' pa Mungu.
- ²⁵Yesu juke, ewacu kumae, Bed ling', ai woko kud i ie.
- ²⁶E tipo m'ucido, kan ekaku ie ekok de ku dwande ma tek, eai woko kud i ie.
- ²⁷E kagi ceke igi wang' lii, ketho gipenjri gigi, giwacu kumae, Maeni ang'o? ponji ma nyen! ku ng'ol ejuko cil tipo m'ucido, e giwore.
- ²⁸E ndhu ndhu nica pire yik mba mba i ng'om Galilaya ceke.
- ²⁹E eni eni, ka giai kud i kacokri, gibino i ot pa Simon gikud Andrea, ku Yakobo man Yohana.
- ³⁰Nwang'u dhamaru Simon uvuto ku tho ma cego kum; e pio pio giyero pire ire:
- ³¹man ebino, eting'e malu ku cinge; e kume m'ucek uweke, en de etimo igi.
- ³²Kud uthieno, ka ceng' upodho, gikelo ju ma kumgi lith ceke i bang'e, ku weg pajogi bende.
- ³³Dhanu ceke ma i adhura de gicokri karacelo dhugola.
- ³⁴E ekeyo kum dhanu dupa ma thojje tung' tung', ewodho pajogi de dupa; eyio ngo ya pajogi giweci, kum ging'eye.
- ³⁵Kugweno, ma fodi piny nyambiambia, eai malu ewok woko, ecidho ka ma ngele, e erwo keca.
- ³⁶Simon ku ju ma gibedo kugi gilubo ng'eye;
- ³⁷e ginwang'e, giwacu ire kumae, Dhanu ceke gi beyenyi.
- ³⁸Ewacu igi kumae, Wek waci kamange i pacu ma ceng'ni, kara ayer kuca bende; kum abino kum lembe nini.
- ³⁹Man emondo i kacokri migi cil i Galilaya ndri ndri, m'eyero ewodho ko pajogi bende.

⁴⁰Ng'atu acel ubino i bang'e ma won joi, erum piny i bang'e, ekwaye, ewacu ire kumae, Tek iyenyo, icopo dwoka leng'.

⁴¹E en ma ngisi nege, erieyo cinge, emulo ko kume, ewacu ire kumae, Ayenyo; kumi dok leng'.

⁴²E kadhoge nica joi weke, man edoko leng'.

⁴³E eng'olo ire lembe ngili ngili, e ndhu ndhu nica ecore woko,

⁴⁴ewacu ire kumae, Nen kud iyer gin moko ni ng'atu moko: ento cidhi inyuthri ni jalam, ithier gin mi dwokoleng' peri ma Musa ng'olo, ni lembatuca igi.

⁴⁵Ento ewok woko, emaku rweyo pire dit, ketho lembene yik tir, ketho ya Yesu copo mondo ngbeng' kendo ngo i adhura, ento ebedo cen i ka ma ngele: man giai kun ku kun ceke gibino i bang'e.

Marko 2

¹Yo ng'ei ceng' moko kan emondo i Kapernaum kendo, juwinjo nia eni i ot.

²Dupa gicokri karacelo, ketho kabedo mbe igi kendo cil dhugola de mbe: man eyero igi lembe.

³E gibino, ma gikelo ng'atu ma won tho ma nego kum nding' i bang'e, ma juang'wen giyeye.

⁴E ka gicopo tundo ceng'ni i bang'e ngo ni njuru dhanu, e giyeco wi ot kpa ka wie: ka giyeco, giluro ng'atu ma won tho ma nego kum nding' ku kavuto m'evuto i wie.

⁵Ka Yesu neno yioyic migi ewacu ni won tho ma nego kum nding' kumae, Wodo, dubo peri juweko woko.

⁶Ento jumoko ma kind jugorcik nuti ma gibedo keca, ma giporo lembe i adundegi kumae,

⁷Ng'atuni weco kumeno nedi? eyero lembacidi kum Mungu: ng'a ma copo weko dubo woko ndhu ng'atu acel, en e Mungu?

⁸E eni eni Yesu, m'eng'eyo i cwinye nia giporo lembe i igi gigi, ewacu igi kumae, Wuporo lembe maeni i adundewu nedi?

⁹Makani ma yot ma sagu, wacu ni won tho ma nego kum nding' kumae, Dubo peri juweko woko; kadi wacu kumae, Ai malu, ting' kavuto peri iwothi?

¹⁰Ento kara wung'ei nia Wod dhanu bedo ku ng'ol wi ng'om mi wekodubo woko (ewacu ni won tho ma nego kum nding' kumae),

¹¹Awacu iri kumae, Ai malu ting' kavuto peri, icidh i ot peri.

¹²Man eai malu, eting'o kavuto tho, e ewok woko i wang'gi ceke; ketho kagi ceke igi wang' lii, man giyungo Mungu, giwacu kumae, Naka fodi waneno wagi eni ki ngo.

- ¹³E ecidho kendo dhu nam; udul dhanu ceke gicidho i bang'e de, e eponjogi.
- ¹⁴Kinde m'ebekadhu, eneno Lawi ma wod Alfayo m'ubedo ka ma jujoko ie ajok, man ewacu ire kumae, Lub ng'eya. E eai malu elubo ng'eye.
- ¹⁵E etimbre, nia ebedo dhu cam i ot pare man weg ajok ku judubo dupa gibedo piny giku Yesugi man julubne: kum gi dupa, man gilubo ng'eye.
- ¹⁶Jugorcik mi Jufarisayo ka gineno nia gibecamu ku judubo ku weg ajok de, giwacu ni julubne kumae, Nedi ecamu emadhu de ku weg ajok ku judubo de?
- ¹⁷Ka Yesu winjo maeni, ewacu igi kumae, Ju ma kumgi leng' can jakeikum negogi ngo, ento ju ma kumgi lith re: abino lwong'o weg bedopwe ngo, ento judubo re.
- ¹⁸Julub Yohana ku Jufarisayo de gibekwiro cam: e gibino giwacu ire kumae, Julub Yohana ku julub Jufarisayo gikwiro cam nedi, ka julubni ke gikwiro cam ungo e?
- ¹⁹Yesu wacu igi kumae, Wot won ambadha gicopo kwiro cam, ma fodi won ambadha ginuti gikugi? ma fodi ginuti giku won ambadhagi, gicopo kwiro cam ungo.
- ²⁰Ento ceng' bibino, ma jubikabu ie won ambadha woko kud i bang'gi, e gibilund kwiro cam i ceng' maeno.
- ²¹Ng'atu moko mbe ma kwoyo wang' kendi m'uti ku kurembo ma nyen: kara kurembo bongu ma nyen nica ma juthube ko kud elund eyec m'uti, edwoke rac ma sagu.
- ²²Ng'atu moko mbe de ma piko pigulok ma nyasa i usaupigulok m'uti; kara pigulok kud ung'eny usaupigulok, pigulok de kud uoi, usaupigulok kud unyothre: ento pigulok ma nyasa jupiko i usaupigulok ma nyen.
- ²³Man etimbre, nia ebekadhu ku kind podhocam i ceng' sabatu; e julubne, ka gibecidho, gimaku jaku jang cam.
- ²⁴Jufarisayo giwacu ire kumae, Nen, nedi gitimo maeno ma cik uyio ngo ceng' sabatu?
- ²⁵Man ewacu igi kumae, Fodi wusomo ngo gin ma Daudi timo, ka canpiny unege, ku kec de, en, ku ju ma ginuti gikugi de?
- ²⁶Maram emondo ko i ot pa Mungu kende ma Abiathar en e jalam ma dit, ecamu kwen mir anyutha, ma cik uyio ngo ya jucam ndhu ni julam, man emio de ni ju ma ginuti gikugi?
- ²⁷Man ewacu igi kumae, Jutimo ceng' sabatu ni dhianu, jutimo dhanu ngo ni ceng' sabatu:
- ²⁸kum kumeno Wod dhanu en e rwoth cil mi ceng' sabatu.

Marko 3

- ¹Man emondo kendo i kacokri: e ng'atu moko ni keca ma cinge lindre.
- ²E gikie, tek ebicange i ceng' sabatu: kara gidote.
- ³Man ewacu ni ng'atu ma cinge lindre kumae, Cung i diere.
- ⁴Ewacu ni joca kumae, Cik uyio i ceng' sabatu ya jutim beri, kadi raci? bodho kwo, kadi nego? Ento giling'.
- ⁵E kan eng'iogi gbe ma ng'ecwiny unege, ma can de nege kum adundegi m'udoko nwang', ewacu ni ng'atuno kumae, Riei cingi. E erieye; man cinge dok kakare.
- ⁶Jufarisayo de giwok woko, man aringa ringa nica gimaku poro lembe giku Juherodiano i kume, rama gicopo nyothe ko.
- ⁷E Yesu giku julubne giai gicidho dhu nam: man udul dhanu ma dit giai i Galilaya gilubo ng'eye; ku i Yahudi de,
- ⁸ku i Yerusalem de, man ku i Idumaya, ku ma loka Yordan, ku ma ng'et Turo ku Sidon de, udul dhanu ma dit ma giwinjo gin ma dit m'etimo, gibino i bang'e.
- ⁹Man eyero ni julubne, nia nyathi yei ubed ayika ire ni njuru dhanu, kara ku gidie:
- ¹⁰kum ekeyo kum dhanu dupa; ketho dhanu ceke ma gi weg tho gicungri i kume kara gimul kume.
- ¹¹Tipo m'ucido de, ka ginene, gipodho piny i wang'e, gikok akoka, giwacu kumae, In i Wod Mungu.
- ¹²Man eng'olo igi ma tek ya ku giketh jung'eye.
- ¹³Man eidho malu wi got, e elwong'o ju ma ie yenyo en i bang'e; e gicidho i bang'e.
- ¹⁴Eketho juapar wi ario de kara gibed gikugi, kara eorgi gicigiyer,
- ¹⁵man gibed ku ng'ol ma giwodh ko pajogi:
- ¹⁶Simon ecaku nyinge Petro;
- ¹⁷Yakobo ma wod Zebedayo, ku Yohana m'umin Yakobo; e ecaku nying' joni Boanerge, thelembene kumae, Wot morpolo:
- ¹⁸man ke Andrea, ku Filipino, ku Bartolomayo, man Matayo, man Thoma, man Yakobo, wod Alfayo, man Thadayo, ku Simon ma Jakanani.
- ¹⁹man Yuda Iskariote, m'ucibe bende. Man emondo i ot.
- ²⁰E udul dhanu gicokri karacelo kendo, ketho nia kadok kwen de gicopo camu ngo.
- ²¹Ka jurimbe giwinjo maeni, giwok gicimake: kum giwacu kumae, Abelu make.

- ²²E jugorcik ma giai Yerusalem giloro piny giwacu kumae, Wie ju Beelzebul, man ke kumae, Ebewodho pajogi ni kum jadit mi pajogi.
- ²³Man elwong'ogi i bang'e, ewacu igi ku lembabola kumae, Jok copo wodho Jok nenedi?
- ²⁴Man tek ker upokre i kume gire, kerne copo cungo ngo.
- ²⁵Man tek ot upokre i kume gire, ode bicopo cungo ngo.
- ²⁶Man tek Jok uai i kume gire, epokre de, ecopo cungo ngo, ento ejik.
- ²⁷Ento ng'atu moko copo mondo ngo i ot pa ng'atu ma tek, enyoth piny pare de, ma k'elar etwio ng'atu ma tek ungo; kan ebilund nyotho ot pare.
- ²⁸Andha awacu iwu kumae, Dubo mi wot dhanu ceke, jubiweko woko igi, man lembacidi migi ma gicido ko Mungu de:
- ²⁹ento ng'atu ma tek biyero lembacidi kum Tipu Maleng' dubo pare jubiweko woko ire ki ngo, ento dubo ma rondo ku rondo ni i wie:
- ³⁰kum giwacu kumae, E won tipo m'ucido.
- ³¹E min mire ku utumin de gibino; man gicungo woko, giro lembe i bang'e, ma gilwong'e ko.
- ³²Udul dhanu de gibedo gitieke; giwacu ire kumae, Nen, meru ku utumeru gini woko giyenyi.
- ³³E eloko lembe igi ewacu kumae, Ma ku utumira de gi ng'agi?
- ³⁴Kan eng'io ju ma gibedo gikugi, ewacu kumae, Nen, ma ku utumira de!
- ³⁵Kum ng'atu ma tek bitimo yeny ma i Mungu yeny, ng'atuca en e umira, ku nyamira, ku ma de.

Marko 4

- ¹Man emaku ponjo dhu nam kendo. Udul dhanu ma dit apila de gicokri i bang'e, ketho eidho i yei, man ebedo i pi; udul dhanu ceke bedo dhu pi i ng'om.
- ²E eponjogi ku lembe dupa m'abola, ewacu igi kumae, i ponji pare,
- ³Wuwinji: Nen, jacoikodhi cidho nicoyo:
- ⁴etimbre de, kan ecoyo, nia kodhi moko podho dhu yo, winyo de bino gicame.
- ⁵Mange de podho i ng'om ma ie ju kidi, ka ma ng'om dit ungo i ie; e eni eni ecobo, kum dhu ng'om thuth ungo:
- ⁶man ka ceng' uidho, erewe; kum ulage mbe, ener woko.
- ⁷Mange ke podho kind ukudho, ukudho dongo, e edeye, man ecego nyinge ngo.

⁸Mange ke podho i ng'om ma ber, ecego nyinge de, edongo enyai de; man ecego nyinge, acel bang' pier adek, man acel bang' pier abusieli, man ke acel bang' dak.

⁹Man ewacu kumae, Ng'atu ma ithe nuti m'ewinjo ko, wek ewinji.

¹⁰E kan ebedo kende, ju ma gibedo i vute ku juapar wi ario gipenje kum lembabolane.

¹¹Man ewacu igi kumae, Giramung'a mi ker pa Mungu jumio iwu: ento ni ju ma gini woko, gin ceke timbre ku lembabola:

¹²kara anena gicopo neno, endre ging'ei ngo; awinja de gicopo winjo, endre ging'ei ngo; kara ku gilokri kendo, man ku juwek dubo migi woko.

¹³Ewacu igi kumae, Wung'eyo lembabola maeni ngo? wubing'eyo lembabola ceke nenedi?

¹⁴Jacoikodhi coyo lembe.

¹⁵Ju maeni gi ju ma gibedo dhu yo, ka ma jucoyo ie lembe; ka giwinjo de, e ndhu ndhu nica Jok ubino, ekabu lembe majucoyo i igi woko.

¹⁶Ju maeni de kumeno gi ju ma jucoyo ka ma ie ju kidi, ma, ka giwinjo lembe, ndhu ndhu nica gijole ku mutoro;

¹⁷e gibedo umbe ulaggi i igi gigi, ento gibedo nyangba; macen, ka masendi kadi ragedo wok kum lembe, e eni eni gikier.

¹⁸Jumange ke gi ju ma jucoyogi kind ukudho; joni gi ju m'uwino lembe,

¹⁹e pidoic mi giki mi ng'om, kud awondi mi lonyo, kud awanya ma rac mi gin mange m'umondo i igi, gideyo lembene, man ecego nyinge ngo.

²⁰Ju maeni ke gi ju ma jucoyogi i ng'om ma ber; gi wagi ju m'uwino lembe, gijole de, man gicego nying'gi, acel bang' pier adek, acel bang' pier abusieli, acel bang' dak.

²¹Man ewacu igi kumae, Jukelo thala ya juum the katoko, kadi the kavuto, ma jukukethe wi kathere ngo?

²²Kum gin moko mbe ma pandre, ento kara enyuthre, kadok ma mungre de, ento kara ewok ka ma leng'.

²³Tek ng'atu moko ithe nuti m'ewinjo ko, wek ewinji.

²⁴Ewacu igi kumae, Wubed ku weng'wu kum gin ma wuwino: ku mukero ma wuporo ko e ma jubiporo ko iwu bende: jubimedo iwu mange de.

²⁵Kum ng'atu ma tek ubedo ko, jubimio ire: man ng'atu ma kubedo ko ngo re, jubikabu woko i bang'e cil maeno m'ebedo ko.

²⁶Man ewacu kumae, Ker pa Mungu de bedo kumeno, calu tek ng'atu moko bolo kodhi i ng'om;

- ²⁷man enindo eai de diewor ku dieceng', e kodhi cobo etwi de, eng'eyo ngo maram etwi ko.
- ²⁸Ng'om ucego nyinge gire; elar etwi, macen eng'ok, e kan ecego nyinge thur.
- ²⁹Ento ka nyinge cek, e eni eni eketho pala i kume, kum palacam uwok.
- ³⁰Man ewacu kumae, Wabiporo ker pa Mungu kud ang'o? kadi wabinyuthe ku lembabola manedi?
- ³¹E calu nying atingli, ma ka jucoyo i ng'om, kadok ebedo nok ma sagu kodhi ceke m'i ng'om,
- ³²ento ka jucoye, edongo de, man edoko dit ma sagu uboko ceke, elodho jange ma dit de; ketho nia winyo ma kor polo gicopo bedo the tipone.
- ³³Eyero lembe igi ku wagi lembabola ma kumeni dupa, calu ma winjre igi;
- ³⁴man eyero igi ngo ma ku lembabola ngo: ento ni julubne ekoro igi there ceke nyalwe.
- ³⁵Ceng' nica, ka piny udoko uthieno, ewacu igi kumae, Wakedhu lokaca.
- ³⁶E giweko udul dhanu, gicidho kugi ku rambe nica i combo. Nwang'u combo mange de ni i bang'e.
- ³⁷E wavuvu ma dit utuk, mukura de maku core i combo, ketho ya combo maku pong'.
- ³⁸En ebedo yo the combo, enindo de wi usau: e gicewe, giwacu ire kumae, Japonji, en e lem moko ngo iri ya warwinyi?
- ³⁹E eceu, ejuko yamu, ewacu de ni nam kumae, Cungi, bed ling'. E yamu cungo. piny de cungo ti.
- ⁴⁰Ewacu igi kumae, Lworo negowu nedi? fodi yioyic umbe kudu?
- ⁴¹E lworo negogi dit apila, man giwacu gigi kumae, Ka kumeno ng'atuni ng'a, ma cil yamu ku nam de giwore e?

Marko 5

- ¹Man giwok loka nam, i ng'om mi Jugadareni.
- ²E kinde m'eloro kud i combo, e aruca ruca nica girombo ku ng'atu m'uai i odliel ma wie ju tipo m'ucido,
- ³ma kabedo pare ni i odliel: ng'atu moko mbe ma copo twie kendo, ungo, kadok ku nyoro de ngo;
- ⁴kum jubejugoyo kongo i tiende jutwie ku nyoro de bang' udul, e erwadu nyoro, eturo i kongo de nziki nziki: ng'atu moko mbe de ma tek ma dwoke mol.

- ⁵Thiri thiri, diewor ku dieceng' de, i odliel i gudi de ebedekok akoka, man ethumbre gire ku kidi.
- ⁶E kan eneno Yesu ku bor, eringo aringa erwo de i bang'e:
- ⁷ekok ku dwande ma tek, ewacu kumae, Lembe mwa ang'o wakudi, Yesu, in i Wod Mungu ma Malu Ngbir. Aketho ikwong'o ba Mungu, kud imi ira ndiba.
- ⁸Kum ewacu ire kumae, Wok woko kud i ng'atuno, in i tipo m'ucido.
- ⁹Man epenje kumae, Nyingi ng'a? En ke ewacu ire kumae, Nyinga Udul; kum wa dupa.
- ¹⁰E epaku dhoge ire ma tek ya kud eriemgi woko kud i ng'ombuni.
- ¹¹Nwang'u udul kul ma dit ubecamu kor got.
- ¹²E gikwaye, giwacu kumae, Orwa i kul, kara wamond i igi.
- ¹³E eyio igi. Tipo m'ucido de giwok woko, gimondo i kul: e udul ukonjre kro ku ka ma lung' i nam, welgi yenyero romo rubanga ario; man githung' i pi.
- ¹⁴E ju m'ukwayugi giringo giyero lembene i adhura, ku i thim de. E gibino nineno gin m'utimbre.
- ¹⁵E gibino ba Yesu, gineno ng'atu ma naka wie ju pajogi de bedo, ekendo kendi pidoie de cu, en e ng'atu ma naka wie ju udul: e lwooro negogi.
- ¹⁶E ju ma gineno maeni giyero igi ram etimbre ko ni ng'atu ma naka wie ju pajogi, man pi kul.
- ¹⁷E gimaku kwaye nia eai woko i kieu migi.
- ¹⁸E kan ebeidho i combo, ng'atu ma naka wie ju pajogi kwaye ya gibed gikude.
- ¹⁹Man eyio ire ngo, edong' ewacu ire kumae, Dok i ot peri ba jurimbi, yer igi rama Rwoth utimo ko gin ma dit iri, man rama kisa nege ko i kumi de.
- ²⁰E ecidhone emaku rweyo i Dekapoli rama Yesu timo ko tic ma dit ire: e dhanu ceke igi wang' lii.
- ²¹E ka Yesu kadhu kendo lokaca ku combo, udul ma dit gicokri i bang'e; man ebedo dhu nam.
- ²²Nie ng'atu acel ma kind judongo m'i kacokri ma nyinge Yairo, bino; e kan enene de, epodho the tiende,
- ²³ekwaye de ma tek, ewacu kumae, Nyathi nyara dhingo tho: akwei, ya ibin iketh cingi i kume, kara kume kei, ebed kwo de.
- ²⁴E gicidho gikude; udul dhanu ma dit de gilubo ng'eye, man gicungri acung'a i kume.
- ²⁵Man dhaku moko, ma rimo mol i kume doko rundi apar wi ario,

- ²⁶man esendre dit ba jukeikum dupa edaru piny pare ceke de, ento eloko kamoko ngo, ento edoko rac ma sagu,
- ²⁷e kan ewinjo pi Yesu, ebino ku kind njuru dhanu ma yor i ng'eye, emulo kendi pare.
- ²⁸Kum ewacu kumae, Tek amulo kendi pare ci, e kuma bikei.
- ²⁹E ndhu ndhu nica dhu rimbe ng'ol ndhu; eng'eyo de kud i ie nia kume kei ni tho pare.
- ³⁰E aruca ruca nica Yesu, m'ung'eyo i ie gire ya tego ai i bang'e wok woko, elokre kind njuru dhanu, ewacu kumae, Ng'a mulo kendi para?
- ³¹Julubne giwacu ire kumae, Ineno udul dhanu ma gicungri i kumi, man iwacu kumae, Ng'a mulo kuma?
- ³²E eneno kun ku kun kara enen ng'atu m'utimo gin maeno.
- ³³Ento dhaku ma lworu benege kume de bemiel, m'eng'eyo gin m'utimbre ire, ewok epodho piny i wang'e eyero ire lemandha ceke.
- ³⁴En ke ewacu ire kumae, Nyara, yioyic peri e m'ukeyo kumi; ci ma cwinyi kwio, kumi bed leng' de ni tho peri.
- ³⁵Kinde ma fodi ebeweco, ju m'uai ba jadit mi kacokri, giwacu kumae, Nyeri tho: isendo Japonji nedi kendo?
- ³⁶Ento Yesu, m'uwinjo lembe ma juyero, ewacu ni jadit mi kacokri kumae, Lworu kud unegi, yi kende.
- ³⁷Man eyio ngo ya ng'atu moko lub ng'eye, ndhu Petro, man Yakobo, man Yohana m'umin Yakobo.
- ³⁸E gibino giwok ba ot pa jadit mi kacokri; man eneno yakni, ku dhanu dupa m'ubeywak m'ubewero wejawu de dit.
- ³⁹Kan emondo, ewacu igi kumae, Nedi wutimbru swa wuywak de? nyathinuno tho ngo, ento enindo aninda.
- ⁴⁰Gidong' ging'iere ang'iera gicaye ko. Ento en kan ewodhogi ceke woko, egamu won nyathin ku min mire de ku ju ma gibedo gikugi bende, e gicidho ka ma nyathin ni ie.
- ⁴¹Emaku nyathin ku cinge, ewacu ire kumae, Talitha kumi; thelembene, ka juloke edoko kumae, Nyane, awacu iri kumae, Ai malu.
- ⁴²E ka dhoge nica nyano ai malu, ewotho; kum nwang'u rundi pare doko apar wi ario. E eni eni igi wang' lii ku wang'uic ma dit.
- ⁴³Man eng'olo igi ma tek nia ng'atu moko kud ung'ei maeni: e eng'olo ya jumi ire cam moko ecam.

Marko 6

- ¹Man eai woko ku keca; ewok i ng'om ma thugi ma dhe; julubne de gilubo ng'eye.
- ²E ka ceng' sabatu wok, emaku ponjo i kacokri: dupa ka giwinje igi wang' lii, giwacu kumae, Ng'atuni nwang'u gin maeni kani? man, rieko ang'o ma jumio ni ng'atuni, ku tic ma tek ma kumeni m'ubetimbre ku cinge e?
- ³Maeni jabodho mi bau ngo, ma wod Mariamu, umin mire ke Yakobo, ku Yose, man Yuda, ku Simon de? nyimin mire bende gini i bang'wa ngo? E gikier ni kume.
- ⁴E Yesu wacu igi kumae, Jabila bedo umbe yung ungo ento i ng'om thugi ma dhe re, man i kind jupagi, kud i ot pare bende ma dhe.
- ⁵Man tic ma mi tego copo timbre ire ngo keca, ento eketho cinge kum weg tho ma lam, man ekeyo kumgi.
- ⁶E ie wang' lii kum yioyic migi m'umbe. Man etieko pacu gbur ku ponji.
- ⁷E elwong'o juapar wi ario i bang'e, emaku orogi de ario ario; emio igi ng'ol de kum tipo m'ucido;
- ⁸eng'oio igi de ya ku giting' gin moko mi woth migi, ndhu uluth kende; kadok kwen, kadi akpo, kadok sente de i gbethe migi;
- ⁹wara re ma giroi: man, ewacu ya ku gikend kanzu ario.
- ¹⁰Man ewacu igi kumae, Ka ma tek wumondo i ie i ot, wubed keca ram wuai ko woko.
- ¹¹Ka ma tek jujolowu i ie ngo, man giwinjowu ngo, ka wuai keca, wukir utur ma the tiendwu woko ni lembatuca igi.
- ¹²E giai, giyero ya dhanu gilok cwinygi.
- ¹³Giwodho pajogi dupa, giwiro mo de kum dhanu dupa ma kumgi lith, gikeyo kumgi de.
- ¹⁴E ubimo Herode winjo pire; kum nyinge yik: e ewacu kumae, Yohana ma Jabaputisi cer ku kind ju m'utho, ka kumeno tego maeni betimbre i ie.
- ¹⁵Ento jumange wacu kumae, En e Elia. Jumange wacu kumae, En e jabila calu acel ma kind jubila.
- ¹⁶Ento Herode, kan ewinjo pire, ewacu kumae, Yohana, m'athumo wie, ecer.
- ¹⁷Kum en e Herode eoro jucijumaku Yohana, jutwie de i odkol pi Herodia, ma ci umin mire ma Filipino: kum egome.
- ¹⁸Kum Yohana wacu ni Herode kumae, Cik uyio ngo iri ya ibed ku ci umeru.
- ¹⁹E Herodia kece, eyenyo enege; ento ecopo ngo;

- ²⁰kum Herode lworu Yohana, kum eng'eyo nia en e ng'atu ma pwe, ma leng' de, man egwoke cu. Kan ewinje de, ie pido dit; ewinje de ku mutoro.
- ²¹E ka ceng' m'ubedo ber ni Herode wok, en e ceng' ma yang' junyole i ie etedo cemo mir uthieno ni judongo pare, ku jego pare ma dongo, ku judongo m'i ng'om Galilaya de;
- ²²e ka nya Herodiane mondo emiel de, enyayu mutoro i Herode ku ju ma gibedo gikugi dhu cam de; e ubimo wacu ni nyaku kumae, Kwai gin ma tek iyenyo, e abimio iri.
- ²³Man eyero ire ku kwong' kumae, Gin ma tek ikwaya ko, abimie iri, kadok ng'et ker para.
- ²⁴E ewok woko, ewacu ni min mire kumae, Akwai ang'o? Ewacu kumae, Wi Yohana ma Jabaputisi.
- ²⁵E eni eni emondo tho bang' ubimo, ekwayu, ewacu kumae, Ayenyo ya imi ira wi Yohana ma Jabaputisi kawono i atangla.
- ²⁶E can unego ubimo dit apila; ento kum kwong' pare, ku ju ma gibedo dhu cam de, eyenyo ngo ekwere.
- ²⁷E sieu maeni ubimo oro asikari acel ma kind ju ma kuro kume, eng'olo de ya ecihd ekel wie: man ecihd ethumo wie i odkol,
- ²⁸man ekelo wiene i atangla, emie de ni nyaku; nyaku ke mie ni miu mire.
- ²⁹E ka julubne giwinjo pire, gibino giting'o avuje, man gikethe i odliel.
- ³⁰E jukwenda gicokri karacelo ba Yesu: e giyero ire pi gin ceke ma gitimo, ku gin ceke ma giponjo de.
- ³¹Man ewacu igi kumae, Wun giwu wubin cen ka ma ngele, wuyom tundu. Kum dupa gicikubino gicidho de, e kinde moko mbe igi kadok ma gicam ie cam de.
- ³²E giai ku combo gicidho i ka ma ngele kakendgi.
- ³³Dhanu de neno gibecidho, dupa de ging'eyogi, man giringo karacelo kuca ku i adhura ku tiendgi, e gilar gitundo igi.
- ³⁴Eai woko eneno udul dhanu ma dit de, e ngisi nege i kumgi, kum gibedo calu rombe ma jakwac migi mbe: man emaku ponjogi ku gin dupa.
- ³⁵Kinde ma ceng' uvoc, julubne gibino i bang'e, giwacu kumae, Kakeni bedo ng'om ngele, kawono ceng' de voc;
- ³⁶lalg, kara gicidh i thim man i pacu gbe gbe, ging'ieu giracama moko igi gigi.
- ³⁷Ento eloko lembe ewacu igi kumae, Wumi igi cam. Giwacu ire kumae, Waciwang'ieu igi kwen ku denarii dak ario, wami igi gicami?

- ³⁸Ewacu igi kumae, Lungu kwen adi ma ni i beng'wu? wuci wunen. Ka ging'eyo, giwacu kumae, Abic, ku rec ario.
- ³⁹Eng'olo igi nia kagi ceke gibed piny wi lum ma numu ni ungu ungu.
- ⁴⁰E gibedo piny ku thek, man dak, man pier abic.
- ⁴¹Man eting'o lungu kwen abic ku rec ario de, e eneno malu i polo, emio mugisa, man eng'weko i kwen de; emio ni julub giketh i wang'gi; rec ario de epoko i kindgi ceke.
- ⁴²E kagi ceke gicamu, giyeng' de.
- ⁴³Gikwanyu kodine, upong'o katoko apar wi ario, ku mi rec bende.
- ⁴⁴Ju ma gicamu lungu kwen gi jumaco rubanga abic.
- ⁴⁵E aruca ruca nica ecwalu julubne giidho i combo, gicidho lokaca i wang'e Bethsaida, kinde ma en ebelalu udul dhanu woko.
- ⁴⁶E kan ecikogi, eidho wi got nirwo.
- ⁴⁷E ka piny udoko uthieno, combo wok i die nam, edong' e kende i ng'om.
- ⁴⁸Man kan eneno gibesendri ku kiewo, kum yamu beai yor i wang'gi, e ecidho i bang'gi ku diewor mi kur mir ang'wende, m'ebewotho ko ku wi pi; calu ebeyenyo kadhugi:
- ⁴⁹ento gin, ka ginene m'ebewotho ku wi pi; giwacu nyo en e ulelu, e gikok akoka;
- ⁵⁰kum kagi ceke ginene, e cwinygi ng'abre. Ento eni eni eweco i bang'gi, ewacu igi kumae, Cwinywu bed tek: meni an; lworu kud unegwu.
- ⁵¹E eidho i bang'gi i combo; yamu de cungo: man igi wang' hi yor i igi;
- ⁵²kum ging'eyo ngo pi lungu kwen, ento adundegi doko nwang'.
- ⁵³E ka gikadhu lokaca, giwok dhu wath i ng'om Genesareti, man ginyiko dhu wath.
- ⁵⁴E ka giai kud i combo, e ndhu ndhu nica dhanu ging'eye.
- ⁵⁵e giringo i ng'ombuno ceke gbe gbe, gimaku yeyo dhanu ma kumgi lith ku kavuto migi, ka ma giwinjo eni i ie.
- ⁵⁶Ka ma tek emondo i ie ceke, i pacu, kadi i adhura de, kadi i thim, gipielo ju ma kumgi lith i katali, man gikwaye ya gimul kadok dhu kendi pare ci: e ju m'umulo kume ceke kumgi kei kubang'gi kubang'gi.

Marko 7

- ¹E Jufarisayo, ku jumoko ma kind jugorcik ma giai Yerusalem, gicokri i bang'e,

²ma gineno nia julubne moko camu kwen migi ku cing'gi ma ie ju cilo, thelebene, cing'gi ma aloga ngo.

³(Kum Jufarisayo, ku Juyahudi ceke, tek gilogo cing'gi mii ngo, gicamu ngo, ma giworo ko lemkei mi judongo:

⁴e ka giai i katali, tek gijom ungo, gicamu ngo; ku gin mange de dupa, ma gijolo ya giwor, lwoko kikombe, kud agulu, kud agulu mi mola.)

⁵Jufarisayo ku jugorcik de gipenje kumae, Nedi julubni giwotho calku lemkei mi judongo ngo, ento gicamu kwen migi ku cilo i cing'gi?

⁶Ewacu igi kumae, Isaya yang' uewo piwu dre wu weg ambili, calu jugoro kumae, Dhanu maeni giyunga ku dendhoggi, Ento adundegi bor kuda.

⁷Ento girwo ira mananu, Ma giponjo cik mi dhanu ni ponji migi.

⁸Wuweko leembang'ola pa Mungu, wudong' wubani wi lemkei mi dhanu.

⁹Man ewacu igi kumae, Dre no yo, wukwero cik pa Mungu, kara wuwor lemkei mu.

¹⁰Kum Musa wacu kumae, Yung wuru ku meru; man, ng'atu m'uyero rac kum won kadi min, wek etho athoa:

¹¹ento wun wuwacu kumae, Tek ng'atu moko biyero ni won kadi min kumae, Gin ma nwang'u ande acopi ko en e Korbani, thelebene, jumio ni Mungu;

¹²wuyio ngo nia ng'atuno tim gin moko kendo ni won kadi min;

¹³wuranju lembe pa Mungu ku lemkei mu, ma wuketho: man wutimo gin mange de dupa ma kumeno.

¹⁴Man elwong'o udul dhanu kendo i bang'e, ewacu igi kumae, Kewu ceke wuwinj lem para, wung'ei de:

¹⁵gin moko mbe ma yo woko ba dhanu, ma tek umondo i ie copo cide; ento gin ma ai yor i dhanu e ma cido i dhanu.

¹⁶Ng'atu moko ma ithe nuti m'ewinjo ko, wek ewinji.

¹⁷Kan eweko udul dhanu emondo i ot, julubne gipenje kum the lembabola nini.

¹⁸Ewacu igi kumae, Wun bende ng'eyong'ec umbe kudu kumeno? Wung'eyo ngo, nia gin ma yo woko ma mondo i dhanu, copo cide ngo;

¹⁹kum emondo i adunde ngo ento i cinoie, ewok woko de i odbari? Maeni ewacu, ma dwoko cemo ceke leng'.

²⁰Man ewacu kumae, Gin ma ai i dhanu, e ma cido dhanu.

²¹Kum kud i ic, ku i adunde dhanu, pidoic ma rac wok, tarwang', ku kwalukwo, ku negonek, ku gieri,

²²ku ketho cwiny hai kum piny, ku camuco, kud abombi, kud awanya ma rac, ku wang' ma rac, ku cayucac, kud ahaye, man lemkasegu:

²³gin ma rac maeni ceke ai kud i ic, e ma cido dhanu.

²⁴Eai ku keca, man ecidho i kieu mi Turo ku Sidon. Emondo de i ot, eyenyo ngo ya ng'atu moko ng'ei maeni; ere ecopo pondo ngo.

²⁵Ento ndhu ndhu nica dhaku, ma nyathi nyare won tipo m'ucido, kan ewinjo pire, ebino epodho the tiende.

²⁶Nwang'u dhakune Dhayunani, ma Surufenisa. E ekwaye nia ewodh pajogi kud i nyare.

²⁷Ewacu ire kumae, Wek nyithindho gilar giyeng': kum emaku piny ungo ya jugam kwen mi nyithindho jubole ni gwogi.

²⁸Ento eloko lembe ewacu ire kumae, Eyo, Rwoth; cil gwogi ma the mesa de gicamu kum ng'ili kwen mi nyithindho.

²⁹Ewacu ire kumae, Kum lembe maeni cidhi; pajogi daru wok kud i nyeri.

³⁰E edok i ot pare, enwang'u jupielo nyathin wi kavuto, pajogi de daru wok.

³¹Eai kendo kud i kieu mi Turo, ekadhu ku i Sidon cil ku dhu nam mi Galilaya, ku kind kieu mi Dekapoli.

³²Man gikelo ng'atu ma ithe dhing' i bang'e, ma jaragwong'o de; e gikwaye eketh cinge i kume.

³³Ecoro kude cen nyalwe ku kmd udul dhanu, eroyo lwete de i ithe, man eng'ulo lau, emulo ko lebe;

³⁴eng'ayu wang'e de malu i polo, egamu cwinye, man ewacu ire kumae, Efatha, thelembene kumae, Yebri.

³⁵E ithe yabre, twic mi lebe de gonjre, man eweco terere.

³⁶Eng'olo igi ya ku giyer ni ng'atu moko: ento ku ba ng'olo m'eng'olo ko igi hai, e girweyo lembene hai m'usagu.

³⁷E igi wang' lii apila, giwacu kumae, Etimo gin ceke ber; eketho ju ma ithgi dhing' giwinjo, man ajuba de giweco.

Marko 8

¹I ceng' maeno, kan udul dhanu ma dit gicokri kendo, cam migi de mbe, elwong'o julubne i bang'e, man ewacu igi kumae,

²Ngisi benega kum udul dhanu, kum gibedo i bang'a kawono doko ceng' adek, ma cam umbe kugi:

³tek alalugi ya gidok thugi ku kec, gibivoc i yo; jumoko m'i kindgi de giai bor.

- ⁴Julubne giloko ire lembe kumae, I ka ma ngele keni jucopo nwang'u kwen m'ang'ina ma ci yeng'o dhanu maeni kani?
- ⁵Epenjogi de kumae, Lungu kwen adi ma ni i beng'wu? Giwacu kumae, Abiro.
- ⁶Man eng'olo ya udul dhanu gibed piny i ng'om: man eting'o lungu kwen abiro, kan emio foyofoc de, eng'weko ie, emio de ba julubne, giketh i wang'gi: e gikethogi i wang' udul dhanu.
- ⁷Nwang'u rec moko ma thindho ni i bang'gi: e kan emio mugisa i wie, eng'olo ya juketh maeni bende i wang'gi.
- ⁸Gicamu de, giyeng': man gicoko padune m'udong', katoko abiro.
- ⁹Man giyenyo romo rubanga ang'wen: e elalugi.
- ¹⁰E eni eni eidho i combo ku iulubne de. man ebino i ng'et Dalmanu
- ¹¹E Jufarisayo giwok, man gimaku penjri gikugi, gibeyenyo giranyutha i polo i bang'e gibidhe ko.
- ¹²Man egamu cwinye kwede kud i ie, ewacu kumae, Dhanum'utuk maeni gibeyenyo giranyutha nedi? andha awacu iwu kumae, Giranyutha moko mbe m'umire ni dhanum'utuk maeni.
- ¹³E ewekogi, eidho i combo kendo ekadhu ko lokaca.
- ¹⁴E wigi wil ku ting'o kwen; gimbe kude i combo ndhu lungu kwen acel pil.
- ¹⁵Man eng'olo igi, ewacu kumae, Wubed ku weng'wu, wukuru ni thobi mi Jufarisayo ku thobi pa Herode.
- ¹⁶E giporo lembe i kindgi, giwacu kumae, Kwen umbe kudwa.
- ¹⁷E Yesu m'ung'eyo maeni ewacu igi kumae, Wuporo lembe nedi, kum kwen mu mbe? fodi wuneno ngo, kadok ang'eya de wung'eyo ngo? adundewu doko nwang'i?
- ¹⁸Wubedo ku weng'wu, wuneno de ngo? man wubedo ku ithwu, wuwinjo de ngo? wupoi de ngo?
- ¹⁹Kinde m'ang'weko i lungu kwen abic ni dhanu rubanga abic, wucoko padune m'udong' upong'o katoko adi? Giwacu ire kumae, Apar wi ario.
- ²⁰Man abiro i kind rubanga ang'wen, wucoko padune katoko adi? Giwacu ire kumae, Abiro.
- ²¹Man ewacu igi kumae, Fodi wukung'eyo ngo?
- ²²Giwok Bethsaida. Man jukelo ng'atu m'abinga i bang'e, gikwaye de emul kume.
- ²³E emaku cing' ng'atu m'abinga, man ewodhe woko kud i pacu; e kan eng'ulo lau i wang'e, eketho cinge de i kume, epenje kumae, Ineno piny moko?

- ²⁴Eting’o wang’e malu, man ewacu kumae, Aneno dhanu; kum anenogi va yen, m’ubewotho.
- ²⁵E elund eketho cinge kendo i wang’e; ng’atuca de neno piny tel, man edok kakare, edong’ eneno gin ceke terere.
- ²⁶Man eore edok thugi, ewacu kumae, Kadok i pacu de kud imondi.
- ²⁷E Yesu ai, ku julubne, gicidho i pacu Kaisaria Filipi: i kinde ma gini i yo epenjo julubne, ewacu igi kumae, Dhanu giwacu ya an a ng’a?
- ²⁸E giyero ire, giwacu kumae, Yohana ma Jabaputisi; jumange de, Elia; ento jumange re, Acel ma kind jubila.
- ²⁹Man epenjogi kumae, Wun ke wuwacu ya an a ng’a? Petro dwoko lembe ewacu ire kumae, In i Kristu.
- ³⁰Man eng’olo igi ya ku giyer pire ni ng’atu moko.
- ³¹Emaku ponjogi de, nia Wod dhanu bikosendre be ku gin dupa, judongo ku julam ma dongo ku jugorcik de gibikwere, jubinege de, man ka ceng’ adek ukadhu ebicer kendo.
- ³²Man eyero lembene igi kele. E Petro make, emaku kwere.
- ³³Ento elokre, e kan eneno julubne, ejuko Petro, ewacu kumae, Dok i ng’eya Jok; kum ii pido pi gin pa Mungu ngo, ento gin mi dhanu.
- ³⁴E elwong’o udul dhanu gibin i bang’e ku julubne, man ewacu igi kumae, Tek ng’atu moko yenyo elub ng’eya, wek ekwere gire, eting’ yen m’athara pare, elub ng’eya.
- ³⁵Kum ng’atu ma tek uyenyoy ebodh kwo pare ebirwinye; ng’atu ma tek birwinyo kwo pare de pira ku lembanyong’a ma juboth ko de e ebibodhe.
- ³⁶Kum kuloka ang’o ni dhanu, kadok egam ng’om ngung’, ma kwo pare ke rwinyo?
- ³⁷Kum girang’o ma ng’atu moko biwilo ko kwo pare?
- ³⁸Kum ng’atu ma tek lewic binege i kuma kum lembe para de i kind dhanum’utuk maeni mi gier ku dubo de, Wod dhanu bende lewic binege i kume, kan ebino i dwong’ pa Won ku malaika maleng’ de.

Marko 9

- ¹Man ewacu igi kumae, Audha ayero iwu kumae, Jumoko nuti kind ju m’ucungo keni, ma gibibilo tho ki ngo, cil ma gineno ko ker pa Mungu bino ku tego.
- ²Yo ng’ei ceng’ abusieli Yesu gamu Petro giku Yakobo, man Yohana, man eterogi kakendgi wi got ma wiu: e kite lokre i wang’gi;

- ³e kendi pare rieny, udoko tar pr, ma jabodho moko mbe m'i ng'om ma copo dwoke tar kumeca.
- ⁴E Elia giku Musa giwok i wang'gi: gibeweco giku Yesugi.
- ⁵E Petro loko lembe ewacu ni Yesu kumae, Japonji, ber iwa kum wani keni: wek watim odbak adek; acel iri, acel ni Musa, acel ke ni Elia.
- ⁶Kum eng'eyo ngo lem m'eloki, kum Iworo benegogi dit.
- ⁷Afuru bino ketho tipo i wigi: dwal uai i afuru de wacu kumae, Maeni Woda ma jamerna: wuwinje.
- ⁸E eni eni nik ginen kun ku kun, gineno ng'atu moko ngo kendo, ndhu Yesu kende re gikugi.
- ⁹Kinde ma gibeloro got, eng'olo igi ya ku giyer pi gin ma gineno ni ng'atu moko, ento ka Wod dhanu bicer kendo ku kind ju m'utho.
- ¹⁰E gikanu lembene, gipenjri gigi rama thelembe mi cer kendo ku kind ju m'utho bedo ko.
- ¹¹E gipenje, giwacu kumae, Ebedo nenedi ma jugorcik giwacu nia Elia bikolar bino be e?
- ¹²Man ewacu igi kumae, Elia lar ubino andha, man edwoko gin ceke: pi Wod dhanu ke jugoro nenedi, nia ebisendre ku gin dupa jubidwoke doko mananu de?
- ¹³Ento awacu iwu, nia Elia daru bino, man gitimo gin ceke ma giyenyo i kume, cil calu egore pire.
- ¹⁴E ka gibino ba julub, gineno udul dhanu ma dit ung'ino i kumgi, jugorcik de ma gibepenjri gikugi.
- ¹⁵Ndhu ndhu nica udul dhanu ceke, ka ginene, igi wang' lii, man giringo aringa i bang'e gimothe.
- ¹⁶Man epenjogi kumae, Wupenjru kugi ku lembang'o?
- ¹⁷E ng'atu acel ma kind udul dhanu dwoko lembe ire kumae, Japonji, akelo woda i beng'i, m'ubedo ku tipo m'ajuba;
- ¹⁸man ka ma tek tipo tere i ie ceke, eredhe piny: voyo de dhure i dhoge, man ekayu lake, emoge de: e awacu ni julubni ya giwodhe woko; e ecopre igi ngo.
- ¹⁹Man cloko lembe igi ewacu kumae, E dlianmrrutuk ma yioyic umbe kugi, abibedo kudu rokani? abitwio cwinya i kumwu rokani? kele i bang'a.
- ²⁰Gikele de i bang'e: e kan enene, e eni eni tipone yece dit; man epodho i ng'om, emaku ng'iele voyo de wok.
- ²¹E epenjo won kumae, Gin maeni make ugambre awene? Man ewacu ire kumae, Ma fodi e nyathin.

- 22**Ebederedhe i mac kud i pi bende wang' udul, nik enyotho: ento tek icopo timo gin moko, bed ku ngisi i kumwa, ikonywa.
- 23**Yesu wacu ire kumae, Tek icopo! Gin ceke copre ni ng'atu m'uyio.
- 24**E ndhu ndhu nica won nyathin ukok, ewacu kumae, Ayio; konya ku yioyic para m'umbe.
- 25**E ka Yesu neno nia udul dhanu gibering'ni karacelo, ejuko tipo m'ucido, ewacu ire kumae, In i tipo ma weco ngo ma winjo de ngo, ang'olo iri wok woko kud i ie, kud i dong' imond i ie kendo.
- 26**Kan ekok, ejake ma tek, e eai woko: man nyathin ubedo calu ng'atu m'utho; ketho nia dhanu kucel ma dit giwacu kumae, Etho.
- 27**Ento Yesu maku cinge, eting'e ko malu; e eai.
- 28**E kan emondo i ot, julubne gipenje nyalwe kumae, Nedi wacopo wodhe ngo?
- 29**ewacu igi kumae, Wagi gino wodhre ku gin moko ngo, ndhu ku rwo.
- 30**E giai kuca, gikadhu ku kind Galilaya; eyenyo ngo ya ng'atu moko ng'ei.
- 31**Kum eponjo julubne, ewacu igi kumae, Wod dhanu jumie i cing' dhanu, man gibinege; ka junege de, yo ng'ei ceng' adek ebicer kendo.
- 32**Ento ging'eyo thelembe nini ngo, lworro de cerogi ku penje.
- 33**E gibino Kapernaum: kan eni i ot epenjogi kumae, Ande wuporo leembang'o i gengi?
- 34**Ento gibedo ling': kum ande gipiembri i yo, nia ng'a ma dit ma sagu.
- 35**Ebedo piny, man elwong'o juapar wi ario; ewacu igi kumae, Tek ng'atu moko yenyo ebed ma kwong'ane, ebibedo cen ma sagu ceke, man jatic mi ceke.
- 36**E egamu nyathin ma nyanok, ekethe i kindgi: e kan eting'e wi bote, ewacu igi kumae,
- 37**Ng'atu ma tek bijolo acel mi wagi nyithindho ma thindho ku nyinga, nwang'u ejolo an; man ng'atu ma tek ujolo an, nwang'u ejolo an ungo, ento ng'atu m'uora.
- 38**Yohana wacu ire kumae, Japonji, waneno ng'atu acel m'ubewodho pajogi ku nyingi; e wacere, kum elubowa ngo.
- 39**Ento Yesu wacu kumae, Kud wukwere: kum ng'atu moko mbe ma bitimo tic ma dit ku nyinga, ma bicopo yero pira rac pio pio.
- 40**Kum ng'atu ma tek ubedo jadhogwa ngo nwang'u en e jabang'wa.
- 41**Kum ng'atu ma tek bimio iwu pi i kikombe wumadhi, kum wu ju pa Kristu, andha ayero iwu, nia sukulia pare birwinyo ire ki ngo.

⁴²Man ke ng'atu ma tek biketho ng'atu acel ma kind nyithi ju maeni ma giyia ukier, ni ng'atuca cika jung'ab pom ma dit i ng'ute, jubaye ko i nam.

⁴³Man tek cingi ketho ikier, thume woko: cika imond i kwo kud abala, sagu ma tek icidho i gehena ku cingi ario, i mac ma negre ngo,

⁴⁴ka ma ukoko migi tho ngo, macne de negre ngo.

⁴⁵Man tek tiendi ketho ikier, thume woko: cika imond i kwo kud abala sagu ma tek ibedo ku tiendi ario ma jubibei ko i gehena,

⁴⁶ka ma ukoko migi tho ngo, macne de negre ngo.

⁴⁷Man ke tek weng'i ketho ikier, fudhe woko: cika imond i ker pa Mungu ku weng'i acel sagu ma tek ibedo ku weng'i ario ma jubei ko i gehena,

⁴⁸ka ma ukoko migi tho ngo, macne de negre ngo.

⁴⁹Kum ku ba dhanu jubimulogi ku kadu ku mac.

⁵⁰Kadu ber: ento tek kadu lake tho, wubidwoko lake kud ang'o? Wubed ku kadu i iwu giwu, cwinywu de kwi wuku juwedu.

Marko 10

¹Eai ku kuca, man ebino i kieu Yahudi ku mi loka Yordan: e udul dhanu gicoko dhoggi i bang'e kendo; man, eponjogi kendo calu ma naka ebedepo njogi.

²E Jufarisayo gibino i bang'e, man gipenje kumae, Cik uyio ya ng'atu moko riem dhaku pare? gibidhe ko.

³Edwoko lembe ewacu igi kumae, Yang' Musa ng'olo iwu ang'o?

⁴Giwacu kumae, Musa yio jugor waraga mi riem, man jurieme woko.

⁵Ento Yesu wacu igi kumae, Kum nwang' mir adundewu e m'uketho egoro lembang'ola maeni.

⁶Ento ugambre i thangambere mi giracwia pa Mungu, etimogi nico ku dhaku.

⁷Kum lembe runi nico biweko won ku min de, man ebimoko ndhu ba dhaku pare;

⁸e gin ario de gibidoko ni kum acel: kum kumeno gibedo ario kendo ngo, ento kum acel.

⁹Ka kumeno gin ma Mungu ribo karacelo dong' dhanu kud upok kindgi.

¹⁰Julubne gipenje kendo pi lembe nini i ot.

¹¹Man ewacu igi kumae, Ng'atu ma tek uriemo dhaku pare, egamu mange de, nwang'u egiere kude:

¹²man tek enne de ecoro cware cen, egomo mange, nwang'u egiere swa.

- ¹³Nwang'u gibekelo nyithindho ma thindho i bang'e, kara emul kumgi: e julubne gijukogi.
- ¹⁴Ento ka Yesu neno maeni, lembene ton i ie, ewacu igi kumae, Wuwek nyithindho ma thindho givin i bang'a; kud wukwergi: kum ker pa Mungu en e mi wagi joni.
- ¹⁵Andha ayero iwu kumae, Ng'atu ma tek bijolo ker pa Mungu calu nyathin ma nyanok ungo, ebimondo i ie ki ngo.
- ¹⁶E eting'ogi wi bote, emio igi mugisa, m'eketho ko cinge i wigi.
- ¹⁷E kan eai ebecikucidho i yo, ng'atu moko ring'ni i bang'e, erum ire de, epenje de, Japonji ma ber, atim ang'o kara acam pacu mi kwo ma rondo ku rondo?
- ¹⁸E Yesu wacu ire kumae, Ilwong'a ma ber nedi? ng'atu moko mbe ma ber, ndhu acel, en e Mungu.
- ¹⁹Ing'eyo lembang'ola, Kud ineg nek, Kud igieri swa, kud ikwal kwo, Kud ibal abali, Kud ivug kuvuga, Yung wuru ku meru de.
- ²⁰Ewacu ire kumae, Japonji, gin maeni ceke agamu woro ma fodi a nyathin.
- ²¹E ka Yesu nene emare, ewacu ire kumae, Gin acel urem iri: cidh, ilok piny ceke m'ibedo ko, imi ni jucan, man ibibedo ku piny m'akana i polo: man ibin, ilub ng'eya.
- ²²Ento wang'e cido kum lembene, edong' ecidho ma can unege: kum en e ng'atu ma piny pare dit.
- ²³E Yesu neno piny gbe, ewacu de ni julubne kumae, Mondo i ker pa Mungu tek apila ni julonyo!
- ²⁴E julub igi wang' lii kum lembe pare. Ento Yesu loko lembe kendo, ewacu igi kumae, Nyithindho, mondo i ker pa Mungu tek apila ni ju m'ugeno lonyo!
- ²⁵Kadhu ku wang' sindani yot ni ngamia, ma sagu mondo i ker pa Mungu ni jalonyo.
- ²⁶E igi wang' lii apila, giwacu ire kumae, Ka kumeno ng'a ma copo bothi?
- ²⁷Yesu nenogi ewacu igi kumae, Ni dhanu ecopre ngo, ento ku Mungu to ecopre: kum gin ceke copre ku Mungu.
- ²⁸Petro maku wacu ire kumae, Nen, waweko gin ceke, man walubo ng'ei.
- ²⁹Yesu wacu kumae, Andha awacu iri, Ng'atu moko mbe m'uweko ot, kadi umego, kadi nyimego, kadi mego, kadi wego, kadi nyithindho, kadi pothi, pira, ku pi lembanyong'a ma juboth ko de,

³⁰ma k'ebinwang'u acel bang' dak ungo kawono i nindo maeni, udi, kud umego, ku nyimego, ku mego, ku nyithindho, ku pothi, karacelo ku ragedo; man i ng'om ma bibino kwo ma rondo ku rondo.

³¹Ento dupa ma kwong'ane bidok ni ma cenne; man ma cenne bidok ni ma kwong'ane.

³²E gini i yo, ma gibeidho ko malu Yerusalem; man Yesu telo yo i wang'gi: e igi wang' lii; ju m'ulubo ng'eye de lworo benegogi. E ecoko juapar wi ario kendo, man emaku yero igi pi gin ma bitimbre i kume,

³³ewacu kumae, Nen, waidho malu Yerusalem; e Wod dhanu jubiketho i cing' julam ma dongo ku jugorcik e gibigonje ya etho, man gibikethe i cing' Thekdhanumange:

³⁴e gibing'ale, gibing'ulo lau i kume, gibifode ma tek, gibinege de; ere yo ng'ei ceng' adek ebicer kendo.

³⁵Yakobo giku Yohana, wot Zebedayo, gibino i bang'e, giwacu ire kumae, Japonji, wayenyo itim iwa gin ma tek wabikwei ko.

³⁶Ewacu igi kumae, Wuyenyo atim ang'o iwu?

³⁷E giwacu ire kumae, Ng'ol iwa ya wajany, acel yo ku cingi ma yor acwic, acel ke yo ku cingi ma yor acam, i dwong' peri.

³⁸Ento Yesu wacu igi kumae, Wung'eyo ngo gin ma wukwayu. Wucopo madhu krkombe m'amadhu? kadi wucopo maku baputisi m'amaku?

³⁹Man giwacu ire kumae, Wacopo yo. Yesu wacu igi kumae, Kikombe m'amadhu wubimadhu; baputisi de m'amaku wubimaku bende:

⁴⁰ento jany yo ku cinga ma yor acwic kadi i cinga ma yor acam en e para ngo m'amio; ento en e ni ju ma juyike igi.

⁴¹E ka juapar giwinjo maeni, gimaku bedo ku konda kum Yakobo giku Yohana.

⁴²E Yesu lwong'ogi i bang'e, ewacu igi kumae, Wung'eyo nia ju ma gibimo wi Thekdhanumange girwodho i wigi; judongo migi de gidhiro wigi.

⁴³Ento ebeto kumeno ngo i kindwu: ento ng'atu ma tek uyenyo edok dwong' i kindwu, ebibedo jatim iwu;

⁴⁴man ng'atu ma tek uyenyo ebeto ma kwong'a i kindwu, ebibedo ni jendwu kewu ceke.

⁴⁵Kum Wod dhanu bende bino ngo ya jutim ire, ento kara etim, emi kwo pare de ni gony mi dhanu dupa.

⁴⁶E gibino Yeriko: man kinde m'eai Yeriko, giku julubne man udul dhanu ma dit, wod Timayo, ma nyinge Bartimayo, en e jakwaipiny ma en e abinga, ebeto dhu yo.

⁴⁷Kan ewinjo nia en e Yesu ma Janazareti, emaku kok, ewacu kumae, Yesu, in i wod Daudi, bed ku kisa i kuma.

⁴⁸Dhanu dupa gijuke, nia ebed ling': ento ekok ma sagu kumae, In i wod Daudi, bed ku kisa i kuma.

⁴⁹Yesu cungo gr, man ewacu kumae, Wulwong'e. E gilwong'o ng'atu m'abingane, giwacu ire kumae, Dong' cwinyi bed tek: ai malu, ebelwong'i.

⁵⁰E en, m'ebayu kendi pare cen, epor malu, ebino ba Yesu.

⁵¹Yesu loko ire lembe, ewacu kumae, Iyenyoy atim ang'o iri? Ng'atu m'abinga wacu ire kumae, Japonji, ayenyoy wang'a ler.

⁵²Yesu wacu ire kumae, Icidhi; yioyic peri e m'utito kumi. E ndhu ndhu nica wang'e lero, edong' elubo ng'eye i wang'ayo.

Marko 11

¹Ka gidhingo Yerusalem, ba Bethfage ku Bethania de, ba got Zeituni, eero kind julubne ario,

²ewacu igi kumae, Wucidh i pacu ma i weng'wu: e pio pio ka wumondo i ie, wubinwang'u nyathi kana m'ubedo atwia, ma ng'atu moko fokubedo i wie ngo; wugonye, wukele.

³Tek ng'atu moko wacu iwu kumae, Wutimo maeni nedi? wuwac kumae, Cande ni i kum Rwoth; e ndhu ndhu nica ebioire keni kendo.

⁴E gicidho, ginwang'u nyathi kana bedo atwia dhugola yo woko i gengi; gigonye de.

⁵Jumoko m'ucungo keca giwacu igi kumae, Wutimo ang'o, ma wubegonyo ko nyathi kana e?

⁶Gin ke giwacu igi calu ma Yesu wacu: e giwekogi gicidho.

⁷E gikelo nyathi kana ba Yesu, gipedho kendi migi de i wie; ebedo de i wie.

⁸Dhanu dupa gipedho kendi migi i wang'ayo; jumange ke jangyen, ma gitong'o i thim.

⁹Ju m'utelo yo, ku ju m'udong' cen de, gikok akoka kumae, Hosana; mugisa ni ng'atu m'ubino ku nying Rwoth:

¹⁰Mugisa ni ker m'ubino, ker pa wegwa ma Daudi: Hosana malu ngbir.

¹¹E emondo i Yerusalem, i hekalu; e kan eneno wi gin ceke ndri, nwang'u piny udoko uthieno, eai ecidho Bethania ku juapar wi ario.

¹²Urwone, ka giai Bethania, kec unege.

- 13**E kan eneno ulam udinyo ku cen, ebino, nia nyo ebinwang'u gin moko i wie: man kan ebino i bang'e, enwang'u gin moko ngo ndhu ithe kende; kum kacek mir ulam fodutundo ngo.
- 14**Eloko lembe man ewacu ire kumae, Ng'atu moko kud ucam nyingi ugambre kawono cil nja ku nja. Julubne de giwinjo maeni.
- 15**Man gibino Yerusalem, emondo i hekalu, man emaku riemo ju ma giloko piny ku ju m'ung'iewo de ku i hekalu, eredho mesa de mi juwilsente, ku kom mi ju m'nioko akuru;
- 16**man eyio ngo ya ng'atu moko yei agulu kadh kudo ku i hekalu.
- 17**Eponjo, ewacu igi kumae, Egore ngo kumae, Ot para jubilwong'o ot mi rwo ni thek ceke? ento wudwoke ni kagonjo mi weg ayeki.
- 18**Julam ma dongo ku jugorcik giwinjo maeni, e giyenyoy maram ginyothe ko: kum lworoy negoy i kume, kum udul dhanu ceke igi wang' lii kum ponji pare.
- 19**E ku bang' uthienoy ceke ebedeai kud i adhura.
- 20**Kugweno ka gikadhu, gineno ulam uner cil i ulage.
- 21**E Petro m'upoy kum lembene ewacu ire kumae, Japonji, nen, ulam m'ikwong'o ener woko.
- 22**Yesu loko lembe ewacu igi kumae, Wubed ku yioyic yo ba Mungu.
- 23**Andha awacu iwu kumae, Ng'atu ma tek biwacu ni got maeni kumae, Mugri iboly i nam, ma adundene kubedo jiji ngo, ento ebiyoy nia gin m'eyero timbre, e gica bibedoy ire.
- 24**Ka kumeno awacu iwu kumae, Gin ceke ma tek wurwo wupenjoy pire de, wuyi nia wujology, e wubibedoy kugi.
- 25**E kinde ma tek wucungo wuberwo, tek wubedoy ku lembe kum ng'atu moko, wuwek lembene rwiny; kara Wegwu bende ma ni i polo uwek kier mu woko.
- 26**Ento tek wuwekoy lembene rwinyoy woko ngo, Wegwu ma ni i polo de biwekoy kier mu woko ngo.
- 27**E gibino kendo Yerusalem: kan ebewothoy de i hekalu, julam ma dongo ku jugorcik ku judongoy de gibino i bang'e;
- 28**e giwacu ire kumae, Itimoy gin maeni ku ng'ol manedi? kadi ng'a m'umio iri ng'ol maeni m'itimoy ko ginduni?
- 29**E Yesu wacu igi kumae, Abipenjoy penji acel i beng'wu, wulok ira lembene de, kan abiyero iwu pi ng'ol m'atimoy ko gin maeni.
- 30**Baputisi pa Yohana ay i polo, kadi bay dhanu? wulok ira lembe.

³¹E giporo lembe gigi, giwacu kumae, Tek wabiwacu kumae, Uai i polo; ebiwacu kumae, Ka kumeno wuyie ngo nedi?

³²Ento tek wawacu kumae, Uai ba dhanu, gilworo dhanu: kum dhanu ceke gikwanu andha nia Yohana en e jabila.

³³E giloko lembe ni Yesu giwacu kumae, Wang'eyo ngo. E Yesu wacu igi kumae, Kadok an de ayero iwu ngo pi ng'ol m'atimo ko gin maeni.

Marko 12

¹Man emaku yero igi ku lembabola kumae, Ng'atu moko podho podho mir ulok, epidho arara de i kume, ekunyo vur ma jubiyo ie nying ulok de, man egomo odtra, e emie ni sumba ba jutipodho, en ke ecidho i ng'om mange.

²Ka kacekne tundo eoro jamiru ba jutipodho, kara egam kum nying ulok moko m'i podho mir ulok ba jutipodho.

³E gigame, gifode de, giketho edok mananu.

⁴Man eoro jamiru mange kendo i bang'gi; e gitong'o lero i wie, man gitime rac dit.

⁵Man eoro mange; e ginege: ku mange de dupa; moko gifodo, moko ke ginego anega.

⁶Udong' ng'atu acel i bang'e, en e wode ma jamer: eore macen i bang'gi, ewacu kumae, Gibijwigri ni woda.

⁷Ento jutipodho maeno giwacu i kindgi gigi kumae, Maeni jacampacu; wubin, wanegue, kara camupacu dong' iwa.

⁸E gimake, ginege de, man gibaye woko kud i podho mir ulok.

⁹Ka kumeno rwoth ma won podho mir ulok bitimo ang'o? ebibino ebinyotho jutipodho, man ebimio podho mir ulok ni jumange.

¹⁰Fodi wusomo lembagora pa Mungu maeni ngo ma kumae, Kidi ma jugomot gikwero, Kidine judwoke ni wi gul;

¹¹Maeni ai ba Rwoth, Man en e gin ma wang'u ijo i wang'wa?

¹²E giyenyo gimake; ere gilworo udul dhanu; kum ging'eyo nia ebolo lembene i kumgi; e giweke, man gicidho.

¹³Man giro jumoko ma kind Jufarisayo ku m'i kind Juherodiano de i bang'e, kara gimake i wec.

¹⁴E ka giwok, giwacu ire kumae, Japonji, wang'eyo nia in i andha, man iparu pi ng'atu moko ngo; kum ineno dhanu ni wang'gi ngo, ento andha iponjo yo pa Mungu: Cik uyio ya jumi ajok ni Kaisari, kadi ku jumi?

¹⁵Wami, kadi ku wami? Ento en, m'eng'eyo ambili migi, ewacu igi kumae, Wumulo ia nedi? wukel denarius i bang'a, anen.

- 16**E gikele. Man epenjogi kumae, Meni ayi ng'a ku ramblembene de? Giwacu ire kumae, Pa Kaisari.
- 17**Yesu wacu igi kumae, Wumi ni Kaisari gin ma pa Kaisari, ni Mungu de gin ma pa Mungu. E igi wang' lii i kume.
- 18**Man Jusadukayo, ma giwacu nia cer umbe, gibino i bang'e; gipenje, giwacu kumae,
- 19**Japonji, Musa goro iwa kumae, Tek ng'atu moko umin utho, ma cege ke dong', m'eweko nyithindho de ngo, ya umin udong' ulag dhakune, enyol kodhidhanu de ni umin mire.
- 20**Nwang'u utumego abiro nuti: ma kwong'ane gamu dhaku, etho de m'eweko kodhi ngo;
- 21**mir arionde lage, de etho, m'eweko kodhi ngo i ng'eye; mir adege de kumeca:
- 22**gin abiro de giweco kodhi ngo. Yo ng'eigi ceke dhaku de tho.
- 23**I cer ebidong' bedo ci ng'a i kindgi? kum ebedo dhaku migi gin abiro.
- 24**Yesu wacu igi kumae, En e kum lembc nini ngo nia wukieri, kum wung'eyo lembagora pa Mungu ngo, kadi tego pa Mungu de?
- 25**Kum ka gibicer ku kind ju m'utho. gigambri ngo, jumio de ngo ya jugam; ento gibedo va malaika m'i polo.
- 26**Ento pi ju m'utho, ma nia gicer; fodi wusomo ngo i kitabu pa Musa, i ka m'uyere pi Yen m'udinyo, maram Mungu weco ko i bang'e, ewacu kumae, An a Mungu pa Ibrahim, man Mungu pa Isak, man Mungu pa Yakobo?
- 27**En e Mungu mi ju m'utho ngo, ento mi ju ma kwo: wukier dit.
- 28**Ng'atu acel ma kind jugorcik ubino, ewinjo gibepenjri i kindgi, eng'eyo de nia eloko igi lembe dre, e epenje kumae, Lembang'ola makani ma ma kwong'a ceke?
- 29**Yesu loko lembe kumae, Ma kwong'ane ende, Wuwinji, E Israel; Rwoth Mungu mwa, en e Rwoth acel:
- 30**man imar Rwoth Mungu peri kud adundeni ceke, ku ng'eyong'ec peri ceke de, ku pidoii ceke de, man ku tegoni ceke de.
- 31**Mir arionde ke e, Imar wedu calu in giri. Lembang'ola mange mbe ma dit ma sagu maeni.
- 32**Jagorcik uwacu ire kumae, Andha, Japonji, iwacu dre nia en e acel: man mange mbe ndhu en:
- 33**man mare kud adunde ceke, ku ng'eyong'ec ceke de, man ku tego ceke, man maru wadijo calu jogijo, esagu giramia m'awang'a ma bo ceke ku lam bende.

³⁴E ka Yesu neno nia edwoko lembe ku rieko, ewacu ire kumae, In i bor ungo ku ker pa Mungu. Yo ng'ei maeno ng'atu moko mbe ma cwinye tek m'epenje ko ku penji moko.

³⁵Yesu loko lembe ewacu kumae, kan eponjo i hekalu, Jugorcik giwacu nenedi nia Kristu en e wod Daudi?

³⁶Daudi en ewacu kumae, ku Tipo Maleng', Rwoth uwacu ni Rwoth para kumae, Jany yo ku cinga ma yor acwic, Ram aketh ko jukwoji ni kom mi tiendi.

³⁷Daudi en elwong'e Rwoth; e kan ebedo wode nenedi? E dhanu ma sai giwinje ku mutoro.

³⁸Man eyero kumae, i ponji pare, Wukuru ni jugorcik, ma gimaru wotho ku kendi ma lor lor, ku bedo ku moth ma i katali de,

³⁹ku bedo wi kom ma sagu wadi i kacokri, ku ka ma sagu wagi i agba:

⁴⁰gi ju ma gicamu udi mi mon ma coggi tho, ni abombi migi de girwo ku rwo ma bor; joni gibinwang'u lembapoka ma dit m'usagu.

⁴¹Man ebedo piny vut kakanpiny, man eneno rama udul dhanu gibolo ko sente i kakanpinyne: dupa de ma gi julonyo gibolo lwar i ie.

⁴²Nie dhaku ma cware tho ma jacan ubino ebolo sente ario i ie, ma romo gwilo acel.

⁴³Man elwong'o julubne i bang'e ewacu igi kumae, Andha awacu iwu kumae, Dhaku maeni ma cware tho ma jacan ebolo ma sagu ma dhanu ceke giboio i kakanpiny:

⁴⁴kum gin ceke gibolo i ie kum sagri migi; ento en kum canpiny pare ebolo i ie ceke m'ebedo ko, ma en e ceke m'etungre kudo.

Marko 13

¹E kan eai i hekalu, jalubne acel uwacu ire kumae, Japonji, nen, maram kidi ku udi de bedo ko!

²E Yesu wacu ire kumae, Ineno udi ma dongo maeni? kidi acel de mbe ma bibedo wi wadi ma jubibolo piny ungo.

³E kan ebedo piny wi got Zeituni yo ba hekalu, Petro giku Yakobo man Yohana kud Andrea gipenje nyalwe kumae,

⁴Yer iwa, gin maeni bitimbre awene? ang'o ma bibedo ni giranyutha ka gin maeni ceke dhingo timbre?

⁵E Yesu maku yero igi kumae, Wukuru, kara ng'atu moko kud uwingwu.

⁶Dhanu dupa bibino i nyinga, gibiwacu kumae, An a en; man gibiwingo dhanu dupa.

- ⁷E ka wubiwinjo pir ali ku rwong ali de cwinywu kud ung'abre: gin maeni bikotimbre be; ento kajikne fodi.
- ⁸Kum thek bijai kum thek wadi, ker de kum ker wadi; digidi de bibedo nuti tak tak; ndrú de bipodho: gin maeni en e landu wi can.
- ⁹Ento dong' wukuru giwu: kum jubikethowu i wang' dilo i kacokri de jubifodowu; wubicungo i wang' jubim ku ju m'ubimo de pira, ni lembatuca igi.
- ¹⁰Man lembanyong'a ma juboth ko jubikolar yero be ni thek ceke.
- ¹¹E ka gipeyowu ba titi, gimiowu de, cwinywu kud ular uring kum lembe ma wubiyero: ento gin ma tek bimire iwu i saa maeno, wuyer maeno; kum en e wun ungo m'uyero, ento Tipo Maleng'.
- ¹²Man umego biting'o umego wang' tho, won nyathin de nyathin pare; nyithindho de bijai kum junyodo migi, man gibiketho juneggi.
- ¹³E dhanu ceke gibidaguwu kum nyinga: ento ng'atu ma biciro cil i kajikne, ng'atuno e ma biboth.
- ¹⁴Ento ka wuneno gin mir adegí mi nyoth ucungo ka ma maku kud ecung i ie (e dong' ng'atu m'usomo ung'ei), i nindo maeni dong' ju ma gini i Yahudi giring i got:
- ¹⁵man ng'atu ma ni wi ot kud elor piny, kadi kud emond i ie, niwodho gin moko ma ni i ot pare:
- ¹⁶man ng'atu ma ni i podho kud edwog nigamu kanzu pare.
- ¹⁷Ento can wi mon ma igi nuti ku mon ma nyithindho dhodhogi i ceng' maeno!
- ¹⁸Wurwo de kara kud ebed i nindo mi koyo.
- ¹⁹Kum masendi bibedo nuti i ceng' maeno, ma wagi maeno ubedo umbe ugambre i thangambere mi giracwia ma Mungu cwio cil ku kawono nini de, man ebibedo nuti kendo de ngo.
- ²⁰Man tek Rwoth kujwigo ceng'ne ngo, kuno di kum moko mbe m'uboth; ento kum ju ma jugoyo nying'gi, m'efoyo, ejwigo ceng'ne.
- ²¹I nindo maeno tek ng'atu moko biwacu iwu kumae, Nen, Kristu eni: kadi, Nen, kuca: kud wuyi:
- ²²kum ju ma Kristu mi ndra ku jubila mi ndra de gibiwok, gibinyutho giranyutha ku musana de, kara giwing ko ju ma jugoyo nying'gi de, tek ecopre.
- ²³Ento wukuru: nen, alar ayero iwu gin ceke.
- ²⁴Ento i ceng' maeno, yo ng'ei masendi maeno, ceng' biyutho, dwi de birieny ungo,
- ²⁵cero de bipodho kud i polo, tego mi polo de biyengre.

- ²⁶E i nindo maeno gibineno Wod dhanu bebino i afuru ku tego ma dit ku dwong' bende.
- ²⁷Man i nindo maeno ebioro malaika, man ebicoko jupare ma jugoyo nying'gi karacelo ku yo the yamu ang'wen, kud i tung' ng'om ku tung' polo de.
- ²⁸Nie wumak ng'eyo lembabola mir ulam bang' ulam: kinde ma jange doko yom, elodho ithe de, wung'eyo nia cwir udhingo:
- ²⁹e kumeno wun bende, ka wuneno gin maeni betimbre, wung'ei nia eni ceng'ni, cil dhugola.
- ³⁰Andha awacu iwu kumae, Dhanum'utuk maeni bikadhu woko ngo, ma fodi gin maeni ceke kutimbre kakare ngo:
- ³¹polo ku ng'om de bikadhu woko: ento lembe para bikadhu woko ngo.
- ³²Ento ceng' maeno kadi saa maeno ng'atu moko mbe m'ung'eyo, cil malaika mi polo, kadok Wod de, ento Wego re.
- ³³Wukuru, wuki man wurwo: kum wung'eyo kanindone ngo.
- ³⁴En e calu ng'atu moko, m'uci wotho i ng'om mange, m'eweko ot pare, m'emio ng'ol de ni jumiru pare, ni ng'atuman tic pare man tic pare, eng'olo ni jakurdhugola de nia eki.
- ³⁵Ka kumeno wuki: kum wung'eyo ngo kabino pa rwoth ma won ot, tek en e uthieno, kadi diewor ma ling', kadi i kok pa gweno, kadi kugweno;
- ³⁶kara tek ebino pio kud enwang' wunindo.
- ³⁷Man gin m'awacu iwu awacu ni dhanu ceke, Wuki.

Marko 14

- ¹Nie yo ng'ei ceng' ario agba mi kadhukuwijo man kwen ma thobi mbe i ie wok: e julam ma dongo ku jugorcik giyenyo maram gimake ko ku rieko, ginege de:
- ²kum giwacu kumae, I ceng' mir agba ngo, rop umaru nyai i kind dhanu.
- ³E kan eni i Bethania i ot pa Simon ma won joi, kinde m'ebedo dhu cam, dhaku moko bino ma won cupa ma ber ma ie ju mo ma ng'wice ng'ar ma ng'ieune tek dit; enego cupane, ekonjo moje de i wie.
- ⁴Ento jumoko nuti ma ging'ur i kindgi gigi, giwacu kumae, Junyotho mo maeni nedi?
- ⁵Kum mo maeni jucopo loko ku denarii ma sagu dak adek, jumio de ni jucan. E ging'ur i kume.
- ⁶Ento Yesu wacu kumae, Wuweke; wunyayu can i ie nedi? etimo tic ma dre i kuma.

- ⁷Kum wubedo ku jucan thiri thiri i beng'wu, man ka wuyenyo wucopo timo ber i bang'gi: ento an wabedo wakudu thiri thiri ngo.
- ⁸Etimo gin m'ecopo: elar ewiro mo i kuma mi kuny.
- ⁹Andha awacu iwu kumae, Ka ceke ma tek jubiyero ie lembanyong'a ma juboth ko i ng'om ngung', maeno bende ma dhaku maeni timo biyere ni poi pare.
- ¹⁰Yuda Iskariote, cn e ng'atu acel ma kind juapar wi ario, ecidho ba julam ma dongo, kara ecibe igi.
- ¹¹E ka giwinjo maeni, anyong'a negogi, man ging'olo ya gibimio ire sente. Man eyeuyo maram ecopo cibe ko igi lwe.
- ¹²I ceng' ma kwong'ane mi kwen ma thobi mbe i ie, kinde ma gilamu kadhukuwijo, julubne giwacu ire kumae, Iyeny waci wayik ka m'ibicamu ie kadhukuwijo kani?
- ¹³Man eoro julubne ario, ewacu igi kumae, Wuci i adhura, e wubirombo ku ng'atu acel m'uyeyo agulu pi: wulub ng'eye;
- ¹⁴ka ma tek ebimondo i ie, wuyer ni won ode kumae, Japonji wacu kumae, Kusika mi welo ma ira, m'abicamu ie kadhukuwijo ku julubna, nikani?
- ¹⁵E en ebinyutho iwu kusika ma malu m'ulwar m'ubedo ku gin ceke i ie, ayika de: wuyik iwa kakeca.
- ¹⁶E julubne gicidho, giwok i adhurane, e ginwang'u calu ewacu igi: man giyiko kadhukuwijo.
- ¹⁷E ka piny udoko uthieno ebino ku juapar wi ario.
- ¹⁸E kinde ma gibedo gibecamu, Yesu wacu kumae, Ayero iwu andha, Acel m'i kindwu biciba, cil ng'atu ma wacamu wakude.
- ¹⁹E can umaku negogi, man giwacu ire acel acel, En e ani?
- ²⁰Ewacu igi kumae, En e ng'atu acel m'i kind juapar wi ario, ma wagwio bwa wakude i tabu.
- ²¹Kum Wod dhanu bicidho. cil calu ma nire gore: ento can ni ng'atu maeno ma Wod dhanu cibre ni kume! ber ni ng'atuca tek jukunyole ngo.
- ²²Man kinde ma gibecamu, eting'o kwen, e kan emio mugisa, eng'weko ie, emio igi de, ewacu kumae, Wugam: maeni kuma.
- ²³Man eting'o kikombe, e kan emio foc, emio igi: kagi ceke gimadhu kume moko.
- ²⁴Man ewacu igi kumae, Maeni rimba mi lembariba, m'uthwogre pi dhanu dupa.
- ²⁵Andha ayero iwu kumae, Abimadhu kum pigulok kendo ngo, cil i ceng' m'abimadhe ie nyen i ker pa Mungu.

- ²⁶E ka giwero wer, gicidho ba got Zeituni.
- ²⁷E Yesu wacu igi kumae, Kewu ceke wubikier: kum egore kumae, Abigoyo jakwac, rombe de bilal mba.
- ²⁸Ento, yo ng'ei cer para, abicidho i weng'wu i Galilaya.
- ²⁹Ento Petro wacu ire kumae, Kadok ceke bikier, an re abikier ungo.
- ³⁰Yesu wacu ire kumae, Andha awacu iri, nia in tinuni, i diwor maeni, ka fodi kulok kukok wang' ario ngo, ibikwera wang' adek.
- ³¹Ento eyero ma tek apila kumae, Kadok akotho be wakudi ngi, abikweri ngo. Kagi ceke de giwacu kumeno.
- ³²E gibino i ka ma nyinge Gethsemane: ewacu de ni julubne kumae, Wubed keni, ma fodi acirwo.
- ³³E ecoko Petro giku Yakobo man Yohana gicidho de gikugi, e ie maku wang' lii, cwinye de ng'abre mumbe.
- ³⁴Man ewacu igi kumae, Can ubenego ng'eyong'ec para dit apila ceng'ni tho: wudong' keni, wuki.
- ³⁵Man ecidho nyangba yor i wang'gi, epodho de i ng'om, man erwo nia, tek ecopre, saa maeni kabre woko ire.
- ³⁶Ewacu kumae, Abba, Vwa, gin ceke copre iri; kab kikombe maeni woko i bang'a: ento yeny ma ia yenyo re ngo, endre yeny ma ii yenyo.
- ³⁷Man ebino, enwaug'u ginindo, man ewacu ni Petro kumae, Simon, inindo? icopo kio ngo saa aceli?
- ³⁸Wuki wurwo de, kara kud wumond i abidhe: cwiny uyeny andha, ento kum ubedo ng'ic.
- ³⁹E ecidho kendo, man erwo, eyero lembe ma cal acel.
- ⁴⁰Man ebino kendo, enwang'u ginindo, kum wang'gi bedo pek; e ging'eyo ngo maram gilok ko lembe ire.
- ⁴¹Man ebino kendo mir adege, ewacu igi kumae, Kawono dong' wunindi, wuyom de: eromo; saa tundo; nen, Wod dhanu jucibe i cing' judubo.
- ⁴²Wuai, wacidhu: nen, ng'atu m'uciba eni ceng'ni.
- ⁴³E ndhu ndhu nica, kinde m'ebeyero, Yuda bino, en e ng'atu acel ma kind juapar wi ario, kud udul dhanu ma weg palamularu ku dul, ma giai ba julam ma dongo ku jugorcik ku judongo de.
- ⁴⁴Nwang'u ng'atu m'ucibe emio igi riekolembe, ewacu kumae, Ng'atu ma tek abicwio limbe, nwang'u en e en; wumake, wuci kude rut.

- ⁴⁵E kan ewok, ndhu ndhu nica ebino i bang'e, ewacu kumae, Japonji; man ecwio limbe.
- ⁴⁶E giketho cing'gi i kume, gimake ko.
- ⁴⁷Ento ng'atu acel ma kind ju m'ucungo keca ewodho palamularu pare, egoyo jamiru pa jalam ma dit, man etong'o ithe woko.
- ⁴⁸Man Yesu loko lembe ewacu igi kumae, Wubino, calu wubino kum jayek, ku palamularu ku dul de kara wumaka?
- ⁴⁹Abedaponjo ma wabedo wakudu i hekalu ku ba rupiny ku ba rupiny, wumaka de ngo: ento maeni timbre kara lembagora pa Mungu timbre kakare.
- ⁵⁰E kagi ceke giweke, giringo.
- ⁵¹Jalawobi moko lubo toke, m'ebedo ku bongu ma nwang' ma jubolo i kume, wi kume m'ubedo muneru: e gimake;
- ⁵²ento eweko bongu ma nwang', man epiei muneru.
- ⁵³E gipeyo Yesu ba jalam ma dit: e julam ma dongo ku judongo ku jugorcik ceke gibino gikugi.
- ⁵⁴Nwang'u Petro lubo ng'eye ku bor cen, cil die pondot pa jalam ma dit; gibedo gikud asikari de, man emuro kume i der mac.
- ⁵⁵Nie julam ma dongo ku dilo ceke giyenyo mulembe kum Yesu ma giketh etho ko; e ginwang'u ngo.
- ⁵⁶Kum dhanu dupa gibale, lembabali migi de ribre acel ungo.
- ⁵⁷E jumoko gicungo, gibale, giwacu kumae,
- ⁵⁸Wawinjo ewacu kumae, Abinyotho hekalu maeni ma jugomo ku cing', man i ceng' adek abigomo mange ma jutimo ku cing' ungo.
- ⁵⁹Kadok ku maeni de abali migi ribre acel ungo.
- ⁶⁰E jalam ma dit ucungo i kindgi, epenjo Yesu, ewacu kumae, Idwoko lembe moko ngo? en e ang'o ma joni benyutho i kumi?
- ⁶¹Ento ebeto ling', eloko lembe moko ngo. Jalam ma dit upenje kendo, ewacu ire kumae, In i Kristu, Wod Jamugisa?
- ⁶²E Yesu wacu kumae, An a en: man wubineno Wod dhanu jany yo ku cing' ma yor acwic mi Tego, m'ebebino de ku i afuru mi polo.
- ⁶³Man jalam ma dit uyeco kendi pare, ewacu kumae, Can jumulembe benegowa ke mir ang'o?
- ⁶⁴Wuwino lembacidi ma kum Mungu: wuwacu ang'o? E kagi ceke gigonje ya eromo ku tho.

⁶⁵E jumoko maku ng'ulo lau i kume, giumo wang'e de, gipade, giwacu ire kumae, Eu: asikari de gijole ku cwany mi cing'gi.

⁶⁶E ka Petro bedo piny i pondot, jatic ma nyaku pa jalam ma drt ubino;

⁶⁷e kan eneno Petro m'ebeoyo mac, enene, ewacu kumae, In bende wubedo wuku Janazareti, ma Yesu.

⁶⁸Ento ekwero, ewacu kumae, Ang'eyo ngo, kadi lembe m'iyero de ang'eyo ngo: e ecidho woko pondot; e kulok ukok.

⁶⁹Jatic ma nyaku nene, e emaku yero ni ju m'ucungo i vutgi kendo kumae, Maeni en e ng'atu acel m'i kindgi.

⁷⁰Ento ekwero kendo. Man yo ku ng'eye nyangba ju m'ucungo i vute giwacu ni Petro kumae, Andha in i ng'atu acel m'i kindgi; kum in i Jagalilaya.

⁷¹Ento emaku yanyu ayany, ku kwong'o kwong' de, ewacu kumae, Ang'eyo ng'atuni ngo ma wuyero pire.

⁷²E ndhu ndhu nica kulok ukok mir arionde. Nie Petro poi kum lembe ma Yesu wacu ire kumae, Ka fodi kulok kukok wang' ario ngo, ibikwera wang' adek. E ka ie pido pire, eywak.

Marko 15

¹E pio pio kugweno julam ma dongo ku judongo man jugorcik, ku dilo ceke, gipido lembe, man gitwio Yesu, gitere, gimie ni Pilato.

²E Pilato penje kumae, In i Ubimo mi Juyahudi? Man eloko lembe ewacu ire kumae, Iwacu.

³Man julam ma dongo gidote kum gin dupa.

⁴E Pilato penje kendo, ewacu kumae, Idwoko lembe moko ngo? nen maram gibedoti ko ku gin dupa.

⁵Ento Yesu dwoko lembe moko kendo ngo; ketho i Pilato wang' lii.

⁶Nwang'u naka ebedegonyo igi jakol acel, ma gikwayu i bang'e i agba.

⁷Nwang'u ng'atu acel nuti ma nyinge Baraba, m'evuto atwia ku ju m'uthubo ali, gi ju ma i aline ginego nek.

⁸E udul dhanu gicidho malu man gimaku kwaye ya etim calu ma naka ebedetimo igi.

⁹E Pilato dwoko lembe igi, ewacu kumae, Wuyenyo agony iwu Ubimo mi Juyahudi?

¹⁰Kum eng'eyo nia kumira e m'uketho julam ma dongo gimie.

¹¹Ento julam ma dongo gicuno lembe i udul dhanu, ya maku egony Baraba igi.

- 12**Pilato loko lembe kendo ewacu igi kumae, Ka kumeno abitimo ang'o kum ng'atu ma wulwong'o Ubimo mi Juyahudi?
- 13**Gikok kendo kumae, Gure.
- 14**E Pilato wacu igi kumae, Nedi, etimo ang'o ma raci? Ento gikok apila kumae, Gure.
- 15**Man Pilato, m'eyenyo lembe cung ber i udul dhanu, egonyo igi Baraba, emio Yesu de, kan edaru fode ku del, ya jugure.
- 16**E asikari gipeye woko i katitlembe, ma en e Odtiti; e gilwong'o udul juwagi ceke karacelo.
- 17**Man gironye ku bongu m'uluga, gikiedo jamkermiwic mir ukudho de, gikethe i wie;
- 18**e gimaku mothe kumae, Moth iri, Ubimo mi Juyahudi!
- 19**E gigoyo wie kud undodi, ging'ulo lau i kume, girum wi cong'gi de girwo ire.
- 20**E ka gidaru ng'ale, giwodho kendi m'uluga, man gironye ku kendi pare. E gipeye woko, gicigigure.
- 21**Man gicung'o ng'atu acel m'ubekadhu akadha, Simon ma Jakurene, m'uai i thim, m'e won Iskander giku Rufo, ya gici gikugi, kara eyei yen m'athara pare.
- 22**E gikele ka ma julwong'o Golgotha, ma ka juloke edoko kumae, Karupokowic.
- 23**E gimio ire pigulok m'ujebre ku yath: ento egame ngo.
- 24**Man gigure, gipoko kendi pare i kindgi, gigoye ku jara, kara ginwang' ju ma bigame.
- 25**E kinde ma saa doko adek, gigure.
- 26**E karamblembe mir adote pare jugoro yo malu kumae, UBIMO MI JUJAHUDI.
- 27**Man jugure karacelo ku weg ayeki ario; acel i cinge ma yor acwic, acel ke yor acam.
- 28**Man lembagora pa Mungu timbre kakare, m'uwacu kumae, Man jukwane karacelo ku judubo.
- 29**Ju ma gibecikukadhu de gicaye, giyengo wigi de, giwacu kumae, Euo! in m'inyotho hekalu, m'igome de ceng' adek,
- 30**leri giri, ilor piny de ku wi yen m'athara.
- 31**Julam ma dongo de gicaye kumeca i kindgi gigi ku jugorcik, giwacu kumae, Elaru jumange; ecopo lare gire ngo.
- 32**Wek Kristu m'Ubimo pa Israel, ulor piny ku kor yen m'athara kawono, kara wanen wayi de. Ju ma jugurogi gikugi de gicaye.

³³E kinde ma saa mir abusiende wok, mudho yutho ng'om ceke cil i saa mir abung'wende.

³⁴E kinde ma saa doko abung'wen Yesu kok ku dwande ma dit kumae, Eloi, Eloi, lama sabakthani? ma, ka juloke edoko kumae, Munguna, Munguna, ikuna nedi?

³⁵Jumoko ma gicungo i vute, ka giwinjo maeni, giwacu kumae, Nen, elwong'o Elia.

³⁶E ng'atu acel uringo, epong'o ucoi pong' ku picwa, ekethe de wi undodi, man emio ire emadhi, ewacu kumae, Wukowuweki; wanenu tek Elia bino wodhe piny.

³⁷E Yesu kok ku dwande ma dit, man eweko cwinye kadhu.

³⁸E kusika mi bongu m'i hekalu yec dra doko ario ugambre i wie cik i there.

³⁹E ka jego, m'ucungo keca i vute, uneno nia eweko cwinye kadhu kumeca, ewacu kumae, Andha ng'atuni en e Wod Mungu.

⁴⁰Nwang'u mon moko de nuti keca ma gibenene ku cen: Mariamu Magdalene, giku Mariamu ma min Yakobo ma nok ku Yose de, man Salome de gini i kindgi;

⁴¹ma, kinde m'eni i Galilaya, gilubo ng'eye, gibegitimo ire bende; ku mon mange de dupa ma gibino kugi malu Yerusalem.

⁴²E ka piny udoko uthieno, kum en e Yikopiny, en e kumeni, ceng' m'ular uwok ni ceng' sabatu,

⁴³e Yusuf ma Arimathaya, en e ng'atu m'i dilo ma won yung, ma en bende ebekuro ker pa Mungu; emondo ba Pilato ku tegocwinye, man ekwayu avuj Yesu.

⁴⁴E Pilato ie wang' lii tek edaru tho: man elwong'o jego i bang'e epenje tek etho ande con.

⁴⁵E kan eng'eyo maeni ba jego eyio avuje ni Yusuf.

⁴⁶Man eng'iewo bongu ma nwang', man efudhe piny, eboye ku bongu ma nwang'ne, man ekethe i liel ma juroko i cana; man eng'ielo kidi kum dhugola mi liel ma juroko i cana.

⁴⁷E Mariamu Magdalene giku Mariamu ma min Yose gineno ka ma jukethe i ie.

Marko 16

¹E ka ceng' sabatu kadhu, Mariamu Magdalene, giku Mariamu ma min Yakobo, man Salome, ging'iewo udok ma ng'wice ng'ar, kara gibin giwire ko.

²E pir kugweno i ceng' ma kwong'a ma yenga, gibino ba liel ma juroko i cana ka ceng' uwok.

³Man giwecri i kindgi kumae, Ng'a ma bing'ielo iwa kidi ku dhugola mi liel ma juroko i cana?

⁴Man giting'o wang'gi, gineno nia kidi ng'iele cen: kum e dit apila.

- ⁵E ka gimondo i liel ma juroko i cana, gineno jalawobi acel ubedo yo ku cing' ma yor acwic, m'eronyo kendi ma tar; e igi wang' lii.
- ⁶Man ewacu igi kumae, Iwu kud uwang' hi; wuyenyo Yesu, ma Janazareti, ma jugure: ecer, embe keni: nen ka ma jukethe i ie!
- ⁷Ento wucidhi, wuyer ni julubne ku Petro de kumae, Ecidho i weng'wu i Galilaya: wubinene kuca, calu eyero iwu.
- ⁸E giwok woko kud i liel ma juroko i cana, giringo: kum mielkum ku wang'uic umakugi: e giyero lembe moko ngo ni ng'atu moko; kum lwooro negogi.
- ⁹Nie kan ecer pir kugweno i ceng' ma kwong'a ma yenga elar enyuthre ni Mariamu Magdalene, ma yang' ewodho pajogi abiro i ie.
- ¹⁰En de ecidho eyero ni ju ma naka gibedo gikugi, kinde ma can ubenegogi giywak de.
- ¹¹E gin de, ka giwinjo nia ebedo kwo, enen ire de, giyio ngo.
- ¹²Yo ng'ei gin maeni enyuthie ni juario ku kite ma tung', ka gibewotho, i yo migi i thim.
- ¹³E gicidho giyero ni ju m'udong': joca de giyio igi ngo.
- ¹⁴Macen enyuthre ni juapar wi acel ka gibedo dhu cam; man edhau i wigi kum yioyic migi m'umbe kum nwang' mir adundegi de, kum giyio ngo ni ju m'unene yo ng'ei cer pare.
- ¹⁵Man ewacu igi kumae, Wucidh i ng'om yu, wuyer lembanyong'a ma juboth ko ni giracwia ceke.
- ¹⁶E ng'atu m'uyio m'umaku baputisi de ebiboth; ento ng'atu m'uyio ngo jubipoko lembe pare rac.
- ¹⁷Giranyutha maeni bilubo ju m'uyio: ku nyinga gibiwodho pajogi; gibiweco ku dhok ma nyen;
- ¹⁸gibiting'o thwol, man tek gimadhu gin moko ma negojo, ebitimogi rac ki ngo; gibiketho cing'gi kum ju ma kumgi lith, e kumgi bikei.
- ¹⁹Ka kumeno Rwoth Yesu, kan edaru yero igi, jujole malu i polo, ejany de yo ku cing' Mungu ma yor acwic.
- ²⁰E gicidho, giyero i kaka ceke, Rwoth utimo kugi, eketho tego kum lembene ku giranyutha m'niube. Amen.

Luka

Luka 1

- ¹Kum dhanu dupa giketho cing'gi nigoro lembe pi gin maeno m'utimbire kakare i kindwa,
- ²cil calu gimiyogi iwa, ma kwong'a wa jumulembe ma ku wang' man jutim mi lembe de,
- ³e ebeto ber ira bende, kum abeto ku ng'eyong'ec mi gin ceke cu ugambre ku kwong'a, nia agor iri kubang'e kubang'e, Theofiio ma jabero;
- ⁴kara ing'ei lemandha mi gin ma juponji kudo.
- ⁵I nindo pa Herode, ubimo mi Yahudi, nwang'u jalam ma nyinge Zakaria nuti, i maka pa Abia: man ebeto ku dhaku ma kind nyir pa Harun, nyinge de Elisabeti.
- ⁶Gin ario de gibeto pwe i wang' Mungu, ma gibewotho i cik ku lembapoka ceke pa Rwoth umbe gin ma rac.
- ⁷Man nyathin umbe kugi, kum Elisabeti mugumba, gin ario de rundi migi kadhu.
- ⁸Nie etimbire, kinde m'etimo tic pa jalam maka pare kubang'e kubang'e i wang' Mungu,
- ⁹calu kura mi tic pa jalam, tic pare en e mondo i hekaiu niwang'u udok ma ng'wice ng'ar.
- ¹⁰Udul ceke mi dhanu berwo woko i saa mir udok ma ng'wice ng'ar.
- ¹¹Malaika pa Rwoth uwok i bang'e ecungo yor acwic ba pemblam mir udok ma ng'wice ng'ar.
- ¹²Zakaria de cwinye ng'abre kan enene, lwooro de make.
- ¹³Ento malaika wacu ire kumae, Lwooro kud unegi, Zakaria: kum kwac peri winjre, cegi Elisabeti binyolo iri nyathin ma nico, man ibilwong'o nyinge Yohana.
- ¹⁴Man mutoro kud anyong'a binegi; dhanu dupa de anyong'a binegogi i munyuru pare.
- ¹⁵Kum ebibeto dwong' i wang' Rwoth, man ebimadhu pigulok kadi giramadha ma mero jo de ngo; man Tipo Maleng' birome, ugambre kud i min.
- ¹⁶Man dhanu dupa mi nyithindho pa Israel ebiloko ni Rwoth Mungu migi.
- ¹⁷Man ebicidho i wang'e i tipo ku tego pa Elia, niloko adunde wego ni nyithindho, juco de niwotho i rieko mi weg bedopwe; niyau dhanu m'ubeto ayika ni Rwoth.
- ¹⁸Zakaria wacu ni malaika kumae, Abing'eyo maeni nenedi? kum an a ng'atu m'uti, dhaku para de rundr pare kadhu.

- ¹⁹Malaika dwoko lembe ewacu ire kumae, An a Gabriel, ma cungo i wang' Mungu; man juora niyero iri, nikelo iri rwonglembe maeni de.
- ²⁰Nen, ibibedo ajuba ibicopo weco de ngo, cil i ceng' ma gin maeni bitimbre i ie, kum iyio lem para ngo, ma bitimbre kakare i nindone.
- ²¹Dhanu de gibekuro Zakaria, igi wang' hi de kum egalu i hekalu.
- ²²Kan ewok woko de, ecopo weco i bang'gi ngo: e ging'eyo nia eneno ginmawokiwang' i hekalu: man enyutho igi anyutha asu, ebedo ling' de.
- ²³Etimbre ka ceng' mi timotim pare timbre kakare, edok i ot pare.
- ²⁴E yo ng'ei ceng' maeni Elisabeti ma dhaku pare gamu ie; epale de dwi abic, ewacu kumae,
- ²⁵Rwoth utimo kumeno ira i ceng' m'enena i ie, nikabu lewic para woko i kind dhanu.
- ²⁶Nie i dwi mir abusiende juoro malaika Gabriel uai ba Mungu ucidho i adhura mi Galilaya, ma nyinge Nazareti,
- ²⁷ba nyaku ma sumba ma ng'atu ma nyinge Yusuf ubenyome, ma en e mi ot pa Daudi; nyaku ma sumbane nyinge Mariamu.
- ²⁸Emondo i bang'e, man ewacu kumae, Moth iri, in ma mugisa kwenyi, Rwoth ni kudi.
- ²⁹Ento ie pido dit kum lembe maeni, ie de bepido ya moth maeni manedi.
- ³⁰Malaika de wacu ire kumae, Lworo kud unegi, Mariamu: kum inwang'u bero ba Mungu.
- ³¹Man nen, ibigamu ii, ibinyolo nyathin ma nico, man ibilwong'o nyinge Yesu.
- ³²Ebibedo dwong', man jubilwong'e Wod Ng'atu ma Malu Ngbir: man Rwoth Mungu bimio ire komker pa kwarumire Daudi.
- ³³man ebicamu ker wi ot pa Yakobo mi nja; kajik mi ker pare de bibedo umbe.
- ³⁴Mariamu wacu ni malaika kumae, Maeni bitimbre nenedi, ma k'ang'eyo co ngo e?
- ³⁵Malaika dwoko lembe ewacu ire kumae, Tipo Maleng' bibino i wii, man tego pa Ng'atu ma Malu Ngbir tipone biumi: kum kumeno bende gin maleng' m'ibinyolo jubilwong'o Wod Mungu.
- ³⁶Man nen, wat peri, Elisabeti bende gamu ie mi wode kan eti; maeni de dwi mir abusiende pa ng'atu ma julwong'o mugumba.
- ³⁷Kum lembe moko mbe ma ai ba Mungu ma bibedo umbe tego.

- 38E Mariamu wacu kumae, Nen, an a bong' pa Rwoth; dong' ebed ira calu lembe peri. E malaika weke.
- 39E Mariamu ai i ceng' maeno ecidho pio pio i ng'om gudi, i adhura mi Yahudi;
- 40man emondo i ot pa Zakaria emotho Elisabeti de.
- 41Etimbre de, nia kan Elisabeti winjo moth pa Mariamu, mukere por malu i ie; Elisabeti de pong' ku Tipo Maleng';
- 42man eting'o dwande malu ku ba dwal ma dit, ewacu kumae, Mugisa kwenyi kind mon, man mugisa ni nyodo m'i ii de.
- 43Man lembe m'unwang'a maeni ai kani, nia min Rwoth para bino i bang'a?
- 44Kum nen, ka dwand moth peri mondo i itha, mukere por malu i ia ni mutoro.
- 45Mugisa ni ng'atu m'uyio de; kum lembe m'uai ba Rwoth uyere ire bitimhie kakare.
- 46Mariamu de wacu kumae, Ng'eyong'ec para beyungo Rwoth,
- 47Man anyong'a nego cwinya kum Mu ngu Jalarna.
- 48Kum eneno wi nok pa bong' pare: Kum nen, ugambre kawono dhanum' utuk ceke gibilwong'a jamugisa.
- 49Kum ng'atu ma tek utimo ira gin ma dit; Nyinge de leng'.
- 50Kisa pare de bedo ni dhanum'utuk ku dhanum'utuk Wi ju m'ulwore.
- 51Enyutho tego ku bote; Elalu jukuhaya ku lembe ma igi pido ku i adundegi.
- 52Ejwigo juker kud i komker migi, Eting'o dhanu ma kitgi mbe malu.
- 53Eyeng'o ju ma kec unegogi ku gin ma ber; Man eketho julonyo gidok mananu.
- 54Ekonyo jatic pare Israel, Kara epoi kum kisa
- 55(Calu yang' eyero ni kwaruwa) Ni Ibrahim ku nyikwaye rondo ku rondo.
- 56Man Mariamu gibedo gikude ma yenyo romo dwi adek, kan edok i ot pare.
- 57Nie nindo ma Elisabeti binyol i ie utimbre kakare: e enyolo nyathin ma nico.
- 58Man judhugola pare ku wat pare giwinjo nia Rwoth uketho kisa pare dit i bang'e; e anyong'a negogi dit gikugi.
- 59Etimbre i ceng' mu aborane, nia gibino nitimo yaa kum nyathin; giyenyo gilwong'e Zakaria, calu nying won.
- 60Man min uloko lembe ewacu kumae, Kumeno ngo; ento jubilmwong'e Yohana.
- 61E giwacu ire kumae, Nying' maeni mbe i kind wat peri.
- 62E gitimo ku giranyutha ni won, maram eyenyo julwong' ko nyinge.

- ⁶³Man elwong' o waraga, egoro de kumae. Nyinge Yohana. E igi kpo wang' lii.
- ⁶⁴Ndhu ndhu nica dhoge yabre, lebe de gonjre, man eyero, ku mio mugisa ni Mungu de.
- ⁶⁵E lworu maku dhanu ceke m'ubedo i vutgi: man lembe maeni ceke yik tir i ng'om gudi ceke mi Yahudi.
- ⁶⁶Dhanu ceke m'uwinjogi gikanu lembene i adundegi, giwacu kumae, Ka kumeno nyathin mae bibedo ni ang' o? Kum cing Rwoth ni i bang' e.
- ⁶⁷Zakaria ma won de Tipo Maleng' urome ndhu, man eewo, ewacu kumae,
- ⁶⁸Mugisa ni Rwoth, Mungu pa Israel; Kum eliewo dhanu pare etimo war de igi,
- ⁶⁹Man eting' o tung mi both rwa I ot pa jatic pare Daudi
- ⁷⁰(Calu eyero ku dhu jubila pare ma leng' m'ugambre por con),
- ⁷¹Ebodhowa ni judegiwa, kud i cing' dhanu ceke m'udaguwa de;
- ⁷²Mi nyutho kisa ni kwaruwa, Man mi poi kum lembariba pare ma leng' ;
- ⁷³Kwong' m'ekwong' o ni kwaruwa Ibra him,
- ⁷⁴Nia edwok iwa, wan ma waboth kud I cing' judegiwa Ya watim ire ma lworu mbe,
- ⁷⁵I leng' cwiny man bedopwe i wang' e I ceng' mwa ceke.
- ⁷⁶Eyo in de, nyathin, jubilwong' i jabila pa Ng'atu ma Malu Ngbir: Kum ibicidho i nyim wang' Rwoth niyiko yo pare;
- ⁷⁷Nimio ng'eyong' ec mi both ni dhanu pare I wek mi dubo migi,
- ⁷⁸Kum kisa ma ng' ic pa Mungu mwa, Ni kum maeni rupiny m'uai malu biliewowa,
- ⁷⁹Nirieny wi ju m'ubedo i mudho ku tipo mi tho; Niketho tiendwa woth i yo mi kwiocwiny.
- ⁸⁰Nyathin udongo, cwinye de doko tek, ebeto i yamba de cil i ceng' m'enyuthre ie ni Israel.

Luka 2

- ¹Nie etimbre i ceng' maeno, nia ng'ol uai ba Kaisari Augusto, nia jugor nying' dhanu ngung' m' i ng'om.
- ²Maeni en e goronying' ma kwong'ane ma jular jugoro ka Kurenio bedo jabim mi Cami.
- ³Dhanu ceke cidho kubang' gi nzu bang' adhura migi ma dhe nigoro nying' gi gigi.

- ⁴Yusuf bende idho malu m'eai i Galilaya, kud i adhura Nazareti, i Yahudi, ecidho bang' adhura pa Daudi, ma julwong'o Bethlehem, kum en e mi ot man wat pa Daudi;
- ⁵nigoro nying'gi gigi giku Mariamu ma cege, m'ebenyomo, ma ie teng'ni.
- ⁶Etimbre, kinde ma gini keca, nia ceng' uromo kakare m'ebinyol i ie.
- ⁷Man enyolo wode ma kayu; eboye ku bongu mi mukere, man epiele i ka cemo mi dhiang', kum kabedo mbe igi i odwelo.
- ⁸I ng'ombuno jukwac nuti, ma gibedo i thim, man gibekuro udul rombe migi ku diewor.
- ⁹Malaika pa Rwoth de cungo i bang'gi dwong' pa Rwoth de caru piny i kumgi: Iworo de negogi dit.
- ¹⁰Malaika wacu igi kumae, Lworo kud unegwu; kum nen, akelo iwu rwonglembe ma ber mir anyong'a ma dit ma bibedo ni dhanu ceke:
- ¹¹kum tinuni junyolo iwu i adhura pa Daudi Jalar, ma en e Kristu ma Rwoth.
- ¹²Maeni en e giranyutha iwu: Wubinwang'u mukere ma juboyo ku bongu mi mukere, man evuto i ka ma juketho ie cam mi dhiang'.
- ¹³E eni eni udul malaika m'i polo ginuti karacelo ku malaika maeno gibepaku Mungu, giwacu kumae,
- ¹⁴Dwong' ni Mungu ma malu ngbir, Kwiocwiny de wi ng'om kind dhanu ma mutoro nege i kumgi.
- ¹⁵Man etimbre, kinde ma malaika ai i bang'gi gidok i polo, jukwac giwecri kumae, Dong' wacidhu kawono i Bethiehem, wanenu gin maeni m'utimbre, ma Rwoth uketho wang'eyo.
- ¹⁶Man gibino pio, ginwang'u Mariamu giku Yusuf, ku mukere de m'uvuto ka ma juketho ie cam mi dhiang'.
- ¹⁷Ka ginene de, giketho jung'eyo pi lembe m'uyere igi pi nyathin maeni.
- ¹⁸Dhanu ceke m'uwinjo maeni igi wang' lii kum lembe ma jukwac uyeri igi.
- ¹⁹Ento Mariamu kanu lembe maeni ceke, epido pigi i adundene.
- ²⁰Jukwac gidok, ku yungo Mungu ku pake de pi gin ceke ma giwinjo ma gineno de, cil calu eyere igi.
- ²¹Ka ceng' abora romo mi timo yaa i kume, jucaku nyinge Yesu, calu malaika lwong'o ma fodi jukugamu icne ngo.
- ²²Ka ceng' uromo mi dwokri leng migi calku cik pa Musa, gikele malu Yerusalem nithiere ba Rwoth

- ²³(calu egore i cik pa Rwoth kumae, Ku ba co ceke m'uyabu i min jubilwong'e leng' ni Rwoth),
- ²⁴man niwodho lam calu cik pa Rwoth uwacu kumae, Akuru ario, kadi nyithindh akuru ario.
- ²⁵Man nen, ng'atu moko nuti Yerusalem, ma nyinge Simeon; ng'atu maeni ng'atu ma pwe ma lworo Mungu de, m'ebekio juk mir Israel: Tipo Maleng' de ni i wie.
- ²⁶Man Tipo Maleng' unyutho ire nia ebineno tho ngo, ma fokeneno Kristu pa Rwoth ungo.
- ²⁷Man ebino i hekalu m'eni i Tipo: ka junyodo pa Yesu gikelo nyathin Yesu i ie, kara gitim i kume calku kura cik,
- ²⁸elund ejole i bote, emio mugisa ni Mungu, ewacu kumae,
- ²⁹Rwoth, kawono iyio jamiru peri cidh, Calku lembe peri, i kwiocwiny;
- ³⁰Kum wang'a neno both peri,
- ³¹M'iyiko i nyim wang' kodhidhanu ceke;
- ³²En e der mi nyuthonyuth ni Thekdha numange, Man dwong' mi dhanu peri Israel.
- ³³Man won ku min de igi wang' lii kum gin m'uyere pire;
- ³⁴man Simeon umio mugisa igi, man ewacu ni Mariamu ma min kumae, Nen, nyathin maeni kethre ni podho ku ai mi dupa i Israel; man pi giranyutha ma juyero pire rac:
- ³⁵eyo man palamularu bicobo ng'eyong'ec peri giri; kara pidoic ma i adunde dupa nyuthie.
- ³⁶Jabila ma dhaku nuti ma nyinge Ana, e nya Fanueli, mi suru pa Acer (eti dit, m'ebedo ku nico oro abiro yo ng'ei bedo nyaku,
- ³⁷man ebeto umbe cware cil i oro pier abora wi ang'wen), m'eai ngo i hekalu, m'erwo ni Mungu diwor ku dieceng' ku weko cam ku kwayukwac de.
- ³⁸Man ewok i saa nini emio foc ni Mungu, man eyero pire ni dhanu ceke m'ukuro war mi Yerusalem.
- ³⁹Man ka gidaru gin ceke calu cik pa Rwoth uwacu, gidok Galilaya, bang' adhura migi ma dhe ma Nazareti.
- ⁴⁰Nyathin udongo, tego medre ire, rieke de pong'e: man bero pa Mungu ni i wie.
- ⁴¹Junyodo pare gibegicidho Yerusalem ku ba rundi i agba mi kadhukuwijo.
- ⁴²Ka rundi pare doko apar wi ario, giidho malu calu kura mir agba;

⁴³man ka gidaru timo ceng'ne kakare, kinde ma gibedok, nyathin Yesu dong' cen i Yerusalem; man junyodo pare ging'eyo ngo;

⁴⁴ento kum giwacu nyo enuti i piro migi, giwotho woth mi ceng' acel; man giyenye i kind wat migi ku juwagi;

⁴⁵ka ginwang'e ngo, gidok Yerusalem, ku yenye.

⁴⁶Man etimbre, ka ceng' adek ukadhu ginwang'e i hekalu, m'ebedo i kind jueuthecik, m'ewinjogi epenjogi ku lembe de:

⁴⁷dhanu ceke m'uwinje de igi wang' lii kum ng'eyong'ec pare ku lembadwoka pare.

⁴⁸Ka ginene, igi wang' lii; e min uwacu ire kumae, Woda, nedi itimo kumeno i bang'wa? nen, waku wuru wayenyi ku can kwa.

⁴⁹Ewacu igi kumae, Wuyenya nedi? wung'eyo ngo nia akoabed i tic pa Vwa be?

⁵⁰Ento ging'eyo lembe m'eyero igi ngo.

⁵¹Man giloro gikugi, giwok Nazareti; man eworogi: e min ukanu lembe maeni ceke i adundene.

⁵²E Yesu dongo man ecikucidho i rieko, man i bero ni Mungu ku dhanu bende.

Luka 3

¹Nie i rundi mir apar wi abije mi camuker pa Tiberio Kaisari, nwang'u Pontio Pilato bedo jabim mi Yahudi, Herode de bedo jabim mi Galilaya, Filipino m'umin ke jabim mi ng'om Itureya man Trakoniti, man Lusania ke jabim mir Abilene,

²i nindo mi lamulam ma dit pa Ana ku Kayafa, e lem pa Mungu bino ba Yohana ma wod Zakaria i yamba.

³Man ebino i ng'om ceke ma ng'et Yordan, ku yero baputisi mi lokocwiny ni wek mi dubo;

⁴calu egore i kitabu mi lembe pa jabila Isaya kumae, Dwand ng'atu acel m'ukok i yamba kumae, Wuyik yo pa Rwoth Wutir yo pare.

⁵Ora ceke bipong' kubang'e kubang'e, Man ku ba gudi ceke kud ungulu got de jubidwoko piny; Man gin m'ugondre bidoko atira, Man yo ma ie ju gei bidoko ndaba;

⁶Man kum ceke de bineno both pa Mungu.

⁷Ka kumeno ewacu ni udul dhanu m'ubino maku baputisi i bang'e kumae, Wu nyikwai thwol, ng'a m'upoyowu nik wupiei ni kwinyo ma bibino?

⁸Ka kumeno dong' wuceg nyingwu ma biromo ku lokocwiny, man kud wumak wacu kud i iwu giwu kumae, Wabedo kud Ibrahim ni kwaruwa; kum awacu iwu, nia Mungu copo ting'o nyithindho ni Ibrahim ku kidi maeni.

- ⁹Cil kawono de lei ubedo ther ulag yedhi: ka kumeno ku ba yen ceke m'ucego nyinge ma ber ungo jung'ole piny, jubole i mac de.
- ¹⁰Udul dhanu gipenje, giwacu kumae, Ka kumeno ang'o ma wakowatim be?
- ¹¹Man edwoko lembe ewacu igi kumae, Ng'atu ma won kanzu ario, emi ni ng'atu ma pare mbe; ng'atu ma won cam, etim kumeno bende.
- ¹²Weg ajok de gibino maku baputisi, man giwacu ire kumae, Japonji, ang'o ma wakowatim be?
- ¹³Ewacu igi kumae, Kud wumed wi ajok m'usag ma jung'olo iwu.
- ¹⁴Asikari bende gipenje, giwacu kumae, Wan ke, ang'o ma wakowatim be? Man ewacu igi kumae, Kud wuvug ng'atu moko ku tego, kadi kud wubal ng'atu moko de; man sukulia mu de rom weng'wu.
- ¹⁵Kum dhanu gibedo ku genogen, dhanu ceke de giporo lembe i adundegi pi Yohana, tek kuno nyo en e Kristu;
- ¹⁶Yohana loko lembe ewacu igi kumae, Amio baputisi iwu andha ku pi; ento ng'atu m'ubebino e tek ma sagu an, ma thondh wara pare aromo ngo ya agony: ebimio iwu baputisi ku Tipo Maleng' ku mac:
- ¹⁷man udheru pare ni i cinge, m'elilo ko laru pare cu, m'ecoko ko nganu de i dero pare; ento ebiwang'u cunge ku mac ma negre ngo.
- ¹⁸Ka kumeno ku lemjuk mange de dupa eyero lembanyong'a ma juboth ko ni dhanu;
- ¹⁹ento kan ejuko Herode ma jabim, kum Herodias ma ci umin mire man kum gin ceke ma rac ma Herode timo,
- ²⁰e emedo maeni kum wadi ceke, nia eciko ba Yohana i odkol.
- ²¹Nie etimbre, ka jumio baputisi ni dhanu ceke, nia Yesu bende jumio ire baputisi, man kan eberwo, polo yabre,
- ²²man Tipo Maleng' uloro i wie ku kum, calu mir akuru, dwal de ai i polo kumae, In i Woda ma jamerna; ma anyong'a nega i kumi.
- ²³En e Yesune, kan emaku ponjo, nwang'u rundi pare yenyero romo pier adek, (ma juwacu nyo) en e wod Yusuf, ma wod Eli,
- ²⁴ma wod Matati, ma wod Lawi, ma wod Melki, ma wod Yanai, ma wod Yusuf,
- ²⁵ma wod Matathia, ma wod Amos, ma wod Nahun, ma wod Esli, ma wod Nagai,
- ²⁶ma wod Maathi, ma wod Matathia, ma wod Simein, ma wod Yosek, ma wod Yoda,
- ²⁷ma wod Yohana, ma wod Resa, ma wod Zorobabel, ma wod Salathiel, ma wod Neri,

- ²⁸ma wod Melki, ma wod Adi, ma wod Kosem, ma wod Elmadem, ma wod Eri,
²⁹ma wod Yesua, ma wod Eliezer, ma wod Yorim, ma wod Matati, ma wod Lawi,
³⁰ma wod Simeon, ma wod Yuda, ma wod Yusuf, ma wod Yonam, ma wod Eliakim,
³¹ma wod Meleya, ma wod Mena, ma wod Matatha, ma wod Nasan, ma wod Daudi,
³²ma wod Yese, ma wod Obedi, ma wod Boaz, ma wod Salmon, ma wod Nahason,
³³ma wod Aminadab, ma wod Aram, ma wod Hezron, ma wod Perez, ma wod Yuda,
³⁴ma wod Yakobo, ma wod Isak, ma wod Ibrahim, ma wod Tara, ma wod Nahor,
³⁵ma wod Saruhu, ma wod Ragau, ma wod Faleg, ma wod Eber, ma wod Sala,
³⁶ma wod Kainan, ma wod Arfakasad, ma wod Cem, ma wod Noa, ma wod Lamek,
³⁷ma wod Methusala, ma wod Enok, ma wod Yaredi, ma wod Mahaleel, ma wod Kainan,
³⁸ma wod Enos, ma wod Seti, ma wod Adamu, ma wod Mungu.

Luka 4

- ¹Yesu ai Yordan, edwogo m'epong' ku Tipo Maleng', Tipo de telo wie i yamba
²wonabali de bidhe nindo pier ang'wen. Ecamu gin moko ngo i ceng' maeno: ka githum, kec unege.
³E wonabali wacu ire kumae, Tek in i Wod Mungu, wac ni kidi maeni nia edok ni kwen.
⁴Yesu loko lembe ire kumae, Egore kumae, Dhanu bibedo ni kum kwen kende ngo.
⁵Man etelo wie malu, enyutho ire ker ceke m'i ng'om i kinde ma nyathigi ci.
⁶Wonabali wacu ire kumae, Abimio ng'ol maeni ceke iri, ku dwong'ne de: kum jumie ira; man ke amie ni ng'atu ma tek ayenyo.
⁷Ka kumeno tek ibirwo i bang'a, ceke bibedo peri.
⁸Yesu dwoko lembe ewacu ire kumae, Egore kumae, Rwo ni Rwoth Mungu peri, man itim ire kende.
⁹Man etelo wie Yerusalem ekethe de wi usimbru mi hekalu, man ewacu ire kumae, Tek in i Wod Mungu, ai ku kuno iredhri piny:
¹⁰kum egore kumae, Ebing'olo lembe ni malaika piri ya gikuri:
¹¹man, Gibitheng'i malu i cing'gi, Kara kud icwany tiendi kum kidi.

- ¹²Yesu loko lembe ewacu ire kumae, Egore kumae, Kud imul i Rwoth Mungu peri.
- ¹³Ka wonabali daru abidhe kubang'e ceke, eweke mi nindo moko.
- ¹⁴E Yesu dwogo Galilaya ku tego mi Tipu: man pire yik cil i ng'om ma ceng'ni ceke.
- ¹⁵Man eponjo i kacokri migi, dhanu ceke de giyunge.
- ¹⁶Ebino Nazareti, ka ma jutunge i ie: man emondo i kacokri i ceng' sabatu, calu kurane, man ecungo malu nisomo.
- ¹⁷Jumio ire kitabu pa jabila Isaya. Man eyabu kitabune, enwang'u ka ma lembe gore i ie kumae,
- ¹⁸Tipu pa Rwoth ni i wia, Kum ewira kara ayer lembanyong'a ni jucan: Eora niyero pi gony ni ju ma juyakugi, Man pi dwoko nenopiny ni abinga, Nigonyo ju ma kumgi dhuth,
- ¹⁹Niyero pi rundi pa Rwoth ma yire.
- ²⁰Man edolo kitabu, edwoke ba jatic, man ebedo piny: wang' dhanu ceke ma i kacokri de konjri i kume.
- ²¹E emaku yero igi kumae, Tinuni lembagora pa Mungu maeni timbre kakare i ithwu.
- ²²Dhanu ceke gi jumulembe pare, man igi wang' lii kum lembe mi bero m'uai i dhoge: giwacu kumae, Maeni wod Yusuf ungo?
- ²³Man ewacu igi kumae, Wubiwacu ira lembabola maeni andha, Jakeikum cengri giri: gin ceke ma wawinjo utimbre Kapernaum, tim keni i ng'om ma thu ma dhe bende.
- ²⁴Man ewacu kumae, Andha ayero iwu kumae, Jabila moko mbe ma yire i ng'om ma thugi ma dhe.
- ²⁵Ento andha awacu iwu kumae, Mon ma coggi tho dupa nuti i Israel i ceng' pa Elia, i nindo ma polo twire rundi adek ku dwi abusiel, ka ndru ma dit upodho i ng'om ngung';
- ²⁶man juoro Elia ba ng'atu moko m'i kindgi ngo, ento ba dhaku ma cware tho kende ma i Sarepta, i ng'om Sidon.
- ²⁷Man weg joi de dupa nuti i Israel i nindo pa Elia ma jabila; ng'atu moko mbe i kindgi de ma julonyo kume, ento Naman kende ma Jacami.
- ²⁸Ka giwinjo gin maeni kwinyo pong'o i dhanu ceke ma i kacokri;
- ²⁹giai malu, man giwodhe woko ku i adhura, gitere wi ungulu got ma jugomo adhura migi I wie, kara gikul wie giredhe ko piny.
- ³⁰Ento ekadhu kud i kindgi ecidho i yo pare.

- ³¹Eloro piny Kapernaum, ma adhura mi Galilaya. Eponjogi de i ceng' sabatu:
- ³²e igi wang' lii kum ponji pare; kum lembe pare bedo ku ng'ol.
- ³³Man i kacokri ng'atu acel nuti ma won tipo mi pajogi m'ucido; man ekok ku dwande ma tek kumae,
- ³⁴Ha! Yesu in ma Janazareti, wabedo ku lembang'o wakudi? ibino nyothowa? Ang'ei in i ng'adi, Ng'atu Maleng' pa Mungu.
- ³⁵Yesu juke ewacu kumae, Bed ling', wok kud i ie. Ka pajogi redhe piny i kindgi, ewok kud i ie ma k'etime rac ungo.
- ³⁶E igi ceke wang' lii, giwecri gigi, giwacu kumae, Maeni lembang'o? kum ku ng'ol man tego eng'olo lembe ni tipo m'ucido, e giwok woko.
- ³⁷E pire yik i kaka ceke m'i ng'om ma ceng'ni.
- ³⁸Man eai kud i kacokri, emondo de i ot pa Simon. E dhamaru Petro kume cek lii; man gikwaye pire.
- ³⁹Man ecungo i wang'e ejuko cekkume; e eweke: e eni eni eai malu man etimo igi.
- ⁴⁰Man ka ceng' umaku mwony, dhanu ceke m'ubedo ku dhanu ma kumgi lith ku tho ma kwonde tung' tung' gikelogi i bang'e; man eketho cinge i kumgi kubang'gi nzu, ecangugi.
- ⁴¹Pajogi de wok woko kud i dhanu dupa, gibekok akoka, man giwacu kumae, In i Wod Mungu. Ejukogi, eyio ngo ya giyer, kum ging'eyo nia en e Kristu.
- ⁴²Ka piny uru, eai ecidho i ka ma ngele: man udul dhanu giyenye, gicidho i bang'e de, giyenyo gicere, nia kud ewekgi.
- ⁴³Ento ewacu igi kumae, Akociyero lembanyong'a mi ker pa Mungu bang' adhura mange bende be: kum juora kum maeno.
- ⁴⁴Man ebedeyero i kacokri mi Galilaya.

Luka 5

- ¹Nie etimbre, kinde ma udul dhanu gicungri i kume giwinjo lem pa Mungu de, nwang'u ecungo dhu nam Genesareti;
- ²man eneno yei ario bedo dhu nam: ento junam giai kud i igi, gibelwoko voi migi.
- ³E emondo i yei acel, ma pa Simon, man epenje ya ecwal i pi nyanok dhu wath. Man ebedo piny eponjo udul dhanu de kud i yei.
- ⁴Kan eweko weco lembe, ewacu ni Simon kumae, Cwal ka ma thuth, wulur voi i pi kara wutwom.
- ⁵Simon uloko lembe ewacu kumae, Japonji, wamula ku tic ku diewor soro, e wakwanyu gin moko ngo: ento kum lem peri abiluro voi.

- ⁶E ka gitimo maeni, gitwomo rec udul dupa; voi migi de maku cot:
- ⁷man gigwelo jutic wagi ma ni i yei mange, ya gibin gikonygi. E gibino, gipong'o yei ario, ketho gimaku mwony.
- ⁸Ento ka Simon Petro neno, epodho the cong Yesu, ewacu kumae, Koiweka, e Rwoth; kum an a jadubo.
- ⁹Kum ie wang' lii, ku ju ma ginuti gikugi de, kum udul rec ma gitwomo;
- ¹⁰Yakobo ku Yohana, wot Zebedayo ma gi jutic wagi Simon, bende kumeno. Yesu wacu ni Simon kumae, Lworo kud unegi; ugambre kawono ibitwomo dhanu.
- ¹¹Ka gikelo yei migi dhu wath, giweko ceke, gilubo ng'eye de.
- ¹²Nie etimbre, kinde m'enuti i adhura acel ma kind wagi, nen, ng'atu moko ma joi romo kume: man kan eneno Yesu, epodho arieba wang'e, man ekwaye, ewacu kumae, Rwoth, tek iyenyoy, icopo dwoko kuma leng'.
- ¹³Man erieyo cinge, emulo ko kume, ewacu kumae, Ayenyo; kumi dok leng'. E eni eni joi weke.
- ¹⁴Man eng'olo ire ya kud eyer ni ng'atu moko: ento cidh i yo peri, man inyuthii ni jalam, man imi pi dwokoleng' peri, calu Musa ng'olo, ni lembatuca igi.
- ¹⁵Ento pire yik m'usagu dit: man udul dhanu ma dit gicokri niwinje, kara jukei tho migi de.
- ¹⁶Ento eai ecidho ka ma ngele, man erwo.
- ¹⁷E etimbre i ceng' moko ma kind maeno, nwang'u ebeponjo; man Jufarisayo ku jueuthecik gibedo keca, ma giai ku ba pacu ceke mi Galilaya man Yahudi ku Yerusalem: man tego pa Rwoth ni i bang'e m'ecangu ko kum.
- ¹⁸Man nen, dhanu kelo ng'atu ma kume tho nding' wi kavuto: man giyenyo giroye, gikethe i wang'e.
- ¹⁹Ka karoye mbe igi kum udul dhanu, giidho wi ot, gilure piny ku wang' biriki ku kavuto pare i kindgi i wang' Yesu.
- ²⁰Kan eneno yioyic migi, ewacu kumae, Nico, dubo peri wekre iri woko.
- ²¹Man jugorcik ku Jufarisayo gimaku poro lembe, giwacu kumae, Maeni ng'a m'uyero lembacidi kum Mungu? Ng'a ma copo weko dubo woko, ma k'e Mungu kende ngo?
- ²²Ento Yesu m'ung'eyo porolembe migi, edwoko lembe igi ewacu kumae, Wuporo lembe i adundewu nedi?
- ²³Makani ma yot ma sagu, wacu kumae, Dubo peri juweko woko iri; kadi wacu kumae, Ai malu iwothi?

- ²⁴Ento kara wung'ei nia Wod dhanu bedo ku ng'ol wi ng'om mi weko dubo (ewacu ni ng'atu ma kume tho nding' kumae), Awacu iri kumae, Ai malu, ting' kavuto peri, man icidh i ot peri.
- ²⁵E ndhu ndhu nica eai malu kud i wang'gi, eting'o gin m'evuto i wie, ecidho i ot pare, ku yungo Mungu.
- ²⁶Kagi ceke igi wang' lii, man giyungo Mungu: lworu de negogi dwanya, giwacu kumae, Tinuni waneno gin ma tung'.
- ²⁷Yo ng'ei gin maeni ecidho, man eneno won ajok, nyinge Lawi, m'ebedo ka ma jujoko ie ajok, man ewacu ire kumae, Lub ng'eya.
- ²⁸Man eweko ceke, eai malu elubo ng'eye.
- ²⁹Man Lawi timo ire agba ma dit i ot pare: weg ajok ku jumange ma gibedo dhu cam gikugi gin udul ma dit.
- ³⁰Jufarisayo ku jugorcik ging'ur kum julubne, giwacu kumae, Wucamu wumadhu de ku weg ajok man judubo nedi?
- ³¹Man Yesu loko lembe ewacu igi kumae, Ju ma kumgi leng' can jakeikum negogi ngo; ento ju ma kumgi lith re.
- ³²Abino ngo nilwong'o weg bedopwe ya gilok cwinygi ento judubo re.
- ³³Man giwacu ire kumae, Julub Yohana giweko cam wang' udul, gikwayu kwac de; julub Jufarisayo bende; ento peri gicamu gimadhu de.
- ³⁴Yesu wacu igi kumae, Wucopo ketho wot won ambadha wek cam, kinde ma won ambadha ni i bang'gi?
- ³⁵Ento ceng' bibino; man ka jubikabu won ambadha woko kud i bang'gi, e gibilund weko cam i ceng' maeno.
- ³⁶Eyero lembabola bende igi kumae, Ng'atu moko mbe ma yeco kurembo kum kendi ma nyen man ekethe kum kendi m'uti; tek eketho, nwang'u eyeco kendi ma nyen, man kurembo de ma kum kendi ma nyen eribre ngo ku kendi m'uti.
- ³⁷Ng'atu moko mbe de ma ketho pigulok ma nyasa i usaupigulok m'uti; tek eketho, pigulok ma nyasa yeco usaune, e en gire ebioi, usaune binyothre.
- ³⁸Ento pigulok ma nyasa jukojuketho i usaupigulok ma nyen be.
- ³⁹Ng'atu moko mbe de ma madhu pigulok ma kudra ma yenyo ma nyasa; kum ewacu kumae, Ma kudra ber ma sagu.

Luka 6

- ¹Nie etimbre i ceng' sabatu, nwang'u ebekadhu ku kind podho cam, julubne gijaku jang cam, gitinyo i cing'gi de, man gimwodo.

- ²Ento jumoko ma kind Jufarisayo giwacu kumae, Nedi wutimo gin ma cik uyio ngo i ceng' sabatu?
- ³Yesu loko lembe ewacu igi kumae, Wusomo ngo cil maeni ma Daudi timo nwang'u kec ubenege, en, ku ju ma ginuti gikugi de;
- ⁴maram emondo ko i ot pa Mungu, man eting'o ecamu kwen m'anyutha, emio de ni ju ma gini i bang'e; ma cik uyio ngo nia jucam ndhu ni julam kengi?
- ⁵Ewacu igi kumae, Wod dhanu en e rwoth mi ceng' sabatu.
- ⁶Etimbre i ceng' sabatu mange, nia emondo i kacokri eponjo de: ng'atu moko de ni keca, ma cinge ma yor acwic ulindre.
- ⁷E jugorcik ku Jufarisayo de gilibe, tek ebikeyo kum ceng' sabatu; kara ginwang' maram gidote ko.
- ⁸Ento eng'eyo pidoic migi; man ewacu ni ng'atu ma cinge lindre kumae, Ai malu, man icung i diere. E eai ecungo.
- ⁹Yesu wacu igi kumae, Apenjowu, Cik uyio ya jutim beri, kadi rac i ceng' sabatu? bodho kwo, kadi nyothe?
- ¹⁰Enenogi ceke kun ku kun de, man ewacu ire kumae, Riei cingi. E etimo kumeno: man cinge dok kakare.
- ¹¹Ento gipong' ku ng'ecwiny ma tek man giwecri gigi pi gin ma gitim kum Yesu.
- ¹²Man etimbre i ceng' maeni, nia ecidho i got nirwo; man ebedo diewor soro i rwo ni Mungu.
- ¹³Man ka piny uru, elwong'o julubne; man egoyo nying' juapar wi ario kud i kindgi, m'elwong'ogi jukwenda:
- ¹⁴Simon, m'elwong'o nyinge Petro, man Andrea m'umin mire, man Yakobo ku Yohana, man Filipino giku Bartolomayo,
- ¹⁵man Matayo giku Thoma, man Yakobo ma wod Alfayo, ku Simon ma julwong'o Zelote,
- ¹⁶man Yuda ma wod Yakobo, man Yuda Iskariote, m'edoko jaganda.
- ¹⁷Man eloro piny gikugi, man ecungo wi pambu, kud udul julubne ma dit, man udul dhanu dupa m'uai i Yahudi ku Yerusalem, man dhu wath mi Turo ku Sidon, ma gibino winje, kara jukei tho migi de;
- ¹⁸man ju ma tipo m'ucido sendogi kumgi kei.
- ¹⁹Udul dhanu ceke de giyenyo gimul kume; kum tego ai i bang'e m'ukeyo kumgi ceke.
- ²⁰Man eng'ayu wang'e malu ba julubne, ewacu kumae, Mugisa iwu wu ju ma jucan: kum ker pa Mungu en e mu.

- ²¹Mugisa iwu wu ju ma kec unegowu kawono: kum wubiyeng'. Mugisa iwu wu ju m'uywak kawono: kum wubing'iero.
- ²²Mugisa iwu, ka dhanu bidaguwu, ka gibikoyowu kud i kindgi, gicayuwu de, man gibayu nyingwu woko calu gi rac, pi Wod dhanu.
- ²³Anyong'a negwu i ceng' maeno, wupor malu de ni mutoro: kum nen, sukulia mu dit i polo; kum kwaru migi timo kumeno ba jubila.
- ²⁴Ento can i wiwu wu ju ma wulony! kum wumaku juk mu.
- ²⁵Can i wiwu, wun ma wuyeng' kawono! kum kec binegowu. Can i wiwu, wun ma wung'iero kawono! kum can binegowu man wubiywak.
- ²⁶Can i wiwu, ka dhanu ceke biyero ber piwu! kum kwaru migi timo kumeno ba jubila mi ndra.
- ²⁷Ento awacu iwu kumae, wu ju m'uwinjo, Wumar judegiwu, wutim ber ba ju m'udaguwu,
- ²⁸wumi mugisa ni ju m'ulamuwu, wurwo pi ju m'uyenyowu ku rop.
- ²⁹Ng'atu m'upadu thengi acel lok kurucel bende; ng'atu m'umayu jabia peri mi ire semisi peri bende.
- ³⁰Mi ni dhanu ceke m'ukwei; ng'atu m'umayu piny peri de kud ilwong' kendo.
- ³¹Man calu wuyenyo nia dhanu gitim iwu, wutim igi bende kumeca.
- ³²Tek wumaru ju m'umaruwu, jufoyowu kum ang'o? kum cil judubo gimaru ju m'umarugi.
- ³³Man tek wutimo ber ni ju m'utimo ber i beng'wu, jufoyowu kum ang'o? kum cil judubo gitimo kumeno.
- ³⁴Man tek wumio banja ni ju ma wugeno nia wubigamu wang'e, jufoyowu kum ang'o? cil judubo mio banja ni judubo, kara gigam wang'e kendo.
- ³⁵Ento wumar judegiwu, wutimigi ber, wumi banja, kud wugen nia wang'e dwog iwu; man sukulia mu bibedo dit, wun de wubibedo wot Ng'atu ma Malu Ngbir: kum e ber ni ju m'umbe foyofoc ku judubo bende.
- ³⁶Kisa negwu, cil calu kisa nego Wegwu.
- ³⁷Kud wupok lembe, ka wun de jubipoko lembe mu ngo: kud wupok lembe rac, e ka wun de jubipoko lembe mu rac ungo: wuweki, e ka wun de jubiwekowu:
- ³⁸wumi, e ka jubimio iwu; mukero ma ber, ma jucung'o ie, ma juyenge de, ma jukonjo pong' hau, gibimio i korwu. Kum ku mukero ma wuporo ko juhporo ko iwu bende.
- ³⁹Man eyero lembabola bende igi kumae, Abinga copo telo wi abinga wadi? gin ario de gibipodho i vur ungo?

⁴⁰Jalub sagu japonji pare ngo: ento ku ba dhanu nzu ka judwoke ndhu cu ebibedo calu japonji pare.

⁴¹Nedi ineno ng'ili m'i wang' umeru, ento ii pido ngo pi riu ma ni i weng'i ini?

⁴²Kadi icopo wacu ni umeru nenedi kumae, Umira, wek akab ng'ili ma ni i weng'i, kan ineno riu ma ni i weng'i in ungo? I won ambili, ilar iwodh riu kud i weng'i in, kan ibilund neno cu m'ikabu ko ng'ili kud i wang' umeru.

⁴³Kum yen ma ber umbe ma cego nyinge ma rac; kadok yen ma rac de mbe ma cego nyinge ma ber.

⁴⁴Kum ku ba yen ceke ng'eire ni nyinge. Kum jupono nying ulam ungo ku kum ukudho, kadok nying ulok de jupono ngo ku kum ucok.

⁴⁵Ng'atu ma ber kud i piny pare m'akana ma ber mir adunde ewodho maeno m'e ber; ng'atu ma rac de kud i piny pare m'akana ma rac ewodho maeno m'e rac: kum kud i sagri ma dit mir adunde dhoge yero.

⁴⁶Wulwong'a Rwoth, Rwoth, nedi ke wutimo gin m'awacu ngo?

⁴⁷Ku ba dhanu ceke m'ubino i bang'a, m'uwinjo lem para de, man m'utimogi, abinyutho iwu ng'atu m'e cal kude:

⁴⁸e calu dhanu m'ubegomo ot, m'ukunyo ng'om unyang', man eporo kathere wi cana: man ka pi m'ucoro ng'om uwok, kulo dhongo ot maeno, man ecoyo yenge ngo: kum ecungo wi cana.

⁴⁹Ento ng'atu m'uwinjo, etimo de ngo, e calu ng'atu m'ugomo ot wi ng'om ma kathere mbe; ma kulo dhonge, e eni eni ode rwombre; man rwombrene bedo dit.

Luka 7

¹Kan edaru lembe ceke i ith dhanu, emondo i Kapernaum.

²Jamiru pa jego moko, en e ng'atu ma kacwinye, kume lith man eyenyo tho.

³Kan ewinjo pi Yesu, eoro judong Juyahudi i bang'e, m'upenje nia ebin elar jamiru pare.

⁴Gin de, ka gibino ba Yesu, gikwaye ma tek, giwacu kumae, Ng'atuno romo nia itim maeni ire;

⁵kum emaru thek mwa, man egomo iwa kacokri mwa en.

⁶E Yesu gicidho gikugi. Man kan ewok ceng'ni ot, jego oro jurimbe i bang'e, ma giwacu ire kumae, Rwoth, kud isendri giri; kum an aromo ngo nia imond i ot para:

⁷kum kumeno ia pido nia aromo ngo m'abin ko i beng'i: ento yer lembe ci, e kum jamiru para bikei.

⁸Kum an a ng'atu ma juketho the ng'ol, m'abedo kud asikari i tienda: awacu ba ng'atu maeni, Cidhi, e ecidho; ni mange de, Bin, e ebino; ni jamiru para de, Tim mae, e etime.

⁹Ka Yesu winjo gin maeni, ie wang' lii i kume, man elokre ewacu ni udul dhanu m'ulube kumae, Awacu iwu kumae, Fodi anwang'u yioyic ma dit ma kumeni ngo, ungo, i Israel de ngo.

¹⁰E ju ma juorogi de, ka gidwogo ba ot, ginwang'u kum jamiru kei.

¹¹Man etimbre yo ku ng'ei maeni nyanok, nia ecidho bang' adhura ma julwong'o Nain; julubne gicidho gikugi, kud udul dhanu ma dit.

¹²Nie kan ewok ceng'ni dhugang' mir adhura, nen, juyeyo avu dhanu, en e wod min kulong', en de e dhaku ma cware tho: man dhanu dupa mir adhura ginuti gikugi.

¹³Ka Rwoth unene, ngisi nege i kume, man ewacu ire kumae, Kud iywakr.

¹⁴Man ecoro ceng'ni emulo kika de: e ju m'uyeye gicungo gr. Man ewacu kumae, Jalawobi, awacu iri, Ai malu.

¹⁵E ng'atu m'utho uai malu, ebedo wi there, emaku weco. Man emie ni min.

¹⁶Elworomakugi kagi ceke: man giyungo Mungu, giwacu kumae, Jabila ma dit uwok i kindwa: man, Mungu liewo dhanu pare.

¹⁷Rwonglembe maeni yik pire i Yahudi ngung', man i ng'om ceke ma ceng'ni.

¹⁸Man julub Yohana giyero ire pi gin maeni ceke.

¹⁹Man Yohana lwong'o kind julubne ario i bang'e eorogi de ba Rwoth, ewacu kumae, In i ng'atu m'ubebino, kadi wakur mange?

²⁰E ka dhanu wok i bang'e, giwacu kumae, Yohana ma Jabaputisi orowa i beng'i, epenjo kumae, In i ng'atu m'ubebino, kadi wakur mange?

²¹I saa maeno ekeyo tho dupa m'unyang' i kum, ku thong'om man tipo ma rac; ju ma abinga dupa de eketho gineno piny.

²²Edwoko lembe ewacu igi kumae, Wuciyer ni Yohana pi gin ma wuneno ma wuwinjo de; abinga neno piny, weg abala mi tielo de giwotho, weg joi kumgi doko leng', ju ma ithgi dhing' de giwinjo, ju m'utho ndhu de gicer, lembanyong'a ma juboth ko de yere ni jucan.

²³Mugisa ni ng'atu m'unwang'u lembe moko ngo m'ekier i wie ni kuma.

²⁴Ka jukwenda pa Yohana ai, emaku yero lembe pi Yohana ni udul dhanu kumae, Wucidho woko i yamba nineno ang'o? undodi m'uyengre ku yamu?

²⁵Ento wucidho woko nineno ang'o? ng'atu m'uronjre ku kendi ma yomi? Nen, ju m'ukendo kendi m'urieny, m'ubedo ku lonyo de, gini i udi mir ubimo.

- ²⁶Ento wucidho woko nineno ang'o? jabila? Eyo, awacu iwu, ma sagu jabila dit.
- ²⁷Maeni ng'atu ma jugoro pire kumae, Nen, aoro jakwenda para i weng'i, Ma biyiko yo peri i weng'i.
- ²⁸Ayero iwu kumae, I kind ju ma mon unyolo, ng'atu moko mbe ma sagu Yohana: ento ng'atu ma en e nok i ker pa Mungu re e m'usage.
- ²⁹Dhanu ceke de ka giwinjo, ku weg ajok de, gimio bedopwe ni Mungu, gi ju m'umaku baputisi ba Yohana.
- ³⁰Ento Jufarisayo ku jueuthecik gikwero lembapora pa Mungu igi gigi, gi ju ma gimaku baputisi ngo i bang'e.
- ³¹Abilund poro dhanum'utuk maeni kud ang'o, man gi calu ang'o?
- ³²Gi calu nyithindho m'ubedo i katali, m'ulwongri i kindgi; m'uwacu kumae, Wakudho usegu iwu, man wumiel ungo; wawero wejawu, wuywak de ngo.
- ³³Kum Yohana ma Jabaputisi bino ku camu kwen ungo kadok ku madhu pigulok de ngo; wuwacu de kumae, E won pajogi.
- ³⁴Wod dhanu bino ku camu ku madhu de: man wuwacu kumae, Nen, ng'atu ma jambo, man andre pigulok, jarimb weg ajok ku judubo de!
- ³⁵E rieke nwang'u bedopwe ni kum nyithindhe ceke.
- ³⁶Kind Jufarisayo acel uyenyoy ya gicam gikude. Man emondo i ot pa Jafarisayo, ebedo dhu cam de.
- ³⁷Nen, dhaku nuti i adhurane ma won dubo; man kan eng'eyo nia ebedo dhu cam i ot pa Jafarisayo, ekelo cupa mi kidi ma ber ma ie ju mo,
- ³⁸ecungo ko yor i ng'eye ba tiende, ku ywak, man emaku cwiro piwang'e wi tiende, eyweyogi de ku yukwie, man ecwio tiende, ewirogi de ku mo.
- ³⁹Nie ka Jafarisayo m'ulwong'e neno maeni, eyero kud i ie, ewacu kumae, Ng'atu maeni, tek en e jabila, kuno di eng'eyo nia dhaku maeni en e ng'a en e ng'atu manedi m'umulo kume, nia en e jadubo.
- ⁴⁰Yesu dwoko lembe ewacu ire kumae, Simon, abedo ku gin moko m'ayer iri. Eloko lembe kumae, Japonji, yer.
- ⁴¹Ng'atu moko m'umio jupiny ni banja ebedo ku jubanja ario: acel banja pare denarii dak abic, mange ke pier abic.
- ⁴²Ka gimbe ku gin ma gicul ka wang'e, eweko igi gin ario. Ka kumeno makani ma kind juario maeni ma bimare ma sagu?
- ⁴³Simon uloko lembe ewacu kumae, Awacu nyo ng'atu m'eweko lem pare dit ma sagu. E ewacu ire kumae, Ipoko lembe pwe.

⁴⁴Elokre ba dhaku, man ewacu ni Simon kumae, Ineno dhaku maeni? Amondo i ot peri, imio pi ira ngo mi tienda: ento ecwiro piwang'e wi tienda, eyweyogi de ku yukwie.

⁴⁵Icwio limba ngo: ento en, ugambre i kinde m'amondo, eweko cwio tienda ngo.

⁴⁶Iwiro mo i wia ngo: ento ewiro tienda ku mo.

⁴⁷Kum kumeno awacu iri kumae, Dubo pare, m'ubedo dupa, uwekre woko; kum emaru dit: ento ng'atu ma juweko ire nyanok, ng'atuno maru nyanok.

⁴⁸Ewacu ire kumae, Dubo peri wekre woko.

⁴⁹Ju ma gibedo kugi dhu cam de gimaku wacu i igi gigi kumae, Ng'atu mae ma weko dubo woko en e ng'a?

⁵⁰Ewacu ni dhaku kumae, Yioyic peri e m'ubodhi; cidh ma cwinyi kwio.

Luka 8

¹Man etimbre yo ku ng'eye nyanok, nia ecihho ku bang' adhura ku pacu de, m'ebeyero m'ebekelo ko lembanyong'a ma juboth ko mi ker pa Mungu, karacelo kude de juapar wi ario,

²ku mon moko ma jukeyo kumgi kum tipo ma rac ku mulima bende: Mariamu ma julwong'o Magdalene, ma juwodho pajogi abiro kud i ie,

³man Yoana ma ci Kuza ma jakurpiny pa Herode, man Susana, ku mange de dupa, ma gitimo ire ku piny migi.

⁴Kan udul dhanu dupa gicokri karacelo i bang'e, ku dhanu m'uai ku bang' adhura ceke de, eyero ku lembabola kumae:

⁵Jacoikodhi cidho nicoyo kodhi pare; kan ecoye de, moko podho dhu yo; junyone de the tielo, winyo ma kor polo de gicame.

⁶Mange ke podho wi cana; kan etwi de, ener woko, kum pi mbe i there.

⁷Mange ke podho kind ukudho; ukudho de dongo karacelo kude, edeye de.

⁸Mange ke podho i ng'om ma mio, etwi de, man ecego nyinge, acel bang' dak. Kan eyero gin maeni, ekok akoka kumae, Ng'atu ma ithe nuti m'ewinjo ko, wek ewinji.

⁹Julubne de gipenje nia the lembabola mae ang'o.

¹⁰Ewacu kumae, Emire iwii ya wung'ei giramung'a mi ker pa Mungu: ento ni dong' dhanu ku lembabola; kara kadok gineno ku ginen, kadok giwinjo de ku ging'ei.

¹¹Nie the lembabola e eni: Kodhi en e lem pa Mungu.

¹²Ju ma dhu yo gi ju m'uwinjo; e wonabali lund ubino, man ekabu lembe woko kud i adundegi, kara ku giyi giboth de.

- ¹³Ju ma wi cana ke, gi ju ma ka giwinjo, gijolo lembe ku mutoro; maeni de ulaggi mbe kugi, ma giyio mi nindo ma nyanok, i nindo mir abidhe de gikier.
- ¹⁴Maeno m'upodho kind ukudho ke, maeni ju m'uwinjo, e ka gicidho i yo migi gideiri ku giki m'i ng'om ku lonyo man mutoro mi kwo maeni, e gicego nying'gi moko ngo ma cu.
- ¹⁵Maeno m'i ng'om ma ber ke, joni gi calu ju m'uwinjo lembe i adunde ma ber ma cu de, ma ka giwinjo lembe, gimoko kume ki, man gicego nying'gi ku twiocwiny.
- ¹⁶Ng'atu moko mbe, ma kan ecwinyo thala, eume kud agulu, kadi ekethe the kavuto; ento ekethe wi thethala, kara ju m'umondo ginen der.
- ¹⁷Kum gin moko mbe ma pandre, ma binyuthre ngo; kadok gin m'amung'a de mbe, ma bing'eire ngo ma bibino ba der de ngo.
- ¹⁸Ka kumeno wukuru maram wuwinjo ko: kum ng'atu ma tek ubedo ko, jubimio ire; man ng'atu ma tek ubedo ko ngo, kud i bang'e jubikabu woko cil maeno m'ewacu nyo ebedo ko.
- ¹⁹Min mire ku utumin mire de gibino i bang'e, man gicopo tundo i bang'e ngo kum njuru dhanu.
- ²⁰Juyero ire kumae, Meru ku utumeru gicungo woko, giyenyo gineni.
- ²¹Ento eloko lembe ewacu igi kumae, Ma ku utumira de gi maeni m'uwinjo lem pa Mungu, m'utime bende.
- ²²Nie etimbre i kind ceng' acel maeno, nia emondo i yei, en ku julubne; man ewacu igi kumae, Wacidhu loka nam; e gimaku kiewo.
- ²³Ento ka gibecidho ku yo mi pi enindo: man wavuvu tuk i nam; e yei migi maku pong' ku pi, e gi ceng'ni tho.
- ²⁴Man gibino i bang'e, gicewe de, giwacu kumae, Japonji, japonji, watho. E eceu, man ejuko yamu ku ngongo mi pi de: e gicungo, nam de nindo seble.
- ²⁵Man ewacu igi kumae, Yioyic mu nikani? Man lworu makugi igi de wang' lii, giwecri de kumae, Ka kumeno ng'atu maeni en e ng'a, m'eng'olo lembe cil ni yamu ku pi de, man giwore e?
- ²⁶E gitundo i ng'om Jugadareni, m'ubedo ng'et ng'om Galilaya.
- ²⁷Kan eloro dhu wath, ng'atu acel m'uai i adhura, i yo migi gideiri ku giki m'i ng'om ku lonyo man mutoro mi kwo maeni, e gicego nying'gi moko ngo ma cu.
- ²⁸E kan eneno Yesu, ekok akoka, man epodho piny i wang'e, ewacu kumae ku dwande ma tek, Watim ang'o wakudi, Yesu, in i Wod Mungu ma Malu Ngbiri? Akwei, kud isenda.

- ²⁹Kum ebeng'olo ni tipo m'ucido ya eai kud i ng'atuno. Kum emake bang' dupa: man jukuro kume, ebeto atwia de ku nyoro ku nyunyu de; kan ecodo gin ma jutwie ko woko, pajogi ringo kude i ng'om ngele.
- ³⁰Yesu penje kumae, Nyingi ng'a? Man ewacu kumae, Nyinga Udul; kum pajogi dupa mondo i ie.
- ³¹Man gikwaye ya kud eng'ol gicidh i longro ma there mbe.
- ³²Nie udul kul dupa nuti keca gibecamu kor got; man gikwaye ya eyi igi nia gimond i igi. E eyio igi.
- ³³Pajogi giai i ng'atuno, gimondo i kul: man udul ukonjri piny ku ka ma lung' i nam, e githung'.
- ³⁴Ka ju m'ukwayugi gineno gin m'utimbre, giringo, giyero lembene i adhura kud i thim de.
- ³⁵Man gicidho woko kara ginen gin m'utimbre; e gibino ba Yesu, man ginwang'u ng'atu ma pajogi ai i ie, ebeto the tiend Yesu m'ekendo bongu, pidoie de cu: e lworro makugi.
- ³⁶Ju ma gineno maeni maram kum won pajogi titre ko giyero igi.
- ³⁷E dhanu ceke m'i ng'et ng'om Jugadareni gipenje ya eai woko kud i bang'gi; kum lworro benegodi dit: e emondo i yei, edok.
- ³⁸Ento ng'atu ma pajogi ai woko kud i ie epenje nia gibed gikugi: ento eore ecidho, ewacu kumae,
- ³⁹Dok i ot peri, yer de pi gin ma dit ma Mungu timo iri. Man ecidho i yo pare, ku rweyo cil i adhura ceke maram Yesu timo ko gin ma dit ire.
- ⁴⁰Ka Yesu dwogo, udul dhanu jole ku mutoro; kum gin ceke gibekure.
- ⁴¹Man nen, ng'atu ma nyinge Yairo, en de e jadit mi kacokri: epodho piny the tiend Yesu, ekwaye de ebin i ot pare;
- ⁴²kum ebeto ku nyare acel kulong', m'ucamu rundi calu apar wi ario, edhingo tho. Ento kan ebetidho udul dhanu gicungri i kume.
- ⁴³Dhaku m'ubedo rundi apar wi ario ku tho ma rimo mol ko dit i kume, m'emio ceke m'etungre kudo ba jukeikum, man acel de mbe ma copo keyo kume.
- ⁴⁴ebino yor i ng'eye, emulo dhu kendi pare: e pio pio dhu rimo m'umol i kume cok.
- ⁴⁵Yesu wacu kumae, Ng'a m'umulo kuma? Ka gin ceke gikwero, Petro, giku ju ma gibedo gikugi giwacu kumae, Japonji, udul dhanu gicungri i kumi gidii.
- ⁴⁶Ento Yesu wacu kumae, Ng'atu moko mulo kuma; kum ang'eyo nia tego ai i bang'a.

⁴⁷Ka dhaku neno nia epondre ngo, ebino ma kume miel kpa kpa, epodho i wang'e, eyero de i vut dhanu ceke thelembe m'uketho emulo kume, maram kume kei ko ndhu ndhu nica.

⁴⁸Man ewacu ire kumae, Nyara, yioyic peri e m'ubodhi; ci ma cwinyi kwio.

⁴⁹Kinde m'ebeyero, e ng'atu acel ubino m'uai ba ot pa jadit mi kacokri ewacu kumae, Nyeri tho ndhu; kud inyai can i Japonji.

⁵⁰Ento Yesu m'uwinjo, edwoko lembe ire kumae, Lworo kud unegi: yi kende, e kume bititre.

⁵¹Kan ebino ba ot, eyio ngo ng'atu moko mond gikugi, ndhu Petro, man Yohana, ku Yakobo, man won ku min nyathin kendgi.

⁵²Dhanu ceke giywak, gigoyo nduru i kume: ento ewacu kumae, Kud wuywaki: kum etho ngo, ento enindo.

⁵³E ging'iere hai, kum ging'eyo nia etho.

⁵⁴Ento en, m'emake ku cinge, elwong'o, ewacu kumae, Nyaku ai malu.

⁵⁵Man tipone dwogo, eai malu pio pio: e eng'olo nia jumi gin moko ire ecam.

⁵⁶Junyodo pare de igi wang' lii: ento eng'olo igi nia ku giwac ni ng'atu moko pi gin m'utimbre.

Luka 9

¹Elwong'o juapar wi ario karacelo, emio igi tego ku ng'ol wi pajogi ceke, man kum keyo tho m'unyang' i kum,

²Man eorogi gici giyer pi ker pa Mungu, man gikei kum ju ma kumgi lith.

³Man ewacu igi kumae, Kud wuting' gin moko mi woth mu, kadok uluth, kadi gbethe, kadi kwen, kadi sente; kadok jabia ario de kud wubed kudo.

⁴Man ot ma tek wumondo i ie, wubed keca, man wuai keca de wucidhi.

⁵Dhanu ceke m'ujolowu ngo, ka wuai ku i adhura maeni, wukir utur woko kud i tiendwu ni lembatuca igi.

⁶E giai, gicidho ku ba pacu, ku yero lembanyong'a ma juboth ko, ku keyo kum i kaka ceke.

⁷Nie Herode ma jabim uwinjo pi gin ceke m'utimbre: e cwinye ng'abre, kum dhanu moko wacu nia Yohana cer ku kind ju m'utho;

⁸man jumoko ke, nia Elia wok en; jumange ke, nia ng'atu acel ma kind jubila ma con ucer kendo.

⁹E Herode wacu kumae, Yohana athumo wie: ento maeni ng'a, m'awinjo gin ma calu maeni pire? Man eyenyo enene.

- ¹⁰Ka jukwenda gidok, giyero ire gin ceke ma gitimo. Man ecokogi, ecoro kugi cen i adhura ma julwong’o Bethsaida.
- ¹¹Ento udul dhanu m’ung’eyo maeni gilubo ng’eye: man ejologi, eyero igi de pi ker pa Mungu, man ekeyo kum ju ma can keyo kum unegogi.
- ¹²Ceng’ udoko reto ma ng’ic; e juapar wi ario gibino, giwacu ire kumae, Lal udul dhanu woko, kara gicidh i pacu ma ceng’ni kud i thim de, gigonj, ginwang’ cam de: kum ka ma wani i ie e ng’om ngele.
- ¹³Ento ewacu igi kumae, Wumi igi gicam. E giwacu kumae, Wabedo ku lungu kwen abic kende ku rec ario tek wakuciwang’iewo cemo ngo mir udul dhanu maeni ceke.
- ¹⁴Kum jumaco giyenyo romo rubanga abic. Ewacu ni julubne kumae, Wuketh gibed piny ni thek ni thek, thek acel calu pier abic.
- ¹⁵Gitimo kumeno de, giketho gibedo piny ceke.
- ¹⁶Eting’o lungu kwen abic ku rec ario de, eneno malu i polo, man emio mugisa i wigi, eng’weko ie de: emio ba julubne giketh i wang’ udul dhanu.
- ¹⁷E gicamu, kagi ceke de giyeng’: jucoko dong’ kodine m’udong’ katoko apar wi ario.
- ¹⁸Man etimbre, kan eberwo katung’, julubne de ni i bang’e: man epenjogi, ewacu kumae, Udul dhanu giwacu nia an a ng’a?
- ¹⁹Giloko lembe giwacu kumae, Yohana ma Jabaputisi; jumange ke, Elia; jumange ke, nia ng’atu acel ma kind jubila ma con ucer en.
- ²⁰Man ewacu igi kumae, Ento wun ke wuwacu nia an a ng’a? E Petro loko lembe ewacu kumae, In i Kristu pa Mungu.
- ²¹Ento ejukogi, eng’olo igi lembe nia ku giyer maeni ni ng’atu moko;
- ²²ewacu kumae, Wod dhanu bikosendre ku gin dupa be, judongo ku julam ma dongo ku jugorcik gibikwere, man jubinege, man i ceng’ mir adege ebicer.
- ²³Man ewacu igi ceke kumae, Tek ng’atu moko yenyo elub ng’eya, dong’ ekwere gire, eting’ yen m’athara pare ku ba rupiny ku ba rupiny, elub ng’eya.
- ²⁴Kum ng’atu ma tek uyenyoy ebodh kwo pare ebirwinye; ento ng’atu ma tek birwinyo kwo pare pira, e ng’atuni bibodhe.
- ²⁵Kum kuloka ang’o ni ng’atu moko, tek enwang’u kuloka ma ng’om bo, ma en ke erwinjre gire?
- ²⁶Kum ng’atu ma tek lewic binege i kuma kum lembe para de, Wod dhanu de lewic binege i kume, kan ebino i dwong’ pare, ku dwong’ pa Wego, ku mi malaika maleng’.

- ²⁷Ento ayero iwu mandha kumae, Kind ju m'ucungo kakeni, moko bibilo tho ki ngo, ma fo gikuneno ker pa Mungu ngo.
- ²⁸Man etimbre yo ng'ei lembe maeni calu ceng' abora, nia ecoko Petro ku Yohana man Yakobo, e gicidho kugi wi got nirwo.
- ²⁹Kinde m'eberwo, ayi wang'e lokre tung', kendi pare de doko tar erieny de.
- ³⁰Man nen dhanu ario giweco gikude, dhanune Musa gikud Elia;
- ³¹ma giwok i dwong', giyero de pi tho pare m'ebitimo kakare i Yerusalem.
- ³²Nie Petro giku ju ma ginuti gikugi nindo benurogi: ento ka giceu terere, gineno dwong' pare ma dhe, ku juario ma gicungo gikugi.
- ³³Man etimbre, kinde ma gibeweke, nia Petro wacu ni Yesu kumae, Japonji, e ber iwa kum wanuti keni: dong' waji otbak adek; acel iri, acel ni Musa, acel ke ni Elia: man eng'eyo ngo gin m'eyero.
- ³⁴Kinde m'ebeyero lem maeni, afuru bino, uketho tipo i wigi: lworro de negogi ka gimondo i afuru.
- ³⁵Dwal de ai i afuru m'uwacu kumae, Maeni Woda, ng'atu m'agoyo wie: wuwinje.
- ³⁶E ka dwal uwok, ginwang'u Yesu dong' kende. E giling', man giyero ni ng'atu moko ngo i ceng' maeno gin moko mi gin ma gineno.
- ³⁷Man etimbre, urwone, ka giloro got, udul dhanu ma dit girombo kude.
- ³⁸Man nen, ng'atu acel m'uai bang' udul dhanu kok akoka, ewacu kumae, Japonji, akwei inen kum woda; kum en e nyathin para kulong':
- ³⁹man nen, tipo make, man ekok pio pio; emielo kume eketho voyo dhure, man eweke pio pio ngo, m'ebewanyu kume rac.
- ⁴⁰E akwayu julubni ya giwodhe woko: man gicopo ngo.
- ⁴¹E Yesu dwoko lembe ewacu kumae, E dhanum'utuk m'umbe yioyic ma wu juco, abibedo kudu rokani, m'atwio ko cwinya i kumwu? kel wodi keni.
- ⁴²Kan ebino de, pajogi redhe piny, man emielo kume kr kr. Ento Yesu juko tipo m'ucido, man ekeyo kum nyathin ma nicone, edwoke de ni won.
- ⁴³E kagi ceke igi wang' lii kum dwong' pa Mungu. Ento ka i dhanu ceke wang' lii kum gin ceke m'etimo, ewacu ni julubne kumae,
- ⁴⁴Wek lembe mae unyang' i ithwu: kum Wod dhanu jubimie i cing' dhanu.
- ⁴⁵Ento ging'eyo thelembe mae ngo, emungre igi, kara ku ging'eye; e lworro penje kum lembe maeni makugi.
- ⁴⁶E piem uwok i kindgi, nia ng'a ma dit ma sagu i kindgi.

⁴⁷Ento ka Yesu ng'eyo piem mir adundegi, egamu nyathin ma nok, ekethe de i ng'ete,

⁴⁸man ewacu igi kumae, Ng'atu ma tek bijolo nyathin ma nyanok maeni i nyinga nwang'u ejolo an: man ng'atu ma tek bijolo an nwang'u ejolo ng'atu m'uora: kum ng'atu ma nyathigi i kindwu ceke, ng'atuno en e dit.

⁴⁹Yohana loko lembe man ewacu kumae, Japonji, waneno ng'atu acel ubewodho pajogi ku nyingi; e wakwere, kum elubo ngo wakugi.

⁵⁰Ento Yesu wacu ire kumae, Kud wukwere; kum ng'atu ma jadhogwu ngo en e jabeng'wu.

⁵¹Man etimbre, ka ceng' ma jubijole ie malu dhingo, eketho wang'e ngili ngili kum cidho Yerusalem, man eoro jukwenda i wang'e:

⁵²e gicidho, man gimondo i pacu mi Jusamaria, kara giyik kaka ire.

⁵³Gijole de ngo, kum wang'e bedo calu ebecidho Yerusalem.

⁵⁴Ka julubne Yakobo ku Yohana gineno maeni, giwacu kumae, Rwoth, iyenyo walwong' mac uai i polo lor piny, uwang'gi?

⁵⁵Ento elokre, man ejukogi.

⁵⁶E gicidho i pacu mange.

⁵⁷Ka gicidho i yo, ng'atu acel uwacu ire kumae, Abilubo ng'ei ka ma ibicidho i ie ceke.

⁵⁸Yesu wacu ire kumae, Kaki bedo ku odng'om, winyo m'i kor polo de bedo ku odgi; ento Wod dhanu bedo ku ka m'ejeng ie wie de ngo.

⁵⁹Ewacu ni ng'atu mange kumae, Lub ng'eya. Ento ewacu kumae, Rwoth, wek alar acidh ayik vwa.

⁶⁰Ento ewacu ire kumae, Wek ju m'utho gikuny ju m'utho migi; ento cidh iyer pi ker pa Mungu mba mba.

⁶¹Ng'atu mange bende wacu kumae, Abilubo ng'ei, Rwoth; ento wek alar amoth ju ma ni i ot para.

⁶²Ento Yesu wacu ire kumae, Ng'atu moko mbe, m'uromo ku ker pa Mungu, ma ketho cinge kum kwej dhiang', man eneno ng'eye.

Luka 10

¹Nie yo ng'ei gin maeni Rwoth uketho jumange pier abiro, eorogi ario ario i wang'e kubang' adhura kubang' adhura ceke, ka ma en gire eyenyo etund i ie.

²Man ewacu igi kumae, Mwoka bedo dit andha, ento jutic e ma gi nok: ka kumeno wukwai Rwoth mi mwoka, nia eor jutic i mwoka pare.

- ³Wucidhi; nen, aorowu calu nyithi rombe i kind urudi.
- ⁴Kud wuting' gbethe, ku mangala, ku wara, kud wumoth ng'atu moko i yo.
- ⁵I ot de ma tek wumondo i ie, wular wuwac kumae, Kwiocwiny ubed ba ot maeni.
- ⁶Man tek wod kwiocwiny ni i ie, kwiocwiny mu bibedo i kume: ento tek umbe i ie, ebidwogo i kumwu kendo.
- ⁷Man wudong' i ot maeno, ku camu ku madhu gin ma gimio: kum jatic romo ku sukulia pare. Kud wuci ku ba ot ku ba ot.
- ⁸Man adhura ceke ma tek wumondo i ie, gijolowu de, wucam gin ma juketho i weng'wu:
- ⁹wukei kum ju ma kumgi lith ma gini i ie, wuwac igi kumae, Ker pa Mungu bino ceng'ni i vutwu.
- ¹⁰Ento adhura ceke ma tek wumondo i ie, gijolowu de ngo, wuwok woko i gengine wuwac kumae,
- ¹¹Cil utur m'uai i adhura mu, m'umoko kum tiendwa, wayweyo woko i kumwu: ento wung'ei maeni, nia ker pa Mungu bino ceng'ni.
- ¹²Awacu iwu kumae, I ceng' maeno Sodom bibedo ber ma sagu adhura maeno.
- ¹³Can i wii, Korazin! can i wii, Bethsaida! kum tek tic ma tek m'utimbre i iwu utimbre i Turo ku Sidon, kuno di gilokri con, ku bedo i usuba man vuru.
- ¹⁴Ento lembe mi Turo ku Sidon bibedo ber ma sagu mu, i ceng' pokolembe.
- ¹⁵In de, Kapernaum, jubidodi malu i polo? jubijwigi piny i Hadeya.
- ¹⁶Ng'atu m'uwinjowu nwang'u ewinjo an; ng'atu m'ukwerowu nwang'u ekwero an; man ng'atu m'ukwero an nwang'u ekwero ng'atu m'uora.
- ¹⁷Ju ma pier abiro gidwogo ku mutoro, giwacu kumae, Rwoth, cil pajogi gibedo wor iwa ni kum nyingi.
- ¹⁸Man ewacu igi kumae, Aneno Jok upodho kud i polo calu lukoth.
- ¹⁹Nen, amio iwu ng'ol ma wunyon ko thwol man ith, man wi tego ceke pa jakwor: gin moko de mbe ma hitimowu rac.
- ²⁰Ento anyong'a kud unegwu kum maeni, nia tipo gibedo wor iwu; ento anyong'a negwu kum nyingwu gore i polo.
- ²¹I saa maeni anyong'a nege i Tipo Maleng', ewacu kumae, Afoij, E Vwa, Rwoth m'i polo ku ng'om, kum imung'o gin maeni ni jurieko ku weg ng'eyong'ec, man inyuthogi ni mukere: eyo, Vwa; kum ebedo ni mutoro i weng'i kumeno.

²²Vwa mio ira gin ceke: ng'atu moko mbe de m'ung'eyo nia Wod en e ng'a, ndhu Wego kende; kadi m'ung'eyo nia Wego de en e ng'a, ndhu Wod kende, ku ng'atu ma Wod uyenyoye ire.

²³Elokre ba julubne, ewacu mung' mung' kumae, Mugisa ni wang' m'uneno gin ma wuneno:

²⁴kum awacu iwu, nia jubila dupa ku ju m'ubimo bim giyenyo ginen gin ma wuneno, ere ginenogi ngo; man giyenyo giwinj gin ma wuwinjo, ere giwinjogi ngo.

²⁵Man nen, jaeuthecik acel ucungo malu emulo ie, epenje kumae, Japonji, atim ang'o kara acam pacu mi kwo ma rondo ku rondo?

²⁶E ewacu ire kumae, Ang'o m'ugore i ciki? isomo nenedi?

²⁷Eloko lembe ewacu kumae, Ibimaru Rwoth Mungu peri kud adundeni ceke, ku ng'eyong'ec peri ceke, man ku tegoni ceke, ku pidoii ceke de; man wedu calu in giri.

²⁸Man ewacu ire kumae, Idwoko lembe cu: tim maeni, e ibibedo kwo.

²⁹Ento en, m'eyenyoye nyuthre nia e pwe, ewacu ni Yesu kumae, Wada en e ng'a?

³⁰Yesu dwoko lembe kumae, Ng'atu acel uai Yerusalem uloro piny Yeriko; epodho i kind jukwo, m'uwodho bongu pare man gifode, e gicidho, giweke ceng'ni tho.

³¹Etimbre nia jalam acel ubeloro piny kud i yojuno: e kan enene, ekadhu ku ng'et yo kucel.

³²Jalawi bende kumeca, kan ewok kakeca, enene de, e ekadhu ku ng'et yo kucel.

³³Ento Jasamaria acel, i woth pare, ewok ka ma eni i ie: kan enene de, ngisi nege i kume,

³⁴ebino de i bang'e, ekonjo mo ku pigulok i wang' rem pare, etwio de; man ekethe wi kana pare gire, etere de i odwelo, man egwoke.

³⁵Urwone ewodho denarii ario, ernio ni won ot, ewacu kumae, Gwoke; piny peri m'uoii ma sagu, kan adwogo, abiculo wang'e iri.

³⁶I kind juadek maeni, iwacu nyo, makani m'unyuthre nia en e wadi ng'atu m'upodho i kind jukwo?

³⁷Ewacu ire kumae, Ng'atu ma kisa nege i kume. E Yesu wacu ire kumae, Cidhi, itim kumeno.

³⁸Nie ka gicidho i yo migi, emondo i pacu acel: e dhaku acel ma nyinge Marsa jole i ot pare.

³⁹Nyamin mire nyinge Mariamu, m'ubedo the tiend Rwoth man ewinjo lem pare.

⁴⁰Ento Marsa besendre ku giratima dupa; e ebino i bang'e, ewacu kumae, Rwoth, lembe pido ii ngo nia nyamira weka atim tic akenda? ka kumeno wac ire nia ekonya.

⁴¹Ento Rwoth udwoko lembe ewacu ire kumae, Marsa, Marsa, cwinyi pido edieng' de kum giki dupa:

⁴²ento can lembe acel nuti: kum Mariamu foyo maka pare ma ber, ma jubimayu woko kud i bang'e ngo.

Luka 11

¹Man etimbre, kan eberwo i kar acel, nia kan eweko, kind julubne acel uwacu ire kumae, Rwoth, ponjwa ku rwo, cil calu Yohana bende ponjo julubne.

²Man ewacu igi kumae, Ka wurwo, wuwac kumae, Wegwa, nyingi bed leng'. Ker peri bin. Yeny ma ii yeny, utimbre i ng'om, calu m'i polo.

³Mi iwa kwen m'uromwa ku ba rupiny.

⁴Wek iwa dubo mwa woko; kum wan giwa bende waweko lem mi jubanja mwa kubang'gi kubang'gi. Kud iterwa i abidhe. Ento larwa ni ng'atu ma rac.

⁵Man ewacu igi kumae, Ng'a m'i kindwu m'ubedo ku jarimbe, m'ebicidho i bang'e ku diwor ma ling', ebiwacu ire kumae, Jarimba, mi ira lungu kwen adek ni banja;

⁶kum jarimba m'uai i woth uwok i bang'a, man gin moko mbe kuda m'aketh i wang'e;

⁷e ebidwoko lembe kud i ot ebiwacu kumae, Kud icanda: kawono dhugola bedo acika, nyithindo para de nuti i bang'a wi kavuto; acopo ai nimio iri ngo?

⁸Awacu iwu kumae, Kadok aaia de ebai ngo ebimio ire de ngo kum en e jarimbe, ento kum ekwayu asu ebai ebimio ire calu ma cande ni i kume.

⁹Man awacu iwu kumae, Wukwai, e ebimire iwu; wuyeny, e wubinwang'u; wudwong', e ebiyabre iwu.

¹⁰Kum ku ba dhanu ceke m'ukwayu gigamu; man ng'atu m'uyeny enwang'u; ng'atu m'udwong'o de eyabre ire.

¹¹Kum makani m'i kindwu ma wego ma wode bikwaye ku lungu kwen, e ebimio ire kidi? kadi rec, kan ebimio ire thwoli?

¹²Kadi tek ebikwaye ku tong'gweno, ebimio ire ithi?

¹³Ka kumeno tek wun, ma wu rac, wung'eyo maram wumio ko giramia ma ber ni nyithindho mu, Wegwu ma ni i polo bimio Tipo Maleng' m'usagu ngo ni ju m'upenje?

¹⁴Ebewodho pajogi ma ajuba. Man etimbre, ka pajogi wok, ng'atu ma ajuba weco; man i udul dhanu wang' lii.

- 15**Ento kindgi moko wacu kumae, Ewodho pajogi woko ni kum Beelzebul ma jadit mi pajogi.
- 16**Jumange, gimulo ie giyenyo giranyutha m'uai i polo i bang'e.
- 17**Ento en, m'eng'eyo pidoic migi, ewacu igi kumae, Ku ba ker ceke m'upokre gire e eng'eny; man ot de m'upokre kum ot wadi podho.
- 18**Man tek Jok bende pokre i kume gire, ker pare bicungo nenedi? kum wuwacu nia awodho pajogi woko ni kum Beelzebul.
- 19**Tek awodho pajogi woko ni kum Beelzebul, wotwu ke wodhogi woko ni kum ng'a? ka kumeno gibibedo jupoklembe mu.
- 20**Ento tek awodho pajogi woko ni kum lwet Mungu, e ker pa Mungu lund ubino i wiwu.
- 21**Ka ng'atu ma tek ukendo jamtho pare kpo ukuro ot pare gire, jamni pare bedo museme:
- 22**ento tek ng'atu ma tek ma sage bino i bang'e, eloye de, emayu woko jamtho pare ceke m'egen, epoko ayeki pare de.
- 23**Ng'atu ma jabang'a ngo nwang'u en e jadhoga; man ng'atu ma wacoko wakude ngo nwang'u eketho.
- 24**Tipo m'ucido kan eai kud ii dhanu, ekadhu ku ka ma pi mbe i ie, ku yenyo yom, kan enwang'u ngo de, ewacu kumae, Abidok ba ot para m'aai i ie.
- 25**Kan ewok, enwang'u ot ubedo ayweya aruka de.
- 26**Elund eciho egamu tipo abiro mange ma dubo migi sagu pare; man gimondo gibedo keno: bedo pa ng'atu maeno macen doko rac ma sagu ma kwong'a.
- 27**Man etimbre, kan eyero lembe maeni, dhaku acel ma kind udul dhanu ting'o dwande, ewacu ire kumae, Mugisa ni ic m'unyoli, ku thuno m'idhodho bende.
- 28**Ento ewacu kumae, Ma sagu, mugisa ni ju m'uwinjo lem pa Mungu, m'uwore de.
- 29**Kinde ma udul dhanu gibecokri karacelo i bang'e, emaku wacu kumae, dhanum'utuk maeni en e dhanum'utuk ma rac: eyenyo giranyutha; man giranyutha moko mbe ma bimire ire ento giranyutha pa Yona.
- 30**Kum calu Yona doko giranyutha ni Junineve, e Wod dhanu bende bibedo kumeno ni dhanum'utuk maeni,
- 31**Ubimo ma dhaku ma yor ariwa bicungo i pokolembe ku dhanum'utuk maeni, man ebipoko lembe i wigi rac: kum eai tung' ng'om niwinjo rieke pa Suleman; man nen, ng'atu ma sagu Suleman ni keni.

- ³²Dhanu mi Nineve bicungo i pokolembe ku dhanum'utuk maeni, man gibipoko lembe i wigi rac: kum giloko cwinygi kum lembayera pa Yona; man nen, ng'atu ma sagu Yona ni keni.
- ³³Ng'atu moko mbe, ma kan ecwinyo thala, ekethe the ot, kadok the katoko, ento wi thethala, kara ju m'umondo ginen der.
- ³⁴Thala mi kumi en e weng'i: ka weng'i cungo acel, kumi dho bende pong' ku der; ento kan ebedo rac, kumi bende pong' ku mudho.
- ³⁵Ka kumeno nen tek der ma ni ii kud ubed ni mudho.
- ³⁶Ka kumeno tek kumi dho pong' ku der, ma ng'ete kucel col ungo, nwang'u ebibedo pong' ku der kwa, calu ka thala mio iri der ku rienyne ma ber.
- ³⁷Nie kan eyero, Jafarisayo penje nia gicam gikude: man emondo, ebedo dhu cam.
- ³⁸Man ka Jafarisayo neno maeni, ie wang' lii kum elar ecamu cemo ma fokejom ungo.
- ³⁹E Rwoth uwacu ire kumae, Nie wun wu Jufarisayo wulwoko kikombe kud atangla ku yo woko; ento kud i iwu wupong' ku kuvuga kud akece de.
- ⁴⁰Wu jukusegu, ng'atu m'utimo yo woko etimo yor i ie bende ngo?
- ⁴¹Ento wumi gin ma ni i iwu ni giramia; e ka gin ceke bibedo leng' iwu.
- ⁴²Ento can i wiwu, Jufarisayo! kum wumio apaje mir ukuju kud usiga man uboko ceke, e wuweko ng'olo lembe ma pwe ku mer pa Mungu: ento emaku wutim maeni, man kud wuwek timo wagi maeno.
- ⁴³Can i wiwu Jufarisayo! kum wumaru kom ma sagu ceke i kacokri, ku moth de i katali.
- ⁴⁴Can i wiwu! kum wubedo calu odliel ma nen ungo, ma ju m'ukadhu kud i wigi ging'eyo ngo.
- ⁴⁵Man ng'atu acel ma kind jueuthecik udwoko lembe ewacu ire kumae, Japonji, ku yero maeni ijuko wan bende.
- ⁴⁶Man ewacu kumae, Can i wiwu bende wu jueuthecik! kum wuketho ter ma yeyo tek wi dhanu, wun giwu de wumulo terne ku lwetwu acel de ngo.
- ⁴⁷Can i wiwu! kum wugomo odliel mi jubila, man wegwu negogi.
- ⁴⁸Kum kumeno wu jumulembe man wuyio tic pa kwaruwu: kum ginegogi, man wugomo odliel migi.
- ⁴⁹Ka kumeno bende rieko pa Mungu wacu kumae, Abiuro jubila ku jukwenda i bang'gi; gibinego kindgi moko gibinyayu ragedo i kumgi de;
- ⁵⁰kara jubin jupenj rimb jubila ceke, m'ugamu thwogre i thekri mi ng'om, ba dhanum'utuk maeni;

⁵¹ugambre kum rimb Habil cil ku rimb Zakaria, m'utho i kind pemblam ku hekalu: eyo, awacu iwu, jubipenjo ba dhanum'utuk maeni.

⁵²Can i wiwu jueuthecik! kum wukabu kifungula mi ng'eyong'ec: wun giwu wumondo ngo, man wucero ju m'ubemondo.

⁵³Kan eai ku keca, jugorcik ku Jufarisayo gimaku yenye ku rop apila, man gicung'e kara eyer pi gin dupa;

⁵⁴gilibe ko, kara gimak lem moko m'uai i dhoge.

Luka 12

¹I kinde maeca, kan udul dhanu rubanga dupa gicokri karacelo, ketho ginyondri, elar emaku wacu ni julubne kumae, Wukuru ni thobi rni Jufarisayo, ma en e ambili.

²Ento gin moko mbe ma umbre, ma ku binyuthre ngo; ma kandre de ma ku bing'eire ngo.

³Kum kumeno gin ma tek wuwacu i mudho ebiwinjre i der; gin ma wuyero ku the ith i kusika biyere wi udi.

⁴Man awacu iwu jurimba, Kud wulwor ju ma nego kum, ma yo ku ng'eye gin moko mbe ma gicopo timo.

⁵Ento apoyowu kum ng'atu ma wubilworo: Wulwor ng'atu, ma tego pare nuti yo ng'ei nek m'enego m'ebolo ko i gehena; eyo, awacu iwu, Wulwore.

⁶Juloko kira abic ku sente ario ngo? acel de mbe i kindgi m'urwinyo i wang' Mungu.

⁷Ento yukwiwu ceke kwandre. Kud wulwor: wu ber ma sagu kira dupa.

⁸Man awacu iwu kumae, Ku ba dhanu ceke ma bituca i wang' dhanu, Wod dhanu de bituce i wang' malaika pa Mungu:

⁹ento ng'atu ma bikwera i wang' dhanu jubikwere bende i wang' malaika pa Mungu.

¹⁰Man ku ba dhanu ma biyero lembe kum Wod dhanu, jubiweko lembene ire woko: ento ng'atu m'uyero lembacidi kum Tipo Maleng' ebiwekre woko ngo.

¹¹Ka gibiterowu de i wang' cokri, ku jubim, ku weg ng'ol de, cwinywu kud uringi maram wubiloko ko lembe, kadi ang'o ma wubiloko, kadi ang'o ma wubiyero:

¹²kum Tipo Maleng' bignonjowu i saa maeni nini ku gin ma maku wuyer.

¹³Ng'atu acel ma kind udul dhanu wacu ire kumae, Japonji, wac ni umira nia epok camupacu wakude.

¹⁴Ento ewacu ire kumae, Ng'atu e, ng'a m'uketha ni japoklembe kadi japokpiny i wiwu?

- ¹⁵Ewacu igi kumae, Wubed ku weng'wu, man wukuru giwu ni gin ceke mi kethocwiny hai kum piny: kum kwo pa dhanu mbe i gin m'esagre kudo.
- ¹⁶Man eyero lembabola igi, ewacu kumae, Podho pa jalonyo moko cego cam hai:
- ¹⁷man eporo lembe i ie gire, ewacu kumae, Abitimo ang'o, kum kamoko mbe ira m'aketh ie cam para?
- ¹⁸Ewacu kumae, Abitimo mae: Abimugo dero para, man abigoyo mange ma dit ma sagu; e abiketho cam para ceke ku piny para de keca.
- ¹⁹Abiwacu ni kwo para kumae, Kwo, ibedo ku piny dit m'akana mi rundi dupa; yom, cam, madhi, anyong'a negi de.
- ²⁰Ento Mungu wacu ire kumae, In i jakasegu, diwor maeni jubilwong'o kwoni i beng'i; man gin m'iyiko, bidong' ni ng'a?
- ²¹Kum ng'atu m'ukanu piny m'akana ire gire bedo kumeni, m'elony ungo de ku ba Mungu.
- ²²Ewacu ni julubne kumae, Ka kumeno awacu iwu kumae, Cwinywu kud uring pi kwo mu, pi gin ma wubicamu; kadi pi kumwu, pi gin ma wubikendo.
- ²³Kum kwo sagu cam, kum de sagu kendi.
- ²⁴Iwu pid pi ngoro nia gicoyo ngo, gikayu de ngo; ma odkancam migi ku dero de mbe; ento Mungu mio igi cam: piwu sagu pi winyo dit apila!
- ²⁵Ng'a m'i kindwu ma copo medo kadongone bot acel ni cwinye m'uringo?
- ²⁶Ka kumeno tek wucopo timo gin maeno ngo ma nyathigi, nedi cwinywu ringo kum gin mange?
- ²⁷Iwu pid pi thiuboko, maram gidongo ko: gimuli ku tic ungo, gicwio de ngo; ento awacu iwu kumae, Cil Suleman i dwong' pare ceke eronjre ngo calkud acel ma kind maeni.
- ²⁸Ento tek Mungu ronyo lum m'i thim kumeno, ma nuti tin, urwo de jubaye i mac; ebironyowu dit ma sagu ngo, E wun ma yioyic mu noki?
- ²⁹Man kud wuyeny gin ma wubicamu, ku gin ma wubimadhu, kadok pidoic mu de kud ubed jiji.
- ³⁰Kum gin maeni ceke thek m'i ng'om giyenyo: ento Wegwu ng'eyo nia can gin maeni ceke ni i kumwu.
- ³¹Ento wuyeny ker pa Mungu, e giki maeni bimedre iwu.
- ³²Kud wulwor, wun udul ma nyanok; kum enyayu mutoro i Wegwu nimio iwu ker.

- 33Wulok piny ma wubedo ko, man wumi giramia ni jucan; wukwoi gbethe ma biti ngo iwu giwu, piny m'akana ma thum ungo i polo, ka ma jakwo tundo ceng'ni i ie ngo, kadok ukoko de nyotho ngo i ie.
- 34Kum ka ma piny m'akana mu ni ie, adundewu bibedo keca bende.
- 35Dong' pierwu bed atwia, thala mu de bed m'eliel;
- 36wun giwu wubed calu dhanu m'ukio rwoth migi, kan ebiai i agba mir ambadha; kara, kan edwogo edwong'o de, giyab ire pio pio.
- 37Mugisa ni jumiru maeno, ma ka rwoth migi bino ebinwang'u gibekuro: andha awacu iwu, nia ebitwire gire, e ebiketho gibed piny dhu cemo, man ebibino ebitimo igi.
- 38Man tek ebino i kur mir arionde, man tek i mir adege de, enwang'ugi kumeno de, mugisa ni jumiru maeno.
- 39Ento wung'ei maeni, nia tek won ot ung'eyo saa ma jakwo bino i ie kuno di ekuro, man eweko ot pare ngo ya jutur.
- 40Wuyikru bende: kum i saa ma wuwacu nyo ngo e Wod dhanu bino.
- 41Petro wacu kumae, Rwoth, iyero lembabola maeni iwa, kadi ni dhanu ceke?
- 42Rwoth uwacu kumae, Ka kumeno ng'a ma jakurpiny mandha ma riek de, ma rwoth pare bikethe wi juode, nimio igi cemo maka migi ka nindone tundo?
- 43Mugisa ni jamiru maeno, ma ka rwoth pare bino ebinwang'u etimo kumeno.
- 44Andha awacu iwu, nia ebikethe wi gin ceke m'ebedo ko.
- 45Ento tek jamiru maeno biwacu i adundene kumae, Rwoth para galu ku bino pare; man ebimaku fodo jutic wadi ma co ku ma nyir de, man ecamu emadhu de, emer de ku kong'o;
- 46rwoth pa jamiru maeno bibino i ceng' m'ewacu nyo ebibino i ie ngo, i saa de m'eng'eyo ngo, man ebigoye ma tek, ebiketho maka pare karacelo ku mi jumandha ngo.
- 47Jamiru maeno, m'ung'eyo yeny ma ii rwoth pare yeny, eyikre de ngo, etimo de ngo calu yeny ma ii rwodhe yeny, jubigoye ku goc dupa;
- 48ento ng'atu m'ung'eyo ngo, man etimo gin m'uromo ku goc de, jubigoye ku goc ma nok. Man ng'atu ma tek jumio ire dupa, jubilwong'o dupa i bang'e: man ng'atu ma tek juketho gin ma dit i kore, e jubikwayu ma sagu i bang'e.
- 49Abino bolo mac wi ng'om; e ang'o m'ayenyo, tek edaru opo?
- 50Ento baputisi para nuti ma jubimio ira; man cwinya ng'abre dit ma foketimbre kakare ngo!

⁵¹Wuwacu nyo abino kelo kwiocwiny i ng'omi? Awacu iwu kumae, Ungo; ento ma sagu pokri:

⁵²kum ugambre kawono dhanu abic m'i ot acel bipokre, adek bijai ni ario, ario ke ni adek.

⁵³Gibipokri, wego kum wodo, wodo ke kum wego; mego ke ku nyare, nyaku ke ku min mire; wang'u ke ku ci wodo, ci wodo ke ku wang'u mire.

⁵⁴Ewacu ni udul dhanu bende kumae, Ka wuneno afuru jire yo reto, ndhu ndhu nica wuwacu kumae, Koth ubebino; e etimbre kumeno.

⁵⁵Man ka wuneno yamu m'uai yor ariwa bekoto, wuwacu kumae, Lietho ma kec bibino; e etimbre de.

⁵⁶Wu weg ambili, wung'eyo maram wung'io ko wang' ng'om ku polo; ento nedi wung'eyo ngo maram wung'i ko nindo maeni?

⁵⁷Nedi wun giwu wuluro gin m'ubedo pwe ngo?

⁵⁸Kum kinde m'ibecidho i wang' jabim wuku jadegini, wuyik lembe wukude mor mor ma fodi wuni i yo; emaru ywei ba japoklembe, japoklembe maru mii ni asikari, asikari de maru boli i odkol.

⁵⁹Awacu iri kumae, Ibiai kakeca ki ngo, ma fodi k'iculo wang' sente pet kubang'e ngo.

Luka 13

¹Nie i nindo maeni nini dhanu moko nuti m'uyero ire pi Jugalilaya, ma Pilato ribo rimbgi ku lam migi.

²Eloko lembe ewacu igi kumae, Wuwacu nyo Jugalilaya maeni gi judubo ma sagu Jugalilaya ceke? kum gisendri ku gin maeni?

³Awacu iwu kumae, Ungo: ento, tek wuloko cwinywu ngo, wun ceke wubirwinyo kumeno.

⁴Kadi juapar wi abora maeno, ma ot ma wiu m'i Siloam upodho i wigi, enegogi de, wuwacu nyo gi judubo ma sagu dhanu ceke m'ubedo i Yerusalemi?

⁵Awacu iwu kumae, Ungo: ento, tek wuloko cwinywu ngo, wun ceke wubirwinyo kumeno.

⁶Man eyero lembabola maeni kumae; Ng'atu moko bedo kud ulam m'epidho i podho pare mir ulok; e ebino yenyo nyinge i wie, enwang'u de ngo.

⁷Man ewacu ni jatipodho mir ulok kumae, Nen, rundi adek maeni abino yenyo nying ulam wi yend ulam maeni, e anwang'u ngo; ng'ole piny; ecamu ng'om mananu de nedi?

- ⁸Man eloko lembe ewacu ire kumae, Rwoth, weke kumeno rundi maeni bende, ma fodi abikofuro ng'om i there, abiketho weyo de:
- ⁹man tek ecego nyinge macen, ber; ento tek ecego ngo, ibing'ole piny.
- ¹⁰Nwang'u ebeponjo i kacokri acel i ceng' sabatu.
- ¹¹Nen, dhaku nuti m'ubedo ku tipo mi mulima rundi apar wi abora; edole ngur, ecopo twinjre malu ngo.
- ¹²E ka Yesu nene, e elwong'e, ewacu ire kumae, Dhaku, ibedo agonya ni mulima peri.
- ¹³Man eketho cinge i kume: e eni eni erieire atira, man eyungo Mungu.
- ¹⁴E jadit mi kacokri, ma lembe ton i ie kum Yesu keyo kum i ceng' sabatu, eloko lembe ewacu ni udul dhanu kumae, Ceng' abusiel nuti ma maku dhanu tim ie tic: ka kumeno wubin i maeno man jukei kumwu, i ceng' sabatu re ngo.
- ¹⁵Ento Rwoth uloko lembe ewacu ire kumae, Wu weg ambili, wun kubeng'wu kubeng'wu ng'atuman gonyo dhiang' pare kadi kana pare kud i dwol, epeye ba pi de ngo?
- ¹⁶Man emaku ngo nia dhaku mae, m'e nyar Ibrahim, ma Jok utwvie, rundi apar wi abora, ugonjre kud i twic maeni i ceng' sabatu?
- ¹⁷Kan eyero gin maeni, lewic umaku jupiem pare ceke: anyong'a nego udul dhanu ceke kum gin ceke mi dwong' m'utimbre ni kume.
- ¹⁸Ka kumeno ewacu kumae, Ker pa Mungu e calu ang'o? man abipore kud ang'o?
- ¹⁹E calu nying atingli, ma ng'atu moko gamu, ebolo i podho pare ma dhe; edongo de, man edoko ni yen; winyo m'i polo de gigonjo wi jange.
- ²⁰Ewacu kendo kumae, Abiporo ker pa Mungu kud ang'o?
- ²¹E calu thobi, ma dhaku gamu elutho i mogo asisa adek, maram thobi rome ko ceke.
- ²²Ecidho i yo pare cil i adhura ku pacu, ku ponjo, m'ewotho ko Yerusalem.
- ²³Ng'atu acel uwacu ire kumae, Rwoth, ju ma giboth gi noki? man ewacu ire kumae,
- ²⁴Ponj mondo ku dhugola ma diny: kum dupa, awacu iwu, biponjo mondo i ie, e gibicopo ngo,
- ²⁵ka won ot uai malu, eciko dhugola de, man wumaku cungo woko, wudwong'o dhugola de, wuwacu kumae, Rwoth, yab iwa; man ebidwoko lembe ebiwacu iwu kumae, Ang'eyowu ngo kadok ka ma wuai i ie de;
- ²⁶wubilund maku wacu kumae, Wacamu wamadhu i weng'i, iponjo de i gengi mwa;

²⁷e ebiwacu kumae, Awacu iwu, Ang'eyo ka ma wuai i ie ngo; wuai cen kud i vuta, wun ceke ma wu jutic mi camuco.

²⁸E ywak ku kayu lak bibedo nuti, ka wubineno Ibrahim, Isak, man Yakobo, ku jubila ceke, i ker pa Mungu, wun e ma jubayuwu woko.

²⁹Gibiai yo nyangu ku yo reto, man yor ariwa ma malu ku yor ariwa ma piny, e gibibedo piny i ker pa Mungu.

³⁰Man nen, moko m'udong' cen bitelo yo, moko de m'utelo yo bidong' cen.

³¹I saa maeno Jufarisayo moko bino, wacu ire kumae, Ai kakeni, ci kamange: kum Herode yenyo enegi.

³²Man ewacu igi kumae, Ci yer ni kaki maeno, Nen, awodho pajogi man akeyo kum tin kud urwo, i ceng' mir adegde de adoko ndhu cu.

³³Ento akoacidh be i yo para tin kud urwo ku nyiceng'maca: kum ecopre ngo nia jabila rwiny woko kud i Yerusalem.

³⁴E Yerusalem, Yerusalem, m'unego jubila pa Mungu, man m'ucanyu ju ma juoro i bang'e ku kidi! ayenyo wang' udul acok nyithindho peri karacelo, cil calu min gweno coko nyithindhe the bombe, ere wuyenyo ngo!

³⁵Nen, ot peri dong' iri ni uvuru: man awacu iwu kumae, Wubinena ngo, cil ma wubiwacu kumae, Mugisa ni ng'atu m'ubino ku nying Rwoth.

Luka 14

¹Man etimbre, kan emondo i ot pa ng'atu acel ma kind jubim mi Jufarisayo i ceng' sabatu nicamu kwen, nia gibekenge.

²Man nen, ng'atu moko nuti i wang'e ma won tho mir ayidha mi pwe.

³E Yesu loko lembe ewacu ni jueuthecik ku Jufarisayo, ewacu kumae, Cik uyio jukei kum i ceng' sabatu, kadi ngo?

⁴Ento giling'. Man egame, ekeyo kume, eweko ecidho.

⁵E ewacu igi kumae, Ng'a m'i kindwu ma ka dhiang' pare kadi kana podho i vur, ma k'ewodhe ngo ndhu ndhu nica i ceng' sabatu?

⁶E gicopo loko lembe ngo kum gin maeni.

⁷Man eyero lembabola ni ju ma julwong'ogi kan eneno maram gifoyo ko kom m'usagu wagi; ewacu igi kumae,

⁸Ka ng'atu moko lwong'i ni cemo mir ambadha, kud ijany wi kom ma sagu wagi; poinyo elwong'o ng'atu moko ma dwong' ma segi,

⁹e ng'atu m'ulwong'i ku ng'atuno de bibino biwacu iri kumae, Yikri ni ng'atuni; e kan ibimaku dok i ka ma nweng' ku lewic.

- ¹⁰Ento ka julwong'i, koicibed ka ma nweng'; kara ka ng'atu m'ulwong'i bino, ewac iri kumae, Jarimo, cidh i ka ma krr: kan ibibedo ku yung i wang' dhanu ceke ma wubedo kugi dhu cam.
- ¹¹Kum ku ba dhanu nzu m'utingre gire jubijwige: man ng'atu m'ujwige gire jubiyunge.
- ¹²Man ewacu ni ng'atu m'ulwong'e de kumae, Kan itimo cam mi dieceng' kadi mir uthieno, kud ilwong' jurimbi, kadi utumeru, kadi wat peri, kadi judhugola peri ma julonyo; gin bende gimaru lwong'i ka wang' maeni, e wang'e bicule iri.
- ¹³Ento kan itimo agba, lwong' jucan, ku weg abala mi bot, ku weg abala mi tielo ku ju ma abinga:
- ¹⁴e mugisa bikwenyi: kum gin moko mbe kugi ma gicul kawang'e: kum ebicule iri i cer mi weg bedopwe.
- ¹⁵Ka ng'atu acel m'i kind ju m'ubedo dhu cam karacelo kude winjo gin maeno, ewacu ire kumae, Mugisa ni ng'atu ma bicamu kwen i ker pa Mungu.
- ¹⁶Ento ewacu ire kumae, Ng'atu moko timo cemo ma dit mir uthieno; man elwong'o dhanu dupa:
- ¹⁷i kinde mi cemo mir uthieno eoro jamiru pare niwacu ni ju ma julwong'ogi kumae, Wubin; kum gin ceke bedo ayika kawono.
- ¹⁸Kagi ceke ku pidoic acel gimaku yenyo lembe m'ugony lembe m'i wigi. Ma kwong'ane wacu ire kumae, Ang'iewo podho, akocinene be; akweii gony lembe m'i wia.
- ¹⁹Mange wacu kumae, Ang'iewo koni dhiang' ma ku mberembere abic, man acimulogi; akweii gony lembe m'i wia.
- ²⁰Ng'atu mange wacu kumae, Agamu dhaku, ka kumeno acopo bino ngo.
- ²¹Jamiru bino, eyero gin maeni ni rwoth pare. E ng'ecwiny ulund umaku won ot, man ewacu ni jamiru pare kumae, Ci pio i gengi kud i yo ma i adhura de, ikel i ie kakeni jucan, ku weg abala mi bot, ku ju ma abinga, man weg abala mi tielo.
- ²²Jamiru wacu kumae, Rwoth, gin m'ing'olo timbre, kabedo re dong'.
- ²³Rwoth uwacu ni jamiru kumae, Ci woko i gengi ku dhugang' de, man idhulgi gibin gimondi, kara ot para pong'.
- ²⁴Kum awacu iri, nia jumaco maeno ma julwong'o moko mbe ma bibilo cemo para mir uthieno.
- ²⁵Nie udul dhanu dupa gicidho gikugi; man elokre, ewacu igi kumae,
- ²⁶Tek ng'atu moko bino i bang'a, ma k'edagu won mire ngo, ku min mire, ku cege, ku nyithindhe, ku utumin, ku nyimin de, eyo, ku kwo pare bende, ecopo bedo jalubna ngo.

²⁷Ng'atu ma tek kuyeyo yen m'athara pare ngo, elubo ko ng'eya, ecopo bedo jalubna ngo.

²⁸Kum ng'a m'i kindwu, m'uyenyo egom ot ma wiu, ma k'elar ebed piny ungo ekwan wel piny, tek ebedo ku m'ecopo dare ko?

²⁹Marmoko, kan edaru ketho kathere, man ecopo dare ngo, dhanu ceke m'uneno gimaku caye,

³⁰giwacu kumae, Ng'atuni maku gomo, man daru loye.

³¹Kadi ubimo ma kani, ma kan ecirombo kud ubimo wagi i lwiny, ma k'ebilar bedo piny ungo epor lembe tek ebicopo ku dhanu rubanga apar nirombo ku ng'atu m'ubino i bang'e ku dhanu rubanga pier ario?

³²Kadi tek ecopo ngo, e eoro kwenda ka fodi wadi ni bor, man epenjo lembe mi kwiocwiny.

³³Ka kumeno ng'atu ma tek ni i kindwu m'ukuno gin ceke m'ebedo ko ngo, ecopo bedo jalubna ngo.

³⁴Ka kumeno kadu bedo mit: ento tek kadu midone rwinyo, jubidwoko midone kud ang'o?

³⁵Eromo ngo ni ng'om kadi ni kaweyo de: jubaye woko. Ng'atu m'ubedo ku ithe m'ewinjo ko, wek ewinji.

Luka 15

¹Nie weg ajok ceke ku judubo bende gibecoro ceng'ni i bang'e kara giwinje.

²Man Jufarisayo ku jugorcik ging'ur, giwacu kumae, Ng'atuni jolo judubo, ecamu kugi de.

³Man eyero igi lembabola mae, ewacu kumae,

⁴Ng'a ma ni i kindwu ma won rombe dak, ma kan acel m'i kindgi rwinyo ire, eweko pier abung'wen wi abung'wen ungo i yamba, eciho de eyenyo maeni m'urwinyo ngo, maram enwang'e ko?

⁵Man kan enwang'e, e ekethe wi goke, k'anyong'a.

⁶Kan etundo i ot pare, elwong'o jurimbe ku judhugola pare karacelo, ewacu igi kumae, Anyong'a negwu wakudu, kum anwang'u rombo para m'urwinyo.

⁷Awacu iwu, nia anyong'a bibedo nuti kumeno i polo kum jadubo acel m'uloko cwinye, ma sagu mi dhanu ma pwe pier abung'wen wi abung'wen, ma can loko cwiny umbe kugi.

⁸Kadi dhaku makani ma won sente apar, tek ng'ete acel urwinyo ire, ecwinyo thala ngo, eyweyo ot de, eyenyo mor mor ungo maram enwang'e ko?

- ⁹E kan enwang'e, elwong'o jurimbe ku judhugola pare karacelo, ewacu kumae, Anyong'a negwu wakudu, kum anwang'u ng'et sente m'urwinyo ira.
- ¹⁰Cil kumeno, awacu iwu, Anyong'a nuti i wang' malaika pa Mungu kum jadubo acel m'uloko cwinye.
- ¹¹Man ewacu kumae, Ng'atu moko bedo ku wote ario:
- ¹²wode ma nok uwacu ni won kumae, Vwa, mi ira ng'et jupiny peri maka para. Man epoko igi piny pare.
- ¹³Yo ng'ei ceng' ma nyanok, wode ma nok ucoko piny pare ceke karacelo etugo woth ecidho i ng'om ma bor; man edhenyo piny pare ku bedo mir awagu.
- ¹⁴E kan elalu ceke, ndru ma dit upodho i ng'om maeno; man emaku bedo ku can piny.
- ¹⁵E ecidho eribre gire ba ng'atu acel ma kind dhanu m'i ng'ombuno; man eore i podho pare emi cam ni kul.
- ¹⁶Man eyenyo eyeng' ku cung' cam ma kul ucamu: e ng'atu moko mbe m'umio ire.
- ¹⁷Ento kan enwang'u rieke gire ewacu kumae, Jutic pa vwa mi sukulia adi m'ubedo ku kwen ma romogi donge dong' de, ka an atho keni ku kec!
- ¹⁸Abiai abicidho ba vwa, abiwacu ire kumae, Vwa, adubo ni polo man i weng'i de;
- ¹⁹aromo ngo kendo nia julwong'a wodi; keth abed calu jatic peri acel mi sukulia.
- ²⁰E eai, ebino de ba won. Ento ka fodi eni bor, won unene, ngisi nege de, man eringo, egwaku ng'ute, ecwio limbe de.
- ²¹Wode wacu ire kumae, Vwa, adubo ni polo, kud i weng'i de: aromo ngo kendo ya julwong'a wodi.
- ²²Ento won uwacu ni jumiru pare kumae, Wuwodh kendi ma sagu wagi pio, wurony i kume; wuroi lagith de i lwete, ku wara de i tiende:
- ²³man wukel nyathi dhiang' m'ucwe, wuthume, man wek wacam, watim anyong'a de:
- ²⁴kum woda maeni ma nwang'u utho, ebedo kwo kendo; erwinyo, man enwangre. E gimaku bedo kud anyong'a.
- ²⁵Nwang'u wode ma jadic ni i thim: e kan ebino edhingo ot de, ewinjo bang' adungu ku miel de.
- ²⁶E elwong'o ng'atu acel i bang'e ma kind jutic, man epenjo nia kuno nyo gin maeni ang'o.
- ²⁷Ewacu ire kumae, Umeru dwogo en; e wuru thumo nyathi dhiang' m'ucwe, kum ejole museme bo de.

- ²⁸Ento ng'ecwiny umake, man eyio ngo emondi: e won uwok woko, man ecuke.
- ²⁹Ento eloko lembe ewacu ni won kumae, Nen, rundi maeni dupa atimo iri, man akadhu ku wi lembang'ola peri ki ngo; ento fodi imio ira nyathi diel de ngo, kara atim anyong'a ku jurimba:
- ³⁰ento ka wodi maeni dwogo, m'ecamu piny m'itungri kudo ku weg tarwang' ithumo ire nyathi dhiang' m'ucwe.
- ³¹E ewacu ire kumae, Woda, ibedo i bang'a asu, gin ceke ma para en e peri.
- ³²Ento emaku jutim anyong'a jubed ku mutoro de: kum nwang'u umeru maeni tho, man ebedo kwo kendo; erwinyo, man enwangre.

Luka 16

- ¹Man ewacu ni julubne bende kumae, Jalonyo moko nuti m'ubedo ku jakurpiny; judoto ng'atuno i bang'e nia edhenyo piny pare.
- ²Man elwong'e, ewacu ire kumae, Lem mae m'awinjo piri e ang'o? wodh wel mi kuropiny peri; kum icopo bedo jakurpiny kendo ngo.
- ³Jakurpiny uwacu i ie gire kumae, Abitimo ang'o, kum rwoth para kabu tic mi kuropiny i bang'a? Tekra mbe mi furofur; lewic de nega kum kwayu piny.
- ⁴Ang'eyo gin m'abitimo, nia, ka jukaba woko kud i tic mi kuropiny, gibin gijola i udigi.
- ⁵E kan elwong'o jubanja pa rwodhe kubang'gi nzu i bang'e, ewacu ni ma kwong'ane kumae, Banja peri adi m'igamu ba rwoth para?
- ⁶Ewacu kumae, Mo mukero dak. Man ewacu ire kumae, Gam waraga peri, ibed piny pio igor pier abic.
- ⁷Elund ewacu ba ng'atu mange kumae, Tn ke banja peri adi? Ewacu kumae, Nganu mukero dak acel. Ewacu ire kumae, Gam waraga peri, igor pier abora.
- ⁸Rwoth pare foyo jakurpiny m'ugondre kum etimo ku riek: kum wot mi ng'om maeni i kind dhanum'utuk migi gi riek ma sagu wot mi der.
- ⁹Man awacu iwu kumae, Wumak jurimo iwu giwu ku piny mi gondri; kara, kan ebithum, gibijolowu i hema ma nja.
- ¹⁰Ng'atu ma en e mandha i gin ma nyathigi en e mandha bende i gin ma dit: man ng'atu m'ugondre i gin ma nyathigi egondre bende i gin ma dit.
- ¹¹Ka kumeno tek wubedo mandha ngo i piny mi gondri ng'a ma bimio iwu piny mandha ni sumba?
- ¹²Tek wubedo mandha ngo i maeno ma pa ng'atu mange, ng'a ma bimio iwu ma mu ma dhe?

- ¹³Jatic umbe ma copo timo ni judongo ario: kum kadi ebidagu acel, ebimaru mucelo; kadi ebimoko bang' acel, man ebicayu mucelo. Wucopo timo ni Mungu ku lonyo de ngo.
- ¹⁴E Jufarisayo, ma jumar sente, giwinjo gin maeni ceke; e gicaye.
- ¹⁵Ewacu igi kumae, Wun wu ju ma wugonyo lembe m'i wiwu giwu i wang' dhanu; ento Mungu ng'eyo adundewu: kum gin m'utingre ku ba dhanu en e gin mir adegi kud i wang' Mungu.
- ¹⁶Cik ku jubila ginuti cil kum Yohana: ugambre i nindo maeca lembanyong'a ma juboth ko mi ker pa Mungu juyero, man ku ba dhanu nzu gimondo i ie ku kero.
- ¹⁷Ento kadhu woko mi polo ku ng'om e yot, ma sagu podho mi ng'et nyiguta acel mi cik.
- ¹⁸Ku ba dhanu ndri ma tek uweko cege, man egamu mange, nwang'u egiero gier: ng'atu m'ugamu ng'atu ma cware weke nwang'u egiero gier.
- ¹⁹Nwang'u jalonyo moko nuti, m'uronjre kud uluga ku bongu ma nwang' ma ber, man ecamu cemo ma mit ceng' ceke:
- ²⁰e jakwaipiny moko ma nyinge Lazaro nuti ma juketho dhugang' pare, ma rem uromo kume ceke,
- ²¹m'eyenyo eyeng' ku ng'ili cam m'uoii ku dhu mesa pa jalonyo; eyo, cil gwogi gibino ginang'u wang' rem pare.
- ²²Man etimbre, nia jakwaipiny utho, malaika de giyeye gitere kor Ibrahim: jalonyo bende tho, e juyike.
- ²³Man eng'ayu wang'e malu kud i Hadeya, ma eni i ndiba, e eneno Ibrahim ku bor, man Lazaro de ni kore.
- ²⁴E ekok ewacu kumae, Vwa Ibrahim, bed ku kisa i kuma, man ior Lazaro, kara eroi wi lwete i pi, ekwi ko leba; kum abedo i ndiba i lebmac maeni.
- ²⁵Ento Ibrahim wacu kumae, Woda, poi nia i rundi m'ibedo ie kwo inwang'u gin peri ma ber, Lazaro de kumeno enwang'u gin ma rac: ento kawono ejukre keni, in ke ini i ndiba.
- ²⁶M'umedo maeni ceke, i kindwa wakudu longro ma dit nuti, kara ju m'uyenyo giai kakeni gikadh i beng'i ku gicopi, kara jumoko ma kuno de kadhu i bang'wa kud ucopre igi.
- ²⁷Man ewacu kumae, Ka kumeno akweii, vwa, iore i ot pa vwa;
- ²⁸kum abedo ku utumira abic; kara eyer igi, kara gin bende ku gibin i ka ndiba maeni.
- ²⁹Ento Ibrahim wacu kumae, Gibedo ku Musa ku jubila de, wek giwinjgi.

³⁰Man ewacu kumae, Ungo, vwa Ibrahim: ento tek ng'atu acel ucidho i bang'gi m'uai i kind ju m'utho, e gibiloko cwinygi.

³¹E ewacu ire kumae, Tek giwinjo Musa ku jubila de ngo, gibicukri ngo, kadok ng'atu moko ai ku kind ju m'utho.

Luka 17

¹Man ewacu ni julubne kumae, Gin ma ketho dhanu kier bikowok be: ento can wi ng'atu, m'ebiwok ni kume!

²E ber ire ma tek jung'abu pom i ng'ute, jubaye ko i nam, sagu ma tek eketho kind nyithindho ma thindho maeni ukier.

³Wukuru giwu: tek umeru dubo, juke; man tek eloko cwinye, wek lembene woko ire.

⁴Man tek edubo iri wang' abiro i ceng' acel, elokre kendo i beng'i wang' abiro, ewacu kumae, Aloko cwinya; wek lembene ire.

⁵E jukwenda wacu ni Rwoth kumae, Med yioyic mwa.

⁶E Rwoth uwacu kumae, Tek wubedo ku yioyic ma ro ku nying atingli, nwang'u wuwacu ni ulemo mae kumae, Fudhri woko, man icidh ipidhri i nam; kuno di eworowu.

⁷Ento ng'a ma ni i kindwu, m'ubedo ku jamiru ma furo fur kadi m'ekwayu rombe, ma biwacu ire, kan eai i thim kumae, Bin pio ibed dhu cam;

⁸ma sagu ebiwacu ire kumae ngo, Yik cam m'abicamu, man itwiri giri, itim ira, cil m'acamu amadhu de: e macen ibicamu ibimadhu de?

⁹Emio foyofoc ni jatic kum etimo gin ma jung'olo ire?

¹⁰E wun bende kumeno, ka wubidaru timo gin ceke ma jung'olo iwu, wuwac kumae, Wa jumiru ma kulokawa mbe; watimo gin ma maku watim.

¹¹Man etimbre, ka gini i yo ma gibecidho ko Yerusalem, nia ebekadhu ku kind Samaria ku Galilaya.

¹²E kan emondo i pacu acel, erombo ku weg joi apar, m'ucungo bor cen:

¹³e giting'o dwandgi malu, giwacu kumae, Yesu, Japonji; bed ku kisa i kumwa.

¹⁴E kan enenogi, ewacu igi kumae, Wucinyuthiu ni julam. E etimbre, ka gicidho, kumgi doko leng'.

¹⁵E ng'atu acel m'i kindgi, kan eneno nia kume kei, edok ku paku Mungu ku dwande ma tek;

¹⁶epodho ariebe wang'e the tiende, ku mio ire foc: man e Jasamaria.

- 17**E Yesu loko lembe ewacu kumae, Juapar kumgi doko leng' ungo? ento juabung'wen gini kani?
- 18**Ng'atu moko mbe ma junwang'u udwogo nimio yung ni Mungu, ndhu jakamange maeni?
- 19**Egam ewacu ire kumae, Ai malu icidhi: yioyic peri e m'ubodhi.
- 20**Ka Jufarisayo gipenje, nia ker pa Mungu bino awene, eloko lembe igi ewacu kumae, Ker pa Mungu bino ndem ndem ungo:
- 21**kadok awaca de gibiwacu ngo kumae, Nen, keni! kadi, Kaca! kum nen, ker pa Mungu ni i iwu.
- 22**Ewacu ni julubne kumae, Ceng' bibino, ka wubiyenyo wunen kind ceng' acel pa Wod dhanu, ere wubinene ngo.
- 23**Gin de gibiwacu iwu kumae, Nen, kaca! Nen, keni! kud wuci kamoko, kadi kud wulub ng'eigi:
- 24**kum calu lukoth, kan emil yo the polo kurucel, eriedo de yo the polo ma kurucel; e Wod dhanu de bibedo kumeno i ceng' pare.
- 25**Ento elar ekoesendre be ku gin dupa man dhanum'utuk maeni de ukwere.
- 26**Calu etimbre i rundi pa Noa, e ebibedo kumeno de i ceng' pa Wod dhanu.
- 27**Gicamu, gimadhu, gigambri, giwodho mi nyom, cil i ceng' ma Noa mondo ie i avur, e pi ma dit ucore, man enyothogi ceke.
- 28**Ebedo kumeno cil calu etimbre i ceng' pa Lot; gicamu, gimadhu, ging'iewo, giloko, gipidho, gigomo:
- 29**ento i ceng' ma Lot uai i ie ku i Sodom, mac ku muganga ai i polo ucwi, unyothogi ceke:
- 30**ebibedo kumeno i ceng' ma Wod dhanu nyuthre i ie.
- 31**I ceng' maeno, ng'atu m'ubedo wi ot, jamni pare ke ni i ot, kud elor piny nilabugi woko: ng'atu ma ni i thim de kumeno kud edok cen.
- 32**Wupoi kum ci Lot.
- 33**Ng'atu ma tek biyenyo egwok kwo pare ebirwinye: ento ng'atu ma tek birwinyo kwo pare ebigwoke.
- 34**Awacu iwu kumae, I diewor maeno jumaco ario bibedo wi kavuto acel; jubigamu acel, wadi ke jubiweko.
- 35**Mon ario birego karacelo; jubigamu acel wadi ke jubiweko.
- 36**Co ario bibedo i thim; acel bikabre, man wadi bidong'.

³⁷Gidwoko lembe giwacu ire kumae, Kakani, Rwoth? Man ewacu igi kumae, Ka ma kum ni i ie, acuth bicokri ie karacelo.

Luka 18

¹Man eyero lembabola igi nia dong' girwo thiri thiri, cwinygi kud uai;

²ewacu kumae, Japoklembe nuti i adhura, ma lworu Mungu ngo, eparu pi dhanu de ngo:

³man dhaku ma cware tho nuti i adhura maeno; ebino i bang'e de wang' udul, ewacu kumae, Cul wang' lembe para kum jadegina.

⁴E eyio ngo nindo moko: ento macen ewacu i ie gire kumae, Kadok alworu Mungu ngo, kadi aparu pi dhanu de ngo;

⁵ento kum dhaku maeni besenda, abiculo wang' lembe pare, kara kud eola ku bino pare ma thiri thiri.

⁶Man Rwoth uwacu kumae, Wuwinj lembe ma japoklembe m'ugondre yero.

⁷E Mungu biculo wang' lembe mi ju m'egoyo wigi ngo m'uywak i bang'e dieceng' ku diewor, ento fodi etwio cwinye i kumgi?

⁸Awacu iwu, nia ebiculo wang' lembe migi pio. Karacelo ku maeni, ka Wod dhanu bino, ebinwang'u yiyoic i ng'omi?

⁹Man eyero lembabola maeni ni ju m'ugendri gigi nia gi pwe, man gicayu jumange ceke:

¹⁰ewacu kumae, Juario idho malu i hekalu nirwo; ng'atu acel en e Jafarisayo, jalwadi ke won ajok.

¹¹Jafarisayo cungo man erwo kumeno i ie gire, Mungu, afoii, kum a calu dhanu mange ngo, ma weg kuvuga, weg gondri, ma weg gier, kadi calu won ajok maeni de ngo.

¹²Aweko cam wang' ario i yenga acel, amio apaje mi gin ceke m'anwang'u.

¹³Ento won ajok, ucungo bor cen, eyio ting'o wang'e malu i polo de ngo, endre edhongo kore, ewacu kumae, Mungu, dong' kisa negi i kuma an a jadubo.

¹⁴Awacu iwu kumae, Ng'atu maeni loro piny i ot pare ma lembe m'i wie gonjre ma sagu pa jalwadi: kum ku ba dhanu ceke m'uyungre gire jubijwige; ento ng'atu m'ujwige gire jubiyunge.

¹⁵Man gikelo mukere migi i bang'e bende, kara emul kumgi: ento ka julubne gineno, gijukogi.

¹⁶Ento Yesu lwong'ogi i bang'e, ewacu kumae, Wuyi nyithindho ma thindho gibin i bang'a, kud wukwergi: kum ker pa Mungu en e mi wagi joni.

- ¹⁷Andha awacu iwu kumae, Ng'atu ma tek bijolo ker pa Mungu calu nyathin ma nok ungo, ebimondo i ie ki ngo.
- ¹⁸Jabim acel upenje, ewacu kumae, Japonji ma ber, abitimo ang'o kara acam pacu mi kwo ma rondo ku rondo?
- ¹⁹E Yesu wacu ire kumae, Nedi ilwong'a ya a beri? ng'atu moko mbe ma ber, ndhu acel kende, en e Mungu.
- ²⁰Ing'eyo lembang'ola, Kud igier gier, Kud ineg nek, Kud ikwal kwo, Kud ibed jamulembe mi ndra, Yung wuru ku meru.
- ²¹Ewacu kumae, Gin maeni ceke aworo ugambre m'a nyathin.
- ²²E ka Yesu winjo maeni, ewacu ire kumae, Lembe acel nuti m'irem i ie: lok gin ceke m'ibedo ko, pok ni jucan, e ibibedo ku piny m'akana i polo: man ibin, ilub ng'eya.
- ²³Ento kan ewinjo lem maeni, can umake dit; kum elony dit.
- ²⁴Ka Yesu nene ewacu kumae, Mondo i ker pa Mungu tek apila ni julonyo!
- ²⁵Kum mondo ku wang' sindani e yot ni ngamia, ma sagu mondo i ker pa Mungu ni julonyo.
- ²⁶Ju m'uwinjo maeni giwacu kumae, Ka kumeno ng'a ma copo bothi?
- ²⁷Ento ewacu kumae, Gin ma copre ngo ni dhanu copre ni Mungu.
- ²⁸E Petro wacu kumae, Nen, waweko piny mwa ceke, walubo ng'ei.
- ²⁹Man ewacu igi kumae, Andha awacu iwu, Ng'atu moko mbe m'uweko ot, kadi dhaku, kadi umego, kadi junyodo, kadi nyithindho, pi ker pa Mungu,
- ³⁰m'ekebinwang'u wang'e bang' dupa ngo i nindo maeni, man i ng'om m'ubino kwo ma rondo ku rondo.
- ³¹Man egamu juapar wi ario i bang'e, ewacu igi kumae, Nen, wabeidho malu Yerusalem, man gin ceke m'ugore ni kum jubila bitimbre kakare kum Wod dhanu.
- ³²Kum jubicibe ni Thekdhanumange, e jubing'ale, man jubiyenye ku rop, jubing'ulo lau de i kume:
- ³³e jubifode man jubinege: man i ceng' mir adege ebicer kendo.
- ³⁴Man ging'eyo gin maeni ngo; thelembe maeni de mungre igi, man ging'eyo ngo thelembe ma juyero.
- ³⁵Man etimbre, kan edhingo Yeriko, nwang'u ng'atu acel ma abinga bedo dhu yo ebekwayu piny:
- ³⁶e kan ewinjo udul dhanu bekadhu, epenjo nia mae ang'o.

- ³⁷Man giwacu ire, nia Yesu ma Nazareti bekadhu en.
- ³⁸Man ekok, ewacu kumae, Yesu, i wod Daudi, bed ku kisa i kuma.
- ³⁹E ju m'utelo yo gijuke, nia ebed ling': ento ekok ma sagu dit kumae, I wod Daudi, bed ku kisa i kuma.
- ⁴⁰E Yesu cungo, man eng'olo ya jukele i bang'e: e kan ewok ceng'ni, epenje kumae,
- ⁴¹Iyenyoy atim ang'o iri? Ewacu kumae, Rwoth, kara nenopiny unendre ira.
- ⁴²E Yesu wacu ire kumae, Nenopiny udwog i beng'i: yioyic peri e m'ubodhi.
- ⁴³E eni eni emaku neno piny, elubo ng'eye de, ku yungo Mungu: man dhanu ceke, ka gineno maeni, gimio pak ni Mungu.

Luka 19

- ¹Man emondo i Yeriko ebekadhu akadha.
- ²Man nen, ng'atu ma nyinge Zakayo nuti; en e jadt mi weg ajok, elony de.
- ³Man eyenyoy enen Yesu ya en e ng'a; ento ecopo ngo ni njuru dhanu, kum etwil.
- ⁴Man etelo yo ku ng'wec, eidho malu wi ulemo kara enene: kum ebikadhu i yo maeno.
- ⁵Ka Yesu wok kakeca, eng'ayu wang'e malu, man ewacu ire kumae, Zakayo, lor piny pio; kum tinuni akobedo i ot peri be.
- ⁶Man etimo pio, eloro piny, ejole de ku mutoro.
- ⁷Ka gineno maeni, kagi ceke ging'ur, giwacu kumae, Emondo nibedo ku ng'atu ma jadubo.
- ⁸Zakayo cungo, man ewacu ni Rwoth kumae, Nen, Rwoth, ng'et piny para kucel amio ni jucan; man tek avugo ng'atu moko ku riu, adwoko wang'e wang' ang'wen.
- ⁹E Yesu wacu ire kumae, Tinuni both ubino ba ot maeni, kum en bende en e wod Ibrahim.
- ¹⁰Kum Wod dhanu bino niyenyoy nilaru de ju m'urwinyoy.
- ¹¹E ka giwinjyo gin maeni, emedo eyero de ku lembabola, kum eni ceng'ni Yerusalem, man kum giwacu nyoy nia ker pa Mungu binyuthre pio.
- ¹²Ka kumeno ewacu kumae, Jadt acel ucidho i ng'om ma bor, nigamu ker ire gire, kan edwogyoy.
- ¹³E elwong'o jumiru pare apar, emio igi nyol mola apar, man ewacu igi kumae, Wulok maeni cil m'abino.

- 14Ento dhanu pare gidage, gioro kwenda i toke, m'uwacu kumae, Wayenyo ngo nia ng'atu maeni bim wiwa.
- 15Man etimbre, kan edwogo kendo, ma nwang'u emaku ker, nia eng'olo ya julwong' jumiru maeni i bang'e, m'emio igi sente, kara eng'ei piny ma giloko.
- 16Ma kwong'ane bino i bang'e, ewacu kumae, Rwoth, nyol mola peri tundo nyol mola apar mange.
- 17Man ewacu ire kumae, Itimo dre, in i jamiru ma ber: kum junwang'u ibedo mandha i lem ma nyathigi, ibed ku ng'ol wi adhura apar.
- 18E mir arionde bino, ewacu kumae, nyol mola peri, Rwoth, utundo nyol mola abic mange.
- 19Ewacu ire bende kumae, In bende ibed wi adhura abic.
- 20E mange bino, ewacu kumae, Rwoth, nen, nyol mola peri eni, m'akanu aboyo ku kitambala:
- 21kum alwori, kum in i ng'atu ma tek: iting'o gin m'iketho piny in ungo, ikayu de gin m'icoyo in ungo.
- 22Ewacu ire kumae, Abipoko lembe peri ku lembe m'uai i dhogi, in i jamiru ma rac. Ing'eyo nia an a dhanu ma tek, m'ating'o gin m'aketho piny an ungo, akayu de gin m'acoyo an ungo;
- 23ka kumeno itero sente para i kakanpiny ungo nedi, man i bino para alwong'e ku kulokane de?
- 24E ewacu ni ju m'ucungo ceng'ni kumae, Wugam nyol mola woko kud i bang'e, wumi ni won nyol mola apar.
- 25Giwacu ire kumae, Rwoth, ebedo ku nyol mola apar.
- 26Awacu iwu kumae, nia ku ba dhanu ceke m'ubedo ko jubimio ire; ento ng'atu m'ubedo ko ngo re, e ma jubimaye cil ku gin m'ebedo ko.
- 27Ento jukwoja eni, ma giyio ngo nia abim wigi, wukelgi keni, wuneggi de i wang'a.
- 28E kan edaru yero kumeni, etelo yo, m'eidho ko mahi Yerusalem.
- 29Man etimbre, kan edhingo ceng'ni Bethfage ku Bethania, ba got ma julwong'o Zeituni, eoro julubne ario,
- 30ewacu kumae, Wucidh, i yo mu i pacu ma yor i weng'wu; ka wumondo i ie wubinwang'u nyathi kana m'ubedo ang'aba, ma fodi ng'atu moko mbe m'ubedo i wie: wugonye, wukele.
- 31Man tek ng'atu moko penjowu kumae, Wugonye nedi? wuwac kumae, Cande ni kum Rwoth.

- ³²E ju ma juorogi gicidho, man ginwang'u lembe bedo calu eyero igi.
- ³³E ka gibegonyo nyathi kana, wegi wacu igi kumae, Wugonyo nyathi kana nedi?
- ³⁴Giwacu kumae, Cande ni i kum Rwoth.
- ³⁵Man gikele ba Yesu: gipedho bongu migi de ng'ei nyathi kana, man giketho Yesu i wie.
- ³⁶E kan ecidho, gipedho bongu migi i yo.
- ³⁷Man kan edhingo, ka ma lung' mi got Zeituni, udul julubne ceke anyong'a maku negogi man gipaku Mungu ku dwal ma tek kum tic mi tego ceke ma gineno;
- ³⁸giwacu kumae, Mugisa ni Ubimo m'ubino i nying' Rwoth: kwicwiny i polo, dwong' de i ka ma malu ngbir.
- ³⁹E Jufarisayo moko ma kind udul dhanu giwacu ire kumae, Japonji, juk julubni.
- ⁴⁰Man eloko lembe ewacu kumae, Awacu iwu nia, tek joni giling' kidi bikok akoka.
- ⁴¹E kan edhingo ceng'ni, eneno adhura eywak de i kume,
- ⁴²ewacu kumae, E, tinuni tek nwang'u ing'eyo gin ma mi kwicwiny peri! ento kawono gimungri i weng'i.
- ⁴³Kum ceng' biwok i kumi, ka jukwoji bidhuro ng'om i theri, man gibitieki kingli, man gibikuri kun ku kun ceke,
- ⁴⁴man gibiredhi i ng'om, ku nyithindho peri ma ni ii; man gibiweko kidi acel de ngo wi wagi ii; kum ing'eyo ngo nindo mi lieu peri.
- ⁴⁵Emondo i hekalu, man emaku riemo ju m'ubeloko kuloka,
- ⁴⁶ewacu igi kumae, Egore kumae, Man ot para bibedo odrwo: ento wudwoke ni kagonjo mi weg ayeki.
- ⁴⁷Man eponjo ceng' ku ceng' i hekalu. Ento julam ma dongo ku jugorik de ku judongo mi dhanu giyenyo ginyothe:
- ⁴⁸e ginwang'u ngo gin ma gicopo timo: kum dhanu ceke gidikri i kume, niwinje.

Luka 20

- ¹Man etimbre, i ceng' acel ma kind wadi, kan ebeponjo dhanu i hekalu, ebeyero lembanyong'a ma juboth ko, julam ma dongo ku jugorcik man judongo de gibino i bang'e;
- ²man giyero, giwacu ire kumae, Wac iwa: Itimo gin maeni ku ng'ol manedi? Kadi en e ng'a m'umio iri ng'ol maeni?
- ³Man eloko lembe ewacu igi kumae, An bende abipenjowu ku penji moko; man wuwac ira:

- ⁴Baputisi pa Yohana, ai i polo kadi ba dhanu?
- ⁵E giporo lembe i kindgi gigi, giwacu kumae, Tek wabiwacu kumae, Uai i polo; ebiwacu kumae, E ka nedi wuyie ngo?
- ⁶Ento tek wabiwacu kumae, Uai ba dhanu; dhanu ceke bicanyuwa ku kidi: kum giyio nia Yohana en e jabila.
- ⁷Gidwoko lembe, nia ging'eyo ngo ka m'eai i ie.
- ⁸E Yesu wacu igi kumae, Kadok an de awacu iwu ngo nia ku ng'ol manedi m'atimo ko gin maeni.
- ⁹Man emaku yero lembabola maeni ni dhanu: Ng'atu moko podho podho mir ulok, emie de ni sumba ba jutipodho, man ecibedo i ng'om mange mi nindo dupa.
- ¹⁰Man i nindo mi mwoka eoro jamiru ba jutipodho, kara gimi ire mwoka moko mi podho mir ulok: ento jutipodho gifode, giore edok mananu.
- ¹¹Fodi eoro jamiru mange de: en bende gifode, gitime rac dit, giore edok mananu.
- ¹²Man eoro mir adegge: en bende gitong'o lero i kume, e gibaye woko.
- ¹³E rwoth mi podho mir ulok uwacu kumae, Abitimo ang'o? Abiuro woda ma jamerna; kuno nyo gibijwigri ire.
- ¹⁴Ento ka jutipodho ginene, giporo lembe i kindgi, giwacu kumae, Maeni jacampacu; dong' wanegue, kara camupacu dong' mwa.
- ¹⁵E gibaye woko kud i podho mir ulok, ginege de. Ka kumeno rwoth mi podho mir ulok bitimo ang'o i kumgi?
- ¹⁶Ebibino ebinyotho jutipodho maeni, ebimio podho mir ulok ba jumange. E ka giwinjo maeni, giwacu kumae, Kud ebed kumeno.
- ¹⁷Ento eneno bang'gi, man ewacu kumae, Ka kumeno mae ang'o m'ugore kumae, Kidi ma jugomot ukwero, Eni jukethe wi guli?
- ¹⁸Ku ba dhanu ceke m'upodho wi kidi maeno bitur nziki nziki; ento ng'atu ma tek ebipodlio i wie, ebikethe pamir utur.
- ¹⁹Jugorcik ku julam ma dongo giyenyo giketh cing'gi i kume i saa maeno nino; man gilworo dhanu: kum ging'eyo nia eyero lembabola maeni i kumgi.
- ²⁰E gioro julib de i bang'e, ma gipali gigi nia gi pwe, kara gimak lembe m'i dhoge, kara gimie ni tego ku ng'ol pa jabim.
- ²¹Man gipenje, giwacu kumae, Japonji, wang'eyo nia iweco iponjo de cu, man ijolo ayi dhanu ngo, ento andha iponjo yo pa Mungu:
- ²²Cik uyio wami ajok ni Kaisari, kadi ungo?
- ²³Ento eng'eyo riu migi, man ewacu igi kumae,

- ²⁴Wuleng' denarius anen. Ayi ng'a ku ramblebene de? Giwacu kumae, Pa Kaisari.
- ²⁵E ewacu igi kumae, Ka kumeno, wumi ni Kaisari gin pa Kaisari, ni Mungu ke gin pa Mungu.
- ²⁶E gicopo maku lem moko ngo i wang' dhanu: e igi wang' lii kum lembadwoka pare, man giling'.
- ²⁷Man Jusadukayo moko gibino i bang'e, gi ju ma giwacu nia cer umbe:
- ²⁸gipenje, giwacu kumae, Japonji, Musa goro iwa, nia tek umin ng'atu moko tho, ma cege nuti, ma nyithindho de mbe kude, emaku ya umin ugam cege, man enyol nyithindho ni umin.
- ²⁹Ka kumeno umego abiro nuti: e ma kwong'ane gamu dhaku, etho de ma nyithindho mbe kude;
- ³⁰mir arionde de game:
- ³¹mir adege de game; man gin abiro bende kumeno githo, ma giweko nyithindho ngo.
- ³²Yo ku ng'eye dhaku de tho.
- ³³Ka kumeno i cer ebidong' bedo ci ng'a m'i kindgi? kum gin abiro gigame ni dhaku igi.
- ³⁴Yesu wacu igi kumae, Wot m'i ng'ombuni gigambri, jumio de mi nyom:
- ³⁵ento ju ma jukwanu ya giromo ma ginwang' ko ng'om maeno, ku cer ma kind ju m'utho de, gigambri ngo, jumiogi de ngo mi nyom:
- ³⁶kum gicopo tho kendo ngo: kum girom rom ku malaika; man gi wot Mungu, ma gi wot mi cer.
- ³⁷Ento nia ju m'utho cer, cil Musa enyutho, i ka Yen m'udinyo, kan elwong'o Rwoth nia Mungu pa Ibrahim, man Mungu pa Isak, man Mungu pa Yakobo.
- ³⁸Nie en e Mungu mi ju m'utho ngo, ento mi ju ma kwo: kum dhanu ceke bedo ni kume.
- ³⁹Jumoko ma kind jugorcik giloko lembe kumae, Japonji, iwacu dre.
- ⁴⁰Kum tegocwiny umbe kugi ma gipenje ko ku penji mange.
- ⁴¹Man ewacu igi kumae, Giwacu nenedi nia Kristu en e wod Daudi?
- ⁴²Kum Daudi wacu en i kitabu mi Zaburi kumae, Rwoth uwacu ni Rwoth para kumae, Jany yo ku cinga ma yor acwic,
- ⁴³Cil m'aketho ko jukwoji ni kom mi tiendi.
- ⁴⁴Ka kumeno Daudi lwong'e Rwoth e, en e wode nenedi?

⁴⁵Man i ith dhanu ceke ewacu ni julubne kumae,

⁴⁶Wukuru giwu ni jugorcik, ma gimaru woth ma ku kendi ma lor lor, man gimaru moth de i katali, ku bedo ma i ka m'usagu i kacokri, ku bedo ma i ka m'usagu i agba;

⁴⁷ma gicamu udi mi mon ma coggi tho, man gitimo rwo ma bor ni abombi: joni binwang'u lembapoka ma rac ma dit m'usagu.

Luka 21

¹E eng'ayu wang'e malu, man eneno julonyo m'ubolo giramia migi i kakanpiny.

²Man eneno dhaku moko ma jacan ma cware tho ubolo sente ario i ie.

³E ewacu kumae, Ayero iwu andha kumae, Dhaku maeni m'e jacan ma cware tho ebolo i ie ma sagugi ceke:

⁴kum joni ceke gibolo i ie ni giramia migi kum gin ma gisagri ko; ento en kum can pare ebolo i ie gin ceke m'ecopre kudo.

⁵E ka jumoko weco pi hekalu, maram erukre ko ku kidi ma ber ku giramia de, ewacu kumae,

⁶Pi gin maeni ma wuneno, ceng' bibmo, ma jubiweko ie kidi acel de ngo kakeni wi wagi, ma jukubibolo piny ungo.

⁷E gipenje, giwacu kumae, Japonji, ka kumeno gin maeni biwok awene? man giranyutha bibedo ang'o ka gin maeni dHINGO timbre?

⁸Man ewacu igi kumae, Wubed ku weng'wu kara ku juwingwu. kum dhanu dupa bibino ku nyinga, ku wacu kumae, An a en; man, Nindo dHINGO ceng'ni: kud wulub ng'eigi.

⁹Man ka wubiwinjo pi lwiny kud ali de, ndiri kud umakwu: kum gin maeni bikolar timbre be; ento kajikne fodi kawono ngo.

¹⁰E elund ewacu igi kumae, Thek bijai kum thek wagi, ker de kum ker;

¹¹digidi ma dit de bibedo nuti, ndrude bibedo nge nge ku thong'om bende; ndiri de bibedo nuti ku giranyutha ma dit m'uai i polo.

¹²Ento ka gin maeni ceke fokutimbre ngo, e gibimakuwu ku cing'gi, man gibinyayu ragedo i kumwu, gibimiowu ba cokri ku otkol de, gibiterowu i wang' ju m'ubimo man i wang' jubim de pi nyinga.

¹³Ebilokre edoko ni lembatuca iwu.

¹⁴Ka kumeno wuketh adundewu cungi, nia iwu bilarpido ngo maram wulok ko lembe:

¹⁵kum abimio iwu dhok man rieko, ma judegi mu ceke bicopo piemo ngo kadi ajaya de.

- ¹⁶Ento junyodo, ku utumego, ku wat, ku jurimo gibicibowu; man moko m'i kindwu gibiketho nia juneggi.
- ¹⁷Dhanu ceke de bidaguwu pi nyinga.
- ¹⁸E yukwic mi wiwu acel de mbe ma birwinyo.
- ¹⁹I twiocwiny mu wubibodho kwo mu.
- ²⁰Ento ka wuneno njuru asikari ubetieko Yerusalem wulund wung'ei nia nyoth pare dHINGO ceng'ni.
- ²¹I nindo maeno ju ma gini i Yahudi wek giring i gudi: man ju ma gini i kinde wek giai woko; man ju ma gini i thim ku gimond i ie.
- ²²Kum maeni ceng' culokwor, kara gin ceke m'ugore timbre kakare.
- ²³Can wi ju ma igi nuti ku ju ma nyithindho dhodhogi i ceng' maeno! kum lem ma tek hai bibedo nuti i ng'om, ku kwinyo de ni dhanu maeni.
- ²⁴Man gibipodho ku lak palamularu, jubipeyogi de ni ayeki i thek ceke: Yerusalem de Thekdhanumange binyone, maram nindo mi Thekdhanumange bitimbre ko kakare.
- ²⁵Giranyutha de bibedo nuti i ceng' ku dwi ku cero; i ng'om de lem ma tek mi thek, i ang'abacwiny kum woi mi nam man mukura;
- ²⁶dhanu biyenyo tho ni lworu, man kum kuro gin m'ubebino i ng'om: kum tego mi polo biyengre.
- ²⁷E gibilund neno Wod dhanu bebino i afuru ku tego man dwong' ma dit.
- ²⁸Ento ka gin maeni maku timbre, wung'ai weng'wu malu, wuting' wiwu malu de; kum war mu dHINGO ceng'ni.
- ²⁹Man eyero igi lembabola mae: Wunen ulam, ku yedhi ceke:
- ³⁰ka gimoc loth, wuneno maeni man wung'eyo giwu nia kawono cwir ni ceng'ni.
- ³¹Cil kumeno wun bende, ka wuneno gin maeni maku timbre, wung'ei nia ker pa Mungu ni ceng'ni.
- ³²Andha ayero iwu kumae, dhanum'utuk maeni bikadhu woko ngo, ma fodi gin ceke kutimbre ngo.
- ³³Polo ku ng'om bikadhu woko: ento lembe para bikadhu woko ngo.
- ³⁴Ento wubed ku weng'wu giwu, kara adundewu kud ucid ku giracama, ku mer kong'o, man ku giki mi bedo maeni, e ceng' maeno bino i kumwu pio pio pamir uwic:
- ³⁵kum ebibino kumeno wi dhanu ceke m'ubedo wi wang' ng'om ngung'.

³⁶Ento wuki ku ba nindo ceke, ku kwayukwac de, kara wusegru ni both ni gin maeni ceke ma bitimbre, wucung de i wang' Wod dhanu.

³⁷E ku ba ceng' ceke eponjo i hekalu; man ku ba diewor ceke eciho woko, man egonjo wi got ma julwong'o Zeituni.

³⁸Dhanuceke de bino i bang'e pir kugweno i hekalu niwinje.

Luka 22

¹NIE agba mi kwen ma thobi mbe i ie dHINGO ceng'ni, ma julwong'o Kadhukuwijo.

²E julam ma dongo ku jugorcik de giyenyo maram gicopo nege ko; kum gilworo dhanu.

³E Jok umondo i Yuda ma julwong'o Iskariote, ma en e kind juapar wi ario.

⁴E eciho, giweco ku julam ma dongo ku jego, maram ecopo mie ko igi.

⁵E anyong'a negogi, man giribo lembe gikugi ya gimie sente.

⁶En de eyio, man eyenyo maram ecopo cibe ko igi kan udul dhanu mbe.

⁷Ceng' mi kwen ma thobi mbe i ie wok, ma jukoJulamu ie lam mi kadhukuwijo be.

⁸Man eoro Petro giku Yohana, ewacu kumae, Wuciyik iwa kadhukuwijo, kara wacam.

⁹E giwacu ire kumae, Iyenyo wayik kani?

¹⁰Man ewacu igi kumae, Nen, ka wumondo i adhura, wubirombo ku ng'atu m'uyeyo agulu pi; wulub ng'eye ka m'emondo i ie i ot.

¹¹E wubiwacu ni won ot kumae, Japonji wacu iri kumae, Odwelo nikani, ka ma wabicamu ie kadhukuwijo ku julubna?

¹²E ebinyutho iwu ot ma dit ma malu m'ubedo ku piny i ie: e wuyik kakeno.

¹³E gicidho, ginwang'u calu ewacu igi: e giyiko kadhukuwijo.

¹⁴Ka saane tundo, ebedo piny, giku julubne.

¹⁵Man ewacu igi kumae, Kadhukuwijo maeni ava camu wakudu nega dit ma fokasendra ngo:

¹⁶kum awacu iwu kumae, Abicame ngo, ma foketimbre kakare ngo i ker pa Mungu.

¹⁷Man egamu kikombe, kan emio foc, ewacu kumae, Wugam maeni, wupok i kindwu:

¹⁸kum awacu iwu kumae, Ugambre kawono abimadhu pigolok ungo, ma fodi ker pa Mungu ku bino ngo.

- ¹⁹E eting'o kwen, e kan emio foc, eng'wenyo ie, emio igi, ewacu kumae, Maeni en e kuma m'umire piwu: wutim mae wupoi ko pira.
- ²⁰Kikombe de kumeca yo ng'ei cemo mir uthieno, ewacu kumae, Kikombe maeni en e lembariba ma nyen i rimba, cil maeno m'uthwogre woko piwu.
- ²¹Ento nen, cing' ng'atu m'uciba ni wi mesa i bang'a.
- ²²Kum Wod dhanu cidho andha, calu lembe kethre: ento can wi ng'atu maeno m'ucibe!
- ²³E gimaku penjri i kindgi, nia ng'a m'i kindgi ma bitimo gin maeni?
- ²⁴Piem uwok i kindgi bende, nia ng'a m'i kindgi ma jukwanu ya e dit ma sagu.
- ²⁵E ewacu igi kumae, Ubimo mi Thekdhanumange gibimo wigi; ju m'ubedo ku ng'ol i wigi julwong'ogi Jutimber.
- ²⁶Ento wubibedo kumeno ngo: ento ng'atu m'usagu i kindwu, dong' edok calu ng'atu ma nok; ng'atu ma jawipiro de, calu ng'atu ma timo.
- ²⁷Kum makani m'usagu, ng'atu m'ubedo dhu cemo, kadi ng'atu m'utimo? en e ng'atu m'ubedo dhu cam ungo? ento abedo i kindwu calu ng'atu m'utimo.
- ²⁸Ento wun wu ju ma wabedo asu wakudu i abidhe para;
- ²⁹man ang'olo iwu ker, cil calu Vwa ng'olo ira,
- ³⁰kara wucam wumadh de dhu mesa para i ker para; man wubijany wi komker ku poko lembe wi suru apar wi ario mir Israel.
- ³¹Simon, Simon, nen, Jok upenjo nia ebed kudi, kara epiedhi pami nganu:
- ³²ento akwayu piri, kara yioyic peri kud urany; in de, kan ilokri kendo, iteng' utumeru.
- ³³Man ewacu ire kumae, Rwoth, abedo ayika mi cidho kudi i odkol man i tho de.
- ³⁴E ewacu kumae, Awacu iri, Petro, kulok bikok ungo tinuni, ma fok'ikwero wang' adek ungo nia ing'eya ngo.
- ³⁵Man ewacu igi kumae, Naka kan aorowu ma gbethe mbe kudu, ku mangala, ku wara de, nwang'u gin moko rem iwu? Giwacu kumae, Gin moko mbe.
- ³⁶Man ewacu igi kumae, Ento kawono, ng'atu ma won gbethe, wek eting'e, man won mangala bende kumeca; man ng'atu ma palamularu pare mbe, wek elok kanzu pare, eng'ieu ko.
- ³⁷Kum awacu iwu, nia maeni m'ugore bikotimbre kakare i kuma be kumae, E jukwane ku judubo: kum maeno ma pira timbre kakare.
- ³⁸E giwacu kumae, Rwoth, nen, palamularu ario ni keni. E ewacu igi kumae, Eromo.

- ³⁹Man ewok woko, ecidho de, wi got Zeituni, calu kura pare; e julubne bende gilubo ng'eye.
- ⁴⁰E kan ewok kakeca, ewacu igi kumae, Wurwo kara kud wumond i abidhe.
- ⁴¹E kindgi liero kugi rom ku ma jucanyu ie kidi; man erum piny erwo,
- ⁴²ewacu kumae, Vwa, tek iyenyo, kab kikombe maeni kud i bang'a: ento yeny para ngo, ento peri, utimbre.
- ⁴³E malaika wok i bang'e kud i polo, m'udwoke tek.
- ⁴⁴E en m'eni i ndiba erwo ma tek m'usagu; kwok pare de doko pami ng'idho rimo m'uton i ng'om.
- ⁴⁵E kan eai malu kud i rwo pare, ebino ba julub, man enwang'u ginindo ni can,
- ⁴⁶man ewacu igi kumae, Wunindo nedi? wuai malu, wurwo, kara kud wumond i abidhe.
- ⁴⁷Kinde ma fodi eweco, nen, udul dhanu, ku ng'atu ma julwong'o Yuda, acel m'i kind juapar wi ario utelo wigi; man ecoro ceng'ni Yesu nicwio limbe.
- ⁴⁸Ento Yesu wacu ire kumae, Yuda, icibo Wod dhanu ku cwici?
- ⁴⁹E ka ju ma ginuti i vute gineno gin ma bilubo toke, e giwacu kumae, Rwoth, wabitong'o ku palamularu?
- ⁵⁰E ng'atu acel m'i kindgi tong'o jamiru pa jalam ma dit, man etong'o ithe ma yor acwic woko.
- ⁵¹Ento Yesu loko lembe ewacu kumae, Wukowuwekgi tundu. Man emulo ithe, eketho ekei.
- ⁵²E Yesu wacu ni julam ma dongo, ku jego mi hekalu, man judongo, ma gibino i kume kumae, Wubino, calu kum won ayeki, ku palamularu ku duli?
- ⁵³Ka wanuti wakudu ceng' ku ceng' i hekalu, wuricyo cingwu ngo i kuma: ento maeni saa mu, ku tego mi mudho.
- ⁵⁴E gimake, man gipeye, gikele i ot pa jalam ma dit. Ento Petro lubo ng'eye ku cen.
- ⁵⁵E ka gikudho mac i die pondot, man gibedo piny karacelo, nwang'u Petro bedo i kindgi.
- ⁵⁶E nyaku moko m'enene kan ebedo i der mac, m'enene tel, ewacu kumae, Ng'atu maeni bende gibedo gikugi.
- ⁵⁷Ento ekwero, ewacu kumae, Nyane, ang'eye ngo.
- ⁵⁸Yo ku ng'eye nyanok ng'atu mange nene, ewacu de kumae, In bende in i ng'atu acel m'i kindgi. Ento Petro wacu kumae, Ng'atue, an ungo.

⁵⁹Yo ng'ei kinde ma calu saa acel ng'atu mange yero ku tegocwinye, ewacu kumae, Andha ng'atu maeni bende gibedo gikugi; kum en e Jagalilaya.

⁶⁰Ento Petro wacu kumae, Ng'atue, ang'eyo gin m'iyero ngo. E eni eni, kinde m'ebeyero, kulok ukok.

⁶¹E Rwoth ulokre, man eneno Petro. E Petro poi kum lembe pa Rwoth, maram ewacu ko ire kumae, Tin ma fodi kulok kukok ungo ibikwera wang' adek.

⁶²E ewok woko, eywak ku can m'apila.

⁶³E dhanu m'umaku Yesu gicaye, gicwanye.

⁶⁴Mau gitwio wang'e ku kita mbala, e gipenje, giwacu kumae, Eu: ng'a m'ucwenyi?

⁶⁵Man gin dupa mange giyero i kume, gicaye ko.

⁶⁶E ka piny uru, udul mi judongo mi dhanu gicokri karacelo, julam ma dongo ku jugorcik; e gipeye woko i dilo migi, giwacu kumae,

⁶⁷Tek in i Kristu, wac iwa. Ento ewacu igi kumae, Tek awacu iwu, wubiyio ngo:

⁶⁸man tek apenjowu, wubiloko lembe ngo.

⁶⁹Ento ugambre kawono Wod dhanu bijany yo ku cing' ma yor acwic mi tego pa Mungu.

⁷⁰E kagi ceke giwacu kumae, Ka kumeno in i Wod Mungu? Man ewacu igi kumae, Wuwacu nia an a en.

⁷¹Man giwacu kumae, Can jumulembe mange negowa nedi? kum wan giwa wawinjo lembe i dhoge en.

Luka 23

¹Man udulgi ceke ai malu, gikele i wang' Pilato.

²E gimaku dote, giwacu kumae, Wanwang'u ng'atu maeni beroco thek mwa, man ebekwero ya ku jumi ajok ni Kaisari, ewacu de nia en e m'e Kristu m'ubimo.

³E Pilato penje, ewacu kumae, In i Ubimo mi Juyahudi? Man edwoko lembe ire ewacu kumae, Iwacu.

⁴Man Pilato wacu ni julam ma dongo kud udul dhanu kumae, Anwang'u dubo ngo i ng'atu maeni.

⁵Ento gijai ma sagu, giwacu kumae, Ethubo i dhanu, eponjo cil i Yahudi ceke, ugambre i Galilaya cil kakeni.

⁶Ento ka Pilato winjo maeni, epenjo tek ng'atuni en e Jagalilaya.

⁷E kan eng'eyo nia eni the pokolembe pa Herode, eore ba Herode, ma en bende eni i Yerusalem i ceng' maeni.

- ⁸Nie ka Herode neno Yesu, anyong'a nege dit: kum ava nene gamu time con, kum ewinjo pire; man egeno ya ebineno musana moko m'utimbre ni kume.
- ⁹E epenje ku lembe dupa; ento eloko lembe ngo ire.
- ¹⁰E julam ma dongo ku jugorcik gicungo, gibedote apila.
- ¹¹Herode de kud asikari pare ging'ale, gicaye de, man ka gironye ku kendi ma bergiore edok ba Pilato.
- ¹²Man i ceng' maeno Herode ku Pilato gicamu rimo: kum naka adegi nii kindgi.
- ¹³E Pilato lwong'o julam ma dongo man jubim ku dhanu de karacelo i bang'e.
- ¹⁴man ewacu igi kumae, Wukelo ng'atuni i bang'e calu ng'atu acel m'uroco dhanu: man nen, an, m'aluro i lembe pare i vutwu, anwang'u dubo ngo i ng'atu maeni pi gin maeno ma wudote pire:
- ¹⁵ungo, kadok Herode: kum edwoke i bang'wa; man nen, etimo gin moko ngo m'uromo ku tho.
- ¹⁶Ka kumeno abifode, man abigonye.
- ¹⁷Nie ekoegony jakol acel igi be i agba.
- ¹⁸Ento kagi ceke gikok karacelo, giwacu kumae, Ter ng'atu maeni cen, gony iwa Baraba:
- ¹⁹en e ng'atu acel ma jubole i odkol kum ethubo ali i adhura, man kum negonek.
- ²⁰Pilato yero igi kendo, m'eyenyo egony Yesu;
- ²¹ento gikok, giwacu kumae, Gure, gure.
- ²²E ewacu igi wang' adegge, Nedi, gin ma rac ang'o ma ng'atuni timo? Anwang'u lembe moko ngo i bang'e ma romo ku tho: ka kumeno abifode abigonye de.
- ²³Ento gijai giwoi ku dwandgi ma tek, ma gipenjo ko nia jugure. E dwandgi sagu.
- ²⁴Man Pilato ng'olo nia dong' jutim gin ma gipenjo.
- ²⁵Man egonyo ng'atu ma jubole i odkol kum athube ku nek, en e ng'atu ma gikwaye; ento Yesu emie ni yeny migi.
- ²⁶E ka gipeye woko, gimaku ng'atu acel ma nyinge Simon ma Jakurene, m'uai i thim, e giketho yen m'athara i wie, kara eyei elub ko ng'ei Yesu.
- ²⁷E udul dhanu ma dit ulubo ng'eye, ku mon m'ugoyo nduru m'uywak de i kume.
- ²⁸Ento Yesu lokre i bang'gi ewacu kumae, Nyig Yerusalem, kud wuywak i kuma, ento wuywak i kumwu giwu, man pi nyithindho mu.
- ²⁹Kum nen, ceng' bibino, ma gibiwacu i ie kumae, Mugisa ni mugumba, ku ic ma fodunyo ungo de, man thuno ma fodi judhodho ngo.

- 30I nindo maeno gibimaku wacu ni gudi kumae, Podh i wiwa; ni ungulu got ke kumae, Umwa.
- 31Kum tek gitimo gin maeni i yen ma numu, ang'o ma bitimbre i yen m'uthwo?
- 32Juario mange bende ginuti, ma gi judubo, ma jupeyogi, gikugi jubecinegogi.
- 33E ka giwok i ka ma julwong'o Upokowic, gigure keca, ku judubo de, acel yo ku cing' ma yor acwic acel ke yo ku cing' ma yor acam.
- 34E Yesu wacu kumae, Vwa, wek lem migi rwiny; kum ging'eyo ngo gin ma gitimo. Man gipoko kendi pare i kindgi, gigoyo ku jara.
- 35Dhanu de cungo gibeneno. Jubim de ging'ale, giwacu kumae, Ebodho jumange; wek ebodhre gire, tek en e Kristu pa Mungu, m'egoyo nyinge.
- 36E asikari bende gicaye, ma gibino i bang'e, gimio picwa ire,
- 37giwacu de kumae, Tek in i Ubimo mi Juyahudi, bodhri giri.
- 38Ramblembe bende ni yor i wie kumae, MAENI UBIMO MI JUYAHUDI.
- 39E jadubo acel ma julierogi ecaye, ewacu kumae, In i Kristu ngo? bodhri giri ku wan de.
- 40Ento wadi dwoko lembe, ejuke, ewacu kumae, E ilworo cil Mungu de ngo, in m'ini i lembapoka ma rac ma cal aceli?
- 41E wan ebedo iwa pwe andha; kum wanwang'u sukulia m'uromo ku tic mwa: ento ng'atuni timo gin moko ngo ma rac.
- 42Man ewacu kumae, Yesu, poi pira kan imondo i ker peri.
- 43E ewacu ire kumae, Andha awacu iri kumae, Tin wabibedo wakudi i Paradis.
- 44I kinde maeno e calu saa mir abusiende, e mudho yutho wi ng'om ceke cil i saa mir abung'wende,
- 45der ceng' de jik: kusika mi bongu m'i hekalu de kak dra.
- 46Man Yesu, m'ukok ku dwande ma tek, ewacu kumae, Vwa, aketho tipona i cingi: e kan ewacu maeni, eweko cwinye kadhu.
- 47E ka jego neno gin m'utimbre, eyungo Mungu, ewacu kumae, Andha ng'atu maeni e ng'atu ma pwe.
- 48E udul dhanu ceke cokri karacelo kum neno maeni, e ka gineno gin m'utimbre, gidok ku dhongo korgi.
- 49E dhanu ceke ma ging'io kugi, ku mon m'ulubo ng'eye kud i Galilaya, gicungo ku cen, gineno gin maeni.
- 50Man nen, ng'atu ma nyinge Yusuf, m'e ng'atu acel ma kind dilo, en e ng'atu ma ber ma pwe de

⁵¹(eyio lembapora migi ku tic migi de ngo), en e ng'atu ma Arimathaya, adhura mi Juyahudi, m'ebekio ker pa Mungu:

⁵²ng'atu maeni cidho ba Pilato, man ekwayu avuj Yesu.

⁵³Man efudhe piny, eboye de i bongu ma nwang', ekethe de i liel ma juroko i cana, ka ma avu dhanu fokuvuto i ie ngo.

⁵⁴Man en e ceng' Yikopiny, ceng' sabatu de dHINGO.

⁵⁵E mon, m'ubino kugi kud i Galilaya, gilubo ng'eye, man gineno liel ma juroko i cana, man maram juketho ko avuje.

⁵⁶E gidwogo, giyiko udok ma ng'wice ng'ar ku mo de. I ceng' sabatu de giyom calku lembang'ola.

Luka 24

¹Ento i ceng' ma kwong'a ma yenga, ka mombwa thumo, gibino ba liel ma juroko i cana, ma gikelo ko udok ma giyiko.

²E ginwang'u jung'ielo kidi woko ku dhu liel ma juroko i cana.

³Gimondo de, ginwang'u avuj Rwoth Yesu de ngo.

⁴E etimbre, kinde ma cwinygi ng'abre kum lembene, nen, juario cungo i vutgi ku kendi m'urieny:

⁵man ka lwooro makugi gikulo wang'gi de i ng'om, giwacu igi kumae, Nedi wuyenyo ng'atu ma kwo i kind ju m'utho?

⁶Embe keni, ento ecer: wupoi maram eyero ko iwu ma fodi eni i Galilaya,

⁷m'ewacu ko nia Wod dhanu jubikomie be i cing' judubo, man jubigure, ebicer kendo de i ceng' mir adege.

⁸E gipoi kum lembe pare,

⁹giai de ku ba liel ma juroko i cana gidok, giyero gin maeni ceke ni juapar wi acel, ku juwadi ceke bende.

¹⁰Nie gin gi Mariamu Magdalene, ku Yoana, man Mariamu ma min Yakobo: ku mon wadi mange de gikugi giyero gin maeni ni jukwenda.

¹¹E lembe maeni nen i wang'gi calu wec mananu; e giyiogi ngo.

¹²Ento Petro ai, eringo ba liel ma juroko i cana; man egung' eneno i ie, eneno kitambala ma nwang' ubedo katung'; man edok i ot pare, ma ie wang' lii kum gin m'utimbre.

¹³Man nen, ceng' nino juario m'i kindgi gicidho i pacu ma julwong'o Emao, ma en e ungolo apar wi abusiel ku Yerusalem.

¹⁴E giweco i kindgi pi gin maeni ceke m'utimbre.

- 15**Man etimbre, kinde ma giweco gipenjri de i kindgi, nia Yesu ku kite coro ceng'ni, giwotho gikugi de.
- 16**Ento wang'gi umbre kara ku ging'eye.
- 17**Man ewacu igi kumae, Lembang'o ma wuwotho ku weco i kindwu? E gicungo ling', ma wang'gi cido ku can.
- 18**Man ng'atu acel m'i kindgi, ma nyinge Kleopa, uloko lembe wacu ire kumae, Ibedo i kendi i Yerusalem man ing'eyo gin m'utimbre kuca i ceng' maeni ngo?
- 19**Man ewacu igi kumae, E girang'o? Man giwacu ire kumae, Gin m'utimbre kum Yesu ma Janazareti, ma en e jabila ma tek i tic ku lembe de i wang' Mungu i wang' dhanu ceke bende:
- 20**man maram julam ma dongo ku jubim mwa de gimie ko kara jupok lembe i wie rac ni tho, man gigure.
- 21**Ento wageno nia en e ng'atu ma biwaru Israel. Eyo m'umedre kum maeni ceke, kawono en e ceng' mir adege yo ng'ei gin maeni m'utimbre.
- 22**Man kendo mon moko m'i kindwa ketho iwa wang' lii, ma gicidho pir kugweno ba liel ma juroko i cana;
- 23**ka ginwang'u avuje ngo, gibino, giwacu nia gineno ginmawokiwang' mi malaika, m'uwacu nia ebedo kwo.
- 24**E jumoko ma ni i bang'wa de gicidho ba liel ma juroko i cana, e ginwang'u ebedo kumeno calu mon uwacu: ento en re ginene ngo.
- 25**Man ewacu igi kumae, E wun ma wun adhura, ma adundewu galu ku yio lembe ceke ma jubila yero!
- 26**Kristu kousendre be ku gin maeni ngo kan emond i dwong' pare?
- 27**Man etheko kum lem pa Musa ku jubila ceke de, ekoro igi i lem pa Mungu ceke gin ma pire gire.
- 28**E gidhingo pacu, ka ma gibecidho i ie: man etimo calu eyenyo ecidh i wang'e.
- 29**Man gicere, giwacu kumae, Dong' wabed wakudu; kum uthieno dhingo, ceng' de doko ng'ic. E emondo gibed gikugi.
- 30**Man etimbre, ka gibedo gikugi dhu cam, eting'o kwen emio mugisa de; e kan eng'wenyo ie emio igi.
- 31**E wang'gi yabre, man ging'eye; e erwinyo woko kud i wang'gi.
- 32**Man giwecri i kindgi kumae, Adundewa wang' lii ngo i iwa, kan eyero iwa i yo, kan ekoro iwa lembagora pa Mungu?
- 33**E i saa maeno giai malu, man gidok Yerusalem, e ginwang'u juapar wi acel ucoko dhoggi karacelo, ku ju ma gini i bang'gi,

- 34 giwacu kumae, Rwoth ucer andha, man enyuthie ni Simon.
- 35 E giyero gin m'utimbre i yo, man maram eng'eire ko igi i ng'wenyo i kwen.
- 36 E ka giyero gin maeni, en ku kite ecungo i kindgi, ewacu igi kumae, Kwiocwiny ubed i beng'wu.
- 37 Ento ndiri makugi man lworu, e giwacu nyo gineno ripo.
- 38 Man ewacu igi kumae, Cwinywu ng'abre nedi? penji de wok i adundewu nedi?
- 39 Wunen cinga ku tienda, nia en e an ku kita: wumul kuma, wunen; kum tipo mbe ku ring'o man cogo, calu ma wuneno abedo ko.
- 40 E kan eyero maeni, enyutho igi cinge ku tiende.
- 41 E ka fodi giyio ngo ni mutoro m'unegogi, ku igi de m'uwang' lii, ewacu igi kumae, Gin moko nuti beng'wu keni mir acama?
- 42 E gimio ire ng'et rec m'athola.
- 43 Man eting'e, ecamu de i wang'gi.
- 44 Man ewacu igi kumae, Maeni en e lembe para m'ayero iwu, ma fodi ani i beng'wu, nia gin ceke koutimbre be kakare, m'ugore pira i cik pa Musa, ku jubila, ku i zaburi de.
- 45 Elund eyabu pidoigi, kara ging'ei lembagora pa Mungu;
- 46 man ewacu igi kumae, Egore kumeno, nia maku Kristu sendre, ecer kendo de ku kind ju m'utho i ceng' mir adege;
- 47 man kara juyer pi lokocwiny ku rucodubo i nyinge ni thek ceke, ugambre Yerusalem.
- 48 Wun wu jumulembe mi gin maeni.
- 49 Man nen, aoro lebang'ola pa Vwa i wiwu; ento wubed i adhura, ram wurony ko tego m'uai malu.
- 50 Man etelo wigi woko i ng'et Bethania: man eting'o cinge malu, emio igi mugisa.
- 51 Man etimbre, kan emio igi mugisa, epokre gikugi, e juting'e malu i polo.
- 52 E girwo ire, man gidok Yerusalem ku mutoro ma dit:
- 53 man gibedo thiri thiri i hekalu, ku mio mugisa ni Mungu.

Yohana

Yohana 1

- 1**Ku kwong'a Lembe nuti, Lembe de bedo ku Mungu, Lembene de en e Mungu.
- 2**Ku kwong'a eni ba Mungu.
- 3**Gin ceke cwire ni kume; man gin moko mbe m'ucwire ma kucwire ni kume ngo.
- 4**Kwo bedo i ie; man kwone en e der mi dhanu.
- 5**Der urieny i mudho; mudho de ng'eye ngo.
- 6**Ng'atu acel, ma Mungu oro ubino, ma nyinge Yohana.
- 7**Ng'atuni bino pi nyuth, kara enyuth lembe mi der, kara dhanu ceke giyi ni kume.
- 8**En e der ungo, endre ebino kara enyuth lembe mi der.
- 9**Maeni en e der andha, ma menyo dhanu ceke kubang'gi m'ubino i ng'om.
- 10**Yang' eni i ng'om, ng'om de cwire ni kume, e ng'om re ma kung'eye ngo.
- 11**Ebino ba pare ma dhe, man ju ma gi pare ma dhene re gijole ngo.
- 12**Ento ju m'ujole ceke, emio igi tego ma gidoko ko nyithindho pa Mungu, ni ju ma giyio nyinge:
- 13**m'unyole, ku rimo ngo, kadok ku yeny mi kum, kadok ku yeny mi dhanu de ngo, endre pa Mungu.
- 14**Man Lembe doko kum, ebedo de i kindwa (man waneno dwong'ne, dwong' ma calu pa nyodo ma kulong' pa Wego), m'epong' ku bero ku lemandha de.
- 15**Yohana nyutho lembe pire, ekok akoka, ewacu kumae, Maeni en e ng'atu m'ayero pire kumae, Ng'atu m'ubino i ng'eya esaga: kum en e ng'atu ma kwong'a ira,
- 16**kum wan ceke wagamu kum gin m'epong' ko, man bero wi bero.
- 17**Kum cik umire ni kum Musa; bero ku lemandha bino ni kum Yesu Kristu.
- 18**Ng'atu moko mbe ma foduneno Mungu nindo moko; Wode kulong', m'eni i kor Wego, enyuthe.
- 19**Maeni lembanyutha pa Yohana, kinde ma Juyahudi gioro julam ku Julawi m'uai Yerusalem i bang'e nipenje kumae, In i ng'a?
- 20**Man etuco, ekwero ngo: etuco kumae, An a Kristu ngo.
- 21**Gipenje de kumae, Ka kumeno ang'o? In i Elia? E ewacu kumae, An a en ungo. Die in i jabila? Edwoko lembe kumae, Ungo.

- ²²Ka kumeno giwacu ire kumae, In i ng'a? kara wadwok lembene ni ju m'uurowa. Iwacu ang'o piri giri?
- ²³Ewacu kumae, An a dwand ng'atu moko m'ukok akoka i yamba kumae, Wutir yo pa Rwoth, calu Isaya ma jabila wacu.
- ²⁴Man joni gi ju ma Jufarisayo giorogi.
- ²⁵Gipenje de, man giwacu ire kumae, Ka kumeno tek in i Kristu ngo, kadok Elia de ngo, kadok jabila de ngo, imio baputisi nedi?
- ²⁶Yohana dwoko lembe igi, ewacu kumae, Amio baputisi i pi: ng'atu acel ucungo i kindwu ma wung'eyo ngo,
- ²⁷ma en e ng'atu m'ubino i ng'eya, ma thondh wara pare an aromo ngo ya agony.
- ²⁸Gin maeni timbre i Bethabara, ma loka Yordan, ka ma Yohana mio ie baputisi.
- ²⁹Urwone eneno Yesu bebino i bang'e, man ewacu kumae, Nen, Nyathi Rombo pa Mungu, ma kabu dubo m'i ng'om woko!
- ³⁰Maeni en e ng'atu m'ayero pire kumae, Ng'atu m'ubino i ng'eya juketho esaga: kum en e ng'atu ma kwong'a ira.
- ³¹Man ang'eye ngo; ento kara enyuthre ni Israel, kum lembe nini abino ku mio baputisi i pi.
- ³²Yohana de nyutho lembe, ewacu kumae, Aneno Tipo ai i polo loro piny pamir akuru; ebedo de i wie.
- ³³Man ang'eye ngo: ento ng'atu m'uora nimio baputisi i pi, ewacu ira kumae, Ng'atu ma tek ibineno Tipo beloro i wie man ebedo i wie, en e ng'atu m'umio baputisi i Tipo Maleng'.
- ³⁴E aneno, man anyutho nia maeni en e Wod Mungu.
- ³⁵Urwone kendo Yohana cungo, ku juario ma kind julubne;
- ³⁶man eneno Yesu kan ewotho, ewacu kumae, Nen, Nyathi Rombo pa Mungu!
- ³⁷Man julubne ario giwinjo kan eyero, e gilubo ng'ei Yesu.
- ³⁸Yesu lokre de, man eneno gilubo ng'eye, man ewacu igi kumae, Wuyenyo ang'o? E giwacu ire kumae, Rabbi, (thelembene, ka juloke, Japonji,) ibedo kani?
- ³⁹Ewacu igi kumae, Wubin, e wubineno. Ka kumeno gibino gineno de ka m'ebedo i ie; man gibedo gikugi ceng' maeno: nwang'u saa calu mir apaje.
- ⁴⁰Acel ma kind juarione m'uwinjo Yohana bewacu, m'ulubo ng'eye de, en e Andrea, m'umin Simon Petro.
- ⁴¹Elar enwang'u umin ma dhe ma Simon, e ewacu ire kumae, Wanwang'u Masia (thelembene, ka juloke, Kristu).

- ⁴²Ekele ba Yesu. Yesu neno bang'e, man ewacu kumae, In i Simon ma wod Yona: jubilwong'i Kefa (thelembene ka juloke, Petro).
- ⁴³Urwone eyenyo ecidh i Galilaya, e enwang'u Filipino: man Yesu wacu ire kumae, Luba.
- ⁴⁴Nwang'u Filipone en e ng'atu ma Bethsaida, mir adhura ma thugi Andrea ku Petro.
- ⁴⁵Filipo nwang'u Nathanael, man ewacu ire kumae, Wanwang'u ng'atu ma Musa goro pire i cik ku jubila, en e Yesu ma Nazareti, ma wod Yusuf.
- ⁴⁶Nathanael uwacu ire kumae, Gin moko ma ber copo ai i Nazareti? Filipino wacu ire kumae, Bin inen.
- ⁴⁷Yesu neno Nathanael ubebino i bang'e, man ewacu pire kumae, Nen, Jaisraeli mandha ma abombi mbe i ie!
- ⁴⁸Nathanael uwacu ire kumae, Ing'eya nenedi? Yesu loko lembe ewacu ire kumae, Ka fodi Filipino kulwong'i ngo, m'ini ther ulam ca, nwang'u aneni.
- ⁴⁹Nathanael uloko lembe kumae, Japonji, in i Wod Mungu; in i Ubimo mir Israel.
- ⁵⁰Yesu loko lembe ewacu ire kumae, Kum awacu iri nia aneni ther ulam ni, iyio? ibineno giki ma dit ma sagu maeni.
- ⁵¹Man ewacu ire kumae, Andhandha, awacu iwu, Wubineno polo yabre, man malaika pa Mungu m'ubeidho m'ubeloro de wi Wod dhanu.

Yohana 2

- ¹Man i ceng' mir adege ambadha nuti i Kana mi Galilaya; man min Yesu de ni kakeca:
- ²julwong'o Yesu bende, giku julubne de i ambadhane.
- ³Kinde ma pigulok uthum, min Yesu wacu ire kumae, Pigulok migi mbe.
- ⁴Man Yesu wacu ire kumae, Dhaku, ang'o ma wabedo ko wakudi? saa para fokuwok ungo.
- ⁵Min uwacu ni jutic kumae, Gin ceke ma tek ewacu iwu ci, wutime.
- ⁶Nwang'u juketho agulu pi mi kidi abusiel keca calu kura logo mi Juyahudi, ma adekapi ario kadi adek ka pong'o agniune acel.
- ⁷Yesu wacu igi kumae, Wupong' agulune ku pi. E gipong'ogi thur.
- ⁸Man ewacu igi kumae, Kawono wutwom, wuter ba jadit mir ambadha. Gitero de.
- ⁹E ka jadit mir agba bilo pi m'udoko ni pigulok kawono, man eng'eyo ngo ka m'eai i ie (endre jutic ma gitwomo pige ging'eyo), jadit mir agba lwong'o won ambadha,

¹⁰man ewacu ire kumae, Ku ba dhanu ceke gilar gikelo pigulok ma mit; man ka dhanu madhu hai, e gikelo maeno ma mit nyanok: in ikanu pigulok ma mit cil kawono.

¹¹Thekri mi giranyutha pare maeni Yesu timo i Kana mi Galilaya, man enyutho dwong' pare; julubne de giyie.

¹²Yo ng'ei maeni eloro piny i Kapernaum, en, ku min, ku utumin, man julubne; man gibedo kuca ceng' dupa ngo.

¹³Man kadhukuwijo mi Juyahudi ni ceng'ni, Yesu de idho malu Yerusalem.

¹⁴Man enwang'u ju m'uloko koni dhiang' ku rombe, kud akuru, man ju m'uwilo sente de gibedo i hekalu:

¹⁵man ekiedo thol ni del, ewodho kogi kud i hekalu, rombe ku koni dhiang' bende; man eoyo sente mi juwil sente, ebolo mesa migi de;

¹⁶man ewacu kumae ni ju m'uloko akuru, Wuwodh giki maeni woko; kud wudwok ot pa Vwa ni odkuloka.

¹⁷Julubne poi nia eгоре kumae, Ava ot peri bicama.

¹⁸Ka kumeno Juyahudi giloko lembe giwacu ire kumae, Giranyutha ang'o m'inyutho iwa kum itimo gin maeni?

¹⁹Yesu dwoko lembe ewacu igi kumae, Wuyak hekalu maeni, man i ceng' adek abiting'e malu.

²⁰Ka kumeno Juyahudi wacu kumae, Jugomo hekalu maeni rundi pier ang'wen wi abusiel, in e m'ibiting'e malu ceng' adeki?

²¹endre eyero pi hekalu ma kume.

²²Ka kumeno ka juting'e ku kind ju m'utho, julubne gipoi nia yang' eyero lembe maeni; e giyio lembagora pa Mungu, ku lembe ma Yesu yero de.

²³Nie kinde m'eni i Yerusalem i kadhukuwijo, i nindo mir agba, dhanu dupa giyio nyinge, ma gineno giranyutha pare m'etimo.

²⁴Ento Yesu nyebre gire ngo i bang'gi, kum eng'eyo dhanu ceke,

²⁵kum eyenyo ngo nia ng'atu moko nyuth lembe pi dhanu; kum eng'eyo en lembe ma nuti i dhanu.

Yohana 3

¹Nie ng'atu acel nuti mi Jufarisayo, ma nyinge Nikodemo, en e jabim mi Juyahudi:

²ng'atuni bino i bang'e ku diewor, ewacu ire kumae, Japonji, wang'eyo nia in i japonji m'uai ba Mungu: kum ng'atu acel de mbe ma copo timo giranyutha maeni m'itimo, tek Mungu mbe kude.

- ³Yesu dwoko lembe ewacu ire kumae, Andhandha, awacu iri kumae, Tek junyolo dhanu nyen ungo, ecopo neno ker pa Mungu ngo.
- ⁴Nikodemo wacu ire kumae, Jucopo nyolo dhanu kan eti nenedi? ecopo mondo i min wang' arionde, kan enyole?
- ⁵Yesu dwoko lembe kumae, Andhandha, awacu iri kumae, Tek jukunyolo dhanu ku pi ku Tipo de ngo, ecopo mondo i ker pa Mungu ngo.
- ⁶Gin ma junyolo ku kum en e kum; man gin ma junyolo ku Tipo de en e tipo.
- ⁷Ii kud uwang' lii kum awacu iri kumae, Jubikonyolowu kendo be.
- ⁸Yamu koto yo ku m'eyenyo, man iwinjo dwande de ento ing'eyo ngo ka m'eai i ie, ing'eyo de ngo ka m'ecidho i ie, dhanu ceke kubang'gi ma junyolo ku Tipo bedo kumeno.
- ⁹Nikodemo dwoko lembe man ewacu ire kumae, Gin maeni copo timbre nenedi?
- ¹⁰Yesu loko lembe man ewacu ire kumae, In i japonji mir Israel, man ing'eyo gin maeni ngo?
- ¹¹Andhandha, awacu iri kumae, Wayero pi gin ma wang'eyo, man wanyutho pi gin ma waneno; wun re wujolo lembanyutha mwa ngo.
- ¹²Tek ayero iwu pi gin m'i ng'om man wuyio ngo, wubiyio nenedi tek ayero iwu pi gin m'i polo?
- ¹³Ng'atu moko mbe m'uidho i polo, ndhu ng'atu m'uloro kud i polo, en e Wod dhanu, ma eni i polo.
- ¹⁴Man calu yang' Musa ting'o thwol malu i yamba, e kumeno jubikoting'o Wod dhanu malu be;
- ¹⁵kara ng'atu ma tek uyio ubed ku kwo ma rondo ku rondo ni kume.
- ¹⁶Kum Mungu maru ng'om mumbe, ketho emio Wode kulong', kara ng'atu ma tek uyie kud erwiny ki, endre ebed ku kwo ma rondo ku rondo.
- ¹⁷Kum Mungu oro Wode i ng'om ungo ya upok lembe m'i ng'om rac; endre kara ng'om uboth ni kume.
- ¹⁸Ng'atu m'uyie lem pare pokre ngo: ng'atu m'uyio ngo lem pare daru pokre rac, kum eyio nying Wod Mungu kulong' ungo.
- ¹⁹Maeni de lembapoka, ya der ubino i ng'om, man dhanu gimaru mudho ma sagu der; kum tic migi rac.
- ²⁰Kum dhanu ceke kubang'gi ma gitimo rac gidagu der, gibino de ngo ba der, kara kujujuke kum ric pare.
- ²¹Endre ng'atu m'utimo lemandha bino ba der, kara tic pare nyuthie, nia gitimbri i Mungu.

- ²²Yo ng'ei gin maeni Yesu ku julubne gibino i ng'om Yahudi; erio keca gikugi, man emio baputisi.
- ²³Yohana bende bemio baputisi i Ainon ma kago ku Salim, kum pi dupa nuti keca: e gibino, gimaku baputisi.
- ²⁴Kum fodi jukubolo Yohana i odkol ungo.
- ²⁵Ka kumeno penji nyai i kind julub Yohana ku Juyahudi pi logo.
- ²⁶Gibino de ba Yohana, giwacu ire kumae, Japonji, en ma naka wubedo wukude loka Yordan, m'inyutho pire, nen, ng'atuni mio baputisi, dhanu ceke de gibino i bang'e.
- ²⁷Yohana loko lembe ewacu kumae, Ng'atu moko copo jolo gin moko ngo, tek emire ire kud i polo ngo.
- ²⁸Wun giwu wunyutho pira, nia awacu kumae, An a Kristu ngo, ento, ya juora i wang'e.
- ²⁹Ng'atu m'ubedo ku mugole en e cwar mugole: ento jarim cwar mugole, m'ucungo m'uwinje de, anyong'a kwa nege kum dwand cwar mugole: ka kumeno anyong'a maeni timbre kakare.
- ³⁰Ebikosagre be, ento an abikojwik be.
- ³¹Ng'atu m'uai malu esagu ceke; ng'atu m'i ng'om en e m'i ng'om, man eyero pi gin m'i ng'om: ng'atu m'uai i polo esagu ceke.
- ³²Gin maeni m'enido m'ewinjo de, mi maeno enyutho; ng'atu moko mbe de ma jolo lembanyutha pare.
- ³³Ng'atu m'ujolo lembanyutha pare emwono ayine kum maeni nia Mungu en e andha.
- ³⁴Kum ng'atu ma Mungu oro yero lembe pa Mungu: kum Mungu mio Tipo pa Mungu: kum Mungu mio Tipo ku mukero ngo.
- ³⁵Wego maru Wod, man emio gin ceke i cinge.
- ³⁶Ng'atu m'uyio Wod ebedo ku kwo ma rondo ku rondo; ento ng'atu m'uwooro Wod ungo bineno kwo ngo, ento kwinyo pa Mungu ni i wie.

Yohana 4

- ¹Ka kumeno ka Rwoth ung'eyo nia Jufarisayo giwinjo ya Yesu ketho julubne ma sagu pa Yohana emio igi baputisi de.
- ²(kadok Yesu en emio baputisi ngo, endre julubne),
- ³eweko Yahudi, man ecidho kendo Galilaya.
- ⁴Man nia ekoekadh ku i Samaria be.

- ⁵Ka kumeno ewok i adhura acel mi Samaria, ma julwong’o Sukar, ceng’ni ng’om ma Yakobo mio ni wode ma Yusuf:
- ⁶man kulo pa Yakobo de ni kakeno. Ka kumeno, Yesu m’uol ku woth pare, ubedo kumeno dhu kulo. Nwang’u saa yenyero romo mir abusiende.
- ⁷Dhaku ma Samaria bino twomo pi: Yesu wacu ire kumae, Mi ira amadhi.
- ⁸Kum julubne ci ng’iewo cam i adhura.
- ⁹Ka kumeno dhaku ma Samaria wacu ire kumae, Ebedo nenedi ma in m’i Jayahudi, e m’idong’ ikwayu pi i bang’a e, ma an ke a dhaku mi Samaria? (Kum Juyahudi giribri ngo ku Jusamaria).
- ¹⁰Yesu dwoko lembe ewacu ire kumae, Tek ing’eyo giramia pa Mungu, ku ng’atu m’uwacu iri kumae, Mi ira amadhi; kuno di ipenje, man kuno di emio iri pi mi kwo.
- ¹¹Dhakune wacu ire kumae, Rwoth, gin moko mbe i beng’i m’itwom ko, man kulone de thuth: ka kumeno inwang’u pi mi kwo maeni kani?
- ¹²I dit ma sagu kwaruwa ma Yakobo, m’emio iwa kulo, ma en de emadhu pige, ku wote, man lim pare?
- ¹³Yesu dwoko lembe ewacu ire kumae, Ku ba dhanu ceke m’umadhu pi maeni rieu binege kendo:
- ¹⁴ento ng’atu ma tek umadhu pi m’amio ire rieu binege kendo ki ngo; ento pi m’abimio ire bidoko ni kulo ma dhenyini i ie ni kwo ma rondo ku rondo.
- ¹⁵Dhaku wacu ire kumae, Rwoth, mi ira piguno, kara rieu kud unega, kadi kud abin atwom bor kuni.
- ¹⁶Yesu wacu ire kumae, Cidhi, ilwong’ cweri, e kan idwog keni.
- ¹⁷Dhakune dwoko lembe ewacu ire kumae, Cwara mbe. Yesu wacu ire kumae, Iwacu dre kumae, Cwara mbe:
- ¹⁸kum naka ibedo ku cogi abic; man ng’atu m’ibedo kude kawono de en e cweri ngo: maeni iwacu andha.
- ¹⁹Dhakune wacu ire kumae, Rwoth, aneno in i jabila.
- ²⁰Naka kwaruwa girwo wi goduni; enke wuwacu, nia Yerusalem e ma ka ma maku jurwo i ie.
- ²¹Yesu wacu ire kumae, Dhaku, yia, saa bino, ma wubirwo ie ni Wego wi goduni ngo, kadok i Yerusalem de ngo.
- ²²Wurwo ni gin ma wung’eyo ngo: wan re warwo ni gin ma wang’eyo; kum both uai ba Juyahudi.

²³Ento saa bino, man enuti kawono, ma ju ma jurwo mandha gibirwo ni Wego i tipo man i lemandha: kum Wego yenyoye wagi ju maeni e ma gibed jurwo ire.

²⁴Mungu en e Tipo: man ju m'urwo ire gikogirwo be i tipo man i lemandha.

²⁵Dhakune wacu ire kumae, Ang'eyo ya Masia bebino (ng'atu ma julwong'e Kristu): kan ebino, ebiyero iwa pi gin ceke.

²⁶Yesu wacu ire kumae, An m'ayero iri nini an a en.

²⁷I wi maeni julubne gibino; e igi wang' lii kum ebeweco ku dhakune; ento ng'atu moko mbe m'uwacu kumae, Iyenyoye ang'o? kadi, Nedi wuweco kude?

²⁸Kum kumeno dhakune weko agulu pare, man eai ecidho i adhura, ewacu de ni dhanu kumae,

²⁹Wubin, wunen ng'atu m'uyero ira pi gin ceke ma naka atimo: maeni copo bedo Kristu?

³⁰Giai i adhura ma gibino ko i bang'e.

³¹I kinde maeni julubne gikwaye, giwacu kumae, Japonji, cam cemo.

³²Ento ewacu igi kumae, Cam para nuti mir acama ma wung'eyo ngo.

³³Ka kumeno julubne giweco i kindgi kumae, Ng'atu moko kelo ire giracama moko?

³⁴Yesu wacu igi kumae, Cemo para en e timo yenyoye ma i ng'atu m'uora yenyoye, ku daru tic pare bende.

³⁵Wuwacu ngo, Fodi dwi dong' ang'wen, ka kakaicam biwoki? nen, awacu iwu kumae, Wung'ai weng'wu malu, wunen pothi, ya gidaru thwo mir akaya.

³⁶Ng'atu m'ukayu enwang'u sukulia, man ecoke nying' ni kwo ma rondo ku rondo; kara ng'atu m'ucoyo ku ng'atu m'ukayu de anyong'a neggi karacelo.

³⁷Kum i maeni lembawaca en e andha kumae, Ng'atu acel ucoyo, ng'atu mange ke kayu.

³⁸Aorowu nikayu maeno ma wumulu ku tic i kume ngo: jumange gimuli ku tije, wun de wumondo i muli mi tic migi.

³⁹Man dhanu mi Jusamaria dupa ma i adhura maeni giyie ni kum lembe pa dhakune, m'etuco kumae, Eyeroye ira gin ceke ma naka atimo.

⁴⁰Kum kumeno ka Jusamaria bino i bang'e, gikwaye ya gibed gikugi: man erio keca ceng' ario.

⁴¹Dhanu mange de dupa giyio kum lem pare;

⁴²e giwacu ni dhakune kumae, Kawono wayio ni kum wec peri ngo: kum wawinjo giwa, e wang'eyo nia maeni en e Jabodh mi ng'om andha.

- ⁴³Yo ng'ei ceng' ario eai kuca ecidho i Galilaya.
- ⁴⁴Kum Yesu en etuco ya jabila mbe ku yung i ng'om pare gire.
- ⁴⁵Kum kumeno kan ebino i Galilaya, Jugalilaya gijole, ma gidaru neno gin ceke m'etimo i Yerusalem i agba kum gin bende gicidho i agba.
- ⁴⁶Elund ebino kendo i Kana mi Galilaya, ka m'eloko ie pi doko ni pigulok. Nwang'u jakal moko p'ubimo nuti ma kum wode lith i Kapernaum.
- ⁴⁷Kan ewinjo nia Yesu ai iYahudi ebino i Galilaya ecidho i bang'e, man ekwaye ya elor piny, ekei kum wode; kum e ceng'ni tho.
- ⁴⁸E Yesu wacu ire kumae, Tek wuneno giranyutha ku musana de ngo, wubiyio ki ngo.
- ⁴⁹Jakal p'ubimo wacu ire kumae, Rwoth, lor piny ma fodi nyathin para ku tho ngo.
- ⁵⁰Yesu wacu ire kumae, Cidh i yo peri; wodi bedo kwo. Ng'atuno yio lembe ma Yesu wacu ire, man ecidho i yo pare.
- ⁵¹Kan ebeloro piny, erombo ku jumiru pare, ma giwacu ire nia wode bedo kwo.
- ⁵²Kum kumeno epenjogi pi saa ma kume maku kei i ie. Giwacu ire kumae, Nyaworo i saa mir abirone e kume m'ucek uweke.
- ⁵³Kum kumeno won ung'eyo nia en e saa ma Yesu wacu ie lembe ire kumae, Wodi bedo kwo: e en gire eyio, ku juode kpo.
- ⁵⁴Maeni giranyutha mir arionde kendo ma Yesu timo, kan eai i Yahudi ecidho Galilaya.

Yohana 5

- ¹Yo ng'ei gin maeni agba mi Juyahudi nuti; man Yesu idho malu Yerusalem.
- ²Nwang'u kut nuti Yerusalem ceng'ni dhu gang' mi rombe, ma julwong'o ku dhu Juebrania Bethesda, ma pondode abic.
- ³Udul ju ma kumgi lith uvuto i maeni, ku ju ma wang'gi cor, ku ju ma weg abala mi tielo, ku ju m'ulindri, ma gibekuro dhenyni mi pi:
- ⁴kum nindo moko malaika pa Rwoth loro piny i kut, man eketho pi dhenyni: e ng'atu ma tek ular umondo yo ng'ei dhenyni mi pi e tho ceke m'unyang' i kume kei ndhu.
- ⁵Nwang'u ng'atu acel nuti keca, m'ebedo ku mulima rundi pier adek wi abora.
- ⁶Ka Yesu nene m'ebevuto, eng'eyo de nia ebeto kumeno hai, ewacu ire kumae, Iyenyio kumi titre?

- ⁷Ng'atu ma kume lith udwoko ire lembe kumae, Rwoth, ng'atu moko mbe ira, m'uketha i kut kinde ma pi bedhenyni: ento kinde ma abebino ng'atu mange lar loro ira.
- ⁸Yesu wacu ire kumae, Ai malu ting' kavuto peri, iwothi.
- ⁹E ndhu ndhu nica kum ng'atuno titre, man eting' o kavuto pare ewotho. Nwang' u ceng' nino ceng' sabatu.
- ¹⁰Kum kumeno Juyahudi wacu ni ng'atu ma kume kei nino kumae, Maeni ceng' sabatu, man cik uyio ngo nik iting' kavuto peri.
- ¹¹Ento edwoko lembe igi kumae, Ng'atu m'utito kuma, e m'uwacu ira kumae, Ting' kavuto peri, iwothi.
- ¹²Gipenje kumae, Ng'atu m'uwacu iri, Ting' kavuto peri wothine en e ng'a?
- ¹³Ento ng'atu ma kume kei ung'eyo ngo nia en e ng'a; kum Yesu wodhre cen, udul dhanu de ni kakeca.
- ¹⁴Yo ku ng'ei gin maeni Yesu nwang'e i hekalu, ewacu ire de kumae, Nen, kumi titre ndhu: kud idong' idub kendo ba, gin ma rac ma sagu maru wok i kumi.
- ¹⁵Ng'atuno cidho ewacu de ni Juyahudi nia en e Yesu m'utito kume.
- ¹⁶Man kum lembe nini Juyahudi ginyayu ragedo kum Yesu, kum etimo gin maeno i ceng' sabatu.
- ¹⁷Ento Yesu loko lembe igi kumae, Vwa ubetimo tic cil ku kawono de, man an de atimo tic.
- ¹⁸Kum lembe nini Juyahudi yenyoye kanenge m'usagu, kum ekadhu ku wi cik mi ceng' sabatu kende ngo, ento elwong' o Mungu ngi ya Won ma dhe, m'ekethre gire ro ku Mungu.
- ¹⁹Yesu lund uloko lembe ewacu igi kumae, Andhandha, awacu iwu, Wod copo timo gin moko gire ngo ma k' eneno Wego betimo ngo: kum gin ma tek etimo, e Wod bende timo ginde kumeca.
- ²⁰Kum Wego maru Wod, man enyutho ire gin ceke m'etimo en: man ebinyutho ire tic ma sagu maeni, kara iwu wang'.
- ²¹Kum calu Wego ting' o ju m'utho, man emio igi kwo, e Wod bende mio kwo ni ju m'eyenyo kumeno.
- ²²Kum kadok Wego de poko lembe wi ng'atu moko ngo, endre emio lembapoka ceke ni Wod;
- ²³kara dhanu ceke giyung Wod cil calu giyungo Wego. Ng'atu m'uyungo Wod ungo eyungo Wego m'uore de ngo.

- ²⁴Andhaandha, awacu iwu kumae, Ng'atu m'uwinjo lem para, m'uyio ng'atu m'uora de, kwo ma rondo ku rondo ni kude, man ebino ngo i pokolembe, ento ekadhu kud i tho emondo i kwo.
- ²⁵Andhandha awacu iwu kumae, Saa bebino, man enuti kawono, ma ju m'utho biwinjo ie dwand Wod Mungu; man ju m'uwinjo gibibedo kwo.
- ²⁶Kum calu Wego bedo ku kwo i ie gire, cil kumeno emio ni Wod bende ku kwo i ie gire:
- ²⁷man emio ire ng'ol m'etim ko lembapoka, kum en e Wod dhanu.
- ²⁸Iwu kud uwang' kum lembe maeni: kum saa bebino, ma ju m'i liel ceke biwinjo ie dwande,
- ²⁹man gibiwok woko; ju m'utimo ber, ni cer mi kwo; ju m'utimo rac ke, ni cer mi pokolembe.
- ³⁰Acopo timo gin moko gira ngo: calu awinjo, e apoko lembe: man pokolembe para de pwe; kum asayu yeny ma ia yeny ngo, ento yeny ma i ng'atu m'uora yeny re.
- ³¹Tek anyutho lembe pira gira, nyutholembe para en e andha ngo.
- ³²Ng'atu mange e m'unyutho pira, e ang'eyo ya gin m'enyutho pira, en e andha.
- ³³Wuoro kwenda ba Yohana, en de enyutho nia en e lemandha.
- ³⁴Ento nyutholembe m'ajolo ai ba dhanu ngo: ento awacu gin maeni, kara wubothi.
- ³⁵En e thala m'uliel m'urieny de; man wuyio ya anyong'a negwu mi nindo moko i der pare.
- ³⁶Ento nyutholembe m'abedo ko e dit ma sagu Yohana; kum tic ma Wego mio ira adar, tic maeni m'atimo enyutho pira, nia Wego ora.
- ³⁷Man Wego m'uora, enyutho pira. Fodi wuwinjo dwande ngo nindo moko, kadi kite de fodi wuneno ngo.
- ³⁸Man wumbe ku lem pare m'ubedo i iwu: kum ng'atu m'eoro, wuyie ngo.
- ³⁹Wuyenyio i lembagora pa Mungu, kum wuwacu nia nyo wubedo ku kwo ma rondo ku rondo i igi; maeni de gi gin m'unyutho lembe pira;
- ⁴⁰man wuyenyio ngo wubin i bang'a, kara wubed ku kwo.
- ⁴¹Agamu dwong' ungo ba dhanu.
- ⁴²Ento ang'eyowu ya wumbe ku mer pa Mungu i iwu giwu.
- ⁴³Abino i nying' Vwa, man wujola ngo: tek ng'atu mange bino i nyinge gire, wubijole.

⁴⁴Wucopo yio nenedi ma wujolo dwong' ng'atuman ba wadi man ba wadi, man wuyenyu dwong' ungo m'uai ba Mungu m'e kende?

⁴⁵Kud wuwac nyo nia abidotowu ba Wego: ng'atu m'udotowu nuti, en e Musa, ma wuketho genogen mu i kume.

⁴⁶Kum tek wuyio Musa, kuno di wuyio an; kum egoro pira.

⁴⁷Ento yek wuyio lembagora pare ngo, wubiyio lem para nenedi?

Yohana 6

¹Yo ng'ei gin maeni Yesu cidho loka nam mi Galilaya, ma en e nam mi Tiberia.

²Udul dhanu ma dit de lubo ng'eye, kum gineno giranyutha m'etimo kum ju ma kumgi lith.

³E Yesu idho got malu, man ebedo kuca ku julubne.

⁴Nwang'u kadhukuwijo ma en e agba mi Juyahudi, udhingo.

⁵Ka kumeno Yesu m'uting'o wang'e malu, m'eneno de udul dhanu ma dit ubebino i bang'e, ewacu ni Filipino kumae, Wabing'iewo kwen kani, kara joni gicami?

⁶Ewacu lembe maeni m'emulo ko ie: kum eng'eyo en gin m'ebitimo.

⁷Filipo loko lembe ire kumae, Kwen mi denarii dak ario de ciromo kugi ngo, ma ka kubang'gi nzu ging'wenyo nyanok nyanok.

⁸Acel m'i kind julubne, en e Andrea, m'umin Simon Petro, uwacu ire kumae,

⁹Nyathinyir acel ni keni, ma lungu kwend nganu abic ni kude, ku rec ario: ento maeni ang'o i kind adhudhe ma kumeni?

¹⁰Yesu wacu kumae, Wuketh dhanu bed piny. Nwang'u kakeca lum dit i ie. Kum kumeno jumaco gibedo piny, welgi yenyo romo rubanga abic.

¹¹E Yesu ting'o lungu kwen; e kan efoyo pire, epoko ni ju m'ubedo piny; rec bende kumeno calu ma giyenyo.

¹²E ka giyeng', ewacu ni julubne kumae, Wucok kodine m'udong', kara gin moko kud urwiny.

¹³E gicokogi, man gipong'o katoko apar wi ario ku kodi lungu kwend nganu abic m'udong' ni ju m'ucamu.

¹⁴Nie ka dhanu neno giranyutha m'etimo, giwacu kumae, Maeni jabila andha m'ubebino i ng'om.

¹⁵Ka kumeno Yesu m'ung'eyo ya giyenyo bino make ku tego, ya gikethe ni ubimo, eai kendo eciho wi got e kende.

¹⁶Ka piny udoko uthieno julubne giloro piny dhu nam;

- 17^e giidho i combo, man gibecidho Kapernaum loka nam. E i kinde maeni piny uyutho, Yesu de fodi ubino i bang'gi ngo.
- 18^E wang' nam de maku tuk kum yamu ma dit m'ukoto.
- 19^{Ka} kumeno ka gikiewo ma yenyo romo ungolo abic kadi abiro, gineno Yesu m'ubewotho ku wi nam, ebedhingo combo de: e lworu makugi.
- 20^{Ento} ewacu igi kumae, En e an; lworu kud unegwu.
- 21^{Ka} kumeno giyenyo gijole i combo: e eni eni combo tundo i ng'om ka ma gibecidho i ie.
- 22^{Urwone} udul dhanu m'ucungo loka nam uneno nia yei mange mbe kakeca, ento acel, nia Yesu de mondo ngo ku julubne i combo, ento ya julubne gicidho kendgi ²³(ento yei moko ai i Tiberia ubino ceng'ni ka ma gicamu ie kwen yo ng'ei foyofoc ma Rwoth ufoyo):
- 24^e kan udul dhanu neno nia Yesu mbe kakeca, kadok julubne de, gin gigi gimondo i yei, man gibino Kapernaum, ma gibeyenyo ko ka Yesu.
- 25^{Ka} ginwang'e de loka nam, giwacu ire kumae, Japonji, ibino kakeni awene?
- 26^{Yesu} dwoko lembe igi ewacu kumae, Andhandha, awacu iwu, Wuyenya ngo kum wuneno giranyutha, ento kum wucamu lungu kwen wuyeng'.
- 27^{Kud} wutim pi cam ma nyothre, endre pi cemo m'ubedo mi kwo ma rondo ku rondo ma Wod dhanu bimio iwu: kum Wego, ma Mungu, mwono ayi i kume.
- 28^{Ka} kumeno giwacu ire kumae, Wabitimo ang'o, kara watim tic pa Mungu?
- 29^{Yesu} loko lembe ewacu igi kumae, Maeni tic pa Mungu ya wuyi ng'atu m'eoro.
- 30^E giwacu ire kumae, Ka kumeno itimo giranyutha ang'o kara wanen, e wayii bende? itimo ang'o?
- 31^{Yang'} wegwa gicamu mana i yamba; calu egore kumae, Emio igi kwen m'uai i polo gicam.
- 32^{Ka} kumeno Yesu wacu igi kumae, Andhandha, ayero iwu, Kwen m'uai i polo Musa mio iwu en ungo; ento Vwa e m'umio iwu kwen mandha m'uai i polo.
- 33^{Kum} kwen pa Mungu en e maeno m'uai i polo loro piny, man emio kwo de ni ng'om.
- 34^E giwacu ire kumae, Rwoth, bedimi iwa kwen maeni thiri thiri.
- 35^{Yesu} wacu igi kumae, An a kwen mi kwo: ng'atu m'ubino i bang'a kec binege ngo, ng'atu m'uyia de rieu binege ki ngo.
- 36^{Ento} awacu iwu, nia wunena, ere fodi wuyio ngo.

- 37 Ceke ma Wego mio ira gibibino i bang'a: ng'atu m'ubino i bang'a de abibaye woko ki ngo.
- 38 Kum aloro kud i polo piny, nitimo yeny ma ia yeny an ungo, ento yeny ma i ng'atu m'uora yeny re.
- 39 Man maeni en e yeny ma i ng'atu m'uora yeny re, ya kum ceke m'emio ira moko kud urwiny ira, endre aketh ecung i kajikceng'.
- 40 Kum maeni en e yeny ma i Vwa yeny nia ceke kubang'gi m'uneno Wod, m'uyie de, ubed ku kwo ma rondo ku rondo; man abiting'e malu i kajikceng'.
- 41 Ka kumeno Juyahudi ging'ur i kume, kum ewacu kumae, An a kwen m'uai i polo loro piny.
- 42 Man giwacu kumae, Maeni Yesu ngo, ma wod Yusuf, ma wang'eyo won ku mini? kawono ewacu nenedi kumae, Aai i polo aloro pinyi?
- 43 Yesu loko lembe ewacu igi kumae, Kud wung'ur i kindwu giwu.
- 44 Ng'atu moko mbe ma copo bino i bang'a, tek Wego m'uora kupeye ngo: man abiketho ecungo i kajikceng'.
- 45 Egore i lem jubila kumae, Gin ceke gbinwang'u ponji ba Mungu. Dhanu ceke kubang'gi m'uwinjo ba Wego, m'ugamu ng'eyo de gibino i bang'a.
- 46 En e nia ng'atu moko neno Wego ngo, ndhu ng'atu m'uai ba Mungu, e m'uneno Wego.
- 47 Andhandha, ayero iwu kumae, Ng'atu m'uyio ebedo ku kwo ma rondo ku rondo.
- 48 An a kwen mi kwo.
- 49 Yang' wegwu camu mana i yamba, man githo.
- 50 Maeni kwen m'uai i polo loro piuy, kara ng'atu m'ucamu kume moko kud etho.
- 51 An a kwen mi kwo m'uai i polo loro piny: tek ng'atu moko camu kwen maeni, ebibedo rondo ku rondo: eyo kwen de m'abimio en e ring' kuma, pi kwo mi ng'om.
- 52 Ka kumeno Juyahudi gipiembri i kindgi, giwacu kumae, Ng'atu maeni copo mio ring' kume iwa ya wacam nenedi?
- 53 Ka kumeno Yesu wacu igi kumae, Andhandha, awacu iwu, Tek wucamu ring' kum Wod dhanu ngo, wumadhu rimbe de ngo, wumbe ku kwo i iwu giwu.
- 54 Ng'atu m'ucamu ring' kuma m'umadhu rimba de ebedo ku kwo ma rondo ku rondo; man abiketho ecungo i kajikceng'.
- 55 Kum ring' kuma en e cemo mandha, rimba de en e giramadha mandha.

- ⁵⁶Ng'atu m'ucamu ring' kuma m'umadhu rimba de ebledo i ia, an de abledo i ie.
- ⁵⁷Calu Wego ma kwo ora, man abledo de ni kum Wego; kumeno ng'atu m'ucama en bende ebibedo ni kuma.
- ⁵⁸Maeni kwen m'uai i polo loro piny: calu ma yang' wego camu ngo, man githo; ng'atu m'ucamu kwen maeni re bibedo rondo ku rondo.
- ⁵⁹Eyero lem maeni i kacokri, kinde m'eponjo i Kapernaum.
- ⁶⁰Ka kumeno kind julubne dupa, ka giwinjo maeni, giwacu kumae, Maeni lembe ma tek ng'a ma copo winje?
- ⁶¹Ento Yesu m'ung'eyo i ie gire ya julubne ging'ur kum maeni, ewacu igi kumae, Maeni ketho wukieri?
- ⁶²Ka kumeno ang'o tek wubineno Wod dhanu beidho ka m'elar ebledo i ie?
- ⁶³En e tipo ma mio kwo; kum kulokane mbe: lembe m'adaru yero iwu gi tipo, gi kwo de.
- ⁶⁴Ento jumoko nuti i kindwu m'uyio ngo. Kum Yesu ng'eyo ku kwong'a ju m'uyio ngo, man ng'atu ma bicibe.
- ⁶⁵Man ewacu kumae, Kum lembe nini awacu iwu nia ng'atu moko mbe ma copo bino i bang'a, tek emire ire ku ba Wego ngo.
- ⁶⁶Kum maeni kind julubne dupa gidok cen, man giwotho kugi kendo ngo.
- ⁶⁷Ka kumeno Yesu wacu ni ju apar wi ario kumae, Wun bendewuyenyo wucidhi?
- ⁶⁸Simon Petro loko lembe ire kumae, Rwoth, wabacidho ba ng'a? In i won lembe mi kwo ma rondo ku rondo.
- ⁶⁹E wadaru yio wang'eyo de nia in i Ng'atu Maleng' pa Mungu.
- ⁷⁰Yesu loko lembe igi kumae, Agoyo wiwu an ungo wun apar wi ario, man kindwu acel en e wonabali?
- ⁷¹Karaman eyero pi Yuda ma wod Simon Iskariote, kum en e ng'atu ma bicibe, en e acel m'i kind juapar wi ario.

Yohana 7

- ¹Yo ng'ei gin maeni Yesu wotho i Galilaya kum eyenyo ngo ewoth i Yahudi, kum Juyahudi giyenyo nege.
- ²Nwang'u agba mi Juyahudi, ma en e agba mi otbak, udhingo ceng'ni.
- ³E utumin uwacu ire kumae, Ai kakeni, icidh i Yahudi, kara julubni bende ginen tic peri m'itimo.
- ⁴Kum ng'atu moko mbe ma rimo gin moko ling', ma en ebeyenyo jung'eye ngbeng'. Tek itimo gin maeni, nyuthri giri ni ng'om.

- ⁵Kum cil utumin de giyie ngo.
- ⁶Ka kumeno Yesu wacu igi kumae, Nindo para foduwok ungo; ento nindo mu nuti thiri thiri.
- ⁷Ng'om copo daguwu ngo; ento an edagu, kum atuco pire, nia tic pare rac.
- ⁸Wuidh malu i agba: aidho malu i agba maeni ngo, kum nindo para foduromo ngo.
- ⁹E kan edaru yero lembe maeni igi ebedo asu i Gahiaya.
- ¹⁰Ento ka utumin uidho malu i agba, elund eidho malu bende, kele re ngo, ento calu lwe.
- ¹¹Ka kumeno Juyahudi giyenye i agba, e giwacu kumae, Eni kani?
- ¹²Man ng'ur dit ni i kind udul dhanu pire: jumoko wacu kumae, En e ng'atu ma ber: jumange ke wacu kumae, Kumeno ngo, ento erwinyo udul dhanu arwinya.
- ¹³Ento ng'atu moko mbe m'uyero pire kele ni lworu mi Juyahudi.
- ¹⁴Ento kan agba tundo i diere Yesu idho malu i hekalu, man eponjo.
- ¹⁵Ka kumeno Juyahudi igi wang' lii, giwacu kumae, Ng'atuni ng'eyo nyiguta nenedi ma fokeponjo ngo e?
- ¹⁶Ka kumeno Yesu dwoko igi lembe ewacu kumae, Ponji para en e para ngo, endre pa ng'atu m'uora.
- ¹⁷Tek ng'atu moko yenyo etim yeny ma ie yenyo, ebing'eyo pi ponjine, tek en e pa Mungu, kadi ayero gira.
- ¹⁸Ng'atu m'uyero lembe m'uai i bang'e gire eyenyo dwong' ire gire: ento ng'atu m'uyenyo dwong' pa ng'atu m'uore, ng'atuno en e andha, gondri de moko mbe i ie.
- ¹⁹Musa mio iwu cik ungo, ere ng'atu moko mbe i kindwu m'utimo cikne? Nedi wuyenyo wunega?
- ²⁰Udul dhanu loko lembe kumae, Pajogi ni ii: ng'a m'uyenyo enegi?
- ²¹Yesu loko lembe ewacu igi kumae, Atimo tic acel, e wun ceke iwu wang' lii pire.
- ²²Musa yang' umio iwu yaa (ma nia en e pa Musa re ngo, endre mi wego); man wutimo yaa i kum dhanu ceng' sabatu.
- ²³Tek dhanu jolo yaa i ceng' sabatu, kara ku jukadh ku wi cik pa Musa; kwinyo negowu i kuma, kum atito kum ng'atu moko i ceng' sabatu?
- ²⁴Kud wupok lembe calu m'anena, endre wupok lembapoka ma pwe.
- ²⁵Ka kumeno jukucel m'uai Yerusalem giwacu kumae, maeni en e ng'atu ma gibeyenyo gineg ungo?

26Nen, ebeyero kele, giyero ire lem moko ngo. Nyo jubim ging'eyo andha nia maeni en e Kristu?

27Ento wang'eyo ng'atu maeni ka m'eai i ie: ento ka Kristu bino, ng'atu moko mbe ma bing'eyo ka m'eai i ie.

28E ka Yesu kok akoka i hekalu, m'ebeponjo ewacu de kumae, Wung'eya, wung'eyo de ka m'aai i ie; abino de gira ngo, ento ng'atu m'uora en e andha, ma wung'eyo ngo.

29Ang'eye, kum aai i bang'e, man eora.

30Ka kumeno giyenyoko kamake: man ng'atu moko mbe m'uketho cinge i kume, kum saa pare fokuwoko ungo.

31Ento kind udul dhanu dupa giyie; man giwacu kumae, Ka Kristu bibino, ebitimo giranyutha ma sagu maeni ma ng'atuni timo?

32Jufarisayo giwinjo udul dhanu beng'uro gin maeni pire: e julam ma dongo ku Jufarisayo gioro asikari nimake.

33Ka kumeno Yesu wacu kumae, Nindo ma nok wanuti wakudu, man acidho ba ng'atu m'uora.

34Wubiyenya, ere wubinwang'a ngo: e ka ma ani i ie, wucopo bino ngo.

35Ka kumeno Juyahudi giweco i kindgi gigi kumae, Ng'atuni bicidho kani ma wakubinwang'e ngo e? ebicidho ba ju m'ulal i kind Juyunani, man ebiponjo Juyunani?

36Lembe maeni m'eyero kumae lembang'o, Wubiyenya, ere wubinwang'a ngo; ka m'abedo i ie de wucopo bino ngo?

37Nie i kajikceng', ma en e ceng' ma dwong' mir agba Yesu cungo ekok akoka, ewacu kumae, Tek rieu nego ng'atu moko, dong' ebin i bang'a emadhi.

38Ng'atu m'uyia, kulo mi pi mi kwo bithwogre kud i ie, calu lembagora pa Mungu wacu.

39Ento maeni eyero pi Tipo ma ju m'uyie bijolo: kum Tipo Maleng' fodumire ngo; kum fodi jukuyungo Yesu ngo.

40Ka kumeno jumoko ma kind udul dhanu ka giwinjo lembuni giwacu kumae, Maeni en e jabila andha.

41Jumange giwacu kumae, Maeni Kristu. Ento jumoko wacu kumae, Ang'o, Kristu ai i Galilaya?

42Lembagora pa Mungu wacu ngo nia Kristu ai ba kodhi Daudi, man i Bethlehem, pacu ma yang' Daudi bedo i ie?

43Kum kumeno pokri wok i kind udul dhanu pire.

- ⁴⁴Jumoko m'i kindgi giyenyo gimake; ento ng'atu moko mbe m'uketho cinge i kume.
- ⁴⁵Ka kumeno asikari gibino ba julam ma dongo ku Jufarisayo; e giwacu igi kumae, Wukele ngo nedi?
- ⁴⁶Asikari giloko lembe kumae, Ng'atu ma foduweco kumeca mbe.
- ⁴⁷Ka kumeno Jufarisayo loko igi lembe kumae, Wun bende wurwinyo?
- ⁴⁸Kind jubim moko nuti m'uyie, kadi kind Jufarisayo de?
- ⁴⁹Ento udul dhanu maeni m'ung'eyo cik ungo gibedo akwong'a.
- ⁵⁰Nikodemo (ma ng'atu acel m'i kindgi, m'ular ubino i bang'e), uwacu igi kumae,
- ⁵¹Cik mwa poko lembe pa ng'atu moko, ma k'elar ewinje ngo, eng'eyo gin m'etimo de ngo?
- ⁵²Giloko lembe giwacu ire kumae, In bende in i ng'atu m'i Galilaya? Koieny, inen de jabila moko mbe m'uai i Galilaya.
- ⁵³(Man ku ba dhanu ceke ng'atuman udok i ot pare man i ot pare:

Yohana 8

- ¹Ento Yesu cidho wi got Zeituni.
- ²Pir kugweno ebino kendo i hekalu, dhanu ceke de gibino i bang'e; man ebedo piny eponjogi.
- ³Jugorcik ku Jufarisayo de gikelo dhaku ma jurube m'ebegiere swa; e ka gikethe i diere,
- ⁴giwacu ire kumae, Japonji, dhaku maeni jurube wi gier, kpa wi gier.
- ⁵Nwang'u i cik re Musa ng'olo iwa ya waneg wagi ma kumeni acanya ku kidi; ka kumeno in ke iwacu ang'o pire?
- ⁶E giwacu maeni, ma gibidhe ko, kara ginwang' agobe i wie. Ento Yesu gung' piny, man egoro wi ng'om ku lwete.
- ⁷Ento ka gipenje asu, etingre malu, ewacu igi kumae, Ng'atu ma dubo mbe kude i kindwu ci, dong' ekwong' canye ku kidi.
- ⁸Egung' piny kendo, man egoro wi ng'om ku lwete.
- ⁹E gin, ka giwinjo lembe maeni, giwok woko acel acel uthekre kum jadit, cil kum m'udong' cen: man Yesu dong' kende, ku dhaku, ma ni i diere.
- ¹⁰E Yesu tingre malu, man ewacu ire kumae, Dhaku, gini kani? ng'atu moko mbe m'upoko lembe i wii raci?

- 11**E ewacu kumae, Ng'atu moko mbe Rwoth. E Yesu wacu kumae, An bende apoko lembe rac i wii ngo: cidh i yo peri; ugambre kawono kud idong' idub kendo.)
- 12**Yesu lund uyero igi kendo, ewacu kumae, An a der m'i ng'om; ng'atu m'ulubo ng'eya biwotho i mudho ngo, ento ebibedo ku der mi kwo.
- 13**Ka kumeno Jufarisayo wacu ire kumae, Inyutho lembe piri giri; nyutholembe peri en e andha ngo.
- 14**Yesu dwoko lembe ewacu igi kumae, Kadok anyuth lembe pira gira, nyutholembe para en e andha; kum ang'eyo ka m'aai i ie, ku ka m'acidho i ie de; ento wun wung'eyo ngo ka m'aai i ie, kadi ka m'acidho i ie de.
- 15**Wupoko lembe calku kum; an apoko lembe kum ng'atu moko ngo.
- 16**Eyo tek apoko lembe, pokolembe para en e andha: kum an a kenda ngo, ento waku Wego m'uora.
- 17**Eyo man i cik mu egore kumae, ya nyutholembe mi juario en e andha.
- 18**An a ng'atu m'ubenyutho lembe pira gira, Wego m'uora de benyutho lembe pira.
- 19**Ka kumeno giwacu ire kumae, Wuru nikani? Yesu loko lembe kumae, Wung'eya ngo, kadok Vwa de: dok wung'eya kuno di wung'eyo Vwa bende.
- 20**Eyero lembuni i kakanpiny, kinde m'eponjo i hekalu: man ng'atu moko mbe m'umake; kum saa pare fokuwok ungo.
- 21**Ka kumeno ewacu igi kendo kumae, Aai woko man wubiyenya, e wubitho i dubo mu: ka m'acidho i ie wucopo bino ngo.
- 22**Ka kumeno Juyahudi giwacu kumae, Ebinegre gire, kum ewacu kumae, Ka m'acidho i ie, wucopo bino ngo?
- 23**E ewacu igi kumae, Wun wuai piny; an aai malu: wun wu mi ng'om maeni; an a mi ng'om maeni ngo.
- 24**Ketho awacu iwu nia wubitho i dubo mu: kum tek wuyio ngo nia an a en, wubitho i dubo mu.
- 25**Ka kumeno giwacu ire kumae, In i ng'a? Yesu wacu igi kumae, Cil maeno bende m'ayero iwu ku kwong'a.
- 26**Giki dupa ni kuda m'ayer apok de piwu: ento ng'atu m'uora en e andha; man gin m'awinjo i bang'e, e ayero ginde ni ng'om.
- 27**Ging'eyo ngo nia eyero igi pi Wego.
- 28**Ka kumeno Yesu wacu kumae, Ka wudaru ting'o Wod dhanu malu wubilund ng'eyo nia an a en man nia atimo gin moko gira ngo, endre ayero gin maeni calu Wego ponja ko.

²⁹Man ng'atu m'uora eni karacelo kuda; eweka kenda ngo, kum atimo gin maeno thiri thiri ma nyayu mutoro i ie.

³⁰Kan eyero gin maeni, dhanu dupa giyio ire.

³¹Ka kumeno Yesu wacu ni Juyahudi maeno m'uyie kumae, Tek wubedo i lem para, nwang'u wu julubna mandha;

³²man wubing'eyo lemandha, e lemandhane bigonyowu.

³³Giloko lembe ire kumae, Wan wa kodhi Ibrahim, fodi wabedo ng'eca pa ng'atu moko ngo: iwacu nenedi, Wubigonjru?

³⁴Yesu loko lembe igi kumae, Andhandha awacu iwu, Ku ba dhanu ceke ma timo dubo en e jamiru mi dubo.

³⁵Man jamiru bedo i ot nja ngo: wod e ma bedo mi nja.

³⁶Ka kumeno tek Wod bigonyowu, wubibedo agonya andha.

³⁷Ang'eyo nia wu kodhi Ibrahim; ento wuyenyo ka nega, kum ka lembe para mbe i iwu.

³⁸Ayero gin m'aneno ba Vwa: wun bende wutimo gin ma wuneno ba wegwu.

³⁹Giloko lembe giwacu ire kumae, Wegwa en e Ibrahim. Yesu wacu igi kumae, Tek wu nyithindho pa Ibrahim kuno di wutimo tic pa Ibrahim.

⁴⁰Ento kawono wuyenyo ka nega an m'a ng'atu m'ayero iwu lemandha, m'awinjo ba Mungu: maeni Ibrahim utimo ngo.

⁴¹Wutimo tic pa wegwu. Giwacu ire kumae, Junyolowa ku tarwang' ungo; Wegwa acel, en e Mungu.

⁴²Yesu wacu igi kumae, Dok Mungu en e Wegwu, kuno di wumara: kum aai ba Mungu abino eni; kum abino gira ngo, ento eora en.

⁴³Nedi wung'eyo wec para ngo? en e kum wucopo winjo lembe para ngo.

⁴⁴Wun wu pa wegwu ma wonabali, e wuyenyo wutim awanya ma rac pa wegwu. Cil ku kwong'a en e janek, man ecungo ngo i lemandha, kum lemandha mbe i ie. Kan eyero ndra, eyero kum gin m'ebedo ko: kum en e jandra, man e won ndrane.

⁴⁵Ento kum ayero lemandha, wuyia ngo.

⁴⁶Ng'a ma ni i kindwu m'utuco wia kum dubo? Tek ayero lemandha wuyia ngo nedi?

⁴⁷Ng'atu ma en e pa Mungu ewinjo lembe pa Mungu: kum lembe nini wuwinjo ngo, kum wu pa Mungu ngo.

⁴⁸Juyahudi giloko lembe giwacu ire kumae, Wayero dre ngo nia i Jasamaria, man pajogi ni ii?

- ⁴⁹Yesu loko lembe kumae, Pajogi mbe i ia; ento ayungo Vwa, man wun re ma wuketho abedo umbe yung.
- ⁵⁰Ento ayenyo kadwong' para gira ngo: ng'atu acel nuti m'ubeyenyo m'ubepoko lembe de.
- ⁵¹Andhandha, ayero iwu kumae, Tek ng'atu moko woro lem para, ebineno tho ki ngo.
- ⁵²Juyahudi wacu ire kumae, Kawono wapoing'eyo nia pajogi ni ii. Ibrahim utho ku jubila bende; man iwacu kumae, Tek ng'atu moko woro lem para, ebibilo tho ki ngo.
- ⁵³In i dit ma sagu wegwa Ibrahim, m'utho? man jubila bende tho: ikethri ni ng'a?
- ⁵⁴Yesu loko lembe kumae, Tek ayungra gira, nwang'u dwong' para en e gin moko ngo: en e Vwa e m'uyunga: ma wuwacu pire, nia en e Mungu mu;
- ⁵⁵man wung'eye ngo: ento ang'eye; man tek awacu ya ang'eye ngo, abibedo jandra calu wun: ento ang'eye, man aworo lem pare.
- ⁵⁶Wegwu ma Ibrahim anyong'a nege kum ebineno ceng' para: man enene, anyong'a nege de.
- ⁵⁷Ka kumeno Juyahudi giwacu ire kumae, Rundi peri fodi pier abic ungo, man ineno Ibrahimu?
- ⁵⁸Yesu wacu igi kumae, Andhandha, awacu iwu, Ku kwong'a ma fodi jukunyolo Ibrahim ungo, nwang'u anuti.
- ⁵⁹Gilund giting'o kidi nik gicanye ko: ento Yesu pale gire, man ewok ku i hekalu.

Yohana 9

- ¹Kan ebekadhu, eneno ng'atu ma wang'e cor ugambre i kanyol pare.
- ²Man julubne gipenje, giwacu kumae, Japonji, ng'a m'udubo, ng'atuni, kadi junyodo pare, ketho junyole ma wang'e cori?
- ³Yesu dwoko lembe kumae, Ng'atuni dubo ngo kadok junyodo pare de: ento kara tic pa Mungu nyuthre i kume.
- ⁴Wakowatimu tic pa ng'atu m'uora be, ma fodi ceng' nuti: diewor ubebino, ma ng'atu moko mbe ma copo timo ie tic.
- ⁵Ma fodi ani i ng'om, an a der mi ng'om.
- ⁶Kan eyero kumeno, eng'ulo lau i ng'om, man etimo ulobo ku laune, man ewiro ulobo i wang' ng'atu ma wang'e cor,
- ⁷ewacu ire kumae, Cidhi, ilog i kut mi Siloam (thelebene ka juloke, Or). Ka kumeno ecidho, elogo de, man ebino m'eneno.

- ⁸Ka kumeno juwadi, ku ju ma yang' ginene, nia en e jakwaipiny, giwacu kumae, Maeni en e ng'atu ma bedo bekwayu piny e ngo?
- ⁹Jumange wacu kumae, En e en: jumange ke wacu kumae, Ungo, endre e calu en. Ewacu kumae, An a en.
- ¹⁰Ka kumeno giwacu ire kumae, E ka weng'i yabre nenedi?
- ¹¹Eloko lembe kumae, Ng'atu ma julwong'o Yesu etimo ulobo ewiro i wang'a de, man ewacu ira kumae, Ci Siloam, ilogi: ka kumeno acidho alogo, e wang'a lero.
- ¹²Giwacu ire kumae, Ng'atuno nikani? Ewacu kumae, Ang'eyo ngo.
- ¹³Gitero ng'atu ma naka wang'e corne ba Jufarisayo.
- ¹⁴Nwang'u ceng' ma Yesu timo ie ulobone man eyabu wang'e de en e ceng' sabatu.
- ¹⁵Ka kumeno Jufarisayo bende gipenje kendo maram wang'e lero ko. Man ewacu igi kumae, Eketho ulobo i wang'a, man alogo, e aneno piny eni.
- ¹⁶Ka kumeno jumoko ma kind Jufarisayo giwacu kumae, Ng'atuni ai ba Mungu ngo, kum ekwiro ceng' sabatu ngo. Ento jumoko wacu kumae, Ng'atu ma jadubo copo timo giranyutha ma kumeni nenedi? E pokri ni i kindgi.
- ¹⁷Ka kumeno giwacu kendo ni ng'atu ma wang'e cor, Iwacu ang'o pire, ni weng'i m'eyabu? E ewacu kumae, En e jabila.
- ¹⁸Ka kumeno Juyahudi giyio pire ngo nia naka wang'e cor, ka wang'e lero kendo, ma fodi gikulwong'o junyodo pare ngo en e ng'atu ma wang'e lerone,
- ¹⁹man gipenjogi giwacu kumae, Maeni wodwu, ma wuwacu nia junyole ma wang'e cori? e ka kawono ke eneno piny nenedi?
- ²⁰Junyodo pare gioko lembe giwacu kumae, Wang'eyo nia maeni en e wodwa, nia junyole de ma wang'e cor:
- ²¹ento maram eneno ko piny kawono, wang'eyo ngo; kadi nia ng'a m'uyabu wang'e de wang'eyo ngo: wupenje; wang'e teng'ni, ebiyero gire.
- ²²Junyodo pare giyero lem maeni, kum gilworo Juyahudi: kum Juyahudi gidaru ripo lembe, nia tek ng'atu moko bituco ya en e Kristu, e jubikabe woko kud i kacokri.
- ²³Ka kumeno junyodo pare wacu kumae, Wang'e teng'ni; wupenje.
- ²⁴Ka kumeno gilwong'o ng'atu ma yang' wang'e cor wang' arionde, giwacu ire kumae, Mi yung ni Mungu: wang'eyo nia ng'atuni en e jadubo.
- ²⁵Ka kumeno eloko lembe kumae, Kadok en e jadubo, ang'eyo ngo: ang'eyo gin acel, nia, naka wang'a cor, kawono re aneno piny.
- ²⁶Gilund gipenje kumae, Etimi nenedi? eyabu weng'i nenedi?

- ²⁷Eloko lembe igi kumae, Ayero iwu kawono, e wuwinjo ngo; wuyenyo wuwinj lembene kendo nedi? wun bende wuyenyo wudok julubne?
- ²⁸Man gicaye, giwacu kumae, In i jalubne; ento wan wa julub Musa.
- ²⁹Wang'eyo nia yang' Mungu weco ku Musa: ento pi ng'atuno, wang'eyo ngo ka m'eai i ie.
- ³⁰Ng'atuni dwoko lembe wacu igi kumae, Ei, maeni en e gin ma wang'u ijo, nia wung'eyo ngo ka m'eai i ie, enke eyabu wang'a.
- ³¹Wang'eyo nia Mungu winjo weg dubo ngo: ento tek ng'atu moko jarwo ni Mungu, etimo yeny ma ie yenyo de, e ewinje.
- ³²Ugambre ma ng'om uthekre fodi juwinjo ngo nia ng'atu moko yabu wang' ng'atu ma junyole ma wang'e cor.
- ³³Tek ng'atuno ai ba Mungu ngo, eco po timo gin moko ngo.
- ³⁴Giloko lembe giwacu ire kumae, Junyoli ndhu i dubo, man iponjo wani? E girieme woko.
- ³⁵Yesu winjo nia girieme woko; kan enwang'e de, ewacu ire kumae, Iyio ni Wod Mungu?
- ³⁶Eloko lembe ewacu kumae, En e ng'a, Rwoth, kara ayi ire?
- ³⁷Yesu wacu ire kumae, Inene, man en e en ma wubeweco wukude nini.
- ³⁸Ewacu kumae, Rwoth, ayio. E erwo ire.
- ³⁹Yesu wacu kumae, Kum lembapoka abino i ng'ombuni, kara ju ma neno piny ungo ginen; man kara ju ma neno piny ke gidok ni abinga.
- ⁴⁰Jumoko mi Jufarisayo ma gibedo kugi giwinjo lembe maeni, man gipenje kumae, Wan bende wan abinga?
- ⁴¹Yesu wacu igi kumae, Tek wun abinga, kuno di dubo mbe kudu: ento kawono wuwacu kumae, Waneno piny: kum kumeno dubo mu dong'.

Yohana 10

- ¹Andhandha, ayero iwu kumae, ng'atu ma mondo i dwol mi rombe ku dhugola ngo, ento eidho ku yo ku mange, ng'atuca en e jakwo, man jayek.
- ²Ento ng'atu ma mondo ku dhugola en e jakwac mi rombe.
- ³Jakur dhugola yabu ire; rombe de winjo dwande: man elwong'o rombe pare ma dhe ku nying'gi, etelo wigi de woko.
- ⁴Kan edaru wodho pare ma dhe ceke woko, etelo wigi, e rombe de gilubo ng'eye: kum ging'eyo dwande.
- ⁵Man gibilubo ng'ei welo ngo, ento gibipiei ire: kum ging'eyo dwand welo ngo.

- ⁶Yesu yero lembabola maeni igi: ento thelembe m'eyero igi ging'eyo ngo.
- ⁷Ka kumeno Yesu wacu igi kendo kumae, Andhandha, awacu iwu, An a dhugola mi rombe.
- ⁸Ju m'ular ubino ira ceke gi jukwo ku juyek: ento rombe winjogi ngo.
- ⁹An a dhugola; tek ng'atu moko mondo yor i bang'a, ebiboth, man ebimondo ebiwok woko de, ebinwang'u arusi de.
- ¹⁰Jakwo bino ngo, ndhu kara ekwal kwo, eneg nek, enyothi: an re abino kara gibed ku kwo, gibed kude dit apila.
- ¹¹An a jakwac ma ber: jakwac ma ber mio kwo pare pi rombe.
- ¹²Ng'atu ma jatic, ma jakwac ungo, ma won rombe de ngo, kan eneno urudi bebino, eweko rombe, epiei, urudi de makugi, elalugi:
- ¹³epiei kum en e jatic, man ie pido pi rombe ngo.
- ¹⁴An a jakwac ma ber; man ang'eyo para ma dhe, para ma dhe de ging'eya,
- ¹⁵cil calu Wego ng'eya, an de ang'eyo Vwa; man amio kwo para pi rombe.
- ¹⁶Rombe para mange nuti, ma gi mi dwonduni ngo: gin bende akoakelgi be, man gibiwino dwanda; gibidoko udul acel de, ku jakwac acel.
- ¹⁷Ka kumeno Vwa mara, kum amio kwo para, kara agame kendo.
- ¹⁸Ng'atu moko mbe ma kabe kud i bang'a, ento amie gira. Abedo ku tego m'amie ko, man abedo ku tego m'agame ko kendo. Ajolo cik maeni ba Vwa.
- ¹⁹Ka kumeno pokri nyai kendo kind Juyahudi kum lembe maeni.
- ²⁰Ju m'i kindgi dupa giwacu kumae, Pajogi ni i ie, abelu make; wuwinje nedi?
- ²¹Jumange wacu kumae, Maeni lembe pa ng'atu ma pajogi ni i wie ngo. Pajogi copo yabu wang' abinga?
- ²²Nwang'u agba mi lilo hekalu nuti Yerusalem:
- ²³nindo mi koyo nuti; Yesu de bewotho i hekalu i pondot pa Suleman.
- ²⁴Ka kumeno Juyahudi gibino gitieke, gipenje kumae, Ibiketho cwinywa bedo jiji rokani? Tek in i Kristu, yer iwa kele.
- ²⁵Yesu loko lembe igi kumae, Ayero iwu, man wuyio ngo: tic m'atimo i nying' Vwa ginyutho pira.
- ²⁶Ento wuyio ngo, kum wuni i kind rombe para ngo.
- ²⁷Rombe para winjo dwanda, man ang'eyogi, gilubo ng'eya de:
- ²⁸amio igi kwo ma rondo ku rondo; man gibirwinyo ki ngo, ng'atu moko mbe de ma bimayugi kud i cinga.

²⁹Vwa, m'umiogi ira, esagu ceke: ng'atu moko mbe de, ma copo mayugi kud i cing' Vwa.

³⁰An waku Vwa wan acel.

³¹Juyahudi giting'o kidi kendo nik gicanye ko.

³²Yesu loko lembe igi kumae, Tic ma ber dupa m'uai ba Vwa adaru nyutho iwu; kum tic maeni ma kani ma wucanya ku kidi pire?

³³Juyahudi giloko ire lembe kumae, Wacenyi ngo ku kidi kum tic ma ber, ento kum icido Mungu; kum in, m'i dhanu, ikethri giri ni Mungu.

³⁴Yesu loko lembe igi kumae, Egore i cik mu kumae ngo, Awacu kumae, Wun wu mungugi?

³⁵Tek elwong'ogi mungugi, ma lem pa Mungu wok i bang'gi (lembagora pa Mungu de copo tur ungo),

³⁶wuwacu pire, ng'atu ma Wego dwoke leng' eore de i ng'om kumae, Iyero lembacidi; kum awacu kumae, An a Wod Mungu?

³⁷Tek atimo tic pa Vwa ngo, kud wuyia.

³⁸Ento tek atimogi, kadok wuyia ngo, wuyi tic: kara wung'ei wuyi de ya Wego ni i ia, an de ani i Wego.

³⁹Giyenyo kamake kendo: ento ewok kud i cing'gi.

⁴⁰Man acidho kendo loka Yordan i ka ma Yohana mio ie baputisi ku kwong'a; ebedo de kakeca.

⁴¹Dhanu dupa de gibino i bang'e; giwacu kumae, Andha Yohana timo giranyutha moko ngo: ento gin ceke ma Yohana yero pi ng'atuni en e andha.

⁴²E dhanu dupa giyio ire keca.

Yohana 11

¹Nwang'u ng'atu acel kume lith, en e Lazaro ma Bethania, ma pacu ma thugi Mariamu giku Marsa ma nyamin.

²En e Mariamu maeno m'uwiwo Rwoth ku mo ma ng'wice ng'ar, man eyweyo tiende ku yukwie, m'umin mire ma Lazaro kume lith.

³Ka kumeno nyimin gioro kwenda i bang'e, giwacu kumae, Rwoth, nen, ng'atu m'imaruru kume lith.

⁴Ento ka Yesu winjo kumeni, ewacu kumae, Tho maeni en e mi nek ungo, ento pi dwong' pa Mungu, kara Wod Mungu nwang' dwong' ni kume.

⁵Nwang'u Yesu maru Marsa ku nyamin de man Lazaro.

- ⁶Ka kumeno kan ewinjo nia kume lith erio nindo maeno ceng' ario ka m'ebedo i ie.
- ⁷Yo ng'ei maeni elund ewacu ni julubne kumae, Dong' wacidhu kendo i Yahudi.
- ⁸Julubne giwacu ire kumae, Japonji, kawono Juyahudi giyenyo gicenyi ku kidi; e icidho kuca kendo?
- ⁹Yesu loko lembe kumae, Ceng' saane apar wi ario ngo? Tek ng'atu moko wotho ku dieceng', ekier ungo, kum eneno der mi ng'om maeni.
- ¹⁰Ento tek ng'atu moko wotho ku diewor, ekier, kum der umbe i ie.
- ¹¹Eyero gin maeni: man yo ng'ei maeni ewacu igi kumae, Jarimbwa Lazaro nindo; ento acidho kara acewe ku wang' nindo.
- ¹²Ka kumeno julub giwacu ire kumae, Rwoth, tek enindo, ebiboth.
- ¹³Nwang'u Yesu yero pi tho pare: ento giwacu nyo eyero pi yom ma juyom ko ku wang' nindo.
- ¹⁴Yesu lund uwacu igi kele kumae, Lazaro tho.
- ¹⁵Anyong'a nega piwu kum ani kuca ngo, kara wuyi; ento dong' wacidhu i bang'e.
- ¹⁶Ka kumeno Thoma, ma julwong'e Didumo, uwacu ni julub wadi kumae, Wan bende wacidhu kara wathou wakugi.
- ¹⁷Ka kumeno ka Yesu wok, enwang'u nia edaru vuto i liel udoko ceng' ang'wen.
- ¹⁸Nwang'u Bethania ni kago ku Yerusalem, ma yenyero romo ungolo ang'wen;
- ¹⁹dhanu mi Juyahudi de dupa gibino ba Marsa giku Mariamu, kara gijukgi pir umeggi.
- ²⁰Ka kumeno ka Marsa winjo nia Yesu bebino, ecidho erombo kude: ento Mariamu bedo asu i ot.
- ²¹Marsa lund uwacu ni Yesu kumae, Rwoth tek ande ini keni, kuno di umira tho ngo.
- ²²Cil kawono de ang'eyo nia gin ceke ma tek ibipenjo ba Mungu, Mungu bimio iri.
- ²³Yesu wacu ire kumae, Umeru bicer kendo.
- ²⁴Marsa wacu ire kumae, Ang'eyo nia ebicer kendo i cer mi kajikceng'.
- ²⁵Yesu wacu ire kumae, An a cer, ku kwo de: ng'atu m'uyio ira kadok etho ento ebibedo kwo;
- ²⁶man ng'atu ma tek ubedo kwo en ke eyio ira ebitho ki ngo. Iyio maeni?
- ²⁷Ewacu ire kumae, Eyo, Rwoth: adaru yio nia in i Kristu ma Wod Mungu, ma ng'atu m'ubebino i ng'om.

- ²⁸E kan edaru yero maeni, eciidho, man elwong'o Mariamu ma nyamin mung' mung', ewacu kumae, Japonji ni keni, man ebelwong'i.
- ²⁹E en, kan ewinjo maeni, eai pio pio, eciidho i bang'e de.
- ³⁰(Nwang'u Yesu fodutundo pacu ngo, ento fodi eni ka ma girombo ie giku Marsa.)
- ³¹Juyahudi ma gini kude i ot, ma gibejuka de, ka gineno nia Mariamu ai tho wok woko, gilund gilubo ng'eye, ma giwacu nyo eciywak wi liel.
- ³²Ka kumeno ka Mariamu bino ka ma Yesu ni ie enene de, epodho piny the tiende, ewacu ire kumae, Rwoth, tek ini keni, kuno di umira kutho ngo.
- ³³Ka kumeno ka Yesu nene m'ebeywak, ku Juyahudi bende ma gibino kugi gibeywak, ecur kud i ie cwinye de pido,
- ³⁴man ewacu kumae, Wukethe kani? Giwacu ire kumae, Rwoth, bin inen.
- ³⁵Yesu ywak.
- ³⁶Juyahudi gilund giwacu kumae, Wunen maram emare ko!
- ³⁷Ento jumoko m'i kindgi wacu kumae, Ng'atu m'uyabu wang' ng'atu ma abinga e, ecoipo ketho ng'atuni bende kud utho ngo?
- ³⁸Ka kumeno Yesu m'ucur kendo kud i ie ebino ba odliel. Nwang'u en e odcana, man jujengo kidi i dhoge.
- ³⁹Yesu wacu kumae, Wung'iel kidi woko. Marsa, ma nyamin ng'atu m'utho, uwacu ire kumae, Rwoth, kawono ng'wic kume beng'wi; kum etho cenge doko ang'wen.
- ⁴⁰Yesu wacu ire kumae, Awacu iri ngo, nia, tek iyio, ibineno dwong' pa Mungu?
- ⁴¹Ka kumeno ging'ielo kidi cen. E Yesu ting'o wang'e malu ewacu kumae, Vwa, afoii kum iwinja.
- ⁴²Man ang'eyo nia iwinja thiri thiri: ento kum udul dhanu m'ucungo i vuta ayero, kara giyi nia iora.
- ⁴³Man kan edaru yero kumeno, ekok ku dwande ma dit kumae, Lazaro, wok woko.
- ⁴⁴E ng'atu m'utho wok woko, ma cinge ku tiende bedo ariwa ku bongu mi kuny; wang'e de bedo ariwa ku kitambala. Yesu wacu igi kumae, Wugonye, wek eciidhi.
- ⁴⁵Ka kumeno dhanu mi Juyahudi dupa ma gibino ba Mariamu, ma gineno gin m'etimo de giyio ire.
- ⁴⁶Ento jumoko m'i kindgi gicidho ba Jufarisayo, man giyero igi pi gin ma Yesu timo.

⁴⁷Ka kumeno julam ma dongo ku Jufarisayo gicoko dilo, giwacu kumae, Watimu ang'o? kum ng'atuno timo giranyutha dupa.

⁴⁸Tek waweke kumeno, dhanu ceke biyio ire: Jurumi de bibino kabu kakawa woko ku thek mwa.

⁴⁹Ento ng'atu acel m'i kindgi, ma en e Kayafa, en e jalam ma dit i rundi maeno, ewacu igi kumae, Wung'eyo gin moko ki ngo,

⁵⁰kadi wukwanu ngo nia maeni en e ber iwa ya ng'atu acel utho pi dhanu, man kara thek dho kud urwiny.

⁵¹Man eyero maeni gire ngo: ento kum en e jalam ma dit i rundi maeno, eewo nia Yesu bitho pi thek;

⁵²man pi thek kende ngo, ento kara ecok nyithindho pa Mungu m'ulal mba bende i acel.

⁵³Kum kumeno ugambre i ceng' maeno giporo lembe kara ginege.

⁵⁴Ka kumeno Yesu wotho kele kendo ngo kind Juyahudi, ento eai keca ecidho i ng'om ma ceng'ni yamba, i adhura ma julwong'o Efraim; erio de kakeca giku julub.

⁵⁵Nwang'u kadhukuwijo mi Juyahudi ni ceng'ni: e dhanu dupa giai i ng'om giidho malu Yerusalem ma fodi kadhukuwijo kuwoko ungo, gicidwokri leng'.

⁵⁶Ka kumeno giyenyo ka Yesu man giwecri i kindgi, ma gicungo i hekalu kumae, Wuwacu ang'o? Ya ebibino i agba ngo?

⁵⁷Nwang'u julam ma dongo ku Jufarisayo ging'olo, nia, tek ng'atu moko ng'eyo kakare, enyuthe, kara gi make.

Yohana 12

¹Ka kumeno ka ceng' mi kadhukuwijo fodi udong' abusiel Yesu bino Bethania, ka ma Lazaro ni ie, en e ng'atu ma Yesu ting'e ku kind ju m'utho.

²Kum kumeno gitedo ire cam mir uthieno keca: Marsa de poko cam; ento Lazaro en e ng'atu acel ma kind ju ma gibedo dhu cam gikugi.

³Mariamun lund uting'o mo ma liu ma ng'wice ng'ar, ma pire tek, ma romo ng'et mukero acel, ewiro ko tiend Yesu, eyweyo tiende de ku yukwie: e ng'wic mone romo ot ceke.

⁴Ento jalub acel, ma Yuda Iskariote, ma ng'atu ma bicibe, uwacu kumae,

⁵Nedi jukwero loko mo maeni ku denarii dak adeki, jumi de ni jucani?

⁶Eyero maeni ngo, kum can m'unege kum jucan; ento kum en e jakwo, usau de ni i bang'e man ewodho gin ma juroyo i ie.

⁷Ka kumeno Yesu wacu kumae, Wuweke, kum ekane kum ceng' kuny para.

- ⁸Kum jucan wubedo kugi thiri thiri; an re wabedo kudu thiri thiri ngo.
- ⁹Ka kumeno dhanu ma sai m'i kind Juyahudi giwinjo nia Yesu ni keca: e gibino, pi Yesu kende ngo ento kara ginen Lazaro bende, m'eting'e ku kind ju m'utho.
- ¹⁰Ento julam ma dongo giporo lembe kara gineg Lazaro bende;
- ¹¹kum dhanu dupa mi Juyahudi giwekogi, giyio ni Yesu de ni kume.
- ¹²Urwone udul dhanu ma dit ma gibino i agba, ka giwinjo nia Yesu bebino Yerusalem,
- ¹³gimaku jang thith, gicirombo ko kude man gikok kumae, Hosana: Mugisa ni ng'atu m'ubebino ku nying Rwoth, en e Ubimo mir Israel.
- ¹⁴Yesu de, kan enwang'u nyathi kana, ebedo i wie; calu egore kumae,
- ¹⁵Lworo kud unegi, nya Sayuni: nen, Ubimo peri bebino, ebedo wi nyathi kana.
- ¹⁶Julub ular ung'eyo gin maeni ngo: ento ka Yesu daru doko dwong', e gilund gipoi nia gin maeni yang' ugore pire, man nia gitimo gin maeni ire.
- ¹⁷Ka kumeno udul dhanu ma ginuti gikugi kinde m'elwong'o Lazaro kud i odliel, m'eting'e de ku kind ju m'utho, ginyutho pire.
- ¹⁸Kum lembe nini udul dhanu bende gicidho nirombo kude, kum giwinjo nia etimo giranyutha maeni.
- ¹⁹Ka kumeno Jufarisayo giwecri kumae, Wunen gin moko ma wutimo mbe; nen, ng'om ubelubo ng'eye.
- ²⁰Nwang'u Juyunani moko ni kind ju m'ucirwo malu i agba:
- ²¹ka kumeno joni gibino ba Filipino, ma en e ng'atu ma Bethsaida mi Galilaya, man gipenje, giwacu kumae, Rwoth, wayenyo wanen Yesu.
- ²²Filipo bino eyero de ni Andrea: Andrea giku Filipino gibino, giyero de ni Yesu.
- ²³Yesu loko lembe igi, ewacu kumae, Saa wok, ma jubiyungo ie Wod dhanu.
- ²⁴Andhandha, ayero iwu, Tek nying' nganu kupodho i ng'om ungo etho de ngo, ebedo e kende; ento tek etho, ecego nyinge dupa.
- ²⁵Ng'atu m'umaru kwo pare erwinye; man ng'atu m'udagu kwo pare i ng'ombuni ebigwoke ni kwo ma rondo ku rondo.
- ²⁶Tek ng'atu moko timo ira, wek elub ng'eya; man ka m'ani ie, jatic para bende bibedo keca: tek ng'atu moko timo ira, Vwa biyunge.
- ²⁷Kawono cwinya ng'abre; e abiwacu ang'o? Vwa, lara ni saa maeni. Ento kum lembe nini abino ni saa maeni.
- ²⁸Vwa, yung nyingi. E dwal ulund ubino uai i polo kumae, Adaru yunge, man abiyunge kendo.

- ²⁹Ka kumeno udul dhanu, m'ucungo ceng'ni, giwinjo de, giwacu nia polo mor: jumange wacu kumae, Malaika weco kude en.
- ³⁰Yesu dwoko lembe ewacu kumae, Dwal maeni wok pira ngo, endre piwu.
- ³¹Kawono pokolembe mi ng'ombuni nuti: kawono jubibayu jadit mi ng'ombuni woko.
- ³²Man an, tek juting'a malu kud i ng'om, abipeyo dhanu ceke i bang'a.
- ³³Ento maeni eyero m'enyutho ko maram ebitho ko.
- ³⁴Ka kumeno udul dhanu loko lembe ire kumae, Wawinjo i cik nia Kristu bedo rondo ku rondo: ka in iwacu nenedi kumae, Jubikoting'o Wod dhanu malu be? Wod dhanune en e ng'a?
- ³⁵Ka kumeno Yesu wacu igi kumae, Fodi der ni i kindwu nindo ma nok. Wuwoth ma fodi der ni i beng'wu, kara mudho kud urubwu: man ng'atu ma wothe i mudho ng'eyo ka m'ecidho i ie ngo.
- ³⁶Ma fodi der ni i beng'wu, wuyi ni der, kara wudok wot der. Yesu yero gin maeni, man eai ecidh epale igi.
- ³⁷Ento kadok edaru timo giranyutha dupa kumeni i wang'gi, ere giyio ire ngo:
- ³⁸kara lembe ma Isaya ma jabila yero utimbre kakare kumae, Rwoth, ng'a m'uyio rwongwa? Bot Rwoth de nyuthre ni ng'a?
- ³⁹Kum lembe maeni gicopo yio ngo, kum Isaya wacu kendo kumae,
- ⁴⁰Ecido wang'gi, edwoko adundegi nwa ng', Kara ku ginen ku wang'gi, ku ging'ei kud adundegi, Ku gilokri de, an de kud acanggi.
- ⁴¹Isaya wacu gin maeni kum eneno dwong' pare; man eyero pire.
- ⁴²Ento cil kind jubim ma dongo bende dupa giyio ire; ento gituce ngo kum Jufarisayo, gimaru wodhogi kud i kacokri:
- ⁴³kum gimaru dwong' mi dhanu ma sagu dwong' pa Mungu.
- ⁴⁴Yesu kok akoka ewacu kumae, Ng'atu m'uyio ira, meca eyio ira ngo, ento ni ng'atu m'uora.
- ⁴⁵Ng'atu m'ubenena, meca ebeneno ng'atu m'uora.
- ⁴⁶Abino i ng'om ni der, kara ng'atu ma tek uyio ira kud ebed i mudho.
- ⁴⁷Man tek ng'atu moko winjo lembe para, eworogi de ngo, apoko lembe pare ngo: kum abino nipoko lembe mi ng'om ungo, ento kara alar ng'om.
- ⁴⁸Ng'atu m'ukwera, man ejolo lem para ngo, gin acel ni i bang'e m'upoko lembe pare: lembe m'ayero, lembene bipoko lembe pare i kajikceng'.

⁴⁹Kum ayero gira ngo; ento Wego m'uora, emio ira lembang'ola, m'ayer, ku m'awec de.

⁵⁰Man ang'eyo nia lembang'ola pare en e kwo ma rondo ku rondo; ka kumeno gin m'ayero, ayero kumeno calu Wego wacu ira.

Yohana 13

¹Nwang'u kan agba mi kadhukuwijo fokutundo ngo, Yesu m'ung'eyo nia saa pare tundo m'ebiai ko i ng'ombuni ecidho ba Wego, m'edaru maru pare ma dhe ma gini i ng'om, emarugi cil i kajikne.

²Man i kinde mi cam mir uthieno, ma nwang'u wonabali daru ketho lembe i adunde Yuda Iskariote, ma wod Simon, nicibe,

³e Yesu, m'eng'eyo nia Wego mio gin ceke i cinge nia eai ba Mungu, ebecidho de ba Mungu,

⁴eai malu ku dhu cam mir uthieno, eketho kendi pare cen; man egamu bongu mi logo, etwio i piere.

⁵Elund ekonjo pi i alibi, man emaku lwoko tiend julubne, eyweyogi de ku bongu logo m'etwio i piere.

⁶Elund ebino ba Simon Petro; Ewacu ire kumae, Rwoth, ilwoko tienda?

⁷Yesu dwoko lembe ewacu ire kumae, Gin m'atimo ing'eyo ngo kawono; ento ibing'eyo macen.

⁸Petro wacu ire kumae, Ibilwoko tienda ki ngo. Yesu loko lembe ire kumae, Tek alwoki ngo, nwang'u maka peri mbe i bang'a.

⁹Simon Petro wacu ire kumae, Rwoth, tienda kende ngo, ento cinga ku wia bende.

¹⁰Yesu wacu ire kumae, Ng'atu m'ujom can logo nege ngo ento mi lwoko tiende kende, endre e leng' ceke; wun de wu leng', ento ceke re ngo.

¹¹Kum eng'eyo ng'atu ma bicibe; kum kumeno ewacu kumae, Wun ceke wu leng' ungo.

¹²Kum kumeno kan edaru lwoko tiendgi, egamu kendi pare de, man ebedo piny kendo, ewacu igi kumae, Wung'eyo gin m'atimo iwu?

¹³Wulwong'a Japonji, man Rwoth: e wuyero dre; kum an a kumeno.

¹⁴Kumeno tek an, m'a Rwoth man Japonji, alwoko tiendwu, maku wun bende wulwok tiendwu man pa wadi man pa wadi.

¹⁵Kum amio iwu por, kara wun bende wutim calu atimo i beng'wu.

¹⁶Andhandha, awacu iwu kumae, Jamiru sagu jadt pare ngo; kadok jakwenda de sagu ng'atu m'uore ngo.

- 17 Tek wung'eyo gin maeni, mugisa iwu tek wutimogi.
- 18 Ayero piwu ceke ngo; ang'eyo ju m'alwong'o: ento kara lembagora pa Mungu timbre kakare kumae, Ng'atu m'ucamu kwen para eting'o ufunyitiende i kuma.
- 19 Ugambre kawono ayero iwu ma foketimbre ngo, kara, kan etimbre, wubin wuyi nia an a en.
- 20 Andhandha, awacu iwu, ng'atu m'ujolo ng'atu m'aoro nwang'u ejolo an; man ng'atu m'ujolo an nwang'u ejolo ng'atu m'uora.
- 21 Ka Yesu daru yero kumeno, e cwinye ng'abre, man etuco, ewacu kumae, Andhandha, ayero iwu, nia ng'atu acel m'i kindwu biciba.
- 22 Julub ginendri, kum cwinygi ni jiji kum ng'atu m'eyero pire.
- 23 Nwang'u ng'atu acel ma Yesu maru ma kind julub ubedo dhu mesa, m'ejeng' ajeng'a kor Yesu.
- 24 Ka kumeno Simon Petro gwele, man ewacu ire kumae, Wac iwa ng'atu m'eyero pire en e ng'a.
- 25 Kan ejeng' kumeno kor Yesu ewacu ire kumae, Rwoth, en e ng'a?
- 26 Ka kumeno Yesu loko lembe kumae, En e ng'atu, m'abigwio ire kwen, abimio ire de. E kan egwio kwen, eting'e emie ni Yuda, ma wod Simon Iskariote.
- 27 Yo ng'ei gamu kwende, e Jok umondo i ie. Ka kumeno Yesu wacu ire kumae, Gin m'itimo, tim pio.
- 28 Nwang'u ng'atu moko mbe dhu mesa m'ung'eyo nia pirang'o eyero ire kumeni.
- 29 Kum jumoko wacu nyo, kum usau ni ba Yuda, Yesu wacu ire kumae, Ng'ieu gin ma cande ni kumwa mir agba; kadi nia emi gin moko ni jucan.
- 30 E kan edaru gamu kwen, ewok woko ndhu ndhu nica: nwang'u en e diewor.
- 31 Ka kumeno kan edaru wok woko, Yesu wacu kumae, Kawono juketho Wod dhanu doko dwong', Mungu de doko dwong' i ie;
- 32 man Mungu bidwoke dwong' i ie gire, e ebidoko dwong' de pio.
- 33 Nyithindho ma thindho, fodi wabedo kudu nindo ma nok. Wubiyenya: man calu awacu ni Juyahudi kumae, Ka m'acidho i ie, wucopo bino ngo; kawono de ayero iwu kumeno.
- 34 Amio iwu cik ma nyen, ya wumeru; cil calu amaruwu, nia wun bende wumeru.
- 35 Kum kumeni dhanu ceke bing'eyo nia wu julubna tek wumeru.
- 36 Simon Petro penje kumae, Rwoth, icidho kani? Yesu loko lembe kumae, Ka m'acidho i ie, icopo lubo ng'eya ngo kawono; ento ibilubo ng'eya macen.

³⁷Petro wacu ire kumae, Rwoth, nedi acopo lubo ng'ei ngo kawono? Abimio kwo para piri.

³⁸Yesu loko lembe kumae, Ibimio kwo peri pira? Andhandha, awacu iri kumae, Kulok bikok ungo, ma fodi k'ikwera wang' adek ungo.

Yohana 14

¹Adndewu knd upidi: wuyi Mungu, wuyi an bende.

²I ot pa Vwa udi ma beco dupa nuti; dok ebedo kumeno ngo, kuno di ayero iwu; kum acidho niyiko kabedo iwu.

³Man tek acidho niyiko kabedo iwu, abibino kendo, abijolowu de i bang'a gira; kara ka m'ani ie, wun bende wubed keca.

⁴Man ka m'acidho i ie, wung'eyo yoje.

⁵Thoma wacu ire kumae, Rwoth, wang'eyo ngo ka m'acidho i ie; wang'eyo yoje nenedi?

⁶Yesu wacu ire kumae, An a yo ku lemandha, ku kwo de: Ng'atu acel de mbe ma bino ba Wego, ndhu ni kuma re.

⁷Tek nwang'u wung'eya, kuno di wung'eyo Vwa bende: ugambre kawono wung'eye, wunene de.

⁸Filipo wacu ire kumae, Rwoth, nyuth iwa Wego, e eromowa.

⁹Yesu wacu ire kumae, Nindo ma wabedo wakudu ie hai ngi e, fodi ing'eya ngo, Filipino? ng'atu m'uneno an nwang'u eneno Wego; nedi iwacu kumae, Nyuth iwa Wego?

¹⁰Iyio ngo nia ani i Wego, man Wego de ni i ia? lembe m'ayero iwu ayero gira ngo: ento Wego m'ubedo i ia etimo tic pare.

¹¹Wuyia nia ani i Wego, Wego de ni i ia: kadi wuyia ni kum tic m'atimo.

¹²Andhandha, awacu iwu kumae, Ng'atu m'uyio ira, tic m'atimo ebitimo bende; ebitimo tic ma sagu maeni de; kum acidho ba Wego.

¹³Man gin ma tek wubikwayu ku nyinga e abitimo ginde, kara Wego dok dwong' i Wod;

¹⁴Tek wubikwaya ku gin moko ku nyinga, abitimo ginde.

¹⁵Tek wumara wubiworo cik para.

¹⁶Man abikwayu Wego, e ebimio iwu Jajuk mange, kara wubed wukugi nja ku nja,

¹⁷en e Tipo mi lemandha: ma ng'om copo jolo ngo; kum enene ngo, kadok ang'eya de eng'eye ngo; wun re wung'eye; kum ebedo i beng'wu, man ebibedo i iwu.

¹⁸Abiwekowu rwa ngo: abino i beng'wu.

- ¹⁹Fodi nyanok, e ng'om binena kendo ngo; ento wun wunena: kum abedo kwo, wun bende wubibedo kwo.
- ²⁰I ceng' maeno wubing'eyo nia ani i Vwa, wun de wuni i ia, an de ani i iwu.
- ²¹Ng'atu m'ubedo ku cik para, m'uworogi de, en e ng'atu m'umara: ng'atu m'umara de Vwa de bimare, man abimare, abinyuthra de ire.
- ²²Yuda (Iskariote ngo) uwacu ire kumae, Rwoth, ebedo nenedi nia ibinyuthii iwa, ni ng'om ke ngo e?
- ²³Yesu loko lembe ewacu ire kumae, Tek ng'atu moko mara, ebiworo lem para: Vwa de bimare, man wabibino i bang'e wabitimo kabedo mwa de i bang'e.
- ²⁴Ng'atu m'umara ngo eworo lembe para ngo: lembe de ma wuwinjo en e para ngo, ento pa Vwa m'uora.
- ²⁵Giki maeni ayero iwu, ma fodi wabedo wakudu.
- ²⁶Ento Jajuk, ma Tipo Maleng', ma Wego biero ku nyinga, ebiponjowu ku gin ceke, man ebipoyowu kum lembe ceke m'ayero iwu.
- ²⁷Aweko kwicwiny i beng'wu; amio iwu kwicwiny para: amio iwu calu ma ng'om mio ngo. Adundewu kud upidi, kadok lworo de kud unege.
- ²⁸Wuwinjo maram ayero ko iwu kumae, Acidho, man adwogo i beng'wu. Tek wumara, kuno di anyong'a negowu, kum acidho ba Wego: kum Vwa saga.
- ²⁹Kawono de ayero iwu ma foketimbire ngo, kara, kan etimbire, wuyi.
- ³⁰Wabiweco wakudu hai ngo, kum jadit mi ng'om ubebino: gin moko m'ebedo ko mbe i ia;
- ³¹ento kara ng'om ung'ei nia amaru Wego, man calu Wego mio ira cik, e an bende atimo kumeno. Wuai, wacidhu.

Yohana 15

- ¹An a tiend ulok mandha, Vwa ke jatipodho.
- ²Ku ba janga ceke ma ni i ia ma cego nyinge ngo, ekabe woko: man ku ba janga ceke ma cego nyinge, elonye, kara eceg nyinge ma sagu.
- ³Kawono wu leng' ni kum lembe m'ayero iwu.
- ⁴Wubed i ia, an de i iwu. Calu jange copo cego nyinge gire ngo, tek ebedo kum tiende ngo; wun de kumeno wucopo ngo, tek wubedo i ia ngo.
- ⁵An a tiend ulok, wun wu jange: Ng'atu m'ubedo i ia, an de i ie, ng'atuno cego nyinge dupa: kum wucopo timo gin moko ngo nge kuda.
- ⁶Tek ng'atu moko bedo i ia ngo, jubaye woko calu jange, ener de; e jucokogi, jubologi de i mac, man giwang'.

- ⁷Tek wubedo i ia, lem para de bedo i iwu, wupenj gin ma tek wuyenyo, manebitimbre iwu.
- ⁸I maeni Vwa doko dwong' ya wucego nyingwu dupa; man wubibedo julubna.
- ⁹Cil calu Wego mara, e an bende amaruwu: wubed i merna.
- ¹⁰Tek wuworo cik para, wubibedo i merna; cil calu aworo cik pa Vwa, abedo de i merne.
- ¹¹Giki maeni ayero iwu, kara anyong'a para bed i iwu, kara anyong'a mu de'pong'.
- ¹²Maeni cik para, nia wumeru, cil calu amaruwu.
- ¹³Ng'atu moko mbe m'ubedo ku mer ma sagu maeni, nia ng'atu moko mi kwo pare pi jurimbe.
- ¹⁴Wun wu jurimba, tek wutimo gin m'ang'olo iwu.
- ¹⁵Ugambre kawono alwong'owu jumiru ngo; kum jamiru ng'eyo ngo gin ma Rwoth pare timo: ento alwong'owu jurimo; kum gin ceke m'awinjo ba Vwa aketho wung'eyo.
- ¹⁶Wugoyo wia ngo, ento an e m'agoyo wiwu, akethowu de, kara wucidh wuceg nyingwu, nyingwune de dong': kara gin ma tek wukwayu ba Wego ku nyinga, emi ginde iwu.
- ¹⁷Ang'olo gin maeni iwu, kara wumeru.
- ¹⁸Tek ng'om udaguwu, wung'eyo nia edaga ma fodi k'edaguwu ngo.
- ¹⁹Dok wun wu mi ng'om, kuno di ng'om umaru ma pare: ento kum wun wu mi ng'om ungo, ento agoyo wiwu kud i ng'om, kum kumeno ng'om udaguwu.
- ²⁰Wupoi kum lembe m'ayero iwu kumae, Jamiru sagu rwodhe ngo. Tek ginyayu ragedo i kuma, gibinyayu ragedo i kumwu bende; tek giworo lembe para, gibiworo mu bende.
- ²¹Ento gin maeni ceke gibitimo i kumwu pi nyinga, kum ging'eyo ng'atu m'uora ngo.
- ²²Tek abino ayero igLde ngo, kuno di dubo migi mbe: ento kawono gimbe ku gin ma gilok wie lembe kum dubo migi.
- ²³Ng'atu m'udagu an nwang'u edagu Vwa bende.
- ²⁴Tek atimo tic i kindgi ngo ma ng'atu mange mbe ma fodutimo, kuno di dubo migi mbe: ento kawono gidaru nena gidaga de waku Vwa.
- ²⁵Ento maeni timbre, kara lembe m'ugore i cik migi kumae, utimbre kakare, Gidaga mananu.

²⁶Ento ka Jajuk ubino, m'abioro i beng'wu m'uai ba Wego, en e Tipo mi lemandha, m'uai ba Wego, ebinyutho lembe pira:

²⁷e wun bende wubinyutho lembe, kum wubedo i bang'a ugambre ku kwong'a.

Yohana 16

¹Giki maeni ayero iwu, kara ku juketh wukier.

²Gibiwodhowu woko kud i cokri: eyo, saa bebino, nia ng'atu m'unegowu biwacu nyo ethiero rwo ni Mungu.

³Man giki maeni gibitimo, kum ging'eyo Wego ngo, kadok an.

⁴Ento ayero giki maeni iwu, kara ka saa migi bino, wupoi pigi, nia ayero iwu. Gin maeni ayero iwu ku kwong'a ug, kum wanuti wakudu.

⁵Ento kawono acidho ba ng'atu m'uora; ng'atu moko de mbe i kindwu m'upenja kumae, Icidho kani?

⁶Ento kum ayero giki maeni iwu, can upong' i adundewu.

⁷Ento ayero iwu lemandha: en e ber iwu nia acidhi; kum tek acidho ngo, Jajuk bibino i beng'wu ngo; ento tek acidho, abiore i beng'wu.

⁸En de, kan ebino, ebituco wi ng'om pi dubo, man pi bedopwe, pi pokoiembe de:

⁹pi dubo, kum giyio ira ngo;

¹⁰pi bedopwe, kum acidho ba Wego, wun de wunena kendo ngo;

¹¹pi pokolembe, kum lem pa jedit mi ng'ombuni daru pokre.

¹²Giki dupa ni kuda m'ayer iwu, ento wucopo jologi ngo kawono.

¹³Ento kan ebibino, en e Tipo mi lemandha, ebitelo wiwu i lemandha ceke: kum ebiyero gire ngo; ento gin ma tek ewinjo, e ebiyero ginde: man ebiyero iwu pi gin ma bibino.

¹⁴Ebiyunga: kum ebigamu kum gin ma para, man ebiyero iwu.

¹⁵Gin ceke ma tek Wego bedo ko en e para: ketho awacu, nia ebigamu kum gin ma para man ebiyero iwu.

¹⁶Fodi nyanok, e wunena kendo ngo: fodi nyanok kendo de, ka wubinena.

¹⁷Ka kumeno kind julubne moko wacu kumae i kindgi, Maeni ang'o m'eyero iwa kumae, Fodi nyanok, e wubinena ngo; fodi nyanok kendo de e wubinena: man, Kum acidho ba Wego?

¹⁸Ka kumeno giwacu kumae, Maeni m'eyero kumae, Fodi nyanokni en e ang'o? Wang'eyo gin m'eyero ngo.

- ¹⁹Yesu ng'eyo nia giyenyo gipenje, e ewacu igi kumae, Wupenjru i kindwu pi lembe maeni nia awacu kumae, Fodi nyanok, e wunena ngo, fodi nyanok kendo, e wubinena?
- ²⁰Andhandha, ayero iwu, nia wubiywak ku goyo nduru de, ento anyong'a binego ng'om: can binegowu, ento can mu bilokre ni anyong'a.
- ²¹Ka moc ugoyo dhaku can nege, kum saa pare wok: ento kan edaru nyolo nyathin epoi pi ndiba kendo ngo, ni anyong'a m'unege nia enyolo dhanu wok i ng'om.
- ²²Kumeno wun bende kawono can unegowu: ento abinenowu kendo, kan anyong'a binego adundewu, anyong'a mu de ng'atu moko mbe ma kabu kud i beng'wu.
- ²³I ceng' maeno wubipenja ku penji moko ngo. Andhandha, ayero iwu kumae, Tek wubikwayu gin moko ba Wego, ebimie iwu ku nyinga.
- ²⁴Fodi wupenjo gin moko ngo ku nyinga: wupenji, man wubijolo kara juketh anyong'a mu pong'.
- ²⁵Ayero gin maeni iwu ku lembabola: saa bebino, kan abiyero iwu kendo ngo ku lembabola, ento abiyero pi Wego kele.
- ²⁶I ceng' maeni wubikwayu ku nyinga: man awacu iwu ngo, nia abikwayu Wego piwu;
- ²⁷kum Wego maruwu gire, kum wumara, man wuyio nia aai ba Wego.
- ²⁸Aai ba Wego, man abinoi ng'om kendo, aweko ng'om, man acidho ba Wego.
- ²⁹Julubne giwacu kumae, Nen, kawono iyero kele, man iyero ku lembabola ngo.
- ³⁰Kawono wang'eyo nia ing'eyo gin ceke, man can penji ma nia ng'atu moko penji ko negi ngo: kum lembe nini wayio nia iai ba Mungu.
- ³¹Yesu loko igi lembe kumae, Kawono dong' wuyio?
- ³²Nen, saa bebino, eyo, edaru wok, ma jubalaluwu i ie, ng'atuman thugi man thugi, man wubiweka dong' kenda; ere abedo kenda ngo, kum Wego ni i bang'a.
- ³³Ayero giki maeni iwu, kara wubed ku kwiocwiny ni kuma. Masendi ni i beng'wu i ng'om: ento dong' cwinywu bed tek; avoyo ng'om.

Yohana 17

- ¹Yesu yero gin maeni; e eng'ayu wang'e malu de i polo, ewacu kumae, Vwa, saa daru wok; yung Wodi, kara Wodi de yungi:
- ²cil calu imio ire ng'ol wi kum nzu, kara emi kwo ma rondo ku rondo ni ceke m'imio ire.

- ³E kwo ma rondo ku rondone e eni, nia ging'ei in m'i Mungu mandha i kendi, ku ng'atu m'ioro, ma Yesu Kristu.
- ⁴Ayungi i ng'om, adaru timo tic m'imio ira atim.
- ⁵Vwa, kawono keth abed dwong' karacelo kudi ku dwong' ma yang' abedo ko karacelo kudi ma fodi ng'om de mbe.
- ⁶Anyutho nyingi ni ju m'imio ira kud i ng'om: gi peri, man imiogi ira: man gidaru woro lembe peri.
- ⁷Kawono ging'eyo nia gin ceke ma tek imio ira uai i beng'i:
- ⁸kum amio igi lembe m'imio ira; man gijologi, man ging'eyo andha nia aai i beng'i, giyio de nia iora.
- ⁹Akwayu pigi: akwayu pi ng'om ungo, ento pi ju m'imio ira; kum gi peri:
- ¹⁰man gin ceke ma para gi peri, man ma peri de gi para: abedo dwong' de ni kumgi.
- ¹¹Anuti i ng'om kendo ngo, gin re gini i ng'om, man abino i beng'i. Vwa Maleng', gwok ju m'imio ira i nyingi, kara gibed acel, calu wan.
- ¹²Kinde ma fodi wani karacelo kugi, agwoko ju m'imio ira i nyingi: akurogi de, ng'atu acel de mbe i kindgi m'urwinyo, ndhu wod nyoth kende; kara lembagora pa Mungu timbre kakare.
- ¹³Ento kawono abino i beng'i; e gin maeni ayero i ng'om, kara gibed kud anyong'a para m'upong' i igi.
- ¹⁴Adaru mio igi lem peri; ng'om de dagugi, kum gi mi ng'om ungo, cil calu an a mi ng'om ungo.
- ¹⁵Akwayu ngo nia ikabgi kud i ng'om, ento nia igwokgi ni ng'atu ma rac.
- ¹⁶Gi mi ng'om ungo cil calu an de a mi ng'om ungo.
- ¹⁷Dwokgi leng' ku lemandha: lembe peri en e lemandha.
- ¹⁸Cli calu iora i ng'om, e kumeno an bende aorogi i ng'om.
- ¹⁹Adwokra leng' gira pigi, kara gin bende judwokgi leng' i lemandha.
- ²⁰Joni kendgi ngo m'abekwayu pigi, endre pi ju m'ubeyio ira bende ni kum lem migi;
- ²¹kara gin ceke gibed acel; cil calu in, Vwa, ini i ia, an de ani ii, kara gin de gibed i iwa: kara ng'om uyi nia iora.
- ²²Man dwong' m'idaru mio ira amio igi; kara gibed acel, cil calu wan wan acel;
- ²³ani i igi, in de ini i ia, kara giteng'ni i acel; kara ng'om ung'ei nia iora, man imarugi de, cil calu imaru an.

²⁴Vwa, ayenyo nia gin bende m'imio ira wabed kugi karacelo ka m'ani ie, kara ginen dwong' para, m'imio ira: kum imara ma fodi ng'om ku thekre ngo.

²⁵E Vwa ma pwe, ng'om ung'ei ngo, ento an ang'ei; joni bende ging'eyo nia iora;

²⁶man aketho ging'ei nyingi, man abiketho eng'eire: kara mer m'imara ko bed i igi, an de i igi.

Yohana 18

¹Ka Yesu daru yero lembe maeni ecidho ku julubne loka kulo Kedron, ka ma podho ni i ie, m'emondo i ie, en ku julubne.

²Nwang'u Yuda bende m'ucibe, eng'eyo kakeca: kum Yesu gibegicokri keca ku julubne wang' udul.

³Ka Yuda gamu udul asikari, kud asikari mange de m'uai ba julam ma dongo ku Jufarisayo de, elund ebino kakeca ku thala ku ridhio ku jamtho de.

⁴Ka kumeno Yesu, m'ung'eyo gin ceke ma bibino i wie, ewok woko, man ewacu igi kumae, Wuyenyo ng'a?

⁵Giloko ire lembe kumae, Yesu ma Nazareti. Yesu wacu igi kumae, An a en. Yuda bende, m'ucibe, gicungo gikugi.

⁶Ka kumeno kan ewacu igi kumae, An a en, gidok ku ng'eigi, gipodho i ng'om.

⁷Elund epenjogi kendo kumae, Wuyenyo ng'a? man giwacu kumae, Yesu ma Nazareti.

⁸Yesu loko lembe kumae, Adaru wacu iwu nia an a en; ka kumeno tek wuyenyo an, wuwek joni gicidh migi:

⁹kara lembe m'eyero timbre kakare kumae, Ju maeni m'imio ira acel de mbe m'i kindgi m'urwinyo ira.

¹⁰Nwang'u Simon Petro m'e won palamularu ewodhe, egoyo ko jamiru pa jalam ma dit, ethumo ithe ma yor acwic bir cen. Nwang'u nying' jamirune Malko.

¹¹Ka kumeno Yesu wacu ni Petro kumae, Roi palamularu i ukorone: kikombe ma Wego mio ira ni, kud amadhi?

¹²Ka kumeno udul asikari ku jego ma dit, man asikari mi Juyahudi, gimaku Yesu gitwie de,

¹³gilar gipeye ba Ana; kum en e jalkwaru Kayafa, ma en e jalam ma dit rundi maeno.

¹⁴Nwang'u Kayafa en e ng'atu m'umio poro thelembe ni Juyahudi, nia en e ber ya ng'atu acel utho pi dhanu.

¹⁵Nwang'u Simon Petro lubo ng'ei Yesu, ku jalub mange de. Nwang'u jalub maeni ging'eiri ku jalam ma dit, man gimondo giku Yesugi i pondot pa jalam ma dit;

- ¹⁶ento Petro cungo yo woko dhugola. Kum kumeno jalub mange, ma ging'eiri ku jalam ma dit, ecidho woko eweco ba ng'atu ma kuro dhugola, man ekelo Petro i ie.
- ¹⁷Nyaku ma kuro dhugola lund uwacu ni Petro kumae, In bende in i ng'atu ma kind julub ng'atuni? Ewacu kumae, An ungo.
- ¹⁸Nwang'u jumiru kud asikari de gicungo keca, ma gidaru vuko mac mi cukmac; kum koyo nuti; gioyo mac de: man Petro bende gicungo gikugi ebemuro kume.
- ¹⁹Jalam ma dit ulund upenjo Yesu pi julubne, ku ponji pare de.
- ²⁰Yesu loko lembe ire kumae, Adaru yero kele ni ng'om; abedaponjo i kacokri, i hekalu de, ka ma Juyahudi ceke gibegicokri i ie; man ayero gin moko lwe ngo.
- ²¹Ipenja nedi? penj ju m'uwinja, pi lembe m'ayero igi; nen, joni ging'eyo lembe m'ayero.
- ²²E kan edaru yero maeni, ng'atu acel m'i kind asikari m'ucungo keca epadu Yesu ku cinge, ewacu kumae, Iloko lembe kumeno ni jalam ma diti?
- ²³Yesu loko lembe ire kumae, Tek adaru yero raci, nyuth karacne: ento tek dre ke, ipada nedi?
- ²⁴Ka kumeno Ana ore atwia ba Kayafa ma jalam ma dit.
- ²⁵Nwang'u Simon Petro cungo acunga ebemuro kume. Ka kumeno giwacu ire kumae, In bende i ng'atu acel m'i kind julubne? Ekwero, ewacu de kumae, An ungo.
- ²⁶Ng'atu acel ma kind jumiru pa jalam ma dit, ma wadi ng'atu ma Petro thumo ithe, uwacu kumae, Aneni wukude ngo i podho?
- ²⁷Petro lund ukwero kendo: e ndhu ndhu nino kulok ukok.
- ²⁸Gilund gipeyo Yesu ku ba Kayafa gicidho kude Odtiti: man en e pir kugweno; ento gin re gimondo ngo i Odtiti, kara ku gicidri, endre gicam kadhukuwijo.
- ²⁹Ka kumeno Pilato wok woko i bang'gi, ewacu kumae, Wukelo adote ang'o kum ng'atuni?
- ³⁰Giloko lembe giwacu ire kumae, Tek ng'atuni jadub lembe ngo, kuno di jukele ngo i beng'i.
- ³¹Ka kumeno Pilato wacu igi kumae, Wugame wun, wupok lembe i wie calku cik mu. Juyahudi wacu ire kumae, Cik uyio iwa ngo ya waneg ng'atu moko:
- ³²kara lembe pa Yesu timbre kakare, m'eyero, m'enyutho ko maram ebitho ko.
- ³³Ka kumeno Pilato mondo kendo i Odtiti, man elwong'o Yesu, epenje de kumae, In i Ubimo mi Juyahudi?
- ³⁴Yesu loko lembe kumae, Iwacu lembuni giri, kadi jumange yero pira iri?

³⁵Pilato loko lembe kumae, An a Jayahudi? Thek mu giwu ku julam ma dongo gikeli i bang'a: itimo ang'o?

³⁶Yesu dwoko lembe kumae, Ker para en e mi ng'ombuni ngo: tek ker para en e mi ng'ombuni, kuno di jumiru para gikiedo, kara ku jumia ni Juyahudi: ento kawono ker para en e ma keni ngo.

³⁷Pilato lund uwacu ire kumae, Kara in i ubimo? Yesu loko lembe kumae, Iyero dhe nia an a ubimo. Junyola pi maeni, man abino i ng'om de pi maeni, kara anyuth pi lemandha. Ku ba dhanu ceke ma mi lemandha winjo dwanda.

³⁸Pilato penje kumae, Lemandha en e ang'o? Kan edaru yero lembe maeni, ewok woko kendo ba Juyahudi, man ewacu igi kumae, Anwang'u dubo moko ngo i ie.

³⁹Ento en e kurawu, ya agony iwu ng'atu acel i kadhukuwijo: ka kumeno wuyenyo agony iwu Ubimo mi Juyahudi?

⁴⁰Gilund gikok kendo, giwacu kumae, Ng'atuni ngo, ento Baraba. Nwang'u Barabane en e jayek.

Yohana 19

¹Pilato lund ugamu Yesu, efode de.

²Asikari de kiedo jamkermiwic mir ukudho, giroyo i wie, gironye de ku kendi m'uluga;

³man gibino i bang'e, giwacu kumae, Moth iri Ubimo mi Juyahudi! Gipade de ku cing'gi.

⁴Pilato wok woko kendo man ewacu igi kumae, Nen, akele woko i beng'wu, kara wung'ei nia anwang'u dubo moko ngo i ie.

⁵Yesu lund uwok woko, m'ekendo jamkermiwic mir ukudho ku kendi m'uluga. Pilato wacu igi kumae, Wunen ng'atuni!

⁶Ka kumeno ka julam ma dongo kud asikari ginene, gikok, giwacu kumae, Gure, gure! Pilato wacu igi kumae, Wugame wun, wugure: kum anwang'u dubo moko ngo i ie.

⁷Juyahudi giloko lembe ire kumae, Cik mwa nuti, man ku cik maeno maku etho, kum ekethre gire ni Wod Mungu.

⁸Ka kumeno ka Pilato winjo lembe maeni, lworu nege m'usagu;

⁹man emondo i Odtiti kendo, epenjo Yesu kumae, Iai kani? Ento Yesu loko ire lembe moko ngo.

¹⁰Ka kumeno Pilato wacu ire kumae, Iweco i bang'a ngo? ing'eyo ngo nia tego para nuti m'agonyi ko, man tego para nuti de m'aguri ko?

- 11**Yesu loko lembe ire kumae, Tego peri mbe m'itimo ko gin moko i kuma, tek emire iri ku malu ngo: ka kumeno ng'atu m'uciba iri dubo pare sagu.
- 12**Kum lembuni Pilato yenyo kagonye: ento Juyahudi giwoi, giwacu kumae, Tek igonyo ng'atuni, nwang'u i jarim Kaisari ngo: ku ba dhanu ceke ma kethie gire ni ubimo nwang'u ejai ni Kaisari.
- 13**Ka kumeno ka Pilato winjo lembe maeni, ewodho Yesu woko, ejany de wi kom mi pokolemba i ka ma julwong'o Ng'omathora, ento ku dhu Juebrania en e Gabatha.
- 14**Nwang'u en e ceng' mi Yikopiny mi kadhukuwijo: eyenyo bedo calu en e saa mir abusiende. Man ewacu ni Juyahudi kumae, Nen, Ubimo mu!
- 15**Ka kumeno gikok kumae, Tere cen, tere cen, gure! Pilato wacu igi kumae, Agur Ubimo mu? Julam ma dongo giloko lembe kumae, Ubimo mwa mbe ndhu Kaisari.
- 16**Elund emie igi ya gigure.
- 17**Ka kumeno gigamu Yesu: e ewok woko, m'ebielo yen m'athara ire gire, i ka ma julwong'o Karupokowic, ma julwong'o ku dhu Juebrania Golgotha:
- 18**gigure kakeca, ku jumange ario, acel yo ku, acel ke yo ku, man Yesu ke ni i diere.
- 19**Man Pilato goro rambembe bende, man ekethe wi yen m'athara. Lembene gore kumae, YESU MA NAZARETI, UBIMO MI JUYAHUDI.
- 20**Ka ku meno dhanu dupa ma kind Juyahudi gisomo rambembe maeni, kum ka ma juguro ie Yesune ni ceng'ni kud adhura; man egore ku dhu Juebrania, man ku dhu Jurumi, man ku dhu Juyunani.
- 21**Ka kumeno julam ma dongo mi Juyahudi giwacu ni Pilato kumae, Kud igor kumae, Ubimo mi Juyahudi: ento nia ewacu kumae, An a Ubimo mi Juyahudi.
- 22**Pilato loko lembe kumae, Gin m'adaru goro adaru goro ndhu.
- 23**E kan asikari gidaru guro Yesu, gigamu kendi pare gipoko ie ang'wen, ku bang' asikari ceke ng'atuman ku maka pare; ku jabia bende: nwang'u jabiane kawang' kwocne mbe, jutheko cwie i wie cik piny.
- 24**Ketho giwacu i kindgi kumae, Ku wayecue ayeca, ento dong' wagoyue ku jara, ketho wanwang' ka won: kara lembagora pa Mungu timbre kakare, m'uwacu kumae, Gipoko kendi para i kindgi, Man gigoyo jabia para de ku jara.
- 25**Asikari gilund gitimo gin maeni. Ento min mire cunگو the yen m'athara pa Yesu, ku nyamin min de, ma Mariamu ma ci Klopa, giku Mariamu ma Magdalene.
- 26**Ka kumeno ka Yesu neno min mire, ku jalub m'amaru cunگو, ewacu ni min kumae, Dhaku, nen wodi!
- 27**Elund ewacu ni jalub kumae, Nen meru! Ugambre i saa maeni jalub udwoke i ot pare.

²⁸Yo ng'ei maeni, Yesu m'ung'eyo nia kawono gin ceke thum, kara lembagora pa Mungu timbre kakare, ewacu kumae, Rieu unega.

²⁹Nwang'u juketho picwa pong' tabu kakeca: e giketho ucoi pong' ku picwa wi tiend alagi, gikethe kum dhoge.

³⁰Ka Yesu jolo picwa, ewacu kumae, Ethum: e ekulo wie, man eweko cwinye kadhu.

³¹Ka kumeno, kum ceng' maeni ceng' mi Yikopiny, Juyahudi lund upenjo Pilato nia jutur tiendgi, jutergi cen, kara avujgi kud ubed kor yen m'athara ceng' sabatu (kum ceng' sabatu maeno ceng' ma dit).

³²Ka kumeno asikari gibino gituro tiend ng'atu ma kwong'ane, ku pa wadi de ma jugurogi gikude;

³³ento ka gibino ba Yesu; gineno de nia edaru tho, gituro tiende ngo:

³⁴ento acel m'i kind asikari cobo ng'ete ku tong', e ndhu ndhu nica rimo ku pi de thwogre.

³⁵E ng'atu m'uneno enyutho lembe, nyutholembe pare de en e andha: eng'eyo de nia eyero andha kara wun bende wuyi.

³⁶Kum gin maeni timbre, kara lembagora pa Mungu timbre kakare kumae, Jubituro cogone acel de ngo.

³⁷Lembagora mange de pa Mungu wacu kumae, Gibineno ng'atu ma gicobo.

³⁸Yo ng'ei gin maeni Yusuf ma Arimathayo, ma jalub Yesu, ento nyalwe ni lworu mi Juyahudi, epenjo Pilato ya ekab avuj Yesu: Pilato de yio ire. Ka kumeno ebino ekabu avuje.

³⁹Nikodemo bende bino, en e ng'atu m'ubino i bang'e ku kwong'a ku diwor, m'ebekelo mo ma liu ma ng'wice ng'ar m'uribre kud udok, ma yenyero romo mukero pier ang'wen wi abic.

⁴⁰Kum kumeno giting'o kum Yesu, giriwo ku bongu ma nwang' kud udok ma ng'wice ng'ar, calu kura kuny mi Juyahudi.

⁴¹Nwang'u podho nuti ka ma jugure ie; man liel ma nyen m'aroka i cana nuti i podhone ma fodi juyiko ng'atu moko i ie ngo.

⁴²Gilund giyiko Yesu kakeca (kum liel m'aroka i cana ni ceng'ni) kum en e ceng' Yikopiny mi Juyahudi.

Yohana 20

¹Nwang'u i ceng' ma kwong'ane ma yenga, Mariamu Magdalene cidho pir kugweno ba liel m'aroka i cana, kinde ma fodi piny col col, man eneno kidi ng'iele woko ku dhu liel m'aroka i cana.

- ²Elund ekwanyu ng'wec, ebino de ba Simon Petro, giku jalub wadi ma Yesu maru, man ewacu igi kumae, Giwodho Rwoth kud i liel m'aroka i cana, wang'eyo de ngo ka ma gikethe i ie.
- ³Ka kumeno Petro wok woko, giku jalub wadi, man gicidho yo ba liel m'aroka i cana.
- ⁴Gin ario de giringo karacelo: jalub wadi de sagu Petro ku ng'wec, elar etundo ba liel m'aroka i cana;
- ⁵man kan egung' eneno i ie de, eneno bongu ma nwang' uvuto; endre emondo i ie ngo.
- ⁶Ka kumeno Simon Petro m'ubelubo ng'eye bende bino, man emondo i liel m'aroka i cana; man eneno bongu ma nwang' uvuto,
- ⁷man kitambala, m'ubedo i wie, evuto karacelo ngo ku bongu ma nwang', ento ebedo adola ka kende,
- ⁸Jalub wadi m'ular utundo ba liel m'aroka i cana, ulund umondo bende eneno, eyio de.
- ⁹Kum fodi ging'eyo lembagora pa Mungu ngo, nia ebikoai kendo be ku kind ju m'utho.
- ¹⁰Kum kumeno julub gidok thugi kendo.
- ¹¹Ento Mariamu cungo acunga yo woko kum liel m'aroka i cana ku ywak: e kumeno, kan ebeywak, egung' eneno i liel m'aroka i cana;
- ¹²man eneno malaika ario ku kendi ma tar gibedo abeda, acel yo ku wic, acel ke yo ku tielo, ka ma kum Yesu kouvuto i ie.
- ¹³E giwacu ire kumae, Dhaku, iywak nedi? Ewacu igi kumae, Kum gikabu Rwoth para woko, ang'eyo de ngo ka ma gikethe i ie.
- ¹⁴Kan eyero kumeno elokre yo ng'eye, man eneno Yesu cungo, ere eng'eyo ngo nia en e Yesu.
- ¹⁵Yesu wacu ire kumae, Dhaku, iywak nedi? iyenyo ng'a? En m'ewacu nyo en e jatipodho, ewacu ire kumae, Rwoth, tek itere kamange, yer ira ka m'ikethe i ie, kan abitere kamange.
- ¹⁶Yesu wacu ire kumae, Mariamu. Elokre, ewacu ire de ku dhu Juebrania, Raboni; ma juwacu kumae, Japonji.
- ¹⁷Yesu wacu ire kumae, Kud imul kuma; kum fodi aidho ba Wego ngo; ento ci ba utumira, man iwac igi nia abecidho ba Vwa ba Wegwu de, ba Mungu para man Mungu mu.
- ¹⁸Mariamu Magdalene ubino uwacu ni julub kumae, Aneno Rwoth; nia eyero ire lembe maeni de en.

¹⁹Nwang'u ceng' nica en e ceng' ma kwong'a ma yenga, ka piny udoko uthieno, nwang'u dhugola de bedo acika ka ma julub ni i ie, ni lworu m'unegogi ni Juyahudi, e Yesu bino ecungo de i diere, ewacu igi kumae, Kwiocwiny ubed i beng'wu.

²⁰E kan edaru yero maeni, enyutho igi cinge ku ng'ete. Ka kumeno anyong'a nego julub ka gineno Rwoth.

²¹Ka kumeno Yesu wacu igi kendo, Kwiocwiny ubed i beng'wu; calu Vwa ora, an de aorowu kumeno.

²²Kan eyero maeni, eyuyo i wigi, man ewacu igi kumae, Wujol Tipo Maleng':

²³dhanu ma tek wuweko dubo migi woko, e dubo migi wekre igi; dhanu ma tek wucero dubo migi, e giceri igi.

²⁴Ento nwang'u Thoma, ma julwong'o Didumo, ma en e ng'atu acel ma kind apar wi ario, embe i bang'gi kinde ma Yesu bino.

²⁵Ka kumeno julub wadi giwacu ire kumae, Waneno Rwoth. Ento ewacu igi kumae, Tek aneno poyo musumali i cinge ngo, aroyo lweta de ngo i poyo musumali, aroyo cinga de ngo i wang' ng'ete, abiyio ngo.

²⁶Yo ng'ei ceng' abora julubne ginuti kendo i ie, man Thoma de gini karacelo kugi. Yesu bino, nwang'u dhugola bedo acika, man ecungo i diere, ewacu kumae, Kwiocwiny ubed i beng'wu.

²⁷Elund ewacu ni Thoma kumae, Riei lweti kakeni, inen cinga de; riei cingi de, iroi i wang' ng'eta: man kud ibed ma yic umbe, ento ma yic nuti.

²⁸Thoma loko lembe ewacu ire kumae, Rwodha ku Munguna.

²⁹Yesu wacu ire kumae, Kum idaru nena, iyio: mugisa ni ju ma gineno ngo, ento giyio.

³⁰Ka kumeno Yesu timo giranyutha mange dupa i wang' julub m'ugore i kitabu maeni ngo:

³¹ento maeni gore kara wuyi nia Yesu en e Kristu, ma Wod Mungu; man kara ka wuyio wubed ku kwo i nyinge.

Yohana 21

¹Yo ng'ei gin maeni Yesu nyuthie gire kendo ni julub dhu nam Tiberia; man enyuthre kumae,

²Nwang'u Simon Petro man Thoma ma julwong'o Didumo, ku Nathanael ma Kana mi Galilaya, man wot Zebedayo, ku juario mange ma kind julubne gibedo karacelo.

³Simon Petro wacu igi kumae, Acitwomo rec. Giwacu ire kumae, Wan bende wabino wakudu. Gitugo woth, giidho de i yei; ento diewor nino gikwanyu gin moko ngo.

⁴Ento ka piny umaku ru, Yesu cungo dhu wath: ento julub ging'eyo ngo nia en e Yesu.

⁵Yesu lund uwacu igi kumae, Nyithindho, giracama moko ni kudu? Giloko lembe ire kumae, Umbe.

⁶Man ewacu igi kumae, Bol voi i ng'et yei ma yor acwic, e wubinwang'u. Ka kumeno gibolo, man kawono gicopo ywaye ngo ni udul rec.

⁷Ka kumeno jalub maeno ma Yesu maru wacu ni Petro kumae, En e Rwoth. Kum kumeno ka Simon Petro winjo nia en e Rwoth, etwio kanzu pare i kume (kum nwang'u ekendo bongu ma yo the wagi kende), e epiei i nam.

⁸Ento julub wadi gibino i yei ma nok (kum dhu wath udong' bor uugo, ento eyenyo romo bol dak ario), gibeywayu voi pong' ku rec i ie.

⁹E ka gidaru loro dhu wath, gineno cukmac keca, ku rec ma juketho i wie, man kwen.

¹⁰Yesu wacu igi kumae, Wukel kum rec moko ma wutwomo kawono.

¹¹Ka kumeno Simon Petro idho i yei man eywayu voi dhu wath, ku rec ma dongo pong' i ie, dak acel ku pier abic wi adek: man kadok gi dupa kumeni de voine yec ungo.

¹²Yesu wacu igi kumae, Wubin wucam. E ng'atu acel de mbe i kind julub ma cwinye tek m'epenje ko kumae, In i ng'a? kum ging'eyo nia en e Rwoth.

¹³Yesu bino, eting'o kwen de, man emio igi, ku rec de kumeno.

¹⁴Maeni doko wang' adege ma Yesu nyuthie ie ni julub, yo ng'ei cer m'ecer ko ku kind ju m'utho.

¹⁵Kum kumeno ka gidaru camu, Yesu wacu ni Simon Petro kumae, Simon, wod Yona, imara ma sagu joni? E eloko ire lembe kumae, Eyo, Rwoth; ing'eyo nia ameri. Ewacu ire kumae, Mi cam ni nyithi rombe para.

¹⁶Ewacu ire kendo wang' arionde, Simon, wod Yona, imara? Ewacu ire kumae, Eyo, Rwoth; ing'eyo nia ameri. Ewacu ire kumae, Kwai rombe para.

¹⁷Ewacu ire wang' adege kumae Simon, wod Yona, imara? Can unego Petro kum epenje wang' adege kumae, Imara? Man ewacu ire kumae, Rwoth, ing'eyo gin ceke; ing'eyo nia ameri. Yesu wacu ire kumae, Mi cam ni rombe para.

¹⁸Andhandha, ayero iri kumae, Ma fodi in i ayada, itwiri giri, iwotho de ka ma ii yenyo: endre kan ibiti, ibirieyo cingi, man ng'atu mange e ma bitwio iri, biteri de ka m'iyenyo ngo.

¹⁹Karaman eyero maeni, m'enyutho ko maram tho m'ebiyungo ko Mungu bibedo ko. Man kan edaru yero lembuni, ewacu ire kumae, Lub ng'eya.

²⁰Petro, m'ulokre, eneno jalub ma Yesu maru belubo ng'eigi; en e ng'atu m'ujeng' i kore bende dhu cemo mii uthieno, m'uwacu de kumae, Rwoth, ng'a m'ucibi?

²¹E ka Petro nene ewacu ni Yesu kumae, Rwoth, ng'atu maeni ke bitimo ang'o?

²²Yesu wacu ire kumae, Tek ayenyo nia ebed cil m'abino, en e ang'o iri? ilub ng'eya.

²³Lembuni lund uyik kind umego, nia jalub maeno bitho ngo: ento Yesu wacu ire ngo, nia ebitho ngo; ento kumae, Tek ayenyo nia ebed cil m'abino, en e ang'o iri?

²⁴En e jalub maeni m'unyutho lembe pi gin maeni, m'ugoro gin maeni de: man wang'eyo nia nyutholembe pare en e andha.

²⁵Gin mange de dupa nuti ma Yesu timo, ma tek jugoro pigi kubang'gi kubang'gi, kud i bang'a cil ng'om dho ngi ciromo ngo ku buku ma jubigoro.

Tic Mi Jukwenda

Tic Mi Jukwenda 1

- ¹Lembagora ma kwong'a m'atimo, E Theofilo, pi gin ceke ma Yesu maku timo ku ponjo de,
- ²cil i ceng' ma jujole ie malu, yo ng'ei lembang'ola m'eng'olo ni kum Tipo Maleng' ni jukwenda ma yang' egoyo nying'gi:
- ³man ku ng'ei masendi pare enyuthre gire igi ma kwo ku gin dupa ma piembre ngo, m'ewok ko i wang'gi nindo pier ang'wen, m'eyero ko pi gin mi ker pa Mungu de:
- ⁴man, ka gicokri karacelo gikugi, eng'olo igi ya ku giwok kud i Yerusalem, ento dong' gikur lembang'ola ma Wego ng'olo, ma, ewacu, yang' wuwinjo i bang'a:
- ⁵kum Yohana mio baputisi ku pi andha ento wun re wubimaku baputisi ku Tipo Maleng' ma fodi nindo dupa kukadhu ngo.
- ⁶Ka kumeno, ka gicokri karacelo, gipenje, giwacu kumae, Rwoth, idwoko ker ni Israel nindo maeni?
- ⁷E ewacu igi kumae, Meni iwu ngo ma nia wung'ei nindone kadi orone, ma Wego ketho gire ka tegone.
- ⁸Ento wun wubinwang'u tego, nwang'u Tipo Maleng' uwok i wiwu: man wubibedo jumulembe para i Yerusalem, man i Yahudi ngung' ku Samaria de, man cil i tung' ng'om bende.
- ⁹E kan edaru yero lembe maeni, kinde ma gibenene, e juting'e malu; afuru de jole kud i wang'gi.
- ¹⁰E kinde ma gibeneno i polo tel nwang'u ebecidho, nen. dhanu ario gicungo i vutgi ku kendi ma tar;
- ¹¹ma giwacu bende kumae, Wu dhanu mi Galilaya, wucungo wubeneno i polo nedi? Yesu maeni, ma jujole kud i kindwu malu i polo no, ebibino kumeca calu ma wunene ram acidho ko i polo.
- ¹²Gilund gidok Yerusalem ma giai ko wi got Zeituni, m'e kago ku Yerusalem, woth ma juwotho ko mi ceng' sabatu.
- ¹³E ka gidaru mondo i ie, giidho i ot ma malu, ka ma gibedo i ie; Petro giku Yohana man Yakobo kud Andrea, Filipino giku Thoma, Bartolomayo giku Matayo, Yakobo wod Alfayo, man Simon Zelote, man Yuda wod Yakobo.
- ¹⁴Joni ceke gibedo ru kum rwo ku cwinygi m'uripo acel, karacelo ku mon, man Mariamu ma min Yesu, ku utumin mire de.

- ¹⁵Ceng' nica Petro cungo malu i kind umego, (nwang'u udul dhanu gicoko dhoggi karacelo, giyenyo romo dak acel ku pier ario,) ewacu kumae,
- ¹⁶Umego, meni lembagora pa Mungu ma yang' Tipo Maleng' uyero ku dhu Daudi pi Yuda, m'e jatel wi ju m'umaku Yesu, uol utimbre be kakare.
- ¹⁷Kum jukwane wakugi, man enwang'u maka pare i tic maeni.
- ¹⁸(Nie ng'atuni ng'iewo podho ku sukulia mi camuco pare, e egam epodho agura wie, e dieie kak, cindie ceke de ole woko.
- ¹⁹Lembene meny ma dhanu ceke m'i Yerusalem ging'eyo; ketho julwong'o podho maeni ku dhu thugi kumae, Akeldama, thelebene kumae, Podho mi rimo.) ²⁰Kum egore kumae i kitabu mi Zaburi, Wek kabedo pare dong' ndhu kende, Ng'atu moko kud ubed i ie: man, Tic pare dong' ng'atu mange maki.
- ²¹Ka kumeno kud i kind dhanu ma wabedo ru wakugi por ma Rwoth Yesu bedumondo man ebedewok ko woko kud i kindwa,
- ²²ugambre kum baputisi ma Yohana mio, rama ceng' uwok ko ma juting'e ie malu kud i kindwa, i kind joni maku ng'atu acel wadok jumulembe wakugi be pi cer pare.
- ²³E giketho juario, Yusuf ma julwong'o Barsaba, ma won mire nyinge Yusto, man Matia.
- ²⁴E girwo, giwacu kumae, In, i Rwoth, m'ung'eyo adunde dhanu yu, nyuth ng'atu m'ifoyo ku kind juario maeni,
- ²⁵kara elag kaka i tic maeni ku mi kwenda bende ma Yuda podho i ie, kara eci gire kakare ma dhe.
- ²⁶E gituro wel i wigi; man wel upodho wi Matia; e jukwane ku jukwenda apar wi acel.

Tic Mi Jukwenda 2

- ¹E ka ceng' mi Pentekote tundo, kagi ceke gibedo karacelo i ka acel.
- ²E aruca ruca nica ba gin moko ai i polo pami wavuvu m'ukoto, man epong'o ot ceke ka ma gibedo i ie.
- ³E leb m'ukaru pami lebmac, uwok i wang'gi; man ebedo i wigi kubang'gi nzu.
- ⁴E kagi ceke Tipo Maleng' uromogi, man gimaku weco ku dhok ma nge nge, calu wec ma Tipo mio igi.
- ⁵Nwang'u Juyahudi gibedo Yerusalem, gi dhanu ma lworu Mungu, ma giai kud i thek ceke ma the polo.
- ⁶Man ka ba gin maeni winjre, udul dhanu gicoko dhoggi karacelo, e lembene loyogi, kum dhanu kubang'gi nzu giwinjo gibeweco ku dhu thugi ma dhe.

- ⁷E kagi ceke gipoi igi de wang' lii, giwacu kumae, Nen, joni ceke ma giweco gi Jugalilaya ngo?
- ⁸Wawinjo ku dhu thuwa ma junyolo kowa kubang'wa ceke ngi nenedi?
- ⁹Juparthi ku Jumedi man Juelemiti, ku ju m'ubedo i Mesopotamia, i Yahudi man Kapadokia, i Ponto man Asia,
- ¹⁰i Frugia man Pamfulia, i Misiri man ng'et Libua ma yo ba Kurene, ku jubedo m'uai i Rumi, Juyahudi ku ju ma juloko wang'gi bende,
- ¹¹Jukrete man ju Arabi, wawinjo gibeweco ku dhu thuwa kwa pi tic ma dwong' pa Mungu.
- ¹²E kagi ceke igi wang' lii, e igi pido kwe, giwacu gigi kumae, Thelembe maeni ang'o?
- ¹³Ento jumange giyero ku cac kumae, Pigulok ma nyasa merogi en.
- ¹⁴Ento Petro, m'ucungo giku juwagi apar wi acel, eting'o dwande malu, eyero igi kumae, Wu dhanu mi Yahudi, ku kewu ceke ma wubedo i Yerusalem de, dong' wung'ei lembe nini, man wucik ithwu kum lem para.
- ¹⁵Kum joni gimer amera ngo, calu ma wuwacu nyo; kum ceng' udoko saa adek kende;
- ¹⁶ento maeni en e lembe m'uyere ni kum jabila ma Yoel:
- ¹⁷Mungu wacu kumae, Gini bitimbre i kajik ceng', Abikonjo kum Tipo para moko wi weg kum ceke: Man wotu ku nyigu gibiewo, Awobi mu de gibineno ginmawokiwang', Judongo mu m'uti ke gibileko lek:
- ¹⁸Eyo i ceng' maeno abikonjo kum Tipo para wi jumiru para ma co. Ku jumiru para ma nyir bende; e gibiewo.
- ¹⁹Man abinyutho musana malu i polo, Ku giranyutha ma piny i ng'om de; Rimo, ku mac, ku lietho mi yiro de:
- ²⁰Ceng' bilokre ni mudho, Dwi ke ni rimo, Ma fodi ceng' pa Rwoth ku wok ungo, Cenguno m'e dwong' pire de dit:
- ²¹Gini bitimbre, nia ng'atu ma tek bilwo ng'o nying Rwoth ebiboth.
- ²²Wu dhanu pa Israel, wuwinj lembe maeni: Yesu ma Nazareti, en e ng'atu ma Mungu foye iwu ku tic ma dwong' man musana ku giranyutha ma Mungu timo ni kume i kindwu, cil calu wun de wung'eyo giwu;
- ²³en, ma jumie ni kum lembagora m'ubedo aketha pa Mungu m'elar eng'eyo, wun de wudong' wugure ku cing' juco wunege de:
- ²⁴ma Mungu ketho ecer, m'egonye ko ku i masendi mi tho: kum ecopre ngo ya ebed kudo.

- ²⁵Kum yang' Daudi yero pire kumae, Aneno Rwoth i wang'a thiri thiri; Kum eni yo ku cinga ma yor acwic, kara ia kud upidi:
- ²⁶Ka kumeno mutoro nego adundena, leba de anyong'a nege; Man ke ring'kuma bende bibedo m'egen;
- ²⁷Kum ibiweko ng'eyong'ec para ni Hadeya ngo, Kadi ibimio Ng'atu Maleng' peri ngo ya enen top.
- ²⁸Iketho ang'eyo yo mi kwo; Ibiyeng'a ku mutoro i weng'i.
- ²⁹Umego, acopo yero iwu dwe dwe pi Daudi ma kwaru, nia etho man juyike, man ke odliel pare ni i kindwa cil i ceng' maeni.
- ³⁰Kum en e jabila, m'eng'eyo de nia Mungu ng'olo ire ku kwong', nia kum kodhi mi kume ebiketho ng'atu acel wi komker pare:
- ³¹en m'elar eneno maeni eyero pi cer ma Kristu bicer ko, nia juweke ni Hadeya ngo, kadi ring'kume de neno top ungo.
- ³²Yesu maeni Mungu ketho ecer, ma kawa ceke de wa jumniembene.
- ³³Ka kumeno en ma judode malu ba cing' Mungu ma yor acwic, m'ejolo lembang'ola ma Wego ng'olo pi Tipo Maleng', ekonjo gin maeni, ma wuneno wuwinjo de.
- ³⁴Kum Daudi idho i polo ngo: ento ewacu en kumae, Rwoth uwacu ni Rwoth para, Jany yo ku cinga ma yor acwic,
- ³⁵Maram abiketho ko jukwoji ni kom mi tiendi.
- ³⁶Dong' juot pa Israel ceke ging'ei ma cwinygi kwio, nia Mungu ketho Yesu maeni ma wugure, ni Rwoth ku Kristu bende.
- ³⁷Nie ka giwinjo maeni, e ecobo adundegi, man giwacu ni Petro giku jukwenda wagi de kumae, Umego, wabitimo ang'o?
- ³⁸E Petro wacu igi kumae, Wulok cwinywu, wumak baputisi kubeng'wu kubeng'wu ku nying' Yesu Kristu ni ruc mi dubo mu; man wubijolo giramia ma Tipo Maleng'.
- ³⁹Kum lembang'olane en e iwu, man ni nyithindho mu, man ni dhanu ceke ma gibedo bor cen, cil ku ju ma Rwoth Mungu mwa bilwong'o i bang'e.
- ⁴⁰Man etuco ku lembe mange de dupa, man ethokogi, ewacu kumae, Dong' wubodhiu giwu ni dlianum'utuk maeni m'ugondri.
- ⁴¹E ju m'ujolo lembe pare gilund gimaku baputisi: man ceng' nica dhanu ma yenyero romo rubanga adek umedogi.
- ⁴²Man gibedo asu ku ponji mi jukwenda ku ripocwiny de, ku kwen m'angweka man ku rwo de.

⁴³Man Iworo makugi kubang'gi ceke: e musana ku giranyutha dupa rimbire ni kum jukwenda.

⁴⁴E ju m'uyio ceke gibedo karacelo, piny migi ceke de bedo ariba;

⁴⁵man giloko jupiny migi ku jamni migi de, gipoko de ku ba dhanu ceke, calku canpiny ma ni kum dhanu kubang'gi kubang'gi.

⁴⁶Man ku ba rupiny ku ba rupiny, ma gibedo asu ku cwinygi m'uripo acel i hekalu, ku kwen m'ang'weka de i udigi, gijolo cemo migi ku mutoro kwa kud adunde m'ucungo acel,

⁴⁷ma gipaku ko Mungu, ma gibedo ku bero de ku ba dhanu ceke. E Rwoth ucikumedo igi ju m'uboth ku ba rupiny ku ba rupiny.

Tic Mi Jukwenda 3

¹Nie Petro giku Yohana gibeidho malu i hekalu i saa mi rwo ma en e saa mir abung'wende.

²E ng'atu moko ma en e jarabala kud i min, jubejuyeye ku ba piny ku ba rupiny jukethe dhugola mi hekalu ma julwong'o Leng' kara ekwai giramia ba ju m'ucikumondo i hekalu;

³ma kan eneno Petro giku Yohana gidhingo mondo i hekalu, epenjo ya egam giramia.

⁴E Petro giku Yohana, ma gitono wang'gi i kume, giwacu kumae, Nen bang'wa.

⁵E eciko ithe i bang'gi, ewacu nyo ebigamu gin moko i bang'gi.

⁶Ento Petro wacu kumae, Mola ma tar ku mola ma kwar de ambe ko; ento gin m'abedo ko, maeno amio iri. Ku nying Yesu Kristu ma Janazareti, wothi.

⁷E emake ku cinge ma yor acwic, man eting'e malu: e aruca ruca nica tiende ku cogo ma ng'ut tiende de maku tego.

⁸Egam epor malu, ecungo, emaku wotho; man emondo kugi i hekalu, m'ewotho, ku por malu, ku paku Mungu de.

⁹Man dhanu ceke ginene m'ewotho ku paku Mungu de:

¹⁰e ging'eyo, nia en e ng'atu ma naka bedo pi giramia Dhugola Maleng' mi hekalu; e gipoi igi de wang' lii kum gin m'utimbre i kume.

¹¹E kinde m'emaku kum Petro giku Yohana, dhanu ceke giring'ni karacelo i bang'gi ma igi wang' lii, i pondot ma julwong'o pondot pa Suleman.

¹²Man ka Petro neno maeni, edwoko lembe ni dhanu kumae, Wu dhanu pa Israel, iwu wang' lii kum ng'atuni nedi? kadi wutono weng'wu i kumwa nedi, calu ya waketho ewotho wan ku tego mwa giwa kadi ni kum bedo mwa ma ayi Mungu ni i kume?

¹³Mungu pa Ibrahim, ku pa Isak, ku pa Yakobo de, Mungu pa kwaruwa, eyungo Jatic pare Yesu; ma wumie, wukwere bende i wang' Pilato, kan eyenyo egonye.

¹⁴Ento wukwero Ng'atu Maleng' ma Pwe de, wudong' wulwong'o janek e ma jumi iwu,

¹⁵man wunego Jathek kwo; ma Mungu ketho ecer ku kind ju m'utho; wa jumulembe de kum maeni.

¹⁶Man ni kum yic mi nyinge e nyinge dwoko ng'atuni tek, ma wuneno wung'eyo de: eyo, yioyic ma ni kume e m'uketho ng'atuni doko cu ma ndhu i vutwu ceke.

¹⁷Nie, umego, ang'eyo wutime cobo, calu ma jubim mu bende gitimo.

¹⁸Ento gin ma Mungu lar unyutho ku dhu jubila ceke, nia Kristu pare bisendre, eketho etimbre kakare kumeno.

¹⁹Ka kumeno wulok cwinywu, man wulokru kendo, kara dubo mu kabre woko, kara nindo mi yepocwiny uai i vut Rwoth;

²⁰man kara eor Kristu ma yang' eketho iwu, en e Yesu:

²¹ma polo kojole be cil i nindo mi dwoko gin ceke, ma yang' Mungu yero pire ku dhu jubila pare maleng' ma ginuti por eca ngi.

²²Musa wacu andha kumae, Rwoth Mungu biting'o jabila iwu kud i kind juwedu, ma calu an; wubiwinjo gin ceke de i bang'e ma tek eyero iwu.

²³E gini bitimbre, nia ku ba dhanu ceke ma biwinjo jabila maeno ngo, gibinyothri ndhu kud i kind dhanu.

²⁴Eyo jubila ceke m'ugambre kum Samwil ku ju ma gliubo ng'eye de, kagi ceke ma yang' giyero, gin bende giyero pi cenguni.

²⁵Wun wu wot jubila, man mi lembariba ma Mungu timo ku kwaruwu, m'ewacu ko ni Ibrahim kumae, I kodhini thek ceke m'i ng'om binwang'u mugisa.

²⁶Mungu m'edaru ting'o Jatic pare malu, elar eore iwu kara emi iwu mugisa, ku lokowu kubeng'wu kubeng'wu kum camuco mu.

Tic Mi Jukwenda 4

¹E ka gibeyero ni dhanu, julam man jadit mi hekalu ku Jusadukayo gibino i bang'gi,

²ma cwinygi ng'abre dit kum joca ponjo dhanu, man giyero ni kum Yesu pi cer ku kind ju m'utho.

³E giketho cing'gi i kumgi, man gikethogi i odkol tundu mir urwone: kum nwang'u piny udoko uthieno.

⁴Ento dupa m'i kindgi m'uwinjo lembene giyio; e wel jumaco doko ve rubanga abic.

- ⁵E urwone lembe timbre kumae, ya jubim migi ku judongo man jugorcik de gicoko dhoggi i Yerusalem;
- ⁶e Ana ma jalam ma dit de nuti, ku Kayafa, man Yohana, man Iskander, ku dhanu ceke ma gi jupagi jalam ma dit de.
- ⁷E ka giketho joca i diere, gipenjo kumae, Wutimo maeni ku tego ang'o, kadi ku nying' ng'a?
- ⁸E Petro, ma Tipo Maleng' urome, elund ewacu igi kumae, Wu jubim mi dhanu, ku judongo de,
- ⁹tinuni tek wubepenjowa pi tic ma ber m'utimbre kum ng'atu ma ng'ic, ya girang'o m'udwoko ng'atuni dho;
- ¹⁰kewu ceke dong' wung'ei, ku dhanu pa Israel ceke bende, nia ku nying' Yesu Kristu ma Nazareti, ma wugure, ma Mungu ketho ecer ku kind ju m'utho, e ng'atuni cungo dho i vutwu kakeni ni kume.
- ¹¹En e kidi ma wun wu jugomot wudwoke ni gin mananu, ma judwoke ni wic mi gul.
- ¹²Man ni kum ng'atu mange both umbe; kum nying' mange mbe the polo, ma jumio i kind dhanu, ma wakowaboth be ni kume.
- ¹³Nie ka gineno tegocwiny pa Petro giku Yohana, ging'eyo de ya gi dhanu ma sang'na ma cobo de, igi wang' lii; e ging'eyo pigi, ya naka gibedo giku Yesugi.
- ¹⁴E ka gineno ng'atu ma kume kei cungo i bang'gi gicopo yero gin moko ngo pire.
- ¹⁵Ento ka ging'olo ya giai cen kud i dilo, gipido lembe i kindgi gigi,
- ¹⁶giwacu kumae, Wabitimo ang'o kum joni? kum musana ma pire dwong' utimbre ni kungi andha, unyuthre ni dhanu ceke ma gibedo i Yerusalem; wan de piembe loyowa.
- ¹⁷Ento kara kud eyik apila i kind dhanu, dong' wacimugi, kara ku giyer nying' maeni kendo ni ng'atu moko.
- ¹⁸E gilwong'ogi, man gipoko igi ya ku giyer ku nying Yesu ki man ku giponj i nying Yesu.
- ¹⁹Ento Petro giku Yohana gidwoko lembe giwacu igi kumae, Tek en e atira i wang' Mungu ya wawinj i beng'wu ma sagu ma ba Mungu, wupok wun:
- ²⁰kum wacopo weko yero pi gin ma waneno ku ma wawinjo de ngo.
- ²¹E gin, ka gicimogi kendo, gigonyogi ma ginwang'u gin moko ngo ma gisendgi i kume ni kum dhanu; kum dhanu ceke giyungo Mungu kum gin m'utimbre.
- ²²Kum ng'atu ma musana mi kum acanga timbre i kume, nwang'u rundi pare sagu pier ang'wen. Maleng' uromogi, man giyero lem pa Mungu ku tegocwiny.

²³E ka jugonyogi, gibino ba juwagi, man gigonyo lembe ceke ma julam ma dongo ku judongo de giyero igi.

²⁴Gin de, ka giwinjo maeni, giting’o dwandgi malu ba Mungu ku cwinygi m’uripo acel, man giwacu kumae, E Rwoth, in m’icwio polo ku ng’om ngi ku nam de, ku gin ceke ma ni i igi bende:

²⁵In ma yang’ iwacu ku Tipo Maleng’, ku dhu wegwa ma Daudi ma jatic peri kumae, Thekdhanumange timo ng’ecwiny apila nedi, Kodhi dhanu de bepido pi gin ma kite mbe nedi?

²⁶Ju m’ubimo m’i ng’om girieri gigi, Jubim de koko dhoggi karacelo, Kum Rwoth, man kum Kristu pare:

²⁷kum andha i adhura nini Herode giku Pontio Pilato, karacelo ku Thekdhanumange ku kodhi dhanu pa Israel de, gicoko dhoggi kum Yesu ma Jatic peri maleng’, m’iwiro mo i wie,

²⁸ya gitim gin ma yang’ cingi ku lembapora peri gilar giketho ya bitimbre.

²⁹Kawono, Rwoth, nen cim migi: man dong’ imi ni jumiru peri ya giyer lembe peri ku tegocwiny kwa,

³⁰kan irieyo cingi m’ikeyo ko tho; man kara giranyutha ku musana de timbre ni kum nying’ Jatic peri maleng’ Yesu.

³¹E ka gidaru rwo ka ma gicoko ie dhoggi karacelo yengre; e kagi ceke Tipo Maleng’ uromogi, man giyero lem pa Mungu ku tegocwiny.

³²Man udul mi ju m’uyio adundegi ripo acel ku ng’eyong’ec de: ng’atu acel de mbe m’uwacu ya ng’et kum gin m’ebedo ko ya pare gire; ento giribo gin ceke karacelo.

³³E jukwenda ginyutho pi cer pa Rwoth Yesu ku tego ma dit: e bero ma dit ubedo i wigi ceke.

³⁴Kum moko mbe m’i kindgi ma canpiny unegogi: kum ceke ma gi weg pothi kadi udi de giloko, man gikelo wel piny mi gin ma gilokone,

³⁵gikethogi de the tiend jukwenda: e jupoko pokne ku ba dhanu nzu, ma can pinje ni i kumgi.

³⁶Man Yusuf, ma jukwenda gilwong’e Barnaba (ma, ka juloke, en e Wodjuk), e Jalawi, dhanu ma thugi ni Kupro,

³⁷e won podho, eloke, ekelo sentene de eketho the tiend jukwenda.

Tic Mi Jukwenda 5

¹Ento ng’atu moko ma nyinge Anania, giku Sahra ma cege, ging’iewo jupiny moko,

- ²man ekanu wel jupiny kucel, cege de giribri kude i lembene, man ekelo kume kucel, ekethe the tiend jukwenda.
- ³Ento Petro wacu kumae, Anania, Jok upong'o adunden inedi m'icwayu ko ndra ni Tipo Maleng', m'ikanu ko kum welpiny mi ng'omi?
- ⁴Kinde m'eni i beng'i, nwang'u en e peri ngo? man kan idaru loke, ebedo i tego peri ngo? Iyio gino wok i adundeni pirang'o? icwayu ndra ni dhanu ngo, ento ni Mungu.
- ⁵E ka Anania winjo lembe nini epodho bir e cwinye kadhu ndhu; man lworu ma dit apila podho wi dhanu ceke ma giwinjo maeni.
- ⁶E awobi giai giboye de, gitere woko gicigiyeke.
- ⁷Man eyenyo romo kinde mi saa adek yo ng'eye, ka cege, ma fokung'eyo gin m'utimbire ngo, umondo.
- ⁸E Petro wacu ire kumae, Yer ira tek wuloko ng'om ku piny mae. Man ewacu kumae, Eyo, ku piny maeno.
- ⁹Ento Petro wacu ire kumae, Wugewuripo lembe ya wumul ko Tipo Rwoth nedi? nen, tiend ju m'uyiko cweri gi ni dhugola, man gibiteri woko.
- ¹⁰E ndhu ndhu nica epodho bir etho ndhu, man gitere woko gicigiyeke ba cware.
- ¹¹E lworu ma dit upodho wi kanisa ceke, ku wi dhanu ceke de ma giwinjo gin maeni.
- ¹²Man giranyutha ku musana dupa timbre kind dhanu ku cing' jukwenda: kagi ceke de gibedo ku cwinygi m'uripo acel i pondot pa Suleman.
- ¹³Ento i kind dong' dhanu m'udong' ng'atu moko mbe ma cwinye tek m'eribre ko kugi: ento ayunga re dhanu yungogi;
- ¹⁴man juyic gimedri m'usagu ba Rwoth, udul jumaco ku jumamon bende:
- ¹⁵ketho giwodho cil ju ma kumgi lith giterogi woko i gengi, gipielogi wi kavuto ku wi par bende, kara ka Petro bekadhu, kuno nyo tipone biumo ng'atu moko m'i kindgi.
- ¹⁶Udul dhanu bende giai i adhura m'utiekko Yerusalem, gicoko dhoggi ma gikelo ko ju ma kumgi lith, ku ju ma tipo m'ucido besendogi: e kumgi kei kubang'gi ndri.
- ¹⁷Ento jalam ma dit uai malu, ku ju ma gibedo gikugi ceke (ma en e pokri mi Jusadukayo), e ngiri pong'ogi
- ¹⁸e giketho cing'gi kum jukwenda, man gicwalugi i odkol.
- ¹⁹Ento malaika pa Rwoth uyabu dhugola mi odkol ku diwor, ewodhogi woko, man ewacu kumae,
- ²⁰Wucidh wucung i hekalu wuyer lembe ceke ni dhanu pi Kwo maeni.

- ²¹E ka giwinjo maeni, gimondo i hekalu ka mombwa maku thumo, giponjo de. Ento jalam ma dit uwok, ku ju ma gibedo gikugi de, man gicoko dhu dilo, ku judongo mi nyikwai Israel de, e giro ya jugamgi i odkol jukelgi.
- ²²Ento asikari m'ucidho giwok ginwang'u gimbe i odkol; man giloko gidok, giyero kumae,
- ²³Wawok wanwang'u dhu odkol ubedo acika kubang'e, jukur de gicungo dhugola: ento ka wayabu, wanwang'u ng'atu moko mbe i ie.
- ²⁴Nie ka jadit mi hekalu ku julam ma dongo giwinjo lembe maeni, igi pido mumbe i kumgi maram lembene binyai ko.
- ²⁵E ng'atu acel ubino uyero igi kumae, Nen, dhanu ma wukethogi i odkol gini i hekalu gicungo gibeponjo dhanu.
- ²⁶E jadit mi hekalu kud asikari gilund gicidho, gikelogi, endre ku kero ngo; kum gilworo dhanu, gimaru canyugi ku kidi.
- ²⁷E ka gikelogi, gikethogi i wang' dilo. E jalam ma dit upenjogi,
- ²⁸ewacu kumae, Wang'olo iwu ma tek ya kud wuponj ku nying' maeni: nen, wuromo Yerusalem ceke ku ponji mu, wuyenyo wukel rimb ng'atuno i wiwa de.
- ²⁹Ento Petro giku jukwenda wagi de giloko lembe giwacu kumae, Wakoworo Mungu be ma sagu woro dhanu.
- ³⁰Mungu pa kwaruwa ting'o Yesu malu, ma nwang'u wunega, ma wuliere ko wi yen.
- ³¹En Mungu dode ku cinge ma yor acwic ya ebed Jaker ku Jalar, kara emi lokocwiny ni Israel, ku ruco dubo.
- ³²Wan de wa jumulembe mi ginduni; man Tipo Maleng' bende, ma Mungu mio ni ju m'uwore.
- ³³Ento joca, ka giwinjo maeni, ethumo adundegi, e giyenyo gineggi.
- ³⁴Ento ng'atu acel ma Jafarisayo ai malu i kind dilo, ma nyinge Gamaliel, m'e jaeuthecik, m'e ng'atu ma pire ber ni dhanu ceke, man eng'olo ya gikogiketh joca cen tundu.
- ³⁵Man ewacu igi kumae, Wu dhanu pa Israel, wubed ku weng'wu i kumwu giwu kum joni, ni gin ma wuyenyo timo.
- ³⁶Kum nwang'u ka fodi ceng' maeni kuwok ungo Theuda wodhre, m'eketho pire yik ya en e m'e en; e dhanu moko, ma va dak ang'wen, ging'ino i kume: e junege; man ju m'uwore ceke, julalugi, e gidoko yaca.
- ³⁷Yo tok ng'atuni ke, Yuda ma Galilaya i ceng' ma jugoro nying' ewodhre, man ecoke dhanu kucel i kume: en bende erwinyo; e ju ma giwore ceke, julalugi nge.

³⁸E kawono abeyero iwu kumae, Kud wutim gin moko kum joni, wuwekgi: kum tek lembapora maeni kadi tic maeni ai ba dhanu, ebirany:

³⁹ento tek eai ba Mungu, wubicopo ranjugi ngo; kuno nyo jubinwang'u ya wubetimo ali cil kum Mungu.

⁴⁰Man giwinjo dwande: e ka gilwong'o jukwenda i bang'gi, gidong' gifodogi afoda man ging'olo igi ya ku giyer ku nying' Yesu, e giwekogi gicidho.

⁴¹E ka kumeno giai kud i dilo, ma anyong'a negogi kum jukwanu ya giromo sendri ma jujwigo kogi kum Nying' maeni.

⁴²E ku ba rupiny ku ba rupiny, i hekalu kud i udigi de, giweko ponjo ku yero de ki ngo ya Yesu en e Kristu.

Tic Mi Jukwenda 6

¹Nie i ceng' maeni, ma wel julub gicikumedri i ie, Juyahudi ma Juyunani gimaku ng'ur kum Juebrania, kum juweko mon migi bedo rwa i timotim ma ku ba rupiny.

²E juapar wi ario gilwong'o udul julub wagi i bang'gi, man giwacu kumae, Maku ku wawek lem pa Mungu, ya watim tic mi mesa.

³Umego, ka kumeno dong' wunen dhanu abiro i kindwu ma pigi ber ma Tipo ku rieko de romogi, ma wakethgi kum ticne.

⁴Ento wan re wabibedo mwa ru wi rwo, man i tic mi lembe bende.

⁵E lembe nini maku i udul dhanu ceke: e gidong' gigoyo wi Stefano, m'e ng'atu ma yioyic ku Tipo Maleng' bende rome, man Filipo, ku Prokoro man Nikanor, ku Timoni, man Parmena, giku Nikolao ma ng'atu ma Antiokia ma juloko wang'e;

⁶e juketho joni wang' jukwenda: man ka gidaru rwo, giketho cing'gi i wigi.

⁷E lembe pa Mungu nyai: wel mi julub de medre dit apila i Yerusalem; udul julam de giworo yic nini.

⁸Man Stefano, ma bero ku tego de rome, etimo musana ma dit ku giranyutha de i kind dhanu.

⁹Ento jukucel ma gi dhanu mi cokri ma julwong'o cokri mi Julibertino, man ke mi Jukurene, man ke mi Juiskanderia, man mi ju mi Kilikia kud Asia, joni giai gipiemo piem giku Stefanogi.

¹⁰E dhoggi thwo kau kum rieko ku Tipo de m'eyero kudo.

¹¹Gidong' gicuno i dhanu, ma giwacu kumae, Wawinjo eyero lembacidi kum Musa man kum Mungu.

¹²Man githubo dhanu, ku judongo, man jugorcik, e gikonjri i kume, gimake, gikele de i wang' dilo,

¹³man giketho jumulembe mi ndra, m'uwacu kumae, Ng'atuni weko yero lembe ngo kum kakeni ma leng', man kum cik de:

¹⁴kum wawinjo ewacu ya Yesu maeni ma Nazareti binyotho kakeni, man ebiloko kura ma Musa mio iwa.

¹⁵E kagi ceke ma gibedo i dilo, ma gikonjo wang'gi i kume, gineno wang'e calu en e wang' malaika.

Tic Mi Jukwenda 7

¹Man jalam ma dit uwacu kumae, Gin maeni kumeno?

²Man eloko kumae, Umego ku wego de, wukowuwinji: Mungu mi dwong' unyuthie ni wegwa ma Ibrahim, kan eni i Mesopotamia, ka fodi ebedo i Haran ungo,

³man ewacu ire kumae, Dong' iai woko kud i ng'om ma thu, kud i kind jupeu de, man ibin i ng'om m'abinyutho iri.

⁴E elund eai kud i ng'om mi Jukaldayo, man ebedo i Haran: ku kuca, ka won utho, Mungu dake i ng'ombuni, ma wubedo i ie kawono:

⁵man emio ire aba i ie ngo, ungo, ma romo tiende de ngo: man eng'olo ya ebimie ire ni jupiny pare, ni nyikwaye de yo ku ng'eye, ma fodi nyathin pare de mbe.

⁶E Mungu wacu calu mae, nia nyikwaye bibedo i ng'om ma nyo ci, nia jubidwokogi de ni ng'eca, man jubitimogi rac rundi dak ang'wen.

⁷E Mungu wacu kumae, Abipoko lembe mi thek ma gibedo ng'eca igi: e yo ng'eye gibiai woko, man gibitimo ira kakeni.

⁸Man emio ire lembariba mi yaa: ka kumeno Ibrahim unyolo Isak, man i ceng' mir aborane etimo yaa i kume; Isak de nyolo Yakobo, Yakobo ke nyolo kwaru apar wi ario.

⁹Man kwaru, ma nyeko timogi kum Yusuf, ging'iewe i Misiri; e Mungu de ni i bang'e,

¹⁰elare de kud i can pare ceke, man emio ire bero ku rieke i wang' Farao m'ubimo mi Misiri; man edwoke ni jabim wi Misiri ku wi ot pare de ceke.

¹¹Nie ndruru podho i Misiri ku Kanan ngung', ku can ma dit. Giracama de kwaruwa nwang'u ngo.

¹²Ento ka Yakobo winjo ya cam nuti i Misiri, elar eoro kwaruwa wang' acel.

¹³Mir arionde Yusuf ung'eire ni utumin; man thek pa Yusuf ung'eire ni Farao.

¹⁴E Yusuf uoro, man elwong'o Yakobo ma won mire ubin i bang'e, ku jupagi ceke, dhanu pier abiro wi abic.

¹⁵E Yakobo loro piny i Misiri; e egam etho, giku kwaruwa de;

- 16**man juyeyogi juterogi kuca i Cekem, e jukethogi i odliel ma Ibrahim ung'iewo ku jupiny mi mola ma tar ba wot Emor ma i Cekem.
- 17**Ento ka nindo ma lembang'ola ma yang' Mungu ng'olo ni Ibrahim udhingo timbre, dhanune ginyai gimedri i Misiri,
- 18**rama ubimo mange camu ko ker i Misiri, m'ung'eyo Yusuf ungo.
- 19**Ng'atuca bombo thek mwa, man etimo rac kum kwaruwa, ya gibai mukere migi woko kara ku gibed kwo.
- 20**I nindo nica junyolo Musa, man kite leng' mumbe; e jugwoke i ot pa won dwi adek:
- 21**e ka jubaye, nya Faraο uting'e, man etunge ka wode ma dhe.
- 22**Man juponjo Musa ku rieko ceke mi Jumisiri; ebedo dwong' de i lembe pare i tic pare de.
- 23**Ento kinde ma rundi pare maku doko pier ang'wen, lembe wok i adundene ya elieu jupagi ma gi nyithi Israel.
- 24**Man kan eneno ng'atu acel ma jutime rac, egam elare, man eculo kwor pi ng'atu ma jubesendo, egam enego Jamisiri:
- 25**e ie wacu ya jupagi ging'eyo nia Mungu bemio igi both ku cinge en e Musa; karaman ging'eyo ngo.
- 26**Urwone ewok i bang'gi kinde ma gibenyego, man eyenyo etheggi, ewacu kumae, Paco, wun umego; wutimo rac ba juwedu nedi ma ng'atuman utimo ba wadi man ba wadi e?
- 27**Ento ng'atu acel m'utimo rac kum wadi ucwale mire cen, ewacu kumae, Ng'a m'uketho idok jabim i wiwa ku japoklembe de?
- 28**Iyenyo inega, pami nyaworo inego Jamisiri?
- 29**E Musa piei kum lembe nini, man edoko jabedo i ng'om Midiani, ka m'enyolo ie wote ario.
- 30**E ka rundi pier ang'wen uthum malaika wok i bang'e i yamba mi got Sinai, i lebmac ma i yen m'udinyo.
- 31**E kinde ma Musa nene, ie wang' lii kum giranena maeno: e kan ecoro ceng'ni nineno, dwand Rwoth ubino kumae,
- 32**An a Mungu pa kwaru, Mungu pa Ibrahim, man pa Isak, man pa Yakobo. E kum Musa miel, man ebedo ku tegocwiny ungo m'enen ko.
- 33**Man Rwoth uwacu ire kumae, Gony wara woko kud i tiendi: kum ka m'icungo i ie en e ng'om ma leng'.

- ³⁴Aneno can mi dhanu para andha ma gini i Misiri, man awinjo ba cur migi, e aloro piny nigonyogi: kawono koibin, abiori i Misiri.
- ³⁵Musa maeni ma gikwere, giwacu kumae, Ng'a m'uketho idok jabim ku japoklembe de? e en nini e ma Mungu ore nibedo jabim ku jalar bende ku cing' malaika m'uwok i bang'e i yen m'udinyo.
- ³⁶Ng'atuni e m'utelo wigi woko, ku yo ng'ei musana ku giranyutha de m'etimo i Misiri, man i nam Makwar, kud i yamba de rundi pier ang'wen.
- ³⁷En e Musa maeno m'ewacu ni nyithindho pa Israel kumae, Mungu biting'o iwu jabila kud i kind juwedu, ma calu an.
- ³⁸Maeni en ma yang' eni i kanisa i yamba giku malaika m'uweco i bang'e i got Sinai, man ku kwaruwa bende: m'egamu wec mi kwo ya emi iwa:
- ³⁹kwaruwa giyio ngo ya gibed wor ire, ento gicore cen, e gilokri ku i adundegi ni Misiri,
- ⁴⁰giwacu ni Harun kumae, Thiedh iwa mungu ma bitelo wiwa: kum Musa maeni, ma naka telo wiwa m'uwodhowa kud i ng'om Misiri, wang'eyo gin m'utimbre i kume ngo.
- ⁴¹Man i ceng' maeca githiedho nyathi dhiang', e gikelo lam ni ayi gin m'acwia nica, man gifoiri kum tic mi cing'gi.
- ⁴²Ento Mungu lokre, man ekunogi ya gitim ni udul mi polo; calu jugoro i kitabu mi jubila kumae, Wumio ira lim m'anega ku lam de I yamba nindo pier ang'wen, E juot pa Israeli?
- ⁴³Man wuting'o hema pa Molok, Ku cero mi mungu ma Refan bende, Ayi gin ma wutimo ya wurwo i bang'gi: E abiterowu cen ng'ei Babeli.
- ⁴⁴Kwaruwa gibedo ku hema mi lembatuca i yamba, cil calu eng'olo m'ewacu ni Musa, ya etime calu ayi m'eneno.
- ⁴⁵Ma kwaruwa bende, i nindo migi, gikelo i ie giku Yocuwagi ka gimwonyo ng'om mi thek, ma Mungu riemo woko kud i wang' kwaruwa, cil i ceng' pa Daudi;
- ⁴⁶m'unwang'u bero i wang' Mungu, man epenjo ya enwang' kabedo ni Mungu pa Yakobo.
- ⁴⁷Ento Suleman e m'udong' ugomo ot ire.
- ⁴⁸Ento Ng'atu ma Malu Ngbir bedo i udi ma jugomo ku cing' ungo; calu yang' jabila wacu kumae,
- ⁴⁹Polo en e komker para, Ng'om ke kom mi tienda: Ot manedi ma wubigomo ira? Rwoth uwacu: Kadi kani ma kayom para?
- ⁵⁰Cinga cwio gin maeni ceke en ungo?

⁵¹Wun ma ng'utwu cikre ma wukuti mo yaa ngo kum adundewu kum ithwu de, wucero Tipo Maleng' thiri thiri: calu ma yang' kwaruwu gibegitimo, e wun bende wutimo kumeca.

⁵²Jubila makani ma yang' kwaruwu gikunyayu ragedo i kumgi ngo? man ginego ju ma gilar ginyutho kabino pa Ng'atu ma Pwe; ng'atu ma kawono wudoko jucibne ku junekne;

⁵³wun ma wujolo cik calu malaika ng'olo, ere wuwore ngo.

⁵⁴E ka giwinjo gin maeni ethumo adundegi, man ging'enjo lakgi i kume.

⁵⁵Ento en, ma Tipo Maleng' urome, eneno i polo tel, man eneno dwong' pa Mungu, ku Yesu de m'ucungo yo ku cing' Mungu ma yor acwic,

⁵⁶man ewacu kumae, Nen, aneno polo yabre, ku Wod dhanu m'ucungo acunga yo ku cing' Mungu ma yor acwic.

⁵⁷Ento gin gikok ku dwandgi ma tek, giculo ithgi de, e gikonjri i kume vur;

⁵⁸e gibaye woko kud i adhura, man gicanye ku kidi: jumulembe de giketho kendi migi the tiend jalawobi ma nyinge Saul.

⁵⁹E gicanyu Stefano ku kidi, m'ebelwong'o Rwoth, ewacu kumae, Rwoth Yesu, jol tipona.

⁶⁰E erum piny, man ekok ku dwande ma tek kumae, Rwoth, kud iketh dubo maeni i kumgi. E kinde m'eyero maeni, enindo.

Tic Mi Jukwenda 8

¹Saul de yio ya etho. Ceng' nica ragedo ma dit uwok kum kanisa ma ni i Yerusalem; e kagi ceke julalugi nge nge i ng'om Yahudi man Samaria, jukwenda re m'udong'.

²E dhanu ma lworu Mungu giyiko Stefano, man giketho ywak ma dit i wie.

³Ento Saul unyotho kanisa, m'emondo ko ku ba udi ku ba udi, m'eywayu ko co ku mon de ekethogi i odkol.

⁴Ka kumeno ju ma julalugi nge nge gicidho ku yero lembe nini.

⁵E Filipino loro piny i adhura ma Samaria, man eyero igi pi Kristu.

⁶E udul dhanu giciko ithgi ku cwinygi m'uripo acel ni lembe ma Filipino yero, ka giwinjo, gineno ku giranyutha m'etimo de.

⁷Kum tipo m'ucido ma ni ii dhanu dupa, giwok woko kud i igi, ma gikok akoka ku dwandgi ma tek: ju ma kumgi tho nding' de dupa, ku weg abala mi tielo, kumgi kei.

⁸E mutoro ma dit ubedo nuti i adhura maeno.

- ⁹Nwang'u ng'atu acel nuti, ma nyinge Simon, ma naka betimo ajoga i adhura nica, eketho i dhanu ma Samaria de wang' lii, m'ekethie gire nia en e ng'atu ma dit:
- ¹⁰ma dhanu ceke de giciko ithgi i bang'e, dhanu ma sai ku dhanu ma pigi yik de, giwacu kumae, Ng'atuni en e tego maeno pa Mungu ma julwong'o Dwong'.
- ¹¹E giciko ithgi i bang'e, kum nindo dupa eketho igi wang' lii kud ajoga pare.
- ¹²Ento ka giyio Filipino m'ubeyero lembanyong'a mi ker pa Mungu ku nying' Yesu Kristu, e gimaku baputisi, co ku mon de.
- ¹³Simonne bende eyio: e kan emaku baputisi, gidong' gibedo giku Filipino; e kan ebeneno giranyutha ku musana ma dit de m'utimbre, ie wang' lii.
- ¹⁴Nie ka jukwenda ma ni i Yerusalem giwinjo nia Samaria jolo lembe pa Mungu, gioro Petro giku Yohana i bang'gi:
- ¹⁵ma, ka giloro piny, girwo pigi, kara gijol Tipo Maleng':
- ¹⁶kum fodi epodho wi jumoko ngo m'i kindgi: fodi gimaku baputisi ku nying Rwoth Yesu kende.
- ¹⁷E gilund giketho cing'gi i wigi, man gijolo Tipo Maleng'.
- ¹⁸Nie ka Simon uneno ya Tipo Maleng' umire ni kum cing' ma jukwenda ketho, ewodho igi sente,
- ¹⁹ewacu kumae, Mi tego maeni ira bende, kara ng'atu ma tek aketho cinga i kume ejol Tipo Maleng'.
- ²⁰Ento Petro wacu ire kumae, Mola ma tar peri nyothii ko giri, kum iwacu nyo giramia pa Mungu junwang'u ku sente.
- ²¹Kaperi mbe kadok kume moko de i lembe maeni: kum adundeni bedo pwe ngo i wang' Mungu.
- ²²Ka kumeno lok cwinyi kum dubo peri maeni, man irwo ni Rwoth, kuno nyo jubiweko pidoic mir adundeni woko iri.
- ²³Kum aneno nia ini i ulecu mi gin ma kec man i twic mi camuco.
- ²⁴E Simon udwoko lembe ewacu kumae, Wurwo pira ba Rwoth, kara gin ma wuwacu no moko kud uwok i kuma.
- ²⁵Ka kumeno joni, ka gidaru tucu man giyero lembe pa Rwoth, e gidok i Yerusalem, man giyero lembanyong'a ma juboth ko i pacu dupa mi Jusamaria.
- ²⁶Ento malaika pa Rwoth uyero ni Filipino, ewacu kumae, Ai malu, ici yor ariwa ma piny ba yo m'uai Yerusalem uloro Gaza: ng'ombe ng'om ngele.
- ²⁷E eai malu ecidho: nen, Jaethiopia, en e jamugumba ma won ng'ol ma dit the Kandake ma rwoth ma dhaku wi Juethiopia, m'ebedo wi piny m'akana pare ceke, m'ebino de nirwo i Yerusalem;

28man ebedwogo adwoga ebedo de i magali pare, man ebesomo kitabu pa jabila ma Isaya.

29E Tipo wacu ni Filipino kumae, Cor ceng'ni, man iwoth kum magali maeni.

30E Filipino ringo i bang'e, ewinjo ebesomo Isaya ma jabila, e epenjo kumae, Ing'eyo gin m'isomo no?

31Edwoko lembe kumae, Acopo nenedi, tek ng'atu moko kutelo wia ngo? E ekwayu Filipino idh gibed gikude.

32Nwang'u kaka lembagora pa Mungu m'esomone e eni, Jupeye calu rombo ba kathum; Man calu nyathi rombo bedo ling' i wang' junyaryuke, En de kumeno ealu dhoge ngo:

33I jwik pare pokolembe pare kabre woko: Ng'a bikoro pi dhanum'utuk i kume? Kum kwo pare jukabu woko kud i ng'om.

34E jamugumba loko lembe ni Filipino ewacu kumae, Akwei, jabila yero maeni pi ng'a? pire gire, kadi pi ng'atu mange?

35E Filipino alu dhoge, man etheko kum lembagora maeni, eyero ko ire pi Yesu.

36Man ka gibecidho i yo, gitundo kum pi moko; e jamugumba wacu kumae, Nen, pi eni; girang'o m'ucera ku maku baputisi?

37E Filipino wacu kumae, Tek iyio kud adundeni ceke icopo. Man eloko lembe ewacu kumae, Ayio nia Yesu Kristu en e Wod Mungu.

38E eng'olo nia magali ukoucungi: e Filipino giloro i pi, giku jamugumba; man emie baputisi.

39E kinde ma giai kud i pi, Tipo Rwoth urwinyo ku Filipino biti; e jamugumba dong' unene kendo ngo, kum ecidho i yo pare ma anyong'a nege.

40Ento judong' junwang'u Filipino i Azoto: e kan ebekadhu akadha eyero lembanyong'a ma juboth ko i adhura ceke ram etundo ko Kaisaria.

Tic Mi Jukwenda 9

1Ento Saul, ma fodi ubewodho cim man nek kum julub Rwoth, ecidho ba jalam ma dit,

2man ekwaye ku waraga m'ecidh ko Dameski ba kacokri, kara tek enwang'u jumoko ma gi mi Yojuni, kadok co kadi mon, ekelgi atwia Yerusalem.

3E kan ebewotho, e etimbre nia edhingo Dameski: e aruca ruca nica der uai i polo ucare ngbeng':

4e epodho i ng'om, man ewinjo dwal uwacu ire kumae, Saul, Saul, inyayu ragedo i kuma nedi?

⁵Man ewacu kumae, In i ng'a, Rwoth? Ewacu kumae, An a Yesu m'ibenyayu ragedo i kuma:

⁶ento ai malu, imond i adhura, man jubiyero iri pi gin m'itim.

⁷E dhanu ma giwotho gikugi dhoggi tal kau ka giwinjo dwal, ento gineno ng'atu moko ngo.

⁸Saul uai malu kud i ng'om; e ka wang'e yabre, eneno gin moko ngo; judong' jupeye apeya ku cinge, jutere ko Dameski.

⁹Man ebedo ceng' adek m'eneno ko piny ungo, m'ecamu de ngo kadok amadha de emadhu ngo.

¹⁰Nwang'u jalub acel ni i Dameski, ma nyinge Anania; e Rwoth uwacu ire ku ginmawokiwang' kumae, Anania. En de eloko lembe kumae, Nen, anuti, Rwoth.

¹¹E Rwoth uwacu ire kumae, Ai malu, icidh i gengi ma julwong'o Atira, ipenj ng'atu acel ma nyinge Saul, ma Jatarso, i ot pa Yuda: kum nen, eberwo;

¹²man eneno ng'atu ma nyinge Anania bemondo, ubeketho cinge de i kume kara emak neno piny.

¹³Ento Anania loko lembe kumae, Rwoth, awinjo pi ng'atuni ba dhanu dupa, maram etimo ko rac kum jumaleng' peri ma ni i Yerusalem:

¹⁴keni de ebedo ku ng'ol m'uai ba julam ma dongo m'etwi ko dhanu ceke m'ulwong'o nyingi.

¹⁵Ento Rwoth uwacu ire kumae, Cidh miri: kum en e agulu m'agoyo wie ira, ya eter nyinga i wang' Thekdhanumange ku ju m'ubimo ku nyithi Israeli bende:

¹⁶kum abinyutho ire kwai gin dupa m'ebikosendre kudo be kum nyinga.

¹⁷E Anania cidho, man emondo i ot; e kan eketho cinge i kume ewacu kumae, Umira Saul, Rwoth ma Yesu m'uwok i beng'i i yo kan ibino, eora kara imak neno piny, Tipo Maleng' de uromi.

¹⁸E ndhu ndhu nica gin moko ma calu apoka ai i wang'e podho piny, e emaku neno piny; man eai malu emaku baputisi;

¹⁹e ecamu cemo man edoko tek. Man ebedo nindo moko ku julub ma gini i Dameski,

²⁰e pio pio eyero pi Kristu nia en e Wod Mungu.

²¹E kagi ceke ka giwinjo igi wang' lii, giwacu kumae, Ng'atuni en e ng'atu m'unyotho ju m'ulwong'o nying' maeni ngo? m'ukele kuni de lembuni, kara etergi atwia wang' julam ma dongo.

²²Ento Saul udoko tek m'usagu, man eloyo Juyahudi m'ubedo i Dameski, enyutho andha nia maeni en e Kristu.

- 23**E ka ceng' dupa kadhu, Juyahudi giporo lembe karacelo nia ginege:
- 24**ento rieko migi ng'eire ni Saul. E gikuro dhugang' dieceng' ku diewor de kara ginege:
- 25**ento julub giting'e ku diewor, e gilure ku wi gang' ku katoko.
- 26**E kan ewok Yerusalem, eponjo ya en de giribri ku julub: man kagi ceke gilwore, giyio de ngo nia en e jalub.
- 27**Ento Barnaba game, etere ba jukwenda, man eyero igi maram eneno ko Rwoth i yo, man nia eweco i bang'e, man maram eyero ko ku tegocwinye i Dameski ku nying Yesu.
- 28**Man gibedo gikugi Yerusalem m'ebedemondo ewok woko de,
- 29**m'ebeyero ku tegocwinye i nying Rwoth: man eyero epiemo piem de kum Juyahudi ma Juyunani; ento gibeyenyo ya ginege.
- 30**Ka utumego ging'eyo maeni, gikele piny i Kaisaria, e giore cidho Tarso.
- 31**Ka kumeno kanisa m'i ng'om ceke mi Yahudi ku mi Galilaya man Samaria de gibedo ma cwinygi kwio, e giteng'ni; e ka gibewotho i lworopa Rwoth man i jukojuk pa Tipo Maleng', gimedri.
- 32**Gini timbre, ka Petro cidho i ng'et ng'om ceke, eloro piny bende ba jumaleng' ma gibedo i Luda.
- 33**Enwang'u ng'atu acel keca ma nyinge Ainea, m'uvuto ru avuta doko rundi abora; kum kume tho nding'.
- 34**E Petro wacu ire kumae, Ainea, Yesu Kristu keyo kumi: ai malu, ipedh kavuto peri. E eai malu tho.
- 35**Dhanu ceke m'ubedo i Luda ku Saron ginene, e giloko cwinygi ni Rwoth.
- 36**Nwang'u jalub acel ma nyinge Tabitha, ma ka juloke edoko Dorka, eni i Yopa: dhaku maeni pong' ku tic ma ber ku tic ma ni jucan m'etimo bende.
- 37**Man etimbre i ceng' maeno, nia kume make, man etho ndhu: e ka gijome, giketthe i ot ma malu.
- 38**Nwang'u Luda bedo kpenge ku Yopa, e julubne, ka giwinjo nia Petro ni keca, gioro dhanu ario i bang'e, gikwaye kumae, Kud igal ku bino i bang'wa.
- 39**E Petro ai malu gicidho gikugi de. E kan ewok, gitere i ot ma malu: man mon ma coggi tho ceke gicoro i vute gibeywak, gibenyutho ko kanzu ku kendi de ma Dorka ubedukwoyo ma fodi enuti i bang'gi.
- 40**Ento Petro wodhogi ceke woko, man erum piny, erwo de; man elokre bang' avu, ewacu kumae, Tabitha, ai malu. E eyabu wang'e, e kan eneno Petro, eai wi there.

⁴¹Man emio ire cinge, eting'e ko malu; e elwong'o jumaleng' ku mon ma coggi tho de, man ethiere m'e kwo.

⁴²E lembene ng'eire cil i Yopa ceke: dhanu dupa de giyio ni Rwoth.

⁴³Man etimbre, nia Petro bedo ceng' dupa i Yopa giku Simon ma jabodho mir adila.

Tic Mi Jukwenda 10

¹Nwang'u ng'atu moko nuti i Kaisaria, ma nyinge Kornelio, en e jego mir ungu asikari ma julwong'o udul asikari mi Juitaliano,

²en e jabeto, en e ng'atu ma lwooro Mungu de ku juode ceke, m'ebedemio giramia dit ni dhanu, ebederwo ni Mungu de thiri thiri.

³Eneno ku ginmawokiwang' ngbeng', nwang'u ene calu saa mir abung'wen mi ceng', malaika pa Mungu bino i bang'e, ewacu ire kumae, Kornelio.

⁴En de, kan enene tel, e lwooro make, ewacu kumae, Girang'o, Rwoth? Man ewacu ire kumae, Rwo peri ku giramia peri giidho malu gibedo ni poi i wang' Mungu.

⁵Kawono dong' ior dhanu i Yopa, gici gigam Simon, ma j ulwong'o Petro:

⁶ebedo ku Simon moko ma jabodho mir adila, ma ode ni dhu nam.

⁷Ka malaika m'uwego i bang'e ai, elwong'o jutic pare ario m'i ot, kud asikari ma lwooro Mungu ma kind ju ma kuro kume thiri thiri;

⁸e kan eyero gin ceke igi, eorogi i Yopa.

⁹Nie urwone, ka gibecidho i woth migi, man gidhingo adhura de, Petro idho malu i ot nirwo, calu saa mir abusiende:

¹⁰e kec umaku nege, man eyenyo ecam: ento kinde ma gibeyiko cam, e piny urwinyo kude biti;

¹¹man eneno polo yabre, e gin moko beloro calu bongu ma dit, ma julture ku gunde ang'wen i ng'om:

¹²ma ie ju kwond yedi ceke ma tiendgi ang'wen ang'wen ku gin ma lak i ng'om de ku winyo m'i lietho bende.

¹³E dwai uwok i bang'e kumae, Ai malu, Petro; ineg icam.

¹⁴Ento Petro wacu kumae, Kumeno ngo, Rwoth; kum gin ma swa ku m'ucido de fokacamu ki ngo.

¹⁵Dwal uwok i bang'e kendo mir arionde kumae, Gin ma Mungu lonyo kud idwoke ni gin ma swa.

¹⁶Gin maeni timbre wang' adek: e ndhu ndhu nica jugamu jamblur nica i polo.

- 17Nie kinde ma Petro ie pido dit pi ginmawokiwang' nia nyo thelembene nik ang'o, nen, dhanu ma Kornelio oro, ma gipenjo ka ot pa Simon, gicungo dhugang',
- 18man gilwong'o gipenjo tek Simon ma julwong'o Petro bedo keca.
- 19E kinde ma Petro bepido pi ginmawokiwang', Tipu wacu ire kumae, Nen, dhanu adek gibeyenyi.
- 20Ento ai malu, ilor piny, wuci wukugi, cwinyi kud ubed jiji: kum aorogi an.
- 21E Petro loro ba joca, ewacu kumae, Nen, an a ng'atu ma wubeyenyo: kum kumeno wubino kum lembang'o?
- 22Giwacu kumae, Kornelio ma jego, ng'atu ma pwe man ng'atu ma lworu Mungu, pire ber de ba thek dho mi Juyahudi, malaika ma leng' upoye ya eor julwong'i ibin i ot pare, ewinj lembe i beng'i de.
- 23E ka kumeno elwong'ogi i bang'e man emio igi kagonjo. E urwone eai malu gicidho gikugi, e umego kucel ma i Yopa de gicidho gikugi.
- 24Urwone gimondo i Kaisaria. Nwang'u Kornelio bekurogi, ku jupagi ku jurimbe de m'elwong'ogi gicoko dhoggi karacelo.
- 25E kan etimbre nia Petro mondo, Kornelio girombo gikude, e epodho piny the tiende, man erwo ire.
- 26Ento Petro ting'e malu, ewacu kumae, Cungi; an de an a dhanu bende.
- 27E ka gibeweco gikude emondo, enwang'u dhanu dupa de gicokri karacelo:
- 28man ewacu igi kumae, Wun de wung'eyo giwu nia cik uyio ngo ya ng'atu ma Jayahudi ribre kadi ubin ba ng'atu ma Thekdhanumange; ento Mungu nyutho ira nia kud alwong' ng'atu moko nia dhanu ma swa kadi m'ucido de:
- 29kum kumeno abino ku piem ungo ka julwong'a. Die apenjowu pirang'o wulwong'a.
- 30E Kornelio wacu kumae, Ceng' ang'wen m'ukadhu dre unyoni, abekwiro saa mir abung'wende mi rwo i ot para; nen, ng'atu moko cungo i wang'a ku kendi m'urieny,
- 31man ewacu kumae, Kornelio, rwo peri winjre giramia peri de gibedo ni poi i wang' Mungu.
- 32Ka kumeno or juci i Yopa, julwong' Simon, ma julwong'o Petro bin i beng'i; ebedo i ot pa Simon ma jabodho mir adila, dhu nam.
- 33Ka kumeno aoro dhanu i beng'i mor mor; man itimo ber nia ibino. Nie ka kumeno wan ceke wanuti keni i wang' Mungu, kara wawinj lembe ceke ma Rwoth ung'olo iri.

³⁴E Petro alu dhoge, ewacu kumae, Ang'eyo andha nia dhanu bedo tung' tung' ungo i wang' Mungu:

³⁵ento i thek ceke ng'atu m'ulwore, m'utimo bedopwe de, e eyie.

³⁶Lembe ma yang' eoro ni nyithindho pa Israel m'eyero lembanyong'a mi kwiocwiny kum Yesu Kristu (en e Rwoth mi ceke)

³⁷lembe nini wung'eyo giwu, ma jurweyo cil i Yahudi ceke, uthekre i Galilaya, yo ng'ei baputisi ma Yohana yero;

³⁸en e Yesu ma Nazareti, maram Mungu wire ko ku Tipo Maleng' ku tego bende: m'ebedewo tho ko awotha ku timo ber, ku keyo kum dhanu ceke ma wonabali voyogi; kum Mungu ni kude.

³⁹Wan de wa jumulembe mi gin ceke m'etimo i ng'om mi Juyahudi, kud i Yerusalem; en ma ginege bende, giliere kor yen.

⁴⁰En ma Mungu ting'e i ceng' mir adeg, emie ya junyuthe,

⁴¹ni dhanu ceke re ngo, ento ni jumulembe ma Mungu lar ugoyo wigi, en e wan, ma wacamu wamadhu de wakugi ku yo ng'ei cer pare ma kind ju m'utho.

⁴²Man eng'olo iwa ya wayer ni dhanu, man watuc nia maeni en e ng'atu ma Mungu ketho ya ebed japoklembe mi ju ma kwo ku ju m'utho bende.

⁴³Jubila ceke ginyutho pire, nia ni kum nyinge ku ba dhanu ceke m'uyio ire ebinwang'u ruc mi dubo.

⁴⁴E kinde ma Petro beyero lembe nini, Tipo Maleng' ucore wi dhanu ceke ma giwinjo lembe nini.

⁴⁵E ju ma weg yaa ma giyio igi wang' lii, kagi ceke ma gibino giku Petrogi, kum giramia ma Tipo Maleng' ukonjre wi Thekdhanumange bende.

⁴⁶Kum giwinjo gibeweco ku dhok mange, giyungo ko Mungu. E Petro lund uloko lembe kumae,

⁴⁷Ng'atu moko copo cero pi, nia ku jumi baputisi ni joni, ma gijolo Tipo Maleng' calu wani?

⁴⁸E eng'olo ya jumi igi baputisi ku nying Yesu Kristu. E gilund gikwaye ya eri i bang'gi ceng' moko.

Tic Mi Jukwenda 11

¹Nie jukwenda kud umego ma ni i Yahudi giwinjo nia Thekdhanumange bende gijolo lem pa Mungu.

²E ka Petro idho Yerusalem, ju ma gi weg yaa gipiemo gikugi,

³giwacu kumae, Imondo ba dhanu ma weg yaango, wucamu wukugi de.

- ⁴Ento Petro theko, man ekoro igi lembe ceke m'utimbre ku there, ewacu kumae,
- ⁵Nwang'u ani i adhura rni Yopa aberwo: e ka piny urwinyo kuda biti aneno ginmawokiwang', gin moko beloro, calu bongu ma dit ma julure kud i polo ku gunde ang'wen; ram etundo ko cil i bang'a:
- ⁶e kan aneno gica tel, ia pido pire de, aneno lim m'i ng'om ma tiendgi ang'wen ang'wen ku yedi m'i thim ku gin ma lak i ng'om man winyo ma kor polo de.
- ⁷E awinjo dwal bende m'uwacu ira kumae. Ai malu, Petro; ineg icam.
- ⁸Ento awacu kumae, Kumeno ngo, Rwoth: kum fodi gin ma sai kadi gin m'ucido de kumondo i dhoga ngo.
- ⁹Ento dwal udwoko lembe kud i polo wang' arionde kumae, Gin ma Mungu lonyo, kud idwoke ni gin ma sai.
- ¹⁰Gica timbre wang' adek: e juywaye kendo pet i polo.
- ¹¹Man nen, ndhu ndhu nica dhanu adek gicungo nyim ot ma wabedo i ie, ma juoro i bang'a uai i Kaisaria.
- ¹²E Tipo wacu ira ya waci wakugi, dhanu kud ubed tung' tung' i wang'a. E umego abusiel maeni de wacidho wakugi; wamondo de i ot pa ng'atuca wakugi:
- ¹³man ewacu iwa maram eneno ko malaika m'ucungo i ot pare, m'uwacu kumae, Or kwenda cidh i Yopa, ulwong' Simon, ma julwong'o Petro;
- ¹⁴m'ebiyero iri lembe, m'ibiboth kudo, in ku juodi ceke.
- ¹⁵E kan amaku yero, Tipo Maleng' upodho i wigi, cil calu epodho i wiwa ku kwong'a.
- ¹⁶E apoi pi lembe pa Rwoth, maram ewacu ko kumae, Yohana mio baputisi andha ku pi; ento wun re wubimaku baputisi ku Tipo Maleng'.
- ¹⁷Ka kumeno tek Mungu mio igi giramia ma calku ma yang' emio iwa bende, kinde ma wayio ni Rwoth Yesu Kristu, ka an ke an a ng'a, m'acopo jai ni Mungu e?
- ¹⁸E ka giwinjo gin maeni, giling', man giyungo Mungu, giwacu kumae, Kara Mungu mio lokocwiny ma ni kwo ni Thekdhanumange bende.
- ¹⁹Ka kumeno ju ma julalugi nge nge kum masendi m'uwok kum Stefano gicidho cil i Foiniki, ku Kupro, rnan i Antiokia, ma giyero ko lembene ni jumange ngo ndhu ni Juyahudi kendgi.
- ²⁰Ento jukucel m'i kindgi, gi dhanu mi Kupro ku mi Kurene de, ma, ka gibino Antiokia, giyero ni Juyunani bende, e giponjogi ku pi Rwoth Yesu.
- ²¹Cing Rwoth de ni i bang'gi: e udul mi ju m'uyio gilokri ba Rwoth.
- ²²E rwonglembe migi tuc i ith kanisa ma ni i Yerusalem: e gioro Barnaba agbele i Antiokia:

²³ma, kinde m'ewok, eneno bero pa Mungu de, mutoro nege; edong' eponjogi ceke nia ku tego mir adundegi gimok ndhu kum Rwoth:

²⁴kum en e ng'atu ma ber, man Tipo Maleng' urome ku yioyic bende: e dhanu dupa gimedri ba Rwoth.

²⁵E ecidho Tarso ku yenyoy Saul;

²⁶e kan enwang'e edwogo kude Antiokia. Etimbre de, nia gibegicoko dhoggi karacelo ku jukanisa rundi acel bo, e giponjo dhanu dupa; e jular julwong'o julub Jukristu i Antiokia.

²⁷Nie ceng' nica jubila giai i Yerusalem giloro piny Antiokia.

²⁸Ng'atu acel m'i kindgi ma nyinge Agabu ai malu, man eewo ku Tipo nia ndru ma dit bipodho i ng'om ngung': etimbre de i ceng' pa Klaudio.

²⁹E julub kubang'gi ceke gikeco ya gior piny ma kakorgi bang' umego ma gini i Yahudi ³⁰ma gitimo bende, gioro ba judongo ku cing' Barnaba giku Saul.

Tic Mi Jukwenda 12

¹Nie calu nindo maeno Herode m'ubimo rieyo cinge esendo ko jumoko mi kanisa.

²E enego Yakobo m'umin Yohana ku palamularu.

³E kan eneno nia maeni nyayu mutoro i Juyahudi, eyenyo nik emak Petro bende. Ceng' nino en e ceng' kwen ma thobi mbe i ie.

⁴E kan emake de, ekethe i odkol, emie de ni thek asikari ang'wen ang'wen ya gikure; ie wacu ya ebiwodhe ni dhanu yo ng'ei cemo mi Kadhukuwijo.

⁵Ka kumeno jukuro Petro i odkol: ento kanisa giguro rwo ma tek ni Mungu pire.

⁶E kinde ma Herode yenyoy ewodhe woko, nie diworne nwang'u Petro nindo kind asikari ario, m'ebedo atwia ku nyoro ario: jukur de ma nyim dhugola gikuro odkol.

⁷Man nen, malaika pa Rwoth ucungo i vute, der de caru i kusika: man epadu Petro i ng'ete, ecewe ko, ewacu kumae, Ai malu pio. E nyoro gony lwany kum cinge.

⁸Malaika wacu ire kumae, Twiri, roi wara peri de. E etimo kumeno. Man ewacu ire kumae, Bol kendi peri i kumi, man ilub ng'eya.

⁹E ewok woko, elube de; ere eng'eyo ngo nia gin ma malaika timo e ya andha, ento ewacu nyo eneno ginmawokiwang'.

¹⁰E ka gikadhu thek jukur ma kwong'ane ku mir arionde, giwok dhugang' mi nyunyu ma mondo i adhura; m'uyabre igi gire kende: e giwok woko, gikadhu kud i yo acel: e eni eni malaika weke.

¹¹E ka wang' Petro lero, ewacu kumae, Kawono apoi ng'eyo andha, nia Rwoth uoro malaika pare ulara kud i cing' Herode, man kud i genogen ceke mi dhanu mi Juyahudi.

¹²E ka ie pido pi lembene, ewok kum ot pa Mariamu ma min Yohana ma julwong'o Marko; ka ma dhanu dupa gicoko ie dhoggi giberwo.

¹³E kinde m'ebedwong'o dhugola ma dhugang', nyaku acel ma nyinge Roda ubino winjo.

¹⁴E kan eng'io dwand Petro, eyabu dhugola ngo ni anyong'a m'unege, ento eringo emondo, ewacu ya Petro cungo dhugang'.

¹⁵E giwacu ire kumae, In i avake. Ento eyero asu nia kumeni andha. Gidong' giwacu kumae, En e malaika pare.

¹⁶Ento Petro bedwong'o asu: e ka giyabu, ginene de, igi wang' lii.

¹⁷Ento en, m'ejukogi ku cinge nia gibed ling', egonyo igi maram Rwoth uwodhe ko kud i odkol. Man ewacu kumae, Wuyer lembe maeni ni Yakobo, kud umego bende. E eai, ecidho kamange.

¹⁸Nie kinde ma piny uru, asikari igi bepido dit kum Petro, ya eni kani.

¹⁹E ka Herode yenye, enwang'e de ngo, erondo jukur, man eng'olo ya juneggi anega. Man eai i Yahudi eloro Kaisaria, ebedo kuca de.

²⁰Nie ebedo ku thungo kum dhanu mi Turo ku Sidon: e gibino i bang'e ku cwinygi m'uripo acel, man, ka gidaru camu rimo ku Blasto majakur kusika p'ubimo, gipenjo ya ng'om ukwi, kum ng'om ma thugi tungre ni kum ng'om p'ubimo.

²¹Nie i ceng' ma jung'olo Herode ronjre ku kendi mi ker, ejany ko wi komker de, man eting'o lembayera igi.

²²Dhanu gigoyo muzira, giwacu kumae, Meni dwand mungu, mi dhanu ngo.

²³E ndhu ndhu nica malaika pa Rwoth ugoye, kum emio dwong' ni Mungu ngo: man ukoko came, cwinye de mwony ndhu.

²⁴Ento lembe pa Mungu meu man emedre.

²⁵E Barnaba giku Saul giai Yerusalem, kinde ma gidaru timotim migi kakare, e gigamu Yohana ma julwong'o Marko gidwogo gikugi.

Tic Mi Jukwenda 13

¹Nwang'u i kanisa ma Antiokia, jubila pa Mungu ku juponji de ginuti, Barnaba, man Simeon ma julwong'o Niger, man Lukio ma Kurene, ku Manaen m'umin m'apidha pa Herode ma jabim, man Saul.

²E kinde ma gibetimo ni Rwoth, ma giweko ko cam de, Tipo Maleng' uwacu kumae, Koi ira Barnaba ku Saul kum tic m'alwong'ogi i kume.

- ³E ka giweko cam girwo de giketho cing'gi i wigi, e giorogi.
- ⁴Kum kumeno joca, ma Tipo Maleng' uorogi, giloro piny Selukia; e giai keca gicidho Kupro ku yo mi pi.
- ⁵Ka gini i Salamini, giyero lem pa Mungu i kacokri mi Juyahudi: gibedo ku Yohana bende ma jatim igi.
- ⁶Ka gikadhu kud i cula ceke cil Pafo, ginwang'u ajoga moko, m'e jabila mi ndra, ma Jayahudi, ma nyinge BarYesu;
- ⁷ma gibedo karacelo giku jabim, ma Sergio Paolo, e ng'atu m'ung'eyo girang'eya. Ng'atuno lwong'o Barnaba giku Saul i bang'e, man eyenyo ewinj lem pa Mungu.
- ⁸Ento Eluma ma ajoga (kum nyinge kumeno ka juloke) ejai igi, m'eyenyo ewing jabim woko kum yioyic.
- ⁹Ento Saul, ma julwong'o Paolo bende, ma Tipo Maleng' urome, etono wang'e i bang'e,
- ¹⁰ewacu kumae, In ma thwo ndra ku tic ma rac ceke pong' ii, i wod wonabali, i jakwoj bedopwe ceke, ibiweko loko wang'ayo ma pwe pa Rwoth ungo?
- ¹¹Kawono, nen, cing' Rwoth ni i kumi, in de ibibedo abinga, ma nindo moko ibineno ko ceng' ungo. E ndhu ndhu nica utor ku mudho podho i wie; e emaku yenyo ka ng'atu m'upeye ku cinge.
- ¹²E jabim, kan eneno gin m'utimbre, elund eyio, ma ie wang' lii kum ponji pa Rwoth.
- ¹³Nie, Paolo giku juwagi gitugo woth kud i Pafo ku yo mi pi, giwok Perga i Pamfulia: e Yohana wekogi edok Yerusalem.
- ¹⁴Ento gin, ma giai Perga, giwok Antiokia m'i Pisidia; e ceng' sabatu gimondo i kacokri, man gibedo piny.
- ¹⁵E yo ng'ei somo cik ku jubila judongo mi kacokri gioro lembe i bang'gi, giwacu kumae, Umego, tek wubedo ku lembe moko mi juk ni dhanu, wuwaci.
- ¹⁶E Paolo ai malu, eting'o cinge man ewacu kumae: Wu dhanu pa Israel, ku wun ma wulworo Mungu de, wuwinji.
- ¹⁷Mungu mi dhanu pa Israel maeni ugoyo wi kwaruwa, eyungo dhanu de ka gibedo ni umondo i ng'om Misiri, man etelo wigi ewodho kogi woko kud i ie ku bote ma tek.
- ¹⁸E i nindo ma yenyo romo pier ang'wen etwio cwinye kum tic migi ma i yamba.
- ¹⁹E kan enyotho thek abiro m'i ng'om Kanan, emio igi ng'ombe ni aba, mi rundi ma yenyo romo dak ang'wen ku pier abic:
- ²⁰yo ng'ei gin maeni emio igi jupoklembe cil kum Samwil ma jabila.

- ²¹Ku yo ng'eye gikwayu ubimo: e Mungu mio igi Saul ma wod Kic, en e dhanu mi suru pa Benyamin, mi nindo mi rundi pier ang'wen.
- ²²E kinde m'ekabe, eting'o Daudi ni ubimo migi; m'enyutho lembe pire bende ewacu kumae, Anwang'u Daudi ma wod Yese, e ng'atu ma ka cwinya, m'ebitimo ceke ma ia yenyo.
- ²³Nie Mungu kelo Jalar, Yesu, ni Israel ku kodhi ng'atuni calu eng'olo;
- ²⁴ka Yohana lar uyero pi baputisi mi lokocwiny ni dhanu pa Israel ceke ma fokewok ungo.
- ²⁵Man ka Yohana betimo tic maka pare, ewacu kumae, Iwu wacu nyo an a ng'a? An a en ungo. Ento nen, ng'atu acel ubebino i ng'eya ma wara pare gonjre ira ngo kum aromo ngo.
- ²⁶Umego, nyikwai kodhi Ibrahim, ku ju m'i kindwu ma lworu Mungu bende, lembe mi both maeni juoro iwa.
- ²⁷Kum ju ma gibedo Yerusalem, ku jubim migi de, kum ging'eye ngo, kadok dwand jubila ma jusomo ku ba ceng' sabatu, giketho etimbre kakare ku gonje.
- ²⁸E kadok ginwang'u the nek ungo i ie, ento gikwayu Pilato ya junege.
- ²⁹E ka gidaru timo gin ceke ma jugoro pire kakare, e gifudhe piny ku kor yen, man gikethe i liel m'aroka i cana.
- ³⁰Ento Mungu ketho ecer ku kind ju m'utho:
- ³¹ju ma giai kugi Galilaya ma giidho gikugi Yerusalem de ginene wang' udul, ma kawono gi jumulembe pare ni dhanu.
- ³²E wakelo iwu rwonglembe ma ber mi lembang'ola ma jumio ni kwaru,
- ³³nia Mungu ketho lembene timbre kakare ni nyithindho mwa, kum eketho Yesu cer; calu egore i zaburi mir arionde kumae, In i Woda, tin anyoli.
- ³⁴Man pi lembe m'eketho ecer ko ku kind ju m'utho, ma kawono dong' edwogo kendo ngo ba top, eyero kumae, Abimio iri mugisa pa Daudi ma leng' mandha de.
- ³⁵Kum ewacu i zaburi mange bende kumae, Ibimio Ng'atu Maleng' peri ngo nineno top.
- ³⁶Kum ka Daudi daru timo porolembe pa Mungu i kind dhanu m'i kume, enindo, jukethe ba kwaru mire de, man eneno top:
- ³⁷ento ng'atu ma Mungu ketho ecer re k'eneno top ungo.
- ³⁸Ka kumeno dong' wung'ei, umego, nia ni kum ng'atuni jubeyero iwu pi ruc mi dubo:
- ³⁹man ku ba dhanu ceke ma giyio, lembe m'i wigi gonjre ni gin ceke, ma jucopo gonyo kowu ngo ku cik pa Musa.

⁴⁰Ka kumeno, wubed ku weng'wu, kara maeni m'uyere i kitabu mi jubila kud uwok i kumwu ma kumae:

⁴¹Nen, wu jucac, iwu wang' lii de, man wurwiny; Kum atimo tic i nindo mu, Tijuno ma wubiyio ki ngo, tek ng'atu moko yero iwu.

⁴²Man ka giwok woko, gikwayu ya juyer igi lembe maeni i ceng' sabatu ma cen.

⁴³Nie ka cokri lal, Juyahudi dupa ku ju ma juloko wang'gi ma lworu Mungu gilubo ng'ei Paolo giku Barnaba; gin, ma giweco gikugi, gipiko lembe i igi de ya gibed asu i bero pa Mungu.

⁴⁴Ceng' sabatu ma cen adhura ceke koko dhoge kpr kpr niwinjo lem pa Mungu.

⁴⁵Ento ka Juyahudi neno udul dhanu, ngiri negogi dwanya, e gipiemu lembe ma Paolo yero, giyanu ayany de.

⁴⁶Man Paolo giku Barnaba giyero ku tegocwinygi, giwacu kumae, Maku wakowalar wayer iwu lembe pa Mungu be. Kum wucwale cen kud i kumwu, wupoko giwu ya wuromo ku kwo ma rondo ku rondo ngo, nen, walokra ba Thekdhanumange.

⁴⁷Kum Rwoth ung'olo iwa kumeno, ewacu kumae, Aketho in ni der mi Thekdhanumange, Kara ibed ni both cil i tung' ng'om.

⁴⁸Ka Thekdhanumange giwinjo maeni, anyong'a negogi, e giyungo lembe pa Mungu: e dhanu ceke ma yang' jukethogi mi kwo ma rondo ku rondo giyio.

⁴⁹E lembe pa Rwoth uyik tir i ng'ombuno ceke.

⁵⁰Ento Juyahudi gipiko lembe i mon ma dongo ma lworu Mungu, ku judongo mir adhurane de, e ginyayu ragedo kum Paolo giku Barnaba, man giriemogi woko kud i kieu mi.

⁵¹Ento gikiro utur m'i tiendgi woko i kumgi, man gibino Ikonio.

⁵²E mutoro ku Tipo Maleng' de pong'o julub.

Tic Mi Jukwenda 14

¹Etimbre de i Ikonio nia gimondo karacelo i kacokri mi Juyahudi, man giyero, m'uketho udul dhanu ma dit mi Juyahudi ku mi Juyunani de giyio.

²Ento Juyahudi ma giwor ungo gipiko lembe i pidoic mi Thekdhanumange, man giketho cwinygi doko kwar kum umego.

³Ka kumeno gibedo kuca hai ma gibeyero ku tegocwiny i Rwoth m'enyutho lembe mi berone, m'eketho giranyutha ku musana de utimbre ku cing'gi.

⁴Ento udul dhanu mir adhura kindgi pokre; jukucel udong' ku Juyahudi, jukucel ke ku jukwenda.

⁵E ka juoli i wigi gi ju ma Thekdhanumange ku Juyahudi ku jubim migi de, kara gitimigi rac dit gicanygi de ku kidi,

⁶lembene tuc i ithgi, man giringo bang' adhura mi Lukaonia, ku Lustra, ku Derbe de, cil i ng'om m'utwodogi bende:

⁷e giyero lembanyong'a ma juboth ko kuca.

⁸Nwang'u ng'atu moko bedo i Lustra, ma won abala i tiende, abalane gambre kud i min, ma fokewotho ki ngo.

⁹Ng'atuno winjo ka Paolo beyero: ma, kan etono wang'e i bang'e, eng'eyo de nia yioyic pare nuti ma tito kume,

¹⁰ewacu ku dwande ma dit kumae, Cung atira wi tiendi. Man epor malu emaku wotho.

¹¹E kan udul dhanu gineno gin ma Paolo timo, giting'o dwandgi malu, giwacu ku dhu Lukaonia kumae, Mungu giloro piny i bang'wa ni ayi dhanu.

¹²E gilwong'o Barnaba ya Zeu; Paolo ke Herme, kum en e jadit mi lembayera.

¹³E jalam mi Zeu ma hekalu pare ni i nyim adhura, ekelo koni dhiang' ku thiuboko ma ber de dhugang', man eyenyo etim lam karacelo kud udul dhanu.

¹⁴Ento ka jukwenda, Barnaba giku Paolo, giwinjo maeni, giyeco kendi migi, e gipiei i kind udul dhanu, gikok akoka,

¹⁵giwacu kumae, Paco, wutimo gin maeni nedi? Wan wa dhanu ma ku kum calu wun, man wakelo iwu lembe ma ber, kara wulokru ku kum gin maeni ma kite mbe ni Mungu ma kwo m'ucwio polo ku ng'om ku nam de, ku gin ceke ma ni i igi de:

¹⁶ma i dhanum'utuk m'ubedukadhu eyio ya thek ceke giwoth i yo migi gigi.

¹⁷Ento ewekre gire ngo ku mulembe, kum etimo ber man emio iwu koth m'uai i polo ku oro ma cam cek ie ber de, eyeng'o adundewu ku cemo ku mutoro bende.

¹⁸E gidwoko wi udul dhanu si si ku wec maeni ya ku gitim lam igi.

¹⁹Ento Juyahudi giai i Antiokia kud Ikonio gibino keca; e ka giloko pidoi udul dhanu, gicanyu Paolo ku kidi, man giywaye woko kud i adhura, ma giwacu nyo etho.

²⁰Ento ka julub gitieke gbur, eai malu, emondo de i adhura: urwone gicidho Derbe giku Barnaba.

²¹E ka giyero lembanyong'a ma juboth ko i adhura nino, man giloko wang' dhanu dupa doko julub, gidok Lustra, kud Ikonio, man Antiokia de,

²²ma gicikuteng'o ko ng'eyong'ec mi julub, gicikujukogi de ya gibed asu i yioyic man nia wakowamondo be ku masendi dupa i ker pa Mungu.

²³E ka giketho judongo igi ku ba kanisa ndri, girwo de ma giweko ko cam, githierogi ni Rwoth, ma giyie.

²⁴E gikadhu ku i Pisidia, man giwok Pamfulia.

²⁵E ka giyero lembene i Perga, giloro piny Atalia;

²⁶giai kuca gicidho Antiokia ku yo mi pi, ka ma juthierogi i ie ni bero pa Mungu pi tic ma gidaru timo.

²⁷E ka giwok, man gicoko kanisa karacelo, gigonyo pi gin ceke ma Mungu timo kugi, man nia eyabu dhu yioyic ni Thekdhanumange bende.

²⁸E girio nindo ma nok ungo ku julub.

Tic Mi Jukwenda 15

¹E dhanu moko giai i Yahudi giloro piny man giponjo umego, giwacu kumae, Tek wutimo yaa ngo calu kura pa Musa, wucopo both ungo.

²E ka Paolo giku Barnaba gibedo ku piem ku penji dit i kindgi ku joca, e umego ging'olo ya Paolo giku Barnaba, ku juwagi mange, giidh Yerusalem ba jukwenda ku judongo kum penji maeni.

³Ka kumeno, gi ju ma kanisa belwokogi i yo migi nica, gikadhu kud i Foiniki ku Samaria de, ma giyero pi lokocwiny mi Thekdhanumange: e ginyayu mutoro ma dit i umego ceke.

⁴E ka giwok Yerusalem kanisa ku jukwenda man judongo de gijologi, e gigonyo pi gin ceke ma Mungu timo kugi.

⁵Ento jumoko mi pokri mi Jufarisayo m'uyio gicungo, giwacu kumae, Maku jutim yaa i kungi, jucik igi de ya giwor cik pa Musa.

⁶E jukwenda ku judongo gicokri karacelo niporo lembe maeni.

⁷E yo ng'ei penji ma dupa de, Petro cungo, man ewacu igi kumae, Umego, wung'eyo nia rundica Mungu goyo wia kud i kindwu, kara Thekdhanumange winj lembanyong'a ma juboth ko ma i dhoga, giyi de.

⁸Man Mungu, ma ng'eyo adunde, enyutho lembe igi, m'emio igi Tipo Maleng', cil calu emio iwa;

⁹man ekoyowa tung' wakugi ngo, elonyo adundegi de ni kum yioyic.

¹⁰Nie ka kumeno wumulo i Mungu nedi, ma wuketho ko mberembere i ng'ut julub ma kwaruwa ku wan de yeyo loyowa e?

¹¹Ento wayio ya wabiboth ni kum bero pa Rwoth Yesu, calu gin.

¹²E udul dhanu ceke giling' ti; gidong' giwinjo Barnaba giku Paolo ma gibegonyo pi giranyutha ku musana de ma Mungu timo kugi i kind Thekdhanumange.

13Yo ng'ei bedo ling' migi, Yakobo loko lembe, ewacu kumae, Umego, wuwinj dwanda:

14Simeon ugonyo iwa maram yang' Mungu liewo ko Thekdhanumange ku kwong'a kara ewodh dhanu moko kud i kindgi pi nyinge.

15E lembe nini ripo gbe ku lembe mi jubila; calu egore kumae,

16Yo ng'ei gin maeni abidwogo, Abiting'o hema pa Daudi m'upodho kendo; Man abiting'o ginde m'ubam kendo, Abiketho ecungo de:

17Kara dong' dhanu m'udong' uyeny Rwoth, Ku Thekdhanumange ceke ma nyinga lwongre i kumgi,

18Rwoth uwacu en, m'eketho gin maeni ng'eire ugambre por yang' con.

19Kum kumeno awacu para, nia ku wanyai can i ju ma Thekdhanumange m'uloko cwinygi ni Mungu;

20ento dong' wagoru igi, ya giceri ni acidi mir ayi gin m'acwia, ku tarwang', ku gin ma judeyo adeya de, man ku rimo.

21Kum Musa bedo ku dhanu m'uyero pire ku bang' adhura ceke, ma jusomo i kacokri ku ba ceng' sabatu ugambre kum dhanum'utuk ma con.

22E elund ebedo ber ni jukwenda ku judongo de, ku kanisa ngung', ya gigo wi dhanu moko mi juwagi, giorgi de Antiokia karacelo ku Paologi man Barnaba; nying' dhanune, Yuda ma julwong'o Barsaba, giku Sila, ma judongo ma kind umego:

23e gioro lembe kumae i cing'gi, Jukwenda kud umego ma dongo, ni umego ma gi mi Thekdhanumange i Antiokia, ku Cami, man Kilikia, moth iwu:

24Kum wawinjo nia jumoko m'uai i bang'wa gisendowu ku lembe, ma giloko ko ng'eyong'ec mu; ma wakumio igi lembang'olane wan ungo;

25ebedo ber iwa, ma cwinywa ripo acel, ya wagoi nying' dhanu waor i beng'wu karacelo ku jumer mwa ma Barnaba ku Paolo,

26gi ju ma cwinygi ai kum kwo migi pi nying Rwoth mwa Yesu Kristu.

27Ka kumeno waoro Yuda giku Sila, gin bende gibiyero lembuno gin ku dhoggi.

28Kum ebedo ber ni Tipo Maleng', iwa de, ya ku waketh ter i wiwu ma sagu gin maeni m'ubedo dre:

29ya wuceru ni gin ma julamu ni ayi gin m'acwia, man kum rimo, man kum gin ma judeyo adeya, man kum tarwang'; tek wugwokru ni gin maeni nwang'u ebibedo ber iwu. Dong' wubedi.

30Kum kumeno joca, ka jucikogi, giloro piny Antiokia; man ka gicoko udul dhanu karacelo, gimio igi waraga.

- ³¹E ka gisomo, anyong'a negogi dit kum jukne.
- ³²Man Yuda giku Sila, ma gin bende gi jubila, gijuko umego ku lembe dupa, giteng'o kogi.
- ³³E ka girio kuca nindo moko, e jucikogi ku bang' umego ma cwinygi kwio ma gidok ko ba ju m'uorogi.
- ³⁴Ento ebedo ber ni Sila ya ebed kuca.
- ³⁵Ento Paolo giku Barnaba re gidong' migi Antiokia, ma gibeponjo gibeyero lembe pa Rwoth, giku juwagi mange bende dupa.
- ³⁶Ka ceng' moko kadhu Paolo wacu ni Barnaba kumae, Dong' wadok kendo walieu umego ku bang' adhura ceke ma wayero ie lembe pa Rwoth, wanen maram gibedo ko.
- ³⁷E Barnaba yenyo ya gici giku Yohanagi bende, ma julwong'e Marko.
- ³⁸Ento Paolo ie wacu ya e ber ungo gici kugi en m'ewekogi Pamfulia, gicidho gikugi ngo i tic.
- ³⁹E giloko dhoggi ngle, ketho gipokri, e Barnaba dong' ugamu Marko, e ma gidong' gicidho gikude Kupro ku yo mi pi:
- ⁴⁰ento Paolo dong' ufoyo pare Sila, e ma giwotho gikude, kan umego daru thierogi ni bero pa Rwoth.
- ⁴¹Man ekadhu kud i Cami ku Kilikia, m'eteng'o ko kanisa.

Tic Mi Jukwenda 16

- ¹Man ebino Derbe ku Lustra bende: man nen, jalub moko ni keca, ma nyinge Timoteo, e wod Nyayahudi m'uyio; won mire re Jayunani.
- ²Ng'atuno umego ma Lustra kud Ikonio de giyero pire ber.
- ³E Paolo yenyo gici gikude; e gigame gitimo yaa i kume ni kum Juyahudi ma gini keca: kum kagi ceke ging'eyo nia won mire e Jayunani.
- ⁴Man ka gicikukadhu ku kind adhura, gimio igi lem cik ma giwor ma jukwenda ku judongo ging'olo i Yerusalem.
- ⁵Ka kumeno kanisa doko tek i yioyic, man gicikumedri ku ba rupiny.
- ⁶Man gikadhu kud i ng'om Frugia ku Galatia de, gi ju ma Tipo Maleng' ukwerogi ya ku giyer lembuni i Asia;
- ⁷e ka giwok kum Musia, giponjo ya gicidh i Bithunia; e Tipo Yesu yio igi ngo;
- ⁸ka gikadhu Musia, giloro Troa.

- ⁹Man ginmawokiwang' uwok i wang' Paolo ku diewor kumae: Ng'atu acel m'i Makedoni cungo, m'ebekwaye ma tek, ewacu kumae, Bin lokani i Makedoni, man ikonywa.
- ¹⁰E kan eneno ginmawokiwang', e ndhu ndhu nica waponjo cidho i Makedoni, iwa wacu ya Mungu lwong'owa waci wayer lembanyong'a ma juboth ko igi.
- ¹¹Ka kumeno ka waai Troa ku yo mi pi, wacidho atira Samothraki, urwone ke Neapoli;
- ¹²waai ku keca wacidho Filipi, ma adhura mi Makedoni, en e ma kwong'a mi ng'ombuno, e ng'om mi Rumi; e wario i adhura nini ceng' moko.
- ¹³Man i ceng' sabatu wani wacidho yo ng'ei gang' dhu kulo, ka ma wawacu nyo karwo ni ie; e wabedo piny wayero de ni mon ma gicokri karacelo.
- ¹⁴Nwang'u dhaku moko ma nyinge Ludia, m'e jatim jamkuloka m'uluga, m'eai i adhura Thuatera, en e ng'atu ma rwo ni Mungu, ewinjo dwandwa: Rwoth uting'o adundene kara ie pid pi gin ma Paolo yero.
- ¹⁵E kinde m'emaku baputisi, ku juode de, e ekwayuwa ma tek, ewacu kumae, Tek iwu wacu ya an a mandha ku ba Rwoth, wumond i ot para, wubed keca de. E ecerowa.
- ¹⁶Man etimbre, kinde ma wabecidho karwo, ya warombo ku nyaku ma won tipo mi ewo giraewa, m'ekelo piny dit ni wegi kum lembe m'ebedeewo.
- ¹⁷Nyano kan ebelubo tokwa waku Paologi ekok akoka, ewacu kumae, Joni gi jumiru pa Mungu ma Malu Ngbir, ma giyero iwu yo mi both.
- ¹⁸Etimo maeni ceng' dupa. Ento Paolo, can umake dit, elokre ewacu ni tipo kumae, Ang'olo iri ku nying Yesu Kristu nia iwok woko kud i ng'atuni. E eai woko i saa maeni nini.
- ¹⁹Ento ka wegi gineno nia genogen mi kuloka migi ai, gimaku Paolo giku Sila, man giywayugi aywaya gicidho kugi i katali i wang' jubim,
- ²⁰e ka gikelogi i wang' jupoklembe, giwacu kumae, Joni, ma gi Juyahudi, gisendo adhura mwa dit apila.
- ²¹man giketho kura ma cik uyio ngo nia wajol, kadi wawor, wan ma wa Jurumi.
- ²²E udul dhanu ceke giai i kumgi karacelo: e jupoklembe giyeco kendi mi joca woko, man ging'olo ya jufodgi ku dul.
- ²³E ka gigoyogi wang' udul, gicwalugi i odkol, ging'olo ni jakur odkol ya ekurgi kr:
- ²⁴en de, kan egamu ng'ol ma kumeno, ecwalugi i kusika ma yo the odkol, eroyo kol de i tiendgi.
- ²⁵Ento kinde ma piny udoko diewor ma ling', nwang'u Paolo giku Sila giberwo gibewero wer de ni Mungu, jukol de gibewinjogi;

26e eni eni digidi ma dit uwok, ketho the odkol umaku yengre: e ndhu ndhu nica dhugola ceke yabre; e twic mi jukol de ceke gonjre.

27Man jakur mi odkol, uceu ku wang' nindo e kan eneno dhugola mi odkol ubedo thwolo, eting'o palamularu pare nik enegre ko, ewacu nyo jukol upiei.

28Ento Paolo kok ku dwande ma tek, ewacu kumae, Kud itim gin moko i kumi: kum wan ceke wanuti keni.

29E elwong'o mac man epiei i ie de, ma kume bemiel ku lworu, epodho piny i wang' Paolo giku Sila,

30man ewodhogi woko ewacu kumae, Paco, akoatim ang'o be ketho abothi?

31Man giwacu kumae, Yi Rwoth Yesu, e ibiboth. in ku juodi de.

32E giyero lembe pa Rwoth ire, ku dhanu ceke ma ni i ot pare de.

33E ecokogi ndhu i saa mi diewor nica, man elwoko wang' goc mi kumgi; e jumie baputisi ndhu ndhu nica, giku juode kpo.

34Man eterogi malu i ot pare, eketho cam de i wang'gi, e anyong'a nege dit, giku juode ceke, ma giyio Mungu.

35Ento kinde ma piny uru, jupoklembe gioro asikari, giwacu kumae, Wuwek joni cidhi.

36E jakur odkol uyero lembene ni Paolo, ewacu kumae, Jupoklembe gioro ya juwek wucidhi: nie dong' wuwoki, wuci ma cwinywu kwio.

37Ento Paolo wacu igi kumae, Gifodowa i wang' dhanu, ma jukupoko lembe mwa rac ungo, ma wan ke wa Jurumi, man gicwaluwa i odkol; e kawono gibewodhowa ling'i? ungone; ento wek gibin giwodhwa woko gin.

38E asikari gidwoko lembe maeni ni jupoklembe: e lworu negogi ka giwinjo nia gi Jurumi;

39e gibino gipaku dhoggi igi; e ka giwodhogi woko, gipenjogi ya giai woko kud i adhura.

40E giai woko kud i odkol gici gimondo i ot pa Ludia: e ka gineno umego, gijukogi, man gicidho.

Tic Mi Jukwenda 17

1Nie ka gikadhu kud i pacu Amlipoli, kud Apolonia de, e gibino Tesaloniki, ka ma kacokri mi Juyahudi ni ie:

2man calu kura Paolo emondo i bang'gi, man ku ba ceng' sabatu adek gicikuluro lembe i lembagora pa Mungu gikugi,

3eyabu i lembe enyutho de ya Kristu kosendre be, man eai kendo de ku kind ju m'utho; man nia Yesu maeni, m'ayero iwu pire nini, en e Kristu.

- ⁴E jumoko m'i kindgi giloko pidoigi, man giribri ku Paolo ku Silagi: udul Juyunani ma dit de ma lworu Mungu, ku mon ma dongo de nyanok ungo.
- ⁵Ento Juyahudi, ma ngiri benegogi, gigamu jumoko ma rac ma kind dhanu ma sai, e ka gicoko njuru dhanu, ginyayu rop i adhura; e gicori kum ot pa Yason, giyenyo giwodh joca woko ni dhanu.
- ⁶E ka ginwang'ugi ngo, gidong' giywayu Yason kud umego moko i wang' jubim mir adhura, gikok kumae, Joni ma ginyotho ng'om gibino keni bende,
- ⁷ma Yason ujologi; man joni ceke gitimo tung' ku cik pa Kaisari, giwacu ya ubimo mange nuti, en e Yesu.
- ⁸Man gisendo udul dhanu ku jubim mir adhura de, ka giwinjo gin maeni.
- ⁹E ka gigamu jupiny ma Yason ku juwagi gigonjri ko, e giwekogi ya gicidhi.
- ¹⁰Man umego gioro Paolo giku Sila pio pio ku diwor nica gicidho Beroya: gin ka gitundo kakeca gimondo i kacokri mi Juyahudi.
- ¹¹Nie joni gi riek ma sagu ju ma Tesaloniki kum gijolo lembene ku pidoigi ma yot, giyenyo i lembagora pa Mungu ku ba rupiny ku ba rupiny, tek gin maeni en e andha.
- ¹²Ka kumeno dupa m'i kindgi giyio; mon Juyunani ma dongo, ku jumaco de, nyanok ungo.
- ¹³Ento ka Juyahudi ma Tesaloniki ging'eyo nia Paolo yero lembe pa Mungu Beroya de, gicidho kuca bende, ma gibethubo kind udul dhanu gisendogi de.
- ¹⁴E aruca ruca nica umego gilund gioro Paolo ucidho agbele dhu nam: Sila giku Timoteo gidong' keca.
- ¹⁵Ento ju ma gilwoko Paolo gitere cik Athene: e ka gigamu lembang'ola m'ulwong'o Sila giku Timoteo ya givin i bang'e pio pio, e gicidho.
- ¹⁶Nie kinde ma Paolo bekurogi i Athene, edieng'o cwinye kan eneno adhurane dhir kud ayi m'acwia.
- ¹⁷Kum kumeno gibegiporo lembe i kacokri giku Juyahudi ku ju ma lworu Mungu de, man i katali ku ba rupiny ku ba rupiny ku ju ma girombo kugi bende.
- ¹⁸Jurieko moko ma gi Juepikurio ku Justoiki girombo kugi. Man jumoko wacu kumae, Jakemo maeno yenyo yero nik ang'o? jumange wacu kumae, Kuno nyo e jayer pi mungu ma welo: kum eyero pi Yesu ku pi cer bende.
- ¹⁹E gigame, gitere Areopago, gipenje kumae, Iyio wang'ei ponji ma nyen maeni m'ibeyero no?
- ²⁰Kum ikelo gin ma fo'wakung'eyo ngo ba ithwa: ka kumeno nie wayenyo wang'ei thelembe mi gin maeni.

- ²¹(Nie Juathene ku welo m'ubedo i kindgi gidaru nindo migi ku gin moko mange ngo, ndhu ku yero kadi ku winjo gin moko ma nyen.)
- ²²Man Paolo cungo i dier Areopago, ewacu kumae, Wu dhanu mir Athene, aneno i gin ceke wuyenyo ka mungu dit.
- ²³Kum kan abekadhu, man aneno gin mi rwo mu, anwang'u pemblam de ma karamblembe ni i kume kumae, NI MUNGU MA JUKUNG'EYO NGO. Nie gin ma wurwo i bang'e ma wubedo cobo pire nini, e ma ayero iwu pire.
- ²⁴Mungu m'ucwio ng'om ku gin ceke ma ni i ie de, en, m'e Rwoth mi polo ku ng'om de, ebledo i hekalu ma jugomo ku cing' ungo;
- ²⁵kadok ku cing' dhanu de jutimo ire ngo, calu ya can gin moko benege, kum en e m'emio kwo ni giki ceke, ku lietho m'i igi de, ku gin ceke;
- ²⁶man etimo thek ceke mi dhanu kud acel kara gibed i wang' ng'om ceke, nwang'u eng'olo rundi migi m'aketha, ku kieu mi kabedo migi;
- ²⁷kara giyeny Mungu, tek kuno nyo giyeny e ginwang'e, kadok abora de ebor ungo kudwa kubang'wa nzu:
- ²⁸kum wakwo man wawotho, wabedo de ni kume; calu jurieko mu moko giwacu kumae, Kum wan de wa nyikwaye.
- ²⁹Ka kumeno tek wa nyikwai Mungu, maku ku wawac nia nyo Rucwic calu mola ma kwar, kadi mola ma tar, kadi kidi ma jung'iko ku bodho man ku rieko mi dhanu.
- ³⁰Nie nindo ma jubedo ie cobo, wang' Mungu kadhu kud i wie; ento kawono eng'olo ni dhanu ceke ku kaka ceke ya gilok cwinygi:
- ³¹kum eketho ceng' m'ebipoko ie lembe mi ng'om i bedopwe ku ng'atu m'eketho: kum maeni emio gin ma ketho kwicwiny ni dhanu ceke, kum eketho ecer ku kind ju m'utho.
- ³²Nie ka giwinjo pi cer mi ju m'utho, jumoko gicayu acaya; ento jumoko giwacu kumae, Wabiwinjo pi maeni kendo i beng'i.
- ³³Ka kumeno Paolo ai woko kud i kindgi.
- ³⁴Ento jumoko gimoko i kume, giyie de: kind joni moko Dionusio ma Jaareopago, dhaku ke ma nyinge Damari, giku jumange de.

Tic Mi Jukwenda 18

- ¹Yo ng'ei lembe maeni eai Athene, man ebino Korinto.
- ²Man enwang'u Jayahudi moko keca ma nyinge Akula, thugi ni i Ponto, fodi eai i Italia, giku cege ma nyinge Priskila, kum Klaudio ng'olo ya dhanu ma Juyahudi ceke giai i Rumi: e ebino i bang'gi;

- ³man kum gi weg bodho acel, gibedo gikugi, gitimo de: kum bodho migi kwoyo hema.
- ⁴Ebedeluro lembe ku ba ceng' sabatu i kacokri, ebedethoko ko Juyahudi ku Juyunani de.
- ⁵Ento ka Sila giku Timoteo giai i Makedoni giloro piny, e lembe ting'o cwiny Paolo, man etuco ni Juyahudi ya Yesu en e Kristu.
- ⁶E ka gipiembri giyanyu ayany de, eyengo bongu pare man ewacu igi kumae, Dong' rimo mu bed i wiwu giwu; an a leng' ugambre kawono adong' cidho ba Thekdhanumange.
- ⁷E eai kakeca, emondo de i ot pa ng'atu acel ma nyinge Tito Yusto, en e ng'atu ma rwo ni Mungu, ma ot pare bedo ceng'ni ku kacokri.
- ⁸Man Krispo, ma jadit mi kacokri, uyio Rwoth ku juode ceke; Jukorinto de dupa ka giwinjo giyio, e jumio igi baputisi.
- ⁹E Rwoth uwacu ni Paolo ku diwor ku ginmawokiwang' kumae, Lworo kud unegi, ento yer kud iling':
- ¹⁰kum wanuti wakudi, ng'atu moko mbe de ma bitimo rac i kumi: kum abedo ku dhanu dupa i adhura nini.
- ¹¹Ebedo kuca rundi acel ku dwi abusiel, ebedeponjo lembe pa Mungu i kindgi.
- ¹²Nie kinde ma Galio bedo jabim mir Akaya, Juyahudi giai wang' acel kum Paolo gitere i wang' kom mi pokolembe,
- ¹³giwacu kumae, Ng'atuni bethoko dhanu ya girwo ni Mungu tung' ku ma cik uyio.
- ¹⁴Ento ka Paolo yenyu alu dhoge, Galio wacu ni Juyahudi kumae, Tek en e lembe ma rac kadi lem sasa ma rac, E wu Juyahudi, kuno di awinjomu:
- ¹⁵ento tek en e penji mi lembe man mi nying' ku mi cik mu giwu, wukor ie giwu; kum ayenyu ngo abed japoklembe mi gin ma kumeno.
- ¹⁶Man eriemogi woko ku vut kom mi ng'olo lembe.
- ¹⁷E kagi ceke gidong' gimaku Sosthene, e jadit mi kacokri, e gifode nyim kom mi pokolembe. E Galio oyo lembene ku die ng'eye.
- ¹⁸Man Paolo, kan erio ceng' dupa yo ng'ei lembuni, emotho umego, e etugo woth ku yo mi pi ecidho Cami, giku Priskila man Akula: kan edaru gwaru wie Kenkrea; kum eng'olo lembene ang'ola.
- ¹⁹E gitundo Efeso, man ewekogi keca: ento en emondo i kacokri, man giluro lembe giku Juyahudi.
- ²⁰E ka gipenje ya gikogibed kugi tundu, eyio ngo;

- ²¹Ento emothogi, ewacu kumae, Abidwogo i beng'wu kendo tek Mungu yio, e eai Efeso ku yo mi pi.
- ²²E kan etundo Kaisaria, eidho malu emotho kanisa, kan edong' eloro Antiokia.
- ²³E kan erio nindo moko keca, eai, ekadhu i ng'om Galatia, ku Frugia, ndri ndri, ecikudwoko cwiny julub ceke tek.
- ²⁴Nie Jayahudi moko ma nyinge Apolo, ma junyole i Iskander, en e ng'atu ma dwande leng', ebino Efeso; man eng'eyo lembagora pa Mungu dit.
- ²⁵Judaru ponjo ng'atu maeni ku yo pa Rwoth; e cwinye ting'e dit eyero eponjo lembe pi Yesu cu, ere eng'eyo baputisi pa Yohana kende:
- ²⁶man emaku yero ku tegocwinye i kacokri. Ento ka Priskila gikud Akula giwinje, gigame i bang'gi, man gikoro ire pi yo pa Mungu cu ma sagu.
- ²⁷E ka ie pido nik ekadh i Akaya, umego gicwake, gigoro lembe de ni julub ya gijole: e kan ewok, ekonyogi dit gi ju ma giyio ni kum bero;
- ²⁸kum eloyo Juyahudi, enyutho i wang' dhanu ku lembagora pa Mungu nia Yesu en e Kristu.

Tic Mi Jukwenda 19

- ¹Man etimbre, nia, kinde ma Apolo ni i Korinto, Paolo m'udaru kadhu kud i ng'om ma yo malu ebino Efeso, man enwang'u julub moko:
- ²e epenjogi kumae, Wujolo Tipo Maleng' ka wuyio? Giloko lembe de giwacu ire kumae, Ungo, kadok awinja de wawinjo ngo nia Tipo Maleng' umire.
- ³Man ewacu kumae, Ka kumeno jumio iwu baputisi ma mir ang'o? Giwacu kumae, Baputisi pa Yohana.
- ⁴Paolo wacu kumae, Yohana mio baputisi mi lokocwiny, ewacu ni dhanu nia dong' giyi ng'atu ma bilubo ng'eye, en e Yesu.
- ⁵E ka giwinjo maeni, e jumio igi baputisi ku nying Yesu.
- ⁶Nie ka Paolo ketho cinge i kumgi, Tipo Maleng' uwok i wigi; e gimaku weco ku dhok mange, man giewo.
- ⁷Dhanune ceke giyenyo romo apar wi ario.
- ⁸Man emondo i kacokri eyero de ku tegocwinye nindo mi dwi adek, ebedeluro i lembe man ethokogi pi lembe mi ker pa Mungu.
- ⁹Ento ka jumoko cwinygi doko nwang' man giwor ungo, gicido Yojuni i wang' udul dhanu, eai i bang'gi, ekoyo julubne de, ebedeluro i lembe ku ba rupiny ku ba rupiny i kisoma pa Turano.
- ¹⁰Gin maeni timbre nindo mi rundi ario: ketho dhanu ceke m'ubedo i Asia giwinjo lembe pa Rwoth, Juyahudi ku Juyunani bende.

- 11**E Mungu timo musana ma dit ku cing' Paolo:
- 12**ketho nia jugamu kitambala ku bongu mi tic m'i kume, jutero ba ju ma kumgi lith, e kumgi kei ndhu, tipo ma rac de ai woko kud i igi.
- 13**Ento Juyahudi moko bende ma giwotho swa, gi weg ajoga, gimaku lwong'onying Rwoth Yesu wi ju ma weg tipo ma rac giwacu kumae, Wakwong'owu ku Yesu ma Paolo beyero pire.
- 14**Nwang'u Skewa acel, e Jayahudi, ma jalam ma dit, wote de abiro nuti ma gitimo maeni.
- 15**Tipo ma rac uloko lembe ewacu igi kumae, Yesu ang'eyo, Paolo de ang'eyo; ento wun wu jukani?
- 16**E ng'atu ma won tipo ma rac upodho i wigi, esagu gin ario de, eloyogi ndhu, ketho gipiei kud i oduno muneru ma kumgi ju rem de.
- 17**Lembene yik ba dhanu ceke, Juyahudi ku Juyunani de, ma gibedo Efeso; e lworo podho i wigi ceke, nying Rwoth Yesu de doko dwong'.
- 18**Man dhanu dupa bende ma giyio gibino, gituco, giyero pi tic migi de.
- 19**Weg ajoga de m'i kindgi ma nok ungo gikelo kitabu migi karacelo giwang'ugi de i wang' dhanu ceke; gikwanu wel pinje de, ginwang'u etundo sente mi mola ma tar rubanga pier abic.
- 20**Ka kumeno lembe pa Rwoth unyai udoko dit ma sagu.
- 21**Nie yo ng'ei gin maeni, Paolo keco i cwinye, nia kan ekadhu ku i Makedoni kud Akaya de ya ecidh Yerusalem ewacu kumae, Yo ng'ei cidho kuca, akoneno Rumi be.
- 22**E kan eoro juario ma kind ju ma timo ire ucidh i Makedoni. Timoteo gikud Erasto, en gire edong' tundu i Asia.
- 23**Man i nindo maeno i dhanu bepido rr kum lembe mi Yojuno.
- 24**Kum ng'atu acel ma nyinge Demetrio, ma jabodho mi mola ma tar, m'etimo hekalu mi mola ma tar mir Artemi, ma kelo kuloka ma nok ungo ni jubodho;
- 25**m'ecokogi karacelo, ku weg tic ma calu maeni de, man ewacu kumae, Paco, wung'eyo nia wanwang'u lonyo ku bodho maeni.
- 26**Wuneno wuwinjo de, nia i Efeso kende ngo, ento cil i Asia ceke kpr kpr, Paolo maeni ethoko dhanu dupa man ewingogi, ewacu nia mungu ma juthiedho ku cing' ya gi mungu ngo:
- 27**man bodho mwa maeni kende ngo ma jumaru cayu; ento hekalu mir Artemi ma mungu ma nyaku ma dit bende jubidwoke doko mananu, jubikabe woko ku kadwong' pare ma naka Asia ku ng'om ceke girwo i bang'e.

²⁸E ka giwinjo lembe maeni kwinyo pong'og, man gikok, giwacu kumae, Artemi mi Juefeso e dwong'.

²⁹E adhura pong' ku yakni: man gikonjri kro i kacokri, ka gidaru maku Gayo gikud Aristarko, gi dhanu ma Makedoni, ma giwotho ku Paologi.

³⁰E ka Paolo yenyo emond ba dhanu, julub gicere.

³¹Dhanu moko mir Asia bende, ma gi jurimbe, gioro lembe i bang'e gikwaye nia kud emond i kacokri.

³²Ka kumeno jumoko gikok ku lembe acel, jumoko ke ku lembe mange: kum cokri bedo wuu; dhanu kucel ma dit ging'eyo lembe ma gicokri i kume ngo.

³³Gidong' giwodho Iskander kud i kind udul dhanu, ma Juyahudi gikethe i wang' dhanu. Man Iskander ujukogi ku cinge, man eyenyo etit thelembe ni dhanu.

³⁴Ento ka ging'eyo nia en e Jayahudi, kagi ceke gikok ku dwandgi acel i kinde ma yenyo romo saa ario kumae, Artemi mi Juefeso e dwong'.

³⁵Ka jagorlembe juko udul dhanu, ewacu kumae, Wu Juefeso, dhanu makani ma kung'eyo nia adhura mi Juefeso e jakur hekalu mir Artemi ma dwong', kud ayi de m'uai ba Zeu upodho pinyi?

³⁶Kum jucopo piemo kum gini ngo, maku wubed moth, man kud wutim lembe vur vur.

³⁷Kum wukelo dhanu maeni kakeni, ma gi juyak hekalu ngo kadi gi jucid mungu mwa ma nyaku de ngo.

³⁸Ka kumeno tek Demetrio, ku jubodho wadi ma ni i bang'e, lembe ni i igi kum ng'atu moko, katitlembe bedo ayaba, man jutitlembe de ginuti: wek gidotri.

³⁹Ento tek wuyenyo lembe moko i gin mange ebing'eny i vora ma juketho.

⁴⁰Kum andha jumaru dotowa kum rop maeni ma tin, kum there mbe: man pi lembe maeni there bititre iwa ngo kum udul dhanu maeni.

⁴¹E kan edaru yero kumeno, elalu cokri.

Tic Mi Jukwenda 20

¹E yo ng'ei rop m'uthum Paolo ma nwang'u elwong'o julub i bang'e ejukogi de, emothogi, e eai ecidho i Makedoni.

²E kan ekadhu kud i theng' ng'ombuca, emio igi juk de ma dit, ecidho i Yunani.

³E kan ebedo dwi adek kuca, e Juyahudi gipido lembe i kume kinde ma nik etug woth ecidh i Cami ku yo mi pi, ie keco ya ebidok ku yo Makedoni.

⁴Ju ma gicidho gikugi gijik Asia, Sopater ma Beroya, wod Puro; man mi Jutesaloniki ke, Aristarko man Sekundo; man Gayo ma Derbe, ku Timoteo; man mir Asia ke, Tukiko giku Tronmo.

- ⁵Ento joni gilar gicidho, gidong' gikurowa i Troa.
- ⁶E waai Filipi ku yo mi pi ka ceng' mi kwen ma thobi mbe i ie kadhu, e watundo i bang'gi Troa i ceng' abic; ka ma wario i ie ceng' abiro.
- ⁷I ceng' ma kwong'ane ma yenga, ka wacokra karacelo ning'weko i kwen, Paolo giweco gikugi, nwang'u ie pido ya urwone ebicidho; man eyero hai maram piny udoko ko diewor ma ling'.
- ⁸Thala de dupa i ot ma malu ka ma wacokra ie karacelo.
- ⁹Nwang'u jalawobi acel ma nyinge Eutuko ubedo i wang'ot, ma nindo ma dit unuro kume; man ka Paolo becidho ku yero lembe ma sagu, ng'atuno ma nindo pare sage epodho piny kud i ot mir adege, man juting'e m'etho.
- ¹⁰E Paolo gam uloro piny, eriebre i wie, egwake ewacu kumae, Kud wutimbru swa; kum kwone nuti i ie.
- ¹¹E kan eidho malu, eng'weko i kwen de, man ecamu, giweco gikugi hai de, maram piny uru ko, e eai woko.
- ¹²Gidong' gikelo nyiruno m'ebedo kwo, e cwinygi kwio.
- ¹³Ento wan, ma walar wacidho ba combo, wacidho Aso ku yo mi pi iwa wacu nyo wabicigamu Paolo kuca: kum eng'olo kumeno, ie caku en ya ewoth ku wi ng'om.
- ¹⁴E ka warombo wakugi Aso, wagame, wabino kugi Mitulene.
- ¹⁵E waai keca ku yo mi pi, urwone watundo kum Kio; ceng' mir adege wagudo Samo; e ceng' mir ang'wende watundo Mileto.
- ¹⁶Kum Paolo keco ya ekadh Efeso ku yo mi pi, kara kud egal i Asia; kum ewotho pio pio, kara tek ecopre, ceng' Pentekote ubin unwang'e Yerusalem.
- ¹⁷E eoro lembe kud i Mileto ucidho Efeso, ulwong' judong kanisa ubin i bang'e.
- ¹⁸Ka gibino i bang'e, ewacu igi kumae, Wun wung'eyo giwu, ugambre i ceng' ma tienda lar unyono i Asia, maram wabedo ko kudu nindo ceke,
- ¹⁹m'atimo ko ni Rwoth ku pidoia ma mol kwa, man ku piwang', ku masendi bende m'unwang'a kum rieke lembe mi Juyahudi;
- ²⁰maram alworo ko ngo niyero iwu gin ceke m'ubedo ni kuloka, ku ponjowu kele, man ku ba udi ku ba udi
- ²¹abedatuco ni Juyahudi ku Juyunani bende ya gilok cwinygi ba Mungu, man gibed ku yioyic yo ba Rwoth mwa Yesu Kristu.
- ²²Man nen, kawono, cwinya twire ya aci Yerusalem m'ang'eyo ko gin ma biciwok i kuma kuca ngo:
- ²³ento Tipo Maleng' utuco ira ku bang' adhura ceke, ewacu nia kol ku ruvwa bekura.

- ²⁴Ento aneno kwo para mit ungo i wang'a, ento kara adar bedo para, ku tic m'agamu ba Rwoth Yesu, ya atuc lembanyong'a ma juboth ko mi bero pa Mungu.
- ²⁵Man kawono, nen, ang'eyo nia wun ceke, m'awotho i kindwu ayero iwu pi ker, wubineno wang'a kendo ngo.
- ²⁶Kum kumeno tinuni atuco iwu, ya an a leng' ni rimb dhanu ceke.
- ²⁷Kum alworo ngo niyero iwu lembapora pa Mungu ceke.
- ²⁸Wubed ku weng'wu giwu, kud udul ceke, ma Tipo Maleng' uketho wudoko julieu i ie kara wumi cam ni kanisa pa Rwoth m'eng'iewo ku rimbe gire.
- ²⁹Ang'eyo yo ng'ei ai para urudi ma rac bimondo i kindwu, ma kisa mbe kugi kum udul;
- ³⁰man kud i kindwu dhanu moko biai, ma biyero lembe ma tung'. kara giwing' julub ulub ng'eigi.
- ³¹Kum kumeno wukuru, wupoi ya calu nindo mi rundi adek aweko juko dhanu ngo kubang'gi kubang'gi diewor ku dieceng' ku piwang'.
- ³²Kawono athierowu ni Mungu, man ni lembe mi berone, ma copo teng'owu, ma copo mio iwu camupacu de kind dhanu ceke ma judwokogi leng'.
- ³³Ng'atu moko mbe m'aneno mola ma tar pare mit i wang'a, kadi mola ma kwar, kadi kendi de.
- ³⁴Wung'eyo giwu nia cing' maeni timo ni canpiny m'unega, ni ju ma wanuti wakugi de.
- ³⁵I gin ceke amio iwu por, nia ku tic ma wumulu ko kumeni maku wukony ju ma ng'ic, wupoi de kum lembe pa Rwoth Yesu, nia ewacu en kumae, Mio en e mugisa ma sagu gamu.
- ³⁶E kan edaru yero kumeno, e erum piny man girwo gikugi ceke.
- ³⁷E kagi ceke giywak dit, gigwaku ng'ut Paolo gicwio limbe de,
- ³⁸ma can unegogi ma sagu kum lembe m'eyero, nia gibineno wang'e kendo ngo. E gitere i yo pare ba combo.

Tic Mi Jukwenda 21

- ¹E kan etimbre nia kindwa liero ku joca e wacidho ku yo mi pi, wabino atira Kos, urwone ke Rodo, waai keca wabino Patara:
- ²e ka wanwang'u combo m'ukadhu lokaca Foiniki, waidho i ie, wacidho ko ku yo mi pi.
- ³E ka waweko Kupro unen yor acam, wacidho Cami ku yo mi pi, e wanyiko Turo; kum keca ka ma combo olo ie ter.

- ⁴E ka wanwang'u julub wario keca ceng' abiro: e joni wacu ni Paolo ku Tipo, nia kud enyon i Yerusalem.
- ⁵E ka ceng' nica thum kakare, waai wacidho i woth mwa; e kagi ceke ku mongi ku nyithindhgi de, gilwokowa ram wakadhu ko ku i adhurane: e warum piny dhu wath, warwo, man wamothia;
- ⁶e wadong' waidho i combo, gin ke giloko gidok thugi kendo.
- ⁷E ka wadaru wot ma waai ko Turo, watundo Tolemai: e wamotho umego, wario de wakugi ceng' acel.
- ⁸Urwone waai, wabino Kaisaria: e wamondo i ot pa Filipino ma jayer lembayong'a ma juboth ko, ma en e ng'atu acel ma kind juabiro, wabedo i bang'e.
- ⁹Nie ng'atuno jumanyir pare gin ang'wen ma gi sumba, ma giewo.
- ¹⁰E ka wario keca ceng' moko, jablia moko ma nyinge Agabo uai i Yahudi loro piny.
- ¹¹E ebino i bang'wa, eting'o thondh pier Paolo, etwio ko tiende ku cinge, ewacu kumae, Tipo Maleng' uwacu kumae, Juyahudi ma i Yerusalem gubitwio ng'atu ma won thondh pier maeni kumeni, gibikethe de i cing' Thekdhanumange.
- ¹²E ka wawinjo gin maeni, wan ku ju ma kakeca de wakwaye ya kud eidh Yerusalem.
- ¹³E Paolo lund uloko lembe kumae, Wubeywak, wuturo ko adundena nedi? kum abedo ayika mi twic kende ngo, ento mi tho bende i Yerusalem pi nying Rwoth Yesu.
- ¹⁴E kan ekwero loko pidoie, waweke, wawacu kumae, Dong' yeny ma i Rwoth uyenyo e m'utimbre.
- ¹⁵E yo ng'ei ceng' maeni wating'o jamni mwa waidho Yerusalem.
- ¹⁶Man jumoko ma kind julub ma Kaisaria bende wacidho wakugi, ma gikelo ng'atu acel mi Kupro, ma nyinge Nason, en e jalub ma con, ma wabicibedo wakugi.
- ¹⁷E ka watundo Yerusalem, umego gijolowa ku mutoro.
- ¹⁸E urwone Paolo mondo ba Yakobo wakugi; nwang'u judongo ceke ginuti.
- ¹⁹E kan emothogi, egonyo gin ma Mungu timo acel acel i kind Thekdhanumange ni kum tic pare.
- ²⁰Gin de, ka giwinjo maeni, giyungo Mungu; man giwacu ire kumae, Umego, ineno nia dhanu m'uyio ma kind Juyahudi gi rubanga swa ngi; man gin ceke ava cik utimogi:

²¹man giwinjo piri, nia iponjo Juyahudi ceke m'i kind Thekdhanumange ya giwek Musa, nia ku gitim yaa kum nyithindho migi, kadi kuragi de ku gikwany.

²²Ka kumeno ang'o? gibiwinjo andha nia ibino.

²³Ka kumeno tim maeni ma wawacu iri: Dhanu ang'wen nuti bang'wa ma lembang'ola ni i wigi:

²⁴igam joni, wudwokru leng' wukugi, iwodh jupiny igi, kara gigwar wigi: e dhanu ceke gibing'eyo nia lembe ma giwinjo piri en e lemandha ngo; ento nia in giri bende iwotho atira, iworu cik de.

²⁵Ento pi Thekdhanumange ma giyio, wagoro, wang'olo nia dong' gigwokri gigi kum gin ma julamu ni ayi gin m'acwia, man ni rimo, ku gin ma judeyo adeya, man kum tarwang'.

²⁶E Paolo lund ugamu jono, man urwone kan edwokre leng' gikugi gimondo i hekalu, m'enyutho ko nia ceng' mi dwokrileng' utimbre kakare, maram lam uwodhre ko pigi ceke kubang'gi kubang'gi.

²⁷E ka ceng' abiro dhingo thum, Juyahudi ma Asia, ka ginene i hekalu, githubo i udul dhanu ceke man giketho cing'gi i kume,

²⁸gikok kumae, Dhanu mir Israel, wukonywa: Janduni en e ng'atu m'uponjo dhanu ceke ku kaka ceke kum dhanu, kum cik de kum ka maeni bende; man ke ekelo dhanu mi Yunani de i hekalu, man ecido kamaleng' maeni.

²⁹Kum gilar ginene i adhura giku Trolimo ma Jaefeso, e ma giwacu nyo Paolo kele i hekalu.

³⁰E adhura ceke bewoi swa, dhanu de ring'ni karacelo; e gimaku Paolo, giywaye woko kud i hekalu: e giciko dhugolane rit.

³¹E ka gibeyenyo nege, rwonglembene tundo ba jego ma dit mir udul asikari, nia rop uromo Yerusalem ceke.

³²E ndhu ndhu nica egamu asikari ku ju ma jego de, man gikonjri kugi piny i bang'gi: e joni, ka gineno jego ma dit kud asikari de, giweko fodo Paolo.

³³E jego ma dit ulund ubino ceng'ni, emake de, man eng'olo ya jutwie ku nyoro ario; e epenjo nia en e ng'a, man edubo ang'o.

³⁴E juman kok ku lembe migi tung', juman ku lembe migi tung', i kind njuru dhanu: e kan ecopo ng'eyo the rop maeni ngo cu kum woi mi dhanu, eng'olo ya jutere i ot ma tek.

³⁵E kan ewok wi gin ma juidho ko i ot, nwang'u asikari giyeye ayeya kum rop mi njuru dhanu;

³⁶kum udul dhanu gilubo ng'eye, ma gikok kumae, Wucwale cen.

³⁷E ka jumaku tero Paolo i ot ma tek, ewacu ni jego ma dit kumae, Acopo yero lembe moko iri? Man ewacu kumae, Ing'eyo dhu Juyunani?

³⁸Ka kumeno in i Jamisiri ngo ma nyamaca teng'o ali, m'utelo wi dhanu rubanga ang'wen i yamba mi Jukwori?

³⁹Ento Paolo wacu kumae, An a Jayahudi, mi Tarso i Kilikia, an a dhanu mir adhura ma nok ungo: e akwei, ya ikoiyi ayer ni dhanu.

⁴⁰E kan eyio, Paolo, m'ucungo wi gin ma juidho ko i ot, ejuko dhanu ku cinge; man ka giling' ti, eyero igi ku dhu Juebrania, ewacu kumae,

Tic Mi Jukwenda 22

¹Umego ku wego de, wukowuwinj lembe para ma kawono abetito iwu.

²E ka giwinjo nia ebeyero igi ku dhu Juebrania, giling' m'usagu: man ewacu kumae,

³An a Jayahudi, ma junyola i Tarso ma Kilikia, ento apidha re jupidha i adhura maeni, ku the tiend Gamaliel, juponja cu calku kura cik pa kwaruwa, ma ava Mungu tima, cil calu etimowu tinuni:

⁴man anyayu ragedo kum Yojuni cil mi nek ngi, m'atwio ko co ku mon de man acwalugi i odkol.

⁵Calu jalam ma dit bende nyutho pira, ku dilo ceke mi judongo bende: m'agamu waraga de i bang'gi ni umego, man acidho Dameski, kara akel ju ma ni kuca bende Yerusalem ku uno kara jusendgi.

⁶Man etimbre, nia ka wabewotho, wadhingo Dameski de, calu nyangu ma the dieceng', e ndhu ndhu nica der uai i polo caru piny ngbeng' i kuma.

⁷E apodho i ng'om, man awinjo dwal uwacu ira kumae, Saul, Saul, inyayu ragedo i kuma nedi?

⁸Man adwoko lembe kumae, In i ng'a, Rwoth? En ke edwoko lembe ira kumae, An a Yesu ma Nazareti, m'ibenyayu ragedo i kuma.

⁹Man ju ma wawotho wakugi gineno der andha, ento giwinjo dwal ungo m'uweco i bang'a.

¹⁰An ke awacu kumae, Abitimo ang'o, Rwoth? Rwoth uloko ira lembe kumae, Ai malu, icidh imond i Dameski; ka jubiyero iri kuca pi gin ceke ma juketho iri ya itim.

¹¹E kan acopo neno piny ungo kum rieny mi der maeno, e ju ma wawotho wakugi gidong' gipeya ku cinga ka wabino Dameski.

¹²E ng'atu moko ma nyinge Anania, m'e jalwor Mungu calku cik, ma pire ber de ni Juyahudi ceke m'ubedo kuca,

13ebino i bang'a, ecungo i vuta e ewacu ira kumae, Umira Saul, mak neno piny. E aneno bang'e ndhu i saa nica.

14Man ewacu kumae, Mungu pa kwaruwa kethi kara ing'ei gin ma ie yenyoy, inen Ng'atu ma Pwe de, man iwinj dwal m'uai i dhoge bende.

15Kum ibibedo jamulembe pire ni dhanu ceke kum gin m'ineno m'iwinjo de.

16Kawono igalu nedi? ai malu, mak baputisi, lwok dubo peri woko, m'ilwong' ko nyinge bende.

17E etimbre, nia, kan adwogo Yerusalem, e kinde m'arwo i hekalu, piny urwinyo kuda biti,

18e aneno ebeweco i bang'a kumae, Tim pio, iwodhri tho kud i Yerusalem kum gibijolo lembatuca ma pira ngo i beng'i.

19Man adwoko lembe kumae, Rwoth, ging'eyo gin ya i kacokri kubang'gi ceke abedafodo ju m'uyio iri acwalugi i odkol de:

20e ka rimb Stefano ma jamulembe peri cwir, nwang'u an de acungo i vute, ayia de ayio, akuro kum kendi mi ju m'unege de.

21Man ewacu ira kumae, Cidhi: kum abiori ngbir ba Thekdhanumange.

22E giwinje maram etundo ko kum lembe mae; e giting'o dwandgi malu, giwacu kumae, Wukab wagi ng'atu ma kumeno woko kud i ng'om: kum maku kud ebed kwo.

23E ka gikok, gibayu kendi migi de woko, giketho utur de i lietho,

24e jegoy ma dit ung'olo ya jutere i ot ma tek, ewacu nia jubiluro i lembe pare ku fodo, kara eng'ei thelembe m'uketho jukok kumeno i kume.

25E ka gitwie ku foto, Paolo wacu ni jegoy m'ucungo i vute kumae, Cik uyio ya ifod ng'atu ma Jarumi, ma fodi jukupoko lembe pare rac ungo?

26Ka jegoy winjo kumeni, ecidho ba jegoy ma dit, ewacu kumae, Iyenyoy timo ang'o? kum ng'atu maeni en e Jarumi.

27E jegoy ma dit ubino ewacu ire kumae, Koiwac ira, in i Jarumi? Man ewacu kumae, Eyo.

28Jegoy ma dit uloko lembe kumae, Anwang'u paker maeni ku piny ma dit. Man Paolo wacu kumae, Ento an junyola anyola Jarumi.

29E ju ma giyenyoy gliur i lembe pare ging'eny wany kud i kume: e jegoy ma dit bende lworoy make kan eng'eyoy nia en e Jarumi, man kum etwie.

30Ento urwonye, kum eyenyoy eng'ei thelembe ma Juyahudi dote i kume cu, egonye, man eng'olo ya julam ma dongoy ku dilo ceke gicokri karacelo, man ekelo Paolo piny ekethe i wang'gi de.

Tic Mi Jukwenda 23

¹Man Paolo, m'eneno dilo tel, ewacu kumae, Umego, abedo i wang' Mungu ku pidocwiny ma ber ceke cil i ceng' maeni.

²E jalam ma dit ma nyinge Anania ng'olo ni ju m'ucungo ceng'ni ya gipad dhoge.

³Paolo lund uwacu ire kumae, Mungu bipedi, in i gang' m'afuya ku vulo: ibedo mi poko lembe para calku cik, e idong' ing'olo ya jugoya tung' ku ciki?

⁴E ju m'ucungo i vute giwacu kumae, Icayu jalam ma dit pa Mungu?

⁵E Paolo wacu kumae, Ang'eyo ngo, umego, nia en e jalam ma dit: kum egore kumae, Kud iyer lem marac kum jabim mi juthu.

⁶Ento ka Paolo ng'eyo nia jukucel gi Jusadukayo jukucel ke gi Jufarisayo, ekok her i dilo kumae, Umego, an a Jafarisayo, a wod Jafarisayo: jupoko lembe i wia kum genogen ku cer mi ju m'utho.

⁷E kan ewacu kumeno, e piem ugapre kind Jufarisayo ku Jusadukayo de; e dhanu m'ucokri gipoko igi dra.

⁸Kum Jusadukayo giwacu nia cer umbe, kadok malaika, kadok tipo ento Jufarisayo gituco ario de.

⁹E piem ujai dit: jugorcik moko ma kind Jufarisayo gicungo, gipiemu, giwacu kumae, Wanwang'u dubo moko ngo i ng'atuni: kuno nyo tipo kadi malaika weco en i bang'e, ka nedi ke?

¹⁰E ka piem udoko dit, jego ma dit, lworu nege ya jumaru yeco Paolo tung' tung', eng'olo nia asikari gilor piny gigame ku tego kud i kindgi, gikele i ot ma tek.

¹¹Diewor m'ulube de Rwoth ucungo i vute, ewacu kumae, Cwinyi bed tek: kum calu ituco pira Yerusalem, e ibikonyutho lembe kumeno be i Rumi bende.

¹²E ka piny uru, Juyahudi giribri karacelo, man gitwiri gigi ku kwong', giwacu nia gibicamu giracama kadi madhu giramadha de ngo ma fodi gikunego Paolo ngo.

¹³E ju ma gikwongri kumeno gi sagu pier ang'wen.

¹⁴Man gibino ba julam ma dongo ku judongo de, giwacu kumae, Watwira giwa ku kwong' ma dit, ya wabibilo gin moko ngo ma fodi wakunego Paolo ngo.

¹⁵Nie ka kumeno wun ku dilo de wunyuth ni jego ma dit nia eketh Paolo lor piny i beng'wu, calu ya wuyenyo wung'i i lembe pare cu ma sagu: e wan, ka fodi ewok ceng'ni ngo, nwang'u wayikra ma wanege ko.

¹⁶Ento wod nyamin Paolo winjo nia gikanu adhi, e ebino emondo i ot ma tek eyero ni Paolo.

¹⁷E Paolo lwong'o jego acel i bang'e, ewacu kumae, Ter jalawobi maeni ba jego ma dit; kum ebedo ku nyawec moko m'eyer ire.

¹⁸Ka kumeno ecoke, man etere ba jego ma dit, ewacu kumae, Paolo ma jakol ulwong'a i bang'e, man epenja ya akel jalawobi maeni i beng'i m'ebedo ku nyawec moko m'eyer iri.

¹⁹E jego ma dit umake ku cinge, man ecoro kude cen, man epenje mung' mung' kumae, En e lembang'o m'ibedo ko m'iyenyo iyer ira?

²⁰Man ewacu kumae, Juyahudi giripo dhoggi, nia gipenji iter Paolo piny urwo ba dilo, calu iyenyo ipenj thelembe pare cu ma sagu.

²¹Ka kumeno kud iyi igi: kum dhanu pier ang'wen ku wie gikanu adhi ire, ma gitwiri gigi ku kwong', nia gicamu ngo gimadhu de ngo ma fodi gikunene ngo: e kawono gibedo ayika, ma gibekuro ko lembang'ola m'i beng'i.

²²Ka kumeno jego ma dit uweko nyiruno cidho, kan eng'olo ire kumae, Kud iwac ni ng'atu moko ki nia inyutho lem maeni ira.

²³Man elwong'o jego ario i bang'e, ewacu kumae, Keth asikari dak ario bed ayika gici gijik i Kaisaria, ku ju ma weg kana de pier abiro, ku ju ma weg tong' ke dak ario, i saa adek mi diewor:

²⁴man eng'olo igi ya gikel riuni, kara giketh Paolo i wie, gitere ko bo ba Feliki ma jabim.

²⁵Man egoro waraga kumae.

²⁶Klaudio Lusua ni jabim ma dwong' Feliki, moth iri.

²⁷Ng'atu maeni Juyahudi make gibeyenyo nege, kan abino i bang'gi kud asikari alare ko nwang'u awinjo nia en e Jarumi.

²⁸Kum ayenyo ang'ei thelembe m'uketho gidote, atere piny ba dilo migi:

²⁹adong' anwang'u nia gidote kum penji mi cik migi, ento en e gin ma romo ku nek kadi twic de ngo.

³⁰E ka junyutho ira nia jubipido lembe kum ng'atuni, e aore i beng'i eno, awacu ni weg adote pare bende nia dong' gidote kud i weng'i.

³¹Kum kumeno asikari, gigamu Paolo calu jung'olo rgi, gitere ku diewor nica Antipatri.

³²Ento urwone giweko weg riuni e ma gidong' gicidho kude, gin ke gidok ba ot ma tek:

³³joca de, ka gitundo Kaisaria gimio waraga ni jabim, giketho Paolo de i wang'e.

³⁴E kan esome, epenjo ka thugi; e kan ewinjo nia e dhanu ma Kilikia,

³⁵ewacu kumae, Abiwinjoi cu nwang'u weg adote peri bende giwok: man eng'olo ya jukure i Odtiti pa Herode.

Tic Mi Jukwenda 24

- ¹E ka ceng' abic ukadhu jalam ma dit ma Anania loro piny ku judongo moko, ku ng'atu acel de ma dwande leng', ma nyinge Tertulo; man gidoto Paolo ba jabim.
- ²E ka julwoug'e, Tertulo maku dote, ewacu kumae, Kum wanwang'u kwiochwiny ma dit ni kumi, in i Feliki ma dwong', man ni kum gwok peri gin ma rac uyikre ni thek maeni,
- ³wajolo maeni i yo ceke, i kaka ceke de, man ku foyofoc ceke.
- ⁴Ento, kara kud aoli kendo, akwei ya ikoiwinja nyanok ku mol peri.
- ⁵Kum wanwang'u ng'atu maeni en e jaganda, e jathub ali i kind Juyahudi ceke i ng'om ngung', man en e jatel wi weg pokri mi Junazareti:
- ⁶man kendo eponjo cido hekalu: e wamake: wabeyenyo wapok lembe pare de ku cik mwa.
- ⁷Ento jego ma dit Lusia bino, man emaye kud i cingwa ku kero ma dit,
- ⁸man eng'olo ya weg adote pare gibin i beng'i e ibing'eyo gin ma wadote i kume ceke ni kum luro i lembe pare m'ibiluro in.
- ⁹E Juyahudi de giribri i lembene, giwacu ya gin maeni bedo kumeno.
- ¹⁰Ka jabim ugwelo ire ya eyer, Paolo loko lembe kumae, Kum ang'eyo nia ibedo japoklembe mi thek maeni rundi dupa, agonyo lembe para ku tegocwiny:
- ¹¹kum icopo ng'eyo nia esagu ceng' apar wi ario de ngo m'aidho ko nirwo i Yerusalem:
- ¹²man kadok i hekalu ginwang'u apiemo ku ng'atu moko ngo kadi athubo i njuru dhanu de ngo, kadi i kacokri, kadi i adhura de.
- ¹³Gin de ecopre igi ngo ma nia giketh ing'ei ya gin ma gidota i kume en e andha.
- ¹⁴Ento maeni atuco iri, nia i Yo ma gilwong'o pokri, e ma atimo ie ni Mungu pa kwaruwa, ma wayio ko gin ceke ma gi calku cik, ku lembe m'ugore i kitabu mi jubila bende;
- ¹⁵m'abedo ku genogen yo ba Mungu, ma gin gi joni bende gigeno, nia cer ma jucer ko bibedo nuti ni weg bedopwe ku ni weg bedopwe ngo de.
- ¹⁶Kum kumeno aponjra gira kara abed ku pidocwiny ma ber m'umbe kier yo ba Mungu ku ba dhanu de thiri thiri.
- ¹⁷Nie ka rundi moko kadhu abino nikelo giramia ba thek mwa, kud ajok bende:
- ¹⁸ginwang'a i maeni ma ia leng' i hekalu, ku njuru dhanu de ngo, ku yakni de ngo: ento Juyahudi moko ma giai i Asia ginuti,
- ¹⁹ma maku gin de gibed nuti i weng'i keni, gikel adote de, tek gibedo ku lembe moko i kuma.

- ²⁰Kadi wek joni gin giwac pi tic ma rac ma ginwang'u kan acungo i wang' dilo,
- ²¹tek en e pi dwal acel maeni ngo, ma nia akok kumae kan acungo i kindgi, Pi cer mi ju m'utho ketho jubetonda i weng'i tinuni.
- ²²Ento Feliki, m'ung'eyo pi Yojuno cu m'usagu, ethirogi, ewacu kumae, Ka Lusua ma jego ma dit biloro piny, abipoko lembe mu.
- ²³Man eng'olo ni jego ya jukure, man juweke ewoth gire kende; man ku jucer wat pare moko kutimo ire.
- ²⁴Ento yo ng'ei ceng' moko, Feliki gibino giku Drusila, ma cege, ma en e Nyayahudi, e elwong'o Paolo, man ewinje pi yioyic ma ni i Kristu Yesu.
- ²⁵E kan eluro lembe mi bedopwe, man pi kwerigijo, ku mi pokolembe ma bibino de, e Feliki doko tipo, man edwoko lembe kumae, Koicidh i yo peri tundu; ka nindo m'ubedo ber ira wok, abilwong'i i bang'a.
- ²⁶Egeno nyo Paolo bimio ire sente: kum kumeno ebedelwong'e wang' udul, man giweco gikude.
- ²⁷Ento ka rundi ario kadhu, Portio Festo kabu Feliki; man kum eyenyo Juyahudi gifoye, Feliki weko Paolo atwia.

Tic Mi Jukwenda 25

- ¹Ka kumeno, ka Festo wok i ng'ombuno, yo ng'ei ceng' adek eai Kaisaria eidho malu Yerusalcm.
- ²Man julam ma dongo ku judongo mi Juyahudi gipiko ie lembe kum Paolo; man gikwaye,
- ³gipenjo bero igi i kume, ya eore Yerusalem e gipido lembe ya gibinege i yo.
- ⁴Ento Festo loko lembe, nia Paolo jubekure Kaisaria, nia en de fodi nyanok ebidok kuca.
- ⁵Ewacu kumae, Ka kumeno dong' jutego m'i kindwu walor piny wakugi, man tek gin moko ma rac ni i ng'atuno, wek gidote.
- ⁶E kan evuto i kindgi ma sagu ceng' abora kadi ceng' apar de ngo, eloro piny Kaisaria; e urwone ejany wi kom mi pokolembe, eng'olo de ya jukel Paolo.
- ⁷E kan ewok, Juyahudi ma giai Yerusalem giloro piny gicungo gitieke, gikelo acukadhok dupa ma rac de i wie ma gicopo ketho ngo ya jung'ei nia en e andha;
- ⁸nie Paolo yero lembe pare kumae, Kadok kum cik mi Juyahudi, kadi kum hekalu de, kadi kum Kaisari de, adubo lembe ki ngo.
- ⁹Ento Festo, m'uyenyo ya Juyahudi gifoye, edwoko lembe ni Paolo ewacu kumae, Iyenyo icidh i Yerusalem e ka jubicipoko lembe peri mi gin maeni i wang'a kuca?

- 10**Ento Paolo wacu kumae, Acungo wang' kom mi pokolemba pa Kaisari, ka ma maku jupok ie lembe para: ni Juyahudi atimo gin moko ma rac ungo, calu in bende ing'eyo cu.
- 11**Ka kumeno tek an a jadubo, man atimo gin moko ma romo ku tho, akwero ngo ya atho; ento tek gin maeni andha ngo ma joni gidota ko, ng'atu moko mbe ma copo mia igi. Ayenyo ndhu ba Kaisari.
- 12**Ka kumeno ka Festo, gipido lembe giku dilo, elund eloko lembe kumae, Iyenyo ba Kaisari: ba Kaisari ibicidho.
- 13**Nie ka ceng' moko kadhu, Agripa m'ubimo giku Berenike de giwok Kaisaria, man gimotho Festo.
- 14**Man ka girio kuca ceng' dupa, Festo pedho lembe pa Paolo i wang' ubimo, ewacu kumae, Nwang'u ng'atu moko nuti ma Feliki weke jakol;
- 15**pi ng'atuni, kan ani i Yerusalem, julam ma dongo ku judongo mi Juyahudi giyero pire ira, gipenja ya apok lembe pare.
- 16**Aloko igi lembe, nia en e kura mi Jurumi ngo ya juwodh ng'atu moko, ma fodi ng'atu ma judote gikunendri ku wang'gi ngo, ma fodi jukuyio ngo de ya eyer pi lembe ma judote ko.
- 17**Ka kumeno ka gicoko dhoggi keni, agalu ngo, ento urwone ajany wi kom mi pokolemba, man ang'olo ya jukele ng'atuno.
- 18**Pi ng'atuno, ka weg adote pare gicungo, gikelo adote mi gin ma rac ungo calu m'awacu nyo:
- 19**ento gibedo ku penji moko i kume pi kisoma migi gigi, man pi Yesu moko, m'utho, e ma Paolo wacu nia ebedo kwo.
- 20**An de, kum ang'eyo ngo maram juluro ko thelembe maeni, apenje tek eyenyo eci Yerusalem ka ma jubipoko ie lembe mi gin maeni.
- 21**Ento ka Paolo yenyo jugwoke ni pokolemba pa Augusto, ang'olo ya jugwoke maram abiore ko ba Kaisari.
- 22**Man Agripa wacu ni Festo kumae, An bende ayenyo awinj ng'atuno an. Ewacu kumae, Urwo ibiwinje.
- 23**Ka kumeno urwone, kan Agripa wok giku Berenike de, kud ayunga ma dit, gimondo de ka ma juwinjo ie lembe ku jego ma dit ku judongo ma i adhura de, e Festo ng'olo ya jukele Paolo i ie.
- 24**E Festo wacu kumae, Ubimo Agripa, ku dhanu ceke ma wanuti wakudu kakeni de, wuneno ng'atu maeni, ma udul Juyahudi ceke giyero pire ira, kud i Yerusalem kuni bende, ma gibekok akoka ya maku kud ebed kwo kendo.

²⁵Ento anwang'u nia etimo gin moko ngo ma romo ku nek: man kum eyenyo en bang' Augusto akeco ya aore.

²⁶Pi ng'atuno abedo ku gin moko ngo ma cu m'agor ni rwoth para. Kum kumeno akele woko i weng'wu, ndhu i weng'i, ubimo Agripa, kara, yo ng'ei titine, abed ku gin moko m'agor.

²⁷Kum kud i bang'a emaku piny ungo, niro jakol, ma jukunyutho pir adote mi kume ngo.

Tic Mi Jukwenda 26

¹E Agripa wacu ni Paolo kumae, Juyio ya igony lembe peri giri. E Paolo lund urieyo cinge, man egonyo lembe pare kumae:

²Kud i bang'a mutoro nega gira, ubimo Agripa, kum abegonyo lembe para i weng'i tinuni pi gin ceke ma Juyahudi gidota pire:

³ma sagu kum in i riek dit i kura ku penji ma kind Juyahudi: kum kumeno akwei iwinja ku twiocwiny.

⁴Juyahudi ceke ging'eyo karamb kura mi bedo para ma fodi a nyathin maram adongo ko de, ugambre ku kwong'a i kind thek mwa, kud i Yerusalem de;

⁵ma ging'eyo ko pira ku kwong'a, tek giyio tucó, nia abedo Jafarisayo m'ulubo pokri m'arida mi kisoma mwa.

⁶Man pi genogen mi lembang'ola ma Mungu ng'olo ni wegwa e kawono acungo kara jupok lembe para;

⁷ni lembang'olane suru mwa apar wi ario, ma gitimo ni Mungu kud avane dieceng' ku diwor, gigeno ya gibitundo i bang'e. Man Juyahudi gidota pi genogen maeni, E ubimo!

⁸Nedi wuwacu ya maeni jucopo yio ngo, nia Mungu ting'o ju m'utho?

⁹Awacu gira andha nia e ber tek atimo gin dupa ma tung' ku nying Yesu ma Nazareti.

¹⁰Maeni de atimo i Yerusalem: aciko ba jumaleng' dupa i odkol, kan adaru gamu ng'ol ba julam ma dongo, man ka junegogi de ayio.

¹¹Asendogi de bang' udul i kacokri ceke, aponjo ketho giyer lembacidi de; kum ng'ecwiny unega dit apila i kumgi, anyayu ragedo i kumgi cil i adhura mi juwirok.

¹²Kum kumeno kan abecidho Dameski ku ng'ol man lembaketha mi julam ma dongo,

¹³dieceng' ma ling', E ubimo, aneno i yo der m'uai i polo, ma sagu rieny mi ceng', m'erieny i kuma i kum ju ma wawotho wakugi de.

- 14**E ka wan ceke wapodho i ng'om, awinjo dwal m'uwacu ira ku dhu Juebrania kumae, Saul, Saul, inyayu ragedo i kuma nedi? cwanyu lak kenge ku tiendi tek iri.
- 15**An ke awacu kumae, In i ng'a, Rwoth? E Rwoth uwacu kumae, An a Yesu m'ibenyayu ragedo i kuma.
- 16**Ento ai malu, icung wi tiendi: kum anyutho iri pi maeni, kara akethi ibed jatic man jamulembe mi gin maeni m'inena i ie, man mi gin m'abinyuthra iri i ie;
- 17**abodha abibodhi ni dhanu, ni Thekdhanumange de, m'abeori i bang'gi,
- 18**niyabu wang'gi, kara gilokri kud i mudho giwok i der man kud i tego pa Jok ba Mungu, kara ginwang' ruc mi dubo, man camupacu kind ju ma judwokogi leng' ni kum yioyic ma ni kuma.
- 19**Kum kumeno, E ubimo Agripa, ajai ngo kum ginmawokiwang' m'uai i polo:
- 20**ento ku kwong'a ayero ni ju ma Dameski, i Yerusalem de, kud i ng'om Yahudi ngung' bende, ni Thekdhanumange bende, nia gilok cwinygi man gilokri ba Mungu, gitim tic de m'uromo ku lokocwiny.
- 21**Kum lembe nini ketho Juyahudi gimaka i hekalu, giponjo nega de.
- 22**Ka kumeno kan adaru nwang'u kony m'uai ba Mungu, acungo cil i ceng' maeni m'abetuco ko ni dhanu ma thindho ku ma dongo de, m'ayero gin moko ngo ndhu gin ma jubila ku Musa giwacu ya bibino;
- 23**nia Kristu bikosendre be, nia ebilar nyutho der ku cer ma kind ju m'utho ni dhanu ku Thekdhanumange.
- 24**Man kan ebegonyo lembe pare kumeno, Festo wacu ku dwande ma tek kumae, Paolo, in i awake; ng'eyo lembe peri ma dit bedwoki ni awake do.
- 25**Ento Paolo wacu kumae, An a awake ngo, Festo ma dwong': ento abeyero lembe mi lemandha ku ma nger de.
- 26**Kum ubimo ng'eyo gin maeni, e abeyero ire bende yot yot: kum ang'eyo gin maeni moko mbe m'upandre ire; kum maeni kutimbre i gul ungo.
- 27**Ubimo Agripa, iyio jubila? Ang'eyo nia iyio.
- 28**E Agripa wacu ni Paolo kumae, Nyakanok ci iyenyo thoka ni dwoka Jakristu.
- 29**Man Paolo wacu kumae, Ayenyo ba Mungu, nia kadok ku ma nyanok kadi ku ma dit de, in kendi ngo, ento ku dhanu ceke bende ma giwinja tinuni, gidok calu an, ku twic re ngo.
- 30**E ubimo ai malu, giku jabim de, man Berenike, ku ju ma gibedo gikugi de:
- 31**e ka gicoro cen, giweco gigi, giwacu kumae, Ng'atuni timo gin moko ngo ma romo ku nek kadi twic de.

³²E Agripa wacu ni Festo kumae, Dok ng'atuni kuyenyo ba Kaisari ngo, kuno di jugonye.

Tic Mi Jukwenda 27

¹E ka jung'olo nia wabacidho Italia ku yo mi pi, gimio Paolo ku jukol mange de i cing' jego ma nyinge Yulio, mir udul asikari pa Augusto.

²E wamondo i combo mir Adramutio, ma bicicomo kamoko dhu wath mir Asia, e wakieura, nwang'u Aristarko, ma Jamakedoni ma Tesaloniki de, ni i bang'wa.

³Urwone wagudo Sidon: man Yulio timo ber ba Paolo, eyio ya ecidh ba wat pare kara edwok cwinye.

⁴E wakieura ku kuca, wacidho ku yo mi pi i gund Kupro, kum yamu ai yor i wang'wa.

⁵E ka wakadhu ku wi nam ma ng'et Kilikia ku Pamfulia de, watundo Mura, adhura ma Lukia.

⁶E jego nwang'u combo ma Iskanderia keca m'ubacidho i Italia; man ekethowa i ie.

⁷E ka wawotho moth moth ceng' dupa, wabino de arida kum Knido, kum yamu becerowa, wacidho ku yo mi pi i gund Krete, kum Salmone;

⁸man wacidho arida ku dhu wath watundo ka ma julwong'o Bandari ma ber; ceng'ni kud adhura Lasaya.

⁹E ka nindo dupa kadhu, man woth udoko anaka, kum ceng' ma juweko ie cam udaru kadhu, Paolo jukogi,

¹⁰ewacu igi kumae, Paco, aneno nia wodhuni bibedo mono ku ruvwa ma dit, ni jamni ku combo kende ngo, ento ni kwo mwa bende.

¹¹Ento jego winjo lembe mi weg combo, ma sagu lembe ma Paolo yero.

¹²Man kum ndiane kabedo mbe i ie mi nindo mi koyo, dhanu kucel m'ulwar giporo lembe ya gikieuri woko ku kuca, nyo gicopo tundo Foiniki ku yo moko, e giri keca de i nindo mi koyo; maeui ndia mi Krete, m'eneno yo pa ndawe ku sasi.

¹³E ka sasi bekoto yo yo, giwacu nyo ginwang'u yeny ma igi yeny, e giting'o nyoro gikadhu dri dri ku kum Krete, ceng'ni dhu wath.

¹⁴Ento yo ku ng'eye nyanok wavuvu ma dit utuk i cnia ucore piny, wavuvune julwong'o Eurakulo:

¹⁵e kan emaku combo, e cidho wang' yamu de copre ngo, waweko ecidh kudwa, edong' ebelekowa.

¹⁶E waringo i gund nyathi cula ma julwong'o Klauda, waii aiia ka waketho combo cungo keca:

- 17**e ka gicwale maiu, giroyo mangru i there; man, kum gilworo kuno nyo gibimoko wi Surtis, gidong' giywayu jamb combo piny, e elekre.
- 18**Man kawaii kwe ku wavuvune, urwone gimaku bayu jamni woko;
- 19**i ceng' mir adege gimaku bayu jamb combo de woko gigi ku cing'gi.
- 20**E ka ceng' kadok cero de rieny ungo i wiwa wang' udul, wavuvu ma nyanok ungo de bekukni kudwa, dong' cwinywa ai ndhu kum both.
- 21**Ka gibedo hai m'umbe cemo, Paolo lund ucungo i kindgi, ewacu kumae, Paco, ande mundo wuwinj dwanda, wuai ungo kud i Krete, nwang'u ande wunwang'u ruvwa ku mono maeni de ngo.
- 22**Man kawono abejukowu ya cwinywu bed tek; kum kwo moko mbe ma birwinyo i kindwu, ndhu combo re.
- 23**Kum malaika pa Mungu ma an a pare, m'atimo ire bende, ecungo i vuta i diewor maeni,
- 24**ewacu kumae, Kud ilwor, Paolo; ibikocungo wang' Kaisari be: man nen, Mungu mio iri dhanu ceke ma wubewotho wukugi.
- 25**Kum kumeno, paco, cwinywu bed tek: kum ayio Mungu, nia ebibedo kumeno cil calu eyere ira.
- 26**Ento wabioi wi cula moko be.
- 27**Ento ka diewor mir apar wi ang'wende wok, kinde ma wabelekra kan kan i nam Adria, ceng'ni diewor ma ling' jutic mi combo wacu nyo gidhingo ng'om moko:
- 28**e gibolo thol ucidho the pi, e ginwang'u etundo mugalma pier ario, yo ng'eye nyanok, gibolo kendo, e ginwang'u etundo mugalma apar wi abic,
- 29**E lworu negogi nia nyo wabirodra dhu wath ma ie ju kidi, e gibolo nyoro ang'wen yo the combo, gikuro ko piny m'uru.
- 30**Man ka jutic mi combo gibeyenyo piei kud i combo, giluro nyathi combo de i nam, calu giyenyo gibol nyoro kud i um combo,
- 31**Paolo wacu ni jego kud asikari de kumae, Tek joni bedo i combo ngo wucopo both ungo.
- 32**E asikari gilund githumo uno mi thanga woko, e giweko epodho.
- 33**E kinde ma piny umaku ru, Paolo kwayugi ceke ya gigam cemo moko, ewacu kumae, Maeni ceng' apar wi ang'wende ma wukuro wuweko ko cam de, ma wucamu ie gin moko ngo.
- 34**Kum kumeno akwayuwu ya wucam cemo moko: kum maeni en e mi both mu: kum yukwic acel de mbe ma birwinyo i wi ng'atu moko m'i kindwu.

- ³⁵E kan ewacu maeni, eting'ō kwen de, egam efoyo Mungu i wang'gi ceke; man eng'weko ie, emaku camu de.
- ³⁶E cwinygi ceke lund ubedo tek, man gin bende gigamu cemo.
- ³⁷E wan ceke ma wani i combo wa dak ario ku pier abiro wi abusiel.
- ³⁸Man ka giyeng', gidwoko combo yot ku bayu nganu i nam.
- ³⁹E ka piny uru, gmg'eyo ng'ombe ngo: ento gineno wath moko m'uroire ni gul, e giporo lembe tek gicopo coro combo jolo i wie.
- ⁴⁰E gibayu nyoro woko, giwekogi i nam, gigonyo ku thol mir utwindine de; giting'ō bongu ma yo um combo de ni yamu, e gicidho dhu wath.
- ⁴¹Ento ka giwok ka ma nam ario rombo i ie, giketho combo gure i ng'om; e ume moko nging' nging' ma wodhre ngo, ento there maku ng'eny ni kum tego mi mukura.
- ⁴²Man asikari poro lembe ya juneg jukol woko, kara jumoko kud ukwang', upiei.
- ⁴³Ento jego m'eyenyo ebodh Paolo, edhirogi ku timo yeny ma igi yeny; e eng'olo de nia ju ma copo kwang' gikogipiei i pi, gilar gitund i ng'om;
- ⁴⁴ju m'udong' ke, moko ni wi bau, moko ni wi gin mange mi combo. E etimbre, nia kagi ceke gitundo bo dhu wath.

Tic Mi Jukwenda 28

- ¹E ka waboth, walund wang'eyo nia cula nino julwong'ō Melita.
- ²Dhanu ma saine gi juwat dit i kumwa: kum gikudho mac, man gijolowa ceke, kum koth m'ubecwi, man kum koyo.
- ³Ento ka Paolo koko with yen ekethogi de i mac, thwol uai i ie ni lietho mi mac, edhokre de ng'ut cinge.
- ⁴Ka dhanu ma saine gineno yedi m'uliere kum cinge, giwacu gigi kumae, Kuno nyo ng'atuni en e janek, ma, kadok eboth kud i nam, ento Pokolembe ma pwe weke ngo ebed kwo.
- ⁵Ento ekiro yedine i mac, gin moko ma rac de mbe m'udong' utime.
- ⁶Ento giwacu nyo ehikwodc, kadi ehipodho hir m'etho. ere ka gikuro hai gineno gin mokoma rac umbe m'utime, giloko pidoigi, man giwacu nia en e mungu.
- ⁷Nwang'u kakeca bedo ceng'ni ku podho pa rwoth mi cula nino, ma nyinge Publio; m'ejolowa, egwokowa ber ceng' adek.
- ⁸E ebedo kumeno, nia won Publio vuto ku kume m'ucek ku thorimo: e Paolo mondo i bang'e, erwo de, eketho cinge de i kume ekeyo ko kume.

- ⁹Ka maeni timbre, ju m'udong' de ma gi weg tho i cula nino gibino, gin de kumgi kei:
- ¹⁰Joni bende giyungowa ku yung dupa; e kinde ma wacidho ku yo mi pi, gikelo gin ma cande negowa giketho i combo.
- ¹¹Man ka dwi adek ukadhu watugo woth ku yo mi pi i combo ma Iskanderia m'ucungo i cula i nindo mi koyo, giranyuthane Umego ma Rut.
- ¹²E wacomo Surakusa, man wario keca ceng' adek.
- ¹³Ku kuca wagondra, wawok Regio: e ka ceng' acel ukadhu sasi tuk, e i ceng' mir arionde watundo Puteoli;
- ¹⁴ka ma wanwang'u ie umego, man gikwayu ya wari kugi ceng' abiro: e kumeno wabino Rumi.
- ¹⁵E kan umego ma kuca, giwinjo piwa, gibino ning'olowa agbele i Apiforo ku Trestaberne: ka Paolo neno joni, efoyo Mungu, man cwinye doko tek.
- ¹⁶E ka wamondo i Rumi, juyio ya Paolo bed gire kende gikud asikari m'ukure.
- ¹⁷Man etimbre, nia ka ceng' adek ukadhu Paolo lwong'o judongo mi Juyahudi karacelo: e ka gicoko dhoggi, ewacu igi kumae, An, umego, kadok atimo gin moko ngo kum dhanu, kadi kum kura pa wegwa de, ento ku Yerusalem re jumia ni jakol i cing' Jurumi:
- ¹⁸ma, ka giluro i lembe para, giyenyo gigonya, kum lembe moko mbe i ia ma mi nek.
- ¹⁹Ento ka Juyahudi gijai kum lembene, ketho ayenyo ba Kaisari: en e nia abedo ku lembe moko m'adot ko thek mwa re ngo.
- ²⁰Ka kumeno pi lembe nini alwong'owu wubin wanendra wawec kudu de: kum abedo atwia ku nyoro maeni kum genogen mir Israel.
- ²¹E giwacu ire kumae, Wagamu waraga moko ngo piri m'uai i Yahudi, umego moko mbe de m'ubino kuni m'ukelo lembe kadi m'uyero piri ma rac de.
- ²²Ento wayenyo wawinj i beng'i gin ma ii bepido: kum pi pokri maeni, wang'eyo i kaka ceke juyero nia e rac.
- ²³E ka gituro ire ceng', gibino dupa i bang'e ka m'ebedo i ie; man ekoro igi lembene, etuco pi kcr pa Mungu, man ethokogi pi Yesu, kud i cik pa Musa ku jubila bende, ugambre kugweno cil uthieno.
- ²⁴Jumoko yio lembe m'eyero, jumoko ke yio ngo.
- ²⁵E ka cwinygi ripo ngo i kindgi gigi, giai yo ng'ei lembe acel ma Paolo yero kumae, Tipo Maleng' yang' uyero dre ni wegwu ku dhu Isaya ma jabila,

²⁶ewacu kumae, Ci ba dhanu maeni, man iwac kumae, Awinja wubiwinjo, man wubing'eyo ki ngo; Anena de wubineno, ere wubing'eyo ki ngo:

²⁷Kum adunde dhanu maeni doko nwang', Ithgi de dhing', Wang'gi de gimio; Kara ku ginen ku wang'gi, Ku giwinj ku ithgi, Ku giug'ei kud adundegi, Ku gilokri kendo, Ketho acanggi.

²⁸Ka kumeno dong' wung'ei, ya both maeni pa Mungu juoro ni Thekdhanumange: gibiwinjo bende.

²⁹E kan eyero lembe maeni, Juyahudi giai, ku poro lembe dit i kindgi.

³⁰Man ebedo oro ario yul i ot pare m'emio ko pinje, man ejolo ceke m'ucidho i bang'e,

³¹m'eyero ko pi ker pa Mungu, m'eponjo ko gin pi Rwoth Yesu Kristu ku tegocwinye ceke, ma ng'atu moko mbe de m'ucere.

Jurumi

Jurumi 1

- ¹Paolo, jamiru pa Yesu Kristu, ma julwong'e ebed jakwenda, ma jukoye pi lembanyong'a ma juboth ko pa Mungu,
- ²m'elar eng'olo ni kum jubila pare i lembagora ma leng' pa Mungu,
- ³pi Wode, ma junyolo mi kodhi Daudi calku kum,
- ⁴m'enyuthre ku tego ya en e Wod Mungu, calku tipo mi leng'cwiny, ni kum cer ma kind ju m'utho; ndhu Yesu Kristu Rwoth mwa,
- ⁵ma ni kume wanwang'u bero man kwenda, ni woro mi yioyic i kind thek ceke, pi nyinge;
- ⁶i kind joni wun bende, julwong'owu ya wubed pa Yesu Kristu:
- ⁷ni dhanu ceke ma gini i Rumi, ma jumer pa Mungu, ma julwong'ogi gibed jumaleng': Bero iwu man kwicwiny m'uai ba Mungu Wegwa man Rwoth Yesu Kristu.
- ⁸Ku kwong'a, afoyo Mungu para ni kum Yesu Kristu piwu ceke, kum yioyic mu yik i ng'om ngung'.
- ⁹Kum Mungu m'atimo ire yor i cwinya i lembanyong'a ma juboth ko pa Wode, en e jamulembe para, maram aweko lwong'o ko nyingwu ki ngo i rwo para thiri thiri
- ¹⁰m'akwayu ko kwac, nia tek ebedo miero ira kawono ku yo moko ma naka k'emiero ngo ku yeny ma Mungu yeny ya abin i beng'wu.
- ¹¹Kum ava nenowu benega dit, kara ami iwu giramia moko mi tipo, kara lembe cung i iwu;
- ¹²lembene eni, kara an ku wun de wajukra i kumwu, ng'atuman kum yioyic pa wadi man kum pa wadi, mu ku para de.
- ¹³Man ayenyo ngo nik wubed cobo, umego, nia wang' udul akeco ya abin i beng'wu (man cil ku kawono de ecere ira), kara abed ku nying' moko m'acego i kindwu bende, cil calu ma i dong Thekdhanumange.
- ¹⁴An a jarabanja mi Juyunani ku mi ju ma sai, mi jurieko ku mi jukusegu bende.
- ¹⁵Kumeno, ku tego m'i ia ceke, abedo ayika ni yero lembanyong'a ma juboth ko iwu bende ma wuni i Rumi.
- ¹⁶Kum lewic unega ngo kum lembanyong'a ma juboth ko: kum en e tego pa Mungu mi both ni dhanu ceke kubang'gi kubang'gi m'uyio; ku kwong'a ni Jayahudi, man ni Jayunani bende.

¹⁷Kum bedopwe pa Mungu nyuthre i ie uai ba yioyic utundo kum yioyic; calu egore kumae, Ento weg bedopwe bikwo ni kum yioyic.

¹⁸Kum kwinyo pa Mungu ai kud i polo unyuthre kum gin ceke ma ayi Mungu mbe i kume man gondri ceke de mi dhanu, m'ucero lemandha i gondri;

¹⁹kum gin pa Mungu ma jung'eyo enyuthre i igi; kum Mungu nyuthe igi.

²⁰Kum gin pare ma nen ungo ugambre i kacwic mi ng'om dong' nen terere, m'eng'eire ni kum gin m'ucwire, cil tego pare mi nja man rucwic; kara kalokolemba m'i wigi bed umbe igi:

²¹kum, gin ma ging'eyo Mungu, giyunge ngo calu en e Mungu, kadok afoya de gifoye ngo; ento gidoko jukuhaya i lembapora migi, man adundegi ma kite mbe yutho.

²²I tucoco ma gitucoco ko gigi ya gi riek, gidoko jukusegu,

²³man giweko dwong' pa Mungu ma nyothie ngo pi giracwia mir ayi dhanu ma nyothre, ku mi winyo, ku mi yedi ma tiendgi ang'wen ang'wen, ku mi gin ma lak i ng'om de.

²⁴Kum kumeno Mungu wekogi i awanya ma rac mir adundegi ni sasa, kara gibed umbe yung mi kumgi i kindgi gigi:

²⁵kum giloko lemandha pa Mungu ku ndra, man girwo ni giracwia pa Mungu gitimo ire de kaka Jacwic, ma Jamugisa mi nja. Amen.

²⁶Kum lembe nini Mungu wekogi ni awanyakum mi sasa: kum mon migi bende giloko tic mi kurajo ni ma mi kurajo ngo:

²⁷man co bende kumeno, ma giweko tic mi mon ma kurajo, gicwaku mac ther awanya ma rac migi ng'atuman ku wadi man ku wadi, ma co ku co wadi gitimo ko gin m'umaku piny ungo, man ginwang'u cul mi kier migi m'uromogi i igi gigi.

²⁸Man cil calu gikwero bedo ku Mu.. ngu i ng'eyong'ec migi, Mungu kunogi ni pidoic ma rac, ma gitimo ko gin ma maku ku jutim;

²⁹ma gipong' ku gondri ceke, ku dubo, ku ketho cwiny hai kum piny, kud akece; gipong' ku kumira, ku nego nek, ku dhau, kud awondi, kud adegi; juyer nying' ma kwe kwe,

³⁰juyer nying' ma rac, weg adegi ni Mungu, jucac, ju ma tingri, ku jukulula, ku jutheb dubo, ku ju ma juco ni junyodo migi,

³¹ma ng'eyong'ec umbe kugi, ku jung'eny lembariba, ma mer mi wat umbe kugi, ma kisa mbe kugi:

³²gin, ma ging'eyo lembapoka pa Mungu, ya ju m'ucikutimo wagi gin ma kumeni giromo ku tho, gikutimo wagi gin maeni atima kende ngo, ento giyio karacelo ku ju m'ucikutimogi bende.

Jurumi 2

- ¹Kum kumeno, E dhanu, in ma tek inuti m'ipoko lembe gin m'iloko wie lembe mbe: kum gin m'ipoko lembe pa wedu i ie, meca ipoko lembe rac i wii giri; kum in m'ipoko lembe icikutimo wagi gino.
- ²Man wang'eyo nia lembapoka pa Mungu en e calku lemandha kum ju m'ucikutimo wagi gino.
- ³E dhanu, iwacu nyo ibiboth ni pokolemba pa Mungu, in m'ipoko lembe wi ju m'ucikutimo wagi gin maeni, ma in de itimo wagi gino?
- ⁴Kadi icayu lonyo mi bero pare ku twiocwiny pare man mwonyolemba pare m'emwonyo hai, m'ing'eyo ko ngo nia bero Mungu unyebi kum lokocwinyi?
- ⁵Ento ku lubo adundeni ma nwang' ma lokre ngo ikanu kwinyo iri giri i ceng' mi kwinyo ku nyuthonyuth mi pokolemba ma pwe pa Mungu:
- ⁶m'ebimio ni dhanu ceke kubang'gi kubang'i ng'atuman calku tic pare:
- ⁷ni ju ma ni kum twiocwiny i timober giyenyo dwong' ku yung man nyothri ngo, kwo ma rondo ku rondo:
- ⁸ento ni ju ma weg ali, m'uworo lemandha ngo, endre m'uworo gondri, kwinyo man ng'ecwiny bibedo nuti,
- ⁹man masendi ku ndiba, wi ng'eyong'ec mi dhanu kubang'e kubang'e m'utimo rac, ma kwong'ane pa Jayahudi, man pa Jayunani bende;
- ¹⁰ento dwong' ku yung man kwiocwiny ni dhanu ceke kubang'gi kubang'gi m'utimo ber, ku kwong'ane ni Jayahudi, man ni Jayunani bende:
- ¹¹kum dhanu tung' tung' ungo ni Mungu.
- ¹²Kum dhanu ceke ma gidubo ma cik umbe kugi gibirwinyo bende ma cik umbe kugi: man dhanu ceke m'udubo the cik jubipoko lembe i wigi ku cik;
- ¹³kum juwinj cik awinja gi pwe ngo i wang' Mungu, endre jutim cik e ma jubikwanugi pwe;
- ¹⁴(kum ka Thekdhanumange ma gimbe ku cik gitimo gin mi cik ni kum kurajo, joni, ma gimbe ku cik, gin gi cik igi gigi;
- ¹⁵kum ginyutho tic mi cik m'ugore i adundegi, ma pidocwinygi nyuthogi kudo, man porolemba migi ma kuman ku kuman ma dotogi kadi ma gonyo lembe m'i wigi;)
- ¹⁶i ceng' ma Mungu bipoko lembe wi lembamung'a mi dhanu, calku lembanyong'a para ma juboth ko, ni kum Yesu Kristu.
- ¹⁷Ento tek julwong'i ku nying' Jayahudi, man ijengri kum cik, man iluli i Mungu,

- ¹⁸man ing'eyo yeny ma ie yenyo, man ing'io gin ma rac ku gin ma ber, ma juponji ku cik,
- ¹⁹man ing'eyo andha nia in giri in i jatel wi ju ma wang'gi cor, m'i der ni ju ma gini i mudho,
- ²⁰m'i jatwiny ju ma kitgi mbe, i japonji de mi mukere, m'ibedo kud ayi mi ng'eyong'ec man mi lemandha i cik;
- ²¹Ka kumeno in m'iponjo ng'atu mange, iponjri giri ngo? in m'iponjo ya maku dhanu kud ukwal kwo, in e m'idong' ikwalu kwo?
- ²²in m'iwacu ya ng'atu moko kud ugier gier, in e m'idong' igiero gieri? in m'idagu ayi gin m'acwia, in e m'idong' ikwalu jamb hekalu?
- ²³in m'iluli i cik, e m'idong' icero yung ni Mungu ku kadhu m'ikadhu ko ku wi ciki?
- ²⁴Kum nying' Mungu cidre i kind Thekdhanumange kum lembe mu, cil calu egore.
- ²⁵Kum yaa kulokane nuti andha, tek in i jatim cik: ento tek in i jakadh ku wi cik, yaa peri doko ni yaango.
- ²⁶Ka kumeno tek won yaango kwiro lembapoka mi cik, yaa pare m'umbe jubikwane ni yaa ngo?
- ²⁷man yaango ma ku kum, tek eketho cik utimbre kakare, ebipoko lembe i wii ngo, ma in ma ku nyiguta ku yaa ikadhu ku wi ciki?
- ²⁸Kum en e Jayahudi ngo m'e Jayahudi ku yo woko; kadi maeno ma yo woko i kum de en e yaa ngo:
- ²⁹ento en e Jayahudi ma en e Jayahudi ma ku yor i ie; man yaa en e maeno mir adunde, i tipo i nyiguta ngo; ma pak pare en e mi dhanu ngo, ento pa Mungu.

Jurumi 3

- ¹Jayahudi lund ubedo ku girasaga manedi? kadi yaa de kulokane ang'o?
- ²E dit i yo ceke: ma kwong'ane, kum juketho wec pa Mungu i korgi.
- ³Kum en e ang'o tek jumoko yioyic umbe kugi? yioyic migi m'umbe bithiro bedomandha pa Mungu?
- ⁴Awene: eyo, dong' junwang' ya Mungu en e mandha, endre dhanu kubang'gi kubang'gi gi jundra; calu egore kumae, Kara lembe m'i wii gonjre ku lembe peri, Kara isag de kan imondo i pokolembe.
- ⁵Ento tek gondri mwa dwoko bedopwe pa Mungu tek, wabiyero ang'o? Mungu en e won gondri m'eliewo jo ku kwinyo? (Ayeru calu ma dhanu yero.)
- ⁶Awene: tek ebedo kumeni Mungu bipoko lembe mi ng'om nenedi?

⁷Ento tek lemandha pa Mungu sagre ni dwong' pare ni kum ndra para, nedi jupoko lembe i wia bende kawono calu a jadubo?

⁸nedi wayero ngo (calu jubeyero nyingwa, man calu jumoko giyero ya wawacu kumae), Dong' watimu rac, kara lembe ma ber uwoki? ma pokolembe ma rac migi bedo pwe.

⁹Ka ke ang'o? ber mwa sagu ber migi? Ungo, ki ngo: kum walar waporo nia Juyahudi giku Juyunani de, gin ceke gini the dubo:

¹⁰calu egore kumae, Moko mbe ma won bedopwe, umbe, acel de mbe;

¹¹Moko mbe m'ung'eyo ng'ec, Moko mbe de m'uyenyo Mungu;

¹²Kagi ceke gikier, gin karacelo gidoko ma kulokagi mbe; Moko mbe m'utimo ber, umbe, kadok acel de mbe:

¹³Dwandgi en e odliel m'ubedo thwolo; Gibombo abombi ku lebgi: Kwir mi pino ni i the dendhoggi:

¹⁴Dhoggi pong' ku lam ma julamu ko jo kud akece:

¹⁵Tiendgi yot kum thwogo rimo;

¹⁶Nyothonyoth ku can ni i yo migi;

¹⁷Man yo mi kwicwiny fodi gikung'eyo ngo:

¹⁸Lworo ma julworo ko Mungu mbe yor i wang'gi.

¹⁹Nie wang'eyo nia gin ma tek cik uyero eyero ni ju ma gini the cik; kara dhok ceke kubang'gi kubang'gi bed amia, man ng'om ceke de jukel i lembapoka pa Mungu:

²⁰kum ni kum tic mi cik ng'atu moko mbe ma lembe m'i wie bigonjre i wang'e; kum ng'eyong'ec mi dubo wok ni kum cik.

²¹Ento kawono bedopwe pa Mungu nge ku cik udaru nyuthre, ma cik ku jubila de ginyutho pire;

²²en e bedopwe pa Mungu ma ni kum yioyic i Yesu Kristu ni dhanu ceke ma giyio; kum tung' tung' umbe;

²³kum kawa ceke wadubo warem ni dwong' pa Mungu;

²⁴ma jugonyo lembe m'i wigi mananu ni kum berone ni kum war ma ni i Kristu Yesu:

²⁵ma Mungu ketho ebed ni lam, ni kum yioyic, i rimo pare, kara enyuth bedopwe pare kum wekodubo m'ular utimbre, i twiocwiny pa Mungu;

²⁶kum nyutho, awacu, bedopwe pare i nindo maeni; kara en gire ebed pwe, man jagony lembe m'i wi ng'atu ma yioyic pare ni i Yesu.

²⁷Ka kumeno luli nikani? Bang'e cikre woko. Ku cik manedi? mi tici? Ungo: ento ku cik mi yioyic.

²⁸Ka kumeno wakwanu nia lembe m'i wi dhanu gonjre ni kum yioyic nge ku tic mi cik.

²⁹Kadi Mungu en e Mungu mi Juyahudi kendgi? en e Mungu mi Thekdhanumange bende ngo? Eyo, mi Thekdhanumange bende:

³⁰tek ebedo kumeno ya Mungu en e acel, man ebigonyo lembe ma wi weg yaa ku yioyic, man ma wi weg yaango ni kum yioyic.

³¹Ka kumeno wathiro cik ni kum yioyici? Awene: ungo, waketho cik ucungo.

Jurumi 4

¹Ka kumeno wabiwacu nia Ibrahim, ma wegwa, unwang'u ang'o calku kumi?

²Kum tek Ibrahim lembe m'i wie gonjre ni kum tic, ebedo ku gin m'elule i kume? endre yo ba Mungu ngo.

³Kum lembagora pa Mungu wacu ang'o? Ibrahim uyio Mungu, man ekwandre ire ni bedopwe.

⁴Nie ni ng'atu m'utimo, sukuliane jukwanu calu mi bero ngo, endre calu mi banja.

⁵Ento ni ng'atu m'utimo ngo, ento m'uyio en m'ugonyo lembe ma wi ju ma ayi Mungu mbe i kumgi, yioyic pare jukwanu ni bedopwe.

⁶Cil calu Daudi bende yero pi mugisa wi ng'atu ma Mungu kwanu bedopwe ire nge ku tic,

⁷m'ewacu kumae, Mugisa ni ju ma camuco migi wekre woko, Man ju ma dubo migi umbre.

⁸Mugisa ni ng'atu ma Mungu bikwanu dubo ire ngo.

⁹Ka kumeno mugisa maeni bino wi weg yaa kendgi, kadi wi weg yaango bende? kum wawacu kumae, Ni Ibrahim yioyic pare jukwanu ni bedopwe.

¹⁰Ka kumeno ekwandre nenedi? kinde m'eni i yaa, kadi i yaango? M'eni i yaa ngo, endre m'embe i yaa:

¹¹man ejolo giranyutha mi yaa, en e ayi mi bedopwe mi yioyic m'ebedo ko kinde m'eni i yaango: kara ebed wego mi ju m'uyio ceke, kadok gini i yaango, kara jukwan bedopwe igi;

¹²man ebed wego mi weg yaa ni ju ma gi weg yaa kendgi ngo, ento m'uwotho i ba tielo mi yioyic maeno ma pa wegwa Ibrahim m'ebedo ko ma fodi ¹³Kum lebang'ola mire ni Ibrahim ku nyikwaye de ni kum cik ungo nia ebed jacampacu m'i ng'om, endre ni kum bedopwe mi yioyic.

¹⁴Kum tek ju ma gi mi cik gi jucampacu, e nwang'u juthiro yioyic, man lembang'ola de juthiro:

¹⁵kum cik timo kwinyo; ento ka ma cik umbe i ie, e kadhukuwicik de mbe.

¹⁶Kum kumeno en e mi yioyic, kara ebed calku bero; kara lembang'ola bed andhandha ni nyikwayu ceke; ni maeno kende ngo ma en e mi cik, endre ni maeno bende ma en e mi yioyic pa Ibrahim, ma en e wegwa ceke

¹⁷(calu egore kumae, Aketho ibed wego mi thek dupa) i wang'e en m'eyio, en e Mungu, m'emio kwo ni ju m'utho, man elwong'o gin m'umbe, calu ginuti.

¹⁸M'eyio i genogen ka genogen umbe, kara edok ni wego mi thek dupa, calku maeno m'uyere kumae, Nyikwei bibedo kumeno.

¹⁹Man ma yioyic pare doko ng'ic ungo ie poro pi kume m'ubedo va etho (ma oro pare yenyoro dak), man ke pi i Sara m'ubedo mvuuy:

²⁰ento, m'enenoban lembang'ola pa Mungu, cwinye bedo jiji ngo ni kum yic m'umbe, ento edoko tek ni kum yioyic, m'emio ko dwong' ni Mungu,

²¹man m'eng'eyo andhandha nia gin m'eng'olo, ecopo time bende kakare.

²²Kum kumeno bende jukwane ire ni bedopwe.

²³Nie egore pire kende ngo, ya jukwane ire:

²⁴ento iwa bende, m'ebikwandre, ma wayio en m'eting'o Yesu Rwoth mwa ku kind ju m'utho,

²⁵ma juwodhe pi kier mwa, man juting'e pi gony mi lembe m'i wiwa.

Jurumi 5

¹Ka kumeno wan ma lembe m'i wiwa gonjre ni kum yioyic, wabedo ku kwiocwiny ku Mungu ni kum Rwoth mwa Yesu Kristu;

²ni kume wan bende wabedo ku mondo mwa ni kum yioyic i bero maeni ma wacungo i ie; man anyong'a negowa i genogen mi dwong' pa Mungu.

³Man kumeni kende ngo ento anyong'a negowa i masendi mwa bende: ma wang'eyo ko ya masendi nyayu twiocwiny;

⁴man twiocwiny nyayu girafoya; man girafoya nyayu genogen:

⁵man genogen ketho lewic ungo; kum mer pa Mungu konjre hau i adunde mwa ni kum Tipo Maleng' m'umire iwa.

⁶Kum kinde ma fodi wa ng'ic, i nindo m'uromo kakare Kristu tho pi ju ma ayi Mungu mbe i kumgi.

⁷Kum e tek ni ng'atu moko ya etho pi won bedopwe: kum kuno nyo ng'atu moko bibedo ku tegocwinye m'ebitho ko pi jabero:

⁸ento Mungu nyutho mer pare gire iwa, kum, kinde ma fodi wa judubo, Kristu tho piwa.

⁹M'ulund usagu dit, wan ma kawono lembe m'i wiwa gonjre ni kum rimbe, wabiboth ni kwinyo pa Mungu ni kume.

¹⁰Kum tek, kinde ma wa jukwor, jupoto kindwa waku Mungugi ni kum tho pa Wode, ma sagu dit, wan ma kindwa poto, wabiboth i kwo pare;

¹¹man kumeni kende ngo, ento anyong'a negowa bende i Mungu ni kum Rwoth mwa Yesu Kristu, ma ni kume wajolo kawono pot ma cwinyjo poto ko.

¹²Ka kumeno, calu ni kum ng'atu acel dubo mondo i ng'om man tho ni kum dubo, e kumeno tho kadhu ba dhanu ceke, kum kagi ceke gidubo:

¹³kum ka fodi cik kular uwok ungo nwang'u dubo ni i ng'om; ento dubo kwandre ngo ka cik umbe.

¹⁴Ento tho bimo ugambre kum Adamu cil kum Musa, cil wi ju ma kudubo ngo ku wagi dubo p'Adamu ma en e ayi pa ng'atu ma bibino.

¹⁵Ento giramia mananu bedo calu kier ungo. Kum tek ni kum kier pa ng'atu acel dhanu dupa tho, ma sagu apila bero pa Mungu, man giramia ma ni kum bero pa ng'atu acel, en e Kristu Yesu, usagre ni dhanu dupa.

¹⁶Man calu ni kum ng'atu acel m'udubo e giramia bedo kumeni ngo: kum lembapoka bino ba ng'atu acel ni gonj ma jugonjo ko jo, ento giramia mananu wok kum kier ma dupa ni tic mi bedopwe.

¹⁷Kum tek, ni kum kier pa ng'atu acel nica, tho bimo ni kum ng'atu acel; e ju ma gijolo sagri mi bero man mi giramia mi bedopwe e ma gibibimo bim i kwo ma sagu dit ni kum ng'atu acel, en e Yesu Kristu.

¹⁸Kum kumeno calu ni kum kier acel lembapoka wok ni dhanu ceke ni gonj ma jugonjo ko jo; cil kumeno ni kum tic acel mi bedopwe giramia mananu wok ni dhanu ceke ni gony mi kwo ma jugonyo ko lembe ma wi jo.

¹⁹Kum ni kum camuco pa ng'atu acel judwoko dhanu dupa ni judubo, cil kumeno ni kum woro pa ng'atu acel jubidwoko dhanu dupa pwe.

²⁰Man cik de bino umedo maeca, kara kier usagre; ento ka ma dubo sagre i ie, e bero sagre dit apila:

²¹kara, calu dubo bimo bim i tho, cil kumeno bero ubim bim ni kum bedopwe ni kwo ma rondo ku rondo ni kum Yesu Kristu Rwoth mwa.

Jurumi 6

¹Wabilund wacu ang'o? Wabidong' asu i dubo, kara bero sagre?

²Awene. Wan ma watho ni dubo, wabibedo i ie kendo nenedi?

- ³Kadi wung'eyo ngo nia wan ceke ma jumio baputisi iwa i Kristu Yesu jumio baputisi iwa i tho pare?
- ⁴Juyikowa kumeno wakude ni kum baputisi i tho: kara calu juting'o Kristu ku kind ju m'utho ni kum dwong' pa Wego, e wan bende wawoth kumeno i nyen mi kwo.
- ⁵Kum tek waribra wakude i ayi mi tho pare, wabibedo bende i ayi mi cer pare;
- ⁶ma wang'eyo maeni, nia ng'atu mwa ma con jugure kude, kara kum mi dubo thum woko, kara ku wabed ng'eca kendo mi dubo;
- ⁷kum ng'atu m'utho ebedo agonya ni dubo.
- ⁸Ento tek watho ku Kristu, wayio nia wabibedo karacelo wakude bende;
- ⁹ma wang'eyo ko nia Kristu m'ucer ku kind ju m'utho etho kendo ngo; tho umbe ku kero kendo i wie.
- ¹⁰Kum tho m'etho, etho wang' acel ni dubo: ento bedo m'ebedo, ebedo ni Mungu.
- ¹¹Cil kumeni bende wukwan giwu ku yor i iwu nia wun avu ni dubo, endre wu kwo ni Mungu ni kum Kristu Yesu.
- ¹²Ka kumeno kud wuyi dubo bim wi kumwu ma tho, ma nia wuwor ko awanyane ma rac:
- ¹³kadi kud wuting' wathkumwu ni dubo calu jamtic mi gondri; endre wutingru giwu ni Mungu, calu ju ma kwo m'uai ba ju m'utho, man wathkumwu calu jamtic mi bedopwe ni Mungu.
- ¹⁴Kum dubo mbe ku kero i wiwu: kum wun wuni the cik ungo, ento the bero.
- ¹⁵Ka ke ang'o? wabidubo, kum wani the cik ungo, ento the bero? Awene.
- ¹⁶Wung'eyo ngo, nia wun ma wu jumiru ni ng'atu ma wutingru ire ni woro, wun wu jumiru pa ng'atu ma wuworo; kadok en e mi dubo mi tho, kadi en e mi woro mi bedopwe?
- ¹⁷Ento foyofoc ni Mungu, nia, ma nwang'u naka wu jumiru mi dubo, wudoko wor ku i adundewu ni ayi ponji maeno ma jukethowu i ie;
- ¹⁸man ka wugonjru kud i dubo, wudoko jumiru mi bedopwe.
- ¹⁹Ayero calu dhanu yero kum ng'ic mi kumwu: kum calu wuting'o wathkumwu ubed jutic mi sasa man mi camuco ni camuco, cil kumeno kawono wuting' wathkumwu ubed jutic mi bedopwe ni dwokrileng'.
- ²⁰Kum ka wu jumiru mi dubo, wubedo agonya ni bedopwe.
- ²¹I nindo maeca wucego nyingwu manedi i gin maeno ma kawono lewic unegowu i kume? kum kajik mi gin maeno en e tho.

²²Ento kawono ma dong' jugonyowu ni dubo man wudoko jutic pa Mungu, e wubedo ku nyingwu ni dwokrileng', man kajikne kwo ma rondo ku rondo.

²³Kum sukulia mi dubo en e tho; ento giramia ma Mungu mio mananu re en e kwo ma rondo ku rondo ni kum Kristu Yesu Rwoth mwa.

Jurumi 7

¹Kadi wubedo cobo, umego (kum ayero ni dhanu m'ung'eyo cik), ya cik ubedo ku kero wi dhanu cil ma fodi ebedo kwo?

²Kum dhaku ma cware nuti ebedo atwia ni cware ni kum cik i nindo ma fodi cwarene bedo kwo; ento tek cwarene tho, egonjre i cik pa cware.

³Kum kumeno, tek ebedo ku nico mange, ma fodi cware bedo kwo, jubilwong'e dhaku ma giere swa: ento tek cwarene tho, ebedo agonya ni cik, kum kumeno en e dhaku ma giere swa ngo, kadok egomo nico mange.

⁴Kum kumeno, juwada, wun bende juketho wutho ni cik ni kum kum Kristu; kara wugom ng'atu mange, ma en e ng'atu ma juting'e ku kind ju m'utho, kara waceg nyingwa ni Mungu.

⁵Kum ka wani i kum, awanya mi dubo, ma nuti ni kum cik, utimbre i wathkumwa m'ecego ko nyinge mi tho.

⁶Ento kawono wabedo agonya ni cik, kum wadaru tho ni maeno m'ucerowa; kum kumeno watimo i nyen mi tipo, man mi nyiguta ma con ungo.

⁷Wabilund yero ang'o? cik en e dubo? Awene. Ento, ang'eyo dubo ngo, tek ni kum cik ungo: kum ang'eyo kethocwiny ma hai kum piny ungo, tek cik uwacu ngo kumae, Kud iketh cwinyi hai kum piny:

⁸ento dubo, m'unwang'u kaka, etimo i ia ni kum lembang'ola kwond kethocwiny hai kum piny ceke, kum ma cik umbe dubo en e avu.

⁹Man ku kwong'a abedo kwo ma cik umbe: ento ka lembang'ola wok, dubo cer, man atho;

¹⁰man lembang'ola, m'ubedo ni kwo, maeni adong' anwang'u ebedo ni tho:

¹¹kum dubo, m'enwang'u kaka, ni kum lembang'ola ebomba, man ni kume de enega.

¹²Kum kumeno cik en e leng', lembang'ola de leng', man e pwe, e ber de.

¹³Maenom'e ber elund edoko ni tho ira? Awene. Ento dubo, kara enyuthre ya en e dubo, ku timo tho ira ni kum maeno m'e ber; kara ni kum lembang'ola dubo dok ni dubo m'akeca.

¹⁴Kum wang'eyo nia cik en e mi tipo: ento an a mi kum, ma jung'iewa the dubo.

- ¹⁵Kum maeno m'atimo ang'eyo ngo: kum gin m'ayenyo ngo, e m'adong' abetimo; ento gin m'adagu, e m'atimo.
- ¹⁶Ento tek gin m'ayenyo ngo, e m'atimo, ayio ni cik nia e ber.
- ¹⁷Kum kumeno kawono en e an kendo ngo m'utime, endre dubo m'ubedo i ia.
- ¹⁸Kum ang'eyo nia i ia, lembene kumae, i kuma, gin moko m'ubedo ber umbe: kum yeny ma ia yenyo nia atim ko ber nuti kuda, ento tim ma nia atime kudo mbe.
- ¹⁹Kum gin ma ber m'ayenyo nik atim atimo ngo: ento dubo m'ayenyo ngo, e m'adong' abetimo.
- ²⁰Ento tek gin m'ayenyo ngo, e m'adong' atimo, en e an kendo ngo m'utime, ento dubo m'ubedo i ia.
- ²¹Alund anwang'u cik, nia, ira m'ayenyo atim ber, dubo nuti.
- ²²Kum anyong'a nega kum cik pa Mungu kum ng'atu ma yor i ic:
- ²³ento aneno cik ma tung' i wathkuma, m'ubekiedo kum cik mi pidoia, man ebekela i kol the cik mi dubo ma ni i wathkuma.
- ²⁴Ei an a ng'atu ma ng'ic ng'a ma biwodha kud i kum mi tho maeni?
- ²⁵Afoyo Mungu ni kum Yesu Kristu Rwoth mwa. Kum kumeni an gira ku pidoia, atimo cik pa Mungu andha; endre ku kum atimo ni cik mi dubo.

Jurumi 8

- ¹Kum kumeno kawono dong' pokolembe ma rac umbe wi ju ma gini i Kristu Yesu.
- ²Kum cik mi Tipo mi kwo i Kristu Yesu ugonya kud i cik mi dubo man mi tho.
- ³Kum gin ma copre ngo ni cik, kum ebedo ng'ic ni kum kum, Mungu, m'eoro Wode ma dhe i ayi kum mi dubo man pi dubo, epoko lembe rac kum dubo i kum:
- ⁴kara leembang'ola mi cik utimbre kakare i iwa, ma walubo tok kum ungo, endre tok Tipo.
- ⁵Kum ju ma gi mi kum igi pido pi gin mi kum; ento ju ma gi mi Tipo re igi pido pi gin mi Tipo.
- ⁶Kum pidoic mi kum en e tho; ento pidoic mi Tipo re en e kwo man kwiochwiny:
- ⁷kum pidoic mi kum en e adegi ku Mungu; kum e wor ungo ni cik pa Mungu, kadok acopa de ecopre ire ngo andha;
- ⁸man ju ma gini i kum gicopo nyayu mutoro i Mungu ngo.
- ⁹Ento wun wuni i kum ungo ento wuni i Tipo, tek Tipo pa Mungu bedo i iwu. Ento tek ng'atu moko Tipo Kristu mbe kude, meca en e pare ngo.

10Man tek Kristu ni i iwu, kum en e avu kum dubo; endre tipo en e kwo kum bedopwe.

11Ento tek Tipo pa ng'atu m'uting'o Yesu ku kind ju m'utho bedo i iwu, ng'atu m'uting'o Kristu Yesu ku kind ju m'utho ebimio kwo bende ni kumwu ma tho ni kum Tipo pare m'ubedo i iwu.

12Kum kumeno, umego, wa jubanja, ni kum ungo, ma nia wabed tok kum:

13kum tek wubedo tok kum, wubikotho be; ento tek wunego tic mi kum ku Tipo, wubibedo kwo.

14Kum ku ba dhanu ceke ma Tipo Mungu telo wigi, maeni gi wot Mungu.

15Kum wujolo tipo mi ng'eca kendo ngo ni lworu, ento wujolo tipo mi dwok ma judwoko kowu ni nyithindho, ma walwong'o ko kumae, Abba, Vwa.

16Tipo gire enyutho lembe karacelo ku tipo mwa, ya wa nyithindho pa Mungu:

17man tek nyithindho, nwang'u jucampacu; jucampacu pa Mungu, man jucampacu karacelo ku Kristu; tek wasendra wakude, kara juyungwa karacelo wakude.

18Kum akwanu ya can mi nindoma kawono maeni romo ngo ya jupore ku dwong' ma binyuthre iwa.

19Kum genogen mi giracwia pa Mungu ma kud avane ubekuro nyuthonyuth mi wot Mungu.

20Kum juketho giracwia pa Mungu bed wor ni gin ma kite mbe, ku yeny m'eyenyo en ungo, ento ni kum ng'atu m'uketho ebed wor, i genogen,

21nia jubigonyo giracwia pa Mungu en bende kud i ng'eca mi nyoth ni gony mi dwong' mi nyithindho pa Mungu.

22Kum wang'eyo nia giracwia pa Mungu ceke becur acura man ebesendre ku remokum karacelo cil ku kawono.

23Man kumeno kende ngo, ento wan giwa bende, ma wabedo ku landu mwoka mi Tipo, cil wan giwa wacur acura i iwa giwa, ma wakuro ko dwok ma judwoko kowa ni nyithindho, lembene kumae, war mi kumwa.

24Kum waboth ni kum genogen: ento genogen ma nen en e genogen ungo: kum ng'a ma geno gin maeno m'enido?

25Ento tek wageno gin ma waneno ngo, e walund wakure ku twiocwiny.

26Man Tipo bende konyo ng'ic mwa kumeca: kum wang'eyo ngo ram warwo ko calu ma maku warwo: ento Tipo gire ekwayu piwa ku cur acura ma aweca ngo;

27man ng'atu ma yenyo i adunde eng'eyo karamb pidoic mi Tipo, kum ekwayu pi jumaleng' calku yeny ma Mungu yeny.

- ²⁸Man wang'eyo nia gin ceke timbre karacelo mi bero ni ju ma gimaru Mungu, ni ju ma julwong'ogi calku yeny ma ie yenyo
- ²⁹Kum ju m'elar eng'eyo, elar ekethogi ya gidok calkud ayi Wode, kara ebed kayu i kind umego dupa:
- ³⁰man ju m'elar ekethogi, elwong'ogi bende: man ju m'elwong'o egonyo lembe m'i wigi bende: man ju m'egonyo lembe m'i wigi, joca e m'eyungogi bende.
- ³¹Wabilund yero ang'o kum gin maeni? Tek Mungu en e jabang'wa, ng'a ke ma goyo kore i kumwa?
- ³²Ng'atu ma kukwero ngo nimio Wode ma dhe, ento ewodhe piwa ceke, ebimio iwa gin ceke k'abamba bende karacelo kude ngo nedi?
- ³³Ng'a ma copo ketho lembe moko wi ju ma Mungu goyo nying'gi? Mungu e ma gonyo lembe ma wi jo;
- ³⁴ng'a ma poko lembe raci? en e Kristu Yesu m'utho, eyo ma sagu, ma juting'e ku kind ju m'utho, m'eni yo ku cing' Mungu ma yor acwic, m'ekwayu bende piwa.
- ³⁵Ng'a ma bikoyowa ku mer pa Kristu? masendi, kadi ndiba, kadi ragedo, kadi ndrui, kadi muneru, kadi both abotha ku tho, kadi palamularu?
- ³⁶Cil calu yang' egore kumae, Junegowa duu piri; Jukwanuwa va rombe mir athuma.
- ³⁷Ento, i gin maeni ceke wasagu weg avoci ni kum ng'atu m'umaruwa.
- ³⁸Kum ang'eyo andhandha, ya kadok tho, kadi kwo, kadi malaika, kadi ker, kadi gin ma nuti, kadi gin ma bibino, kadi tego,
- ³⁹kadi kadongone, kadi kathuthne, kadi giracwia mange pa Mungu, bicopo koya ku mer pa Mungu ngo, ma eni i Kristu Yesu Rwoth mwa.

Jurumi 9

- ¹Ayero lemandha i Kristu, acwayu ndra ngo, ma pidocwinya de benyutho wakude i Tipo Maleng',
- ²nia can ma dwong' man remo ma thum ungo de ni i adundena.
- ³Kum acopo yeny ya an gira abed ma kwong' ni i wia m'ukoya ku Kristu kum utumira, ma gi wedina calku kum:
- ⁴ma gi Juisraeli; ma dwok ma judwoko ko jo ni wot en e migi, ku dwong', man lembariba, ku mio cik, man rwo ma ba Mungu, ku lembang'ola de;
- ⁵ma kwaru en e migi, ma Kristu bende ai i bang'gi calku kum, ma ceke eni i wie, Mungu ma won mugisa ma nja. Amen.
- ⁶Endre ebedo calu lembe pa Mungu doko ni gin mananu ngo. Kum gin ceke ma gi mi Israel, gi Israel kagi ceke ngo:

- ⁷kadok, kum gi kodhi pa Ibrahim, meca kagi ceke gi nyithindho ngo: ento kodhini bilwongre ni kum Isak.
- ⁸Lembene kumae, en e nyithindho mi kum ungo ma gi nyithindho pa Mungu; endre nyithindho mi lembang'ola jukwanugi ni kodhi.
- ⁹Kum maeni en e lembe mi lembang'ola kumae, Karunyoni abibino, man nyathin ma nico bibedo nuti ni Sara.
- ¹⁰Man kumeni kende ngo; ento Rebeka bende m'egamu ie ku ng'atu acel, ma en e wegwa Isak,
- ¹¹kum nyithindho ma fodi jukunyologi ngo, kadok ma fodi gikutimo gin moko ma ber kadi ma rac de ngo, kara yeny ma Mungu yenyoy calku goyo nying' ucungi, mi tic ungo, endre pa ng'atu m'ulwong'o,
- ¹²eyere ire kumae, Jadit bitimo ni ng'atu ma nok.
- ¹³Cil calu egore kumae, Yakobo amaru. endre Esau adagu.
- ¹⁴Wabilund wacu ang'o? Gondri nuti ku Mungu? Awene.
- ¹⁵Kum ewacu ni Musa kumae, Kisa binega kum ng'atu ma kisa nega i kume, man ngisi de binega kum ng'atu ma ngisi nega i kume.
- ¹⁶Ka kumeno en e pa ng'atu m'uyenyoy re ngo, kadi pa ng'atu m'uringo de ngo, endre pa Mungu ma kisa nege.
- ¹⁷Kum lembagora pa Mungu yero ni Farao kumae, Kum lembe maeni nini ating'i malu, kara anyuth tego para i ii, man kara nyinga rweire i ng'om ceke.
- ¹⁸Kum kumeno kisa nege kum ng'atu m'eyenyoy; man edwoko cwiny ng'atu m'eyenyoy tek.
- ¹⁹Ibilund wacu ira kumae, Nedi ebedoto adote asu? Kum ng'a ma copo jai kum yeny ma ie yenyoy?
- ²⁰Ungo endre, E dhanu, in i ng'a m'idwoko wang' lembe ni Mungu e? Gin m'ucwire biwacu ni ng'atu m'ucwie kumae, Nedi icwia kumeni?
- ²¹Kadi jacwiagulu tego pare mbe kum ulobo, ma ku lungu ulobo acel ecwio ng'ete kucel ni agulu mi yung, ku ng'ete kucel ke agulu m'umbe yungi?
- ²²Ang'o tek Mungu, m'eyenyoy enyuth kwinyoy pare, man eketh tego pare ng'eire, eciro ku mwonyolembe hai agulu mi kwinyoy ma juyiko ni nyoth ma junyothri ko:
- ²³man kara eketh lonyoy mi dwong' pare wi agulu mi kisa ung'eire, m'elar eyiko mi dwong',
- ²⁴cil wan, ma julwong'owa bende, m'uai ba Juyahudi kendgi ngo, ento ba Thekdhanumange bende?

- ²⁵Calu ewacu i Hoseya kumae, Abilwong'o maeno dhanu para, ma en e dhanu para ngo; Ng'atu ma jamer ungo de, ya jamer.
- ²⁶Man ebitimbre, ya ka ma juwacu ie igi kumae, Wun wu dhanu para ngo, Kakeca gibilwongri wot Mungu ma kwo.
- ²⁷Isaya bende ekok pir Israel kumae, Tek wel mi nyithindho pa Israel ubedo calu kwio ma dhu nam, donge e ma biboth:
- ²⁸kum Rwoth bitimo lembe pare kakare wi ng'om, m'ebidare ko ku jwige bende.
- ²⁹Man, calu Isaya lar uyero kumae, Dok Rwoth mir Udul kuweko iwa kodhi ngo, Kuno di wadoko va Sodom, man kuno di judwokowa calku Gomora.
- ³⁰Wabilund wacu ang'o? Ya Thekdhanumange, m'ulubo bedopwe ngo, utundo kum bedopwe, cil bedopwe ma en e mi yioyic:
- ³¹ento Israel, m'ulubo tok cik mi bedopwe utundo kum cik maeno ngo.
- ³²Pirang'o? Kum giyenye ku yioyic ungo, endre calu eyenjre ku tic. Gikier kum kidi ma redhojo;
- ³³cil calu egore kumae, Nen, aketho i Sayuni kidi ma redhojo man cana mi kier: Man ng'atu m'uyio ire lewic binege ngo.

Jurumi 10

- ¹Umego, yeny mir adundena man kwayukwac para ma ba Mungu en e pigi, ya gibothi.
- ²Kum anyutho pigi nia gibedo kud amora pi Mungu, endre calku ng'eyong'ec ungo.
- ³Kum ma fodi gi cobo kum bedopwe pa Mungu, ma gibeyenyo de ya giketh migi e m'ucungi, gidwokri gigi wor ungo ni bedopwe pa Mungu.
- ⁴Kum Kristu en e kajik mi cik ni bedopwe ni dhanu ceke m'uyio kubang'gi kubang'gi.
- ⁵Kum Musa goro ya ng'atu m'utimo bedopwe ma en e mi cik ebibedo ni kum maeno.
- ⁶Endre bedopwe ma en e mi yioyic uwacu kumae, Kud iwac ku i adundeni kumae, Ng'a ma biidho i polo? (lembene eni, nikelo Kristu piny:)
- ⁷kadi, Ng'a ma biloro piny i vur ma there mbe? (lembene eni, niting'o Kristu ku kind ju m'utho).
- ⁸Ento ewacu ang'o? Lembe maeni ni kago kudi, i dhogi, man i adundeni: lembene eni, lembe mi yioyic, ma wayero:
- ⁹kum tek ibituco ku dhogi ya Yesu en e Rwoth, man ibiyio kud adundeni nia Mungu ting'e ku kind ju m'utho, e ibiboth:

- ¹⁰kum kud adunde dhanu yio ni bedopwe; man ku dhok lembatuca jutuco ni both.
- ¹¹Kum lembagora pa Mungu wacu kumae, Ng'atu ma tek uyie jubinyayu lewic i wie ngo.
- ¹²Kum tung' tung' umbe kind Juyahudi ku Juyunani: kum Rwoth acel e ma Rwoth mi ceke man ke elony ni ceke m'ulwong'e;
- ¹³kum, Ng'atu ma tek bilwong'o nying Rwoth ebiboth.
- ¹⁴E gibilund lwong'e nenedi ma fodi gikuyie ngo? man gibiyie nenedi ma fodi gikuwinje ngo? man gibiwino nenedi ma jayero mbe?
- ¹⁵man gibiyero nenedi, tek juorogi ngo? cil calu egore kumae, Ei karamb ber mi tiend ju m'ukelo lembanyong'a ma juboth ko mi gin ma ber!
- ¹⁶Ento kagi ceke giciko ithgi kum lembanyong'a ma juboth ko ngo. Kum Isaya wacu kumae, Rwoth, ng'a m'uyio rwonglembe mwa?
- ¹⁷Kum kumeno yioyic uwok ni kum winjo, winjo ke ni kum lembe pa Kristu.
- ¹⁸Ento awacu kumae, Giwinjo ngo? Eyo, andha, Dwandgi meny i ng'om ceke, Lembe migi de tundo cil i kajik mi ng'om.
- ¹⁹Ento awacu kumae, Israel ung'eyo ngo? Ku kwong'a Musa wacu kumae, Abinyayu ngiri i iwu kum maeno ma thek ungo, Ku thek de ma ng'eyong'ecne mbe abinyayu ng'ecwiny i iwu.
- ²⁰Man Isaya e won tegocwiny ma dit, man ewacu kumae, Anwangra ku ju ma giyenya ngo; Anyuthra ni ju m'upenja ngo.
- ²¹Ento pi Israel ewacu kumae, Ceng' du ari nithang'u cinga ni ju ma gi juco man jupiem.

Jurumi 11

- ¹Ka kumeno awacu kumae, Mungu coro dhanu pare ceni? Awene. Kum an bende an a Jaisraeli, mi kodhi Ibrahim, mi suru pa Benyamin.
- ²Mungu coro dhanu pare m'elar eng'eyogi cen ungo. Kadi wung'eyo ngo gin ma lembagora pa Mungu wacu pir Elia? maram ekwayu ko Mungu kum Israel kumae:
- ³Rwoth, ginego jubila peri, gimugo pemblam peri; man adong' akenda, man giyenyo ka kwona.
- ⁴Ento lembadwoka pa Mungu wacu ire nik ang'o? Dhanu m'udong' ira gira gi rubanga abiro, ma fodi gikurumo conggi ngo ni Bal.
- ⁵Cil kumeno i nindo ma kawono nini bende donge m'udong' calku goyo nying' mi bero nuti.

- ⁶Ento tek en e ni kum bero, nwang'u en e ni kum tic kendo ngo: kum tek en e kumeni ngo nwang'u bero en e bero kendo ngo.
- ⁷Ka ke ang'o? Maeno ma Israel ubeyenyo, maeno enwang'u ngo; ento ju ma jugoyo nying'gi ginwang'e man donge m'udong' judwoko cwinygi nwang':
- ⁸calu egore kumae, Mungu mio igi tipo mi rip rip, wang' kara ku ginen, man ith kara ku giwinji, cil i ceng' maeni nini.
- ⁹Man Daudi wacu kumae, Dong' mesa migi dok ni uwic, man ngbak, Ku gin ma redhojo, ku cul de igi:
- ¹⁰Dong' wang'gi yuthi, kara ku ginen, Man igung' ng'eigi piny thiri thiri.
- ¹¹Ka kumeno awacu kumae, Gikier kara gipodhi? Awene: ento ni kum podho migi both uwok ni Thekdhanumange, kara enyai ngiri i igi.
- ¹²Nie tek podho migi en e lonyo mi ng'om, man ruvwa migi de lonyo ni Thekdhanumange; pong' migi sagu dit ungo?
- ¹³Ento ayero iwu wu ju ma wu Thekdhanumange. Kum kumeno kum an a jakwenda mi Thekdhanumange, ayungo tic para;
- ¹⁴tek ku yo moko acopo ketho ngiri neg ju ma wa kum acel wakugi, man kara abodh jumoko m'i kindgi.
- ¹⁵Kum tek cor ma jucoro kogi cen en e pot ma jupoto ko ng'om, jol ma jujolo kogi ke bibedo girang'o, ndhu kwo ngo m'uai ba ju m'utho?
- ¹⁶Man tek cam ma kwong'a bedo leng', cam dho bende bedo kumeno.
- ¹⁷Ento tek jange moko juturo woko, man in, ma in ulemo m'i thim, juroi i kindgi, man macen wudoko jurib wukugi mir ulag mi mio mir ulemo;
- ¹⁸kud iluli kum jange: ento tek iluli, en e in ungo m'uyeyo ulage ento ulage re m'uyeyo in.
- ¹⁹Ka kumeno ibiwacu kumae, Jange juturo woko, kara juroya i ie.
- ²⁰Ber; juturogi woko ni kum yioyic migi m'umbe, man ni kum yioyic peri icungo. Kud ibed ku pidoic mi tingri, endre ilwor:
- ²¹kum tek Mungu weko jange ma dhe ngo, e ebiweko in de ngo.
- ²²Ka kumeno wunen bero ku kwaya pa Mungu: yo ba ju m'upodho, kwaya; endre yor i beng'i, bero pa Mungu, tek ibedo asu i bero pare: tek kumeno ngo e in bende jubitong'i.
- ²³Man joca bende, tek gibedo asu ngo i yioyic migi m'umbe, jubiroyogi i ie: kum Mungu copo royogi i ie kendo.

- ²⁴Kum tek jutong'i woko kud i maeno ma en e ulemo m'i thim ma ma dhe, man juroi tung' ku ma dhe i ulemo ma ber; maeni ma gi jange ma dhe, jubiroyogi i ulemo nngi gigi ma sagu dit ungo?
- ²⁵Kum ayenyo ngo, umego, ya wubed cobo ni giramung'a maeni, kara kud wubed riek i weng'wu giwu, nia ng'et nwang'cwiny upodho wi Israel, cil ma pong' mi Thekdhanumange wok ko;
- ²⁶man kumeno Israel ceke biboth: cil calu egore kumae, Jagony bibino m'ebiai i Sayuni; Ebikabu gin ma ayi Mungu mbe i kume kum Yakobo:
- ²⁷Man maeni en e lembariba para igi, Kinde m'abikabu dubo migi woko.
- ²⁸Man pi lembanyong'a ma juboth ko, gi judegi piwu: endre pi goyo nying', gi jumer pi kwaru.
- ²⁹Kum giramia ku lwong'o pa Mungu lokri mbe kude.
- ³⁰Kum calu wun yang' wu juco ni Mungu, ento kawono wudaru nwang'u kisa ni kum camuco migi,
- ³¹cil kumeni joni bende kawono gi juco, kara ni kum kisa m'unyuthre iwu gin bende kawono ginwang' kisa.
- ³²Kum Mungu ciko ceke karacelo ni camuco, kara kisa nege kum ceke.
- ³³Ei karamb thuth mi lonyo mi rieko ku ng'eyong'ec pa Mungu mire ma! karamb pokolemba pare ma yenjre ngo, man yo pare de ma lure ngo!
- ³⁴Kum ng'a m'ung'eyo pidoic pa Rwothi? kadi ng'a ma japorlembe pare?
- ³⁵kadi ng'a ma lar mio ire, man ebicnie ire kendo?
- ³⁶Kum gin ceke ai i bang'e, man ni kume, man ire. Dwong' ma rondo ku rondo ubed ire. Amen.

Jurumi 12

- ¹Ka kumeno, umego, akwayuwu ku kisa pa Mungu, ya wuthier kumwu ubed ni lam ma kwo, ma leng', ma yire ni Mungu, ma en e rwo mu mi tipo.
- ²Man kud wuporu ku ng'om maeni: endre wubed ma kothwu lokre ni kum dwoko pidoiwu nyen, kara wung'ei yeny ma Mungu yenyo m'e ber m'e yire de m'e cu ma ndhu de.
- ³Kum ayero, ni kum bero m'umire ira, ni dhanu ceke ma ni i kindwu kubang'gi kubang'gi, ng'atuman ie kud upid pire gire ma sagu ma maku ie pidi; ento ie pid kumeni calu pidoie bedo nger, calu mukero mi yioyic ma Mungu daru mio ni dhanu ceke kubang'gi kubang'gi.
- ⁴Kum cil calu wabedo ku wathkum dupa i kum acel, man wathkum ceke tic migi acel ungo:

- ⁵kumeni wan, ma wa dupa, wa kum acel i Kristu, man wan ceke wa wathkum ng'atuman pa wadi man pa wadi.
- ⁶Man ma wabedo ku giramia ma tung' tung' calku bero maeni m'umire iwa, tek en e lembila, dong' waeu calku yioyic maka mwa;
- ⁷kadi timotim, dong' wamira giwa ni timotim mwa; kadi ng'atu m'uponjo de, ni ponji pare;
- ⁸kadi ng'atu m'ujuko juk de ni jukojuk pare: ng'atu m'umio de, dong' etime k'abamba; ng'atu m'ubimo bim de, ebim kud amora; ng'atu ma kisa nege de, enege k'anyong'a.
- ⁹Dong' mer ubed umbe umbili. Dag hai maeno m'e rac; mok kum maeno m'e ber.
- ¹⁰I mer mir umego wumeru ku ber ng'atuman ku wadi man ku wadi; i lembe mi yung dong' ng'atuman uting' wadi ma sagu en;
- ¹¹i amora i molkum ungo; i yauni mi tipo; ma wubetimo ko ni Rwoth,
- ¹²ma anyong'a benegowu i genogen; ma wutwio ko cwinywu i masendi; ma wubedo ko asu i rwo;
- ¹³ma wukony ko jumaleng' ku canpiny m'unegogi; ma wugwok ko welo ber.
- ¹⁴Mi mugisa ni ju m'unyayu ragedo i kumwu; mi mugisa, man kud wukwong' kwong'.
- ¹⁵Anyong'a negwu ku ju ma anyong'a negogi; wuywak ku ju m'uywak.
- ¹⁶Wubed ma pidoiwu ripo acel man kum wadi man kum wadi. Kud wuketh pidoiwu kum gin ma dit, endre iwu pid pi gin ma nweng'. Kud wubed riek i weng'wu giwu.
- ¹⁷Kud wucul wang' gin ma rac ni ng'atu moko. Iwu pid pi gin ma ber i wang' dhanu ceke.
- ¹⁸Tek ecopre, calu eni i iwu, wubed ma cwinywu kwio ku dhanu ceke.
- ¹⁹Jumer, kud wucul kwor mi kumwu giwu, ento wuwek kaka ni kwinyo pa Mungu: kum egore kumae, Culo kwor en e para; abiculo an, Rwoth uwacu.
- ²⁰Ento tek jadegini kec ubenege, mi ire cam; tek rieu unege, mi emadhi: kum i tim m'itimo ko kumeni ibicoko cukmac i wie.
- ²¹Tic ma rac kud uloi, endre isag tic ma rac ku bero.

Jurumi 13

- ¹Ku ba pidoic ceke dong' gibed wor the tego ma ni i wigi: kum won tego moko mbe ma kuai ba Mungu ngo: man weg tego ma nuti Mungu kethogi en.

²Ka kumeno ng'atu m'ujai ni won tego, meca ejai kum lembang'ola pa Mungu: man ju m'ujai gibinwang'u lembapoka i wigi gigi.

³Kum jubim gin ung'oindiri ngo ni tic ma ber, endre ni tic ma rac. Man iyenyo nia ibed umbe lworu kum won tego? tim maeno m'e ber, e ibinwang'u pak ba maeno:

⁴kum en e jatim pa Mungu iri pi bero. Ento tek itimo maeno m'e rac, dong' lworu negi; kum eyeyo palamularu ngo ma there mbe: kum en e jatim pa Mungu, en e jaculkwor pi kwinyo ni ng'atu m'utimo rac.

⁵Kum kumeno maku wubed wor, kum kwinyo kende ngo, ento kum pidocwiny bende.

⁶Kum en e kum lembe nini m'uketho wumio ajok bende; kum gin gi jutim mi tic pa Mungu, ma gibedo asu i lembe maeni nini.

⁷Wumi ni dhanu ceke gin m'umaku piny; ajok ni ng'atu ma maku jujok ire ajok; jambng'om ni ng'atu ma maku jumi ire jambng'om; lworu ni ng'atu ma maku julwore; yung ni ng'atu ma maku juyunge.

⁸Kud wubed ku banja mi gin pa ng'atu moko, ndhu mari: kum ng'atu m'umaru wadi nwang'u etimo cik kakare.

⁹Kum lembe nini, Kud igier gier, Kud ineg nek, Kud ikwal kwo, Kud iketh cwinyi hai kum piny, man tek lembang'ola moko mange nuti, ecokre i lembe maeni, e eni, Ibimaru wedu calu imeri giri.

¹⁰Mer timo rac ungo kum wadi: ka kumeno mer en e timbre kakare mi cik.

¹¹Man maeni, ma wung'eyo ko nindo, ya kawono en e kaceu ma wuceu ko ku wang' nindo: kum kawono both ni ceng'ni wa ma sagu kinde ma wayio.

¹²Diewor uvoc, man rupiny udhingo: ka kumeno dong' wawenyu tic mi mudho cen, man dong' waronyu jamtho mi der.

¹³Dong' wawothu calu ma maku wawothu, calu i dieceng'; i cok ma jucokri ko ku vul ungo ku mer ma jumer ko ku kong'o de ngo, i gier ma jugieri ko swa ku sasa de ngo, i dhau ku ngiri de ngo.

¹⁴Ento dong' wurony Rwoth Yesu Kristu, man kud wuyik kaka ni kum, ni awanyane ma rac.

Jurumi 14

¹Ento ng'atu ma ng'ic i yioyic wujole, endre ku lembapoka mi piem ungo.

²Ng'atu acel yioyic pare nuti m'ecamu ko giki ceke; ento ng'atu ma ng'ic re nang'u dek.

³Dong' ng'atu ma camu kud ecai ng'atu ma camu ngo; man ng'atu ma camu ngo kud epok lembe pa ng'atu ma camu: kum Mungu daru jole.

- ⁴In i ng'a m'ipoko lembe wi jatic pa ng'atu mange e? ni Rwoth pare gire ecungo kadi epodho. Eyo, jubiketho ecungo: kum Rwoth tego pare nuti m'eketho ecungo ko.
- ⁵Ng'atu acel ketho ceng' acel bedo dit ma sagu wi wadi: ng'atu mange ke ketho ceng' ceke bedo calacel. Ku ba dhanu ku ba dhanu dong' ng'atuman ung'ei cu i pidoie gire.
- ⁶Ng'atu ma kwiro ceng', ekwire ni Rwoth: man ng'atu ma camu, ecamu ni Rwoth, kum emio foyofoc ni Mungu; man ng'atu ma camu ngo, ecamu ngo ni Rwoth, man emio foyofoc ni Mungu.
- ⁷Kum ng'atu moko mbe i kindwa ma bedo ire gire, ng'atu moko mbe de ma tho ire gire.
- ⁸Kum kadok wabedo, wabedo ni Rwoth; kadi kadok watho de, watho ni Rwoth: ka kumeno kadok wabedo, kadi watho, wan wa pa Rwoth.
- ⁹Kum pi lembe nini Kristu tho man ecer kendo, kara ebed Rwoth mi ju m'utho ku ju ma kwo bende.
- ¹⁰Ento in, ipoko lembe wi umeru pirang'o? kadi in kendo, icayu umeru pirang'o? kum kawa ceke wabicungo nyim kom mi pokolemba pa Mungu.
- ¹¹Kum egore kumae, Calu abedo, Rwoth uwacu, cong ceke kubang'e kubang'e birum ira, Man leb ceke kubang'e kubang'e bipaku Mungu.
- ¹²Kum kumeno ku ba dhanu ceke m'i kindwa ng'atuman biyero pire gire ni Mungu.
- ¹³Ka kumeno ku wapoku lembe kendo ma nia ng'atuman upok lembe wi wadi man wi wadi: endre ma sagu wupok lembe mae, nia ng'atu moko kud uketh gin ma redho jo i yo p'umin, kadi kaka ma jupodho i ie.
- ¹⁴Ang'eyo, man ang'eyo andhandha i Rwoth Yesu, ya gin moko mbe ma cido gire kende: ndhu ni ng'atu m'ukwanu gin moko ya ecido, e ire ecido.
- ¹⁵Kum tek can unego wedu kum cemo, meca iwotho kendo i mer ungo. Kud inyoth ng'atu ma Kristu tho pire ku cemo peri.
- ¹⁶Ka kumeno kud iyi juyer pi bero peri ku rac;
- ¹⁷kum ker pa Mungu en e camu guacama man madhu giramadha de ngo, endre bedopwe man kwiocwmy kud anyong'a i Tipo Maleng'.
- ¹⁸Kum ng'atu m'utimo ni Kristu i maeni enyayu mutoro ni Mungu man dhanu foye.
- ¹⁹Kum kumeno dong' walubu tok gin ma ketho kwiocwiny, man gin ma watengra ko i kume.

²⁰Kud inyoth tic pa Mungu pi giracama. Gin ceke gi leng' andha; ento en e dubo ni ng'atu m'ucamu ku kier.

²¹En e ber nicamu ring'o ngo, kadi madhu pigulok, kadi timo gin moko m'umeru kier i kume.

²²Yioyic m'ibedo ko, bed kude giri i wang' Mungu. Anyong'a ni ng'atu m'upoko lembe pare gire rac ungo i gin maeno m'eyio.

²³Ento ng'atu ma tek ucamu ma cwinye ni jiji lembapoka ma rac ni i wie, kum ecamu ma yioyicne mbe; man gin ma tek en e mi yioyic ungo en e dubo.

Jurumi 15

¹Nie wan ma wa tek maku wayei mulima mi ju ma ng'ic, man ku wanyai mutoro i iwa giwa.

²Ku ba dhanu ceke m'i kindwa dong' ng'atuman unyai mutoro i wadi pi maeno m'e ber, mi teng'oteng'.

³Kum Kristu bende nyayu mutoro i ie gire ngo; ento, calu egore kumae, Cac mi ju m'ucayu in upodho i wia.

⁴Kum gin ma yang' ugore egore pi ponji mwa, kara ni kum twiocwiny man ni kum jukojuk mi lembagora pa Munguwabed ku genogen.

⁵Nie Mungu ma won twiocwiny ku jukojuk umi iwu ya wubed ku pidoic acel ng'atuman ku wadi man ku wadi calku Kristu Yesu:

⁶kara ku cwinywu m'ucungo acel man ku dhogwu acel wuyung Mungu ma won Rwoth mwa Yesu Kristu.

⁷Kum kumeno wujolu, cil calu Kristu bende jolowu, ni dwong' pa Mungu.

⁸Kum ayero nia Kristu judaru dwoke ni jatim mi yaa pi lemandha pa Mungu, kara edwok leembang'ola m'umire ni wegwa tek,

⁹man kara Thekdhanumange yung Mungu pi kisa pare; calu egore kumae, Pi maeni abituci i kind Thekdhanu mange, Man abiwero ni nyingi.

¹⁰Man kendo ewacu kumae, Anyong'a negwu, wu Thekdhanumange, karacelo ku dhanu pare.

¹¹Man kendo kumae, Wupak Rwoth, wu Thekdhanumange ceke; Man dong' dhanu ceke gipake.

¹²Man kendo, Isaya wacu kumae, Ulag Yese bibedo nuti, Man ng'atu ma biwok nibimo wi Thekdhanumange; Thekdhanumange de bigeno i kume.

¹³Nie dong' Mungu mi genogen upong'wu kud anyong'a ceke ku kwiocwiny i yic ma wuyio, kara wusegru i genogen, i tego pa Tipo Maleng'.

- ¹⁴Man an gira bende ang'eyo piwu andhandha, juwada, ya wun giwu wupong' ku bero, wupong' ku ng'eyong'ec ceke, ma wucopo jukru ko bende.
- ¹⁵Endre agoro iwu ku tegocwiny ma sagu i ng'ete moko, calu abeketho wupoi kendo, kum bero m'uai ba Mungu m'umire ira,
- ¹⁶kara abed jatic pa Kristu Yesu ni Thekdhanumange, m'abetimo tic mi lamulam mi lembanyong'a pa Mungu ma juboth ko, kara lam ma Thekdhanumange dok m'eyire, m'edoko leng' ni kum Tipo Maleng'.
- ¹⁷Ka kumeno abedo ku kulula para i Kristu Yesu i gin ma pa Mungu.
- ¹⁸Kum abibedo ku tegocwiny ungo m'ayer ko pi gin moko ndhu maeni ma Kristu timo ni kuma, pi woro mi Thekdhanumange, ku lembe man tic bende,
- ¹⁹i tego mi giranyutha ku musana, i tego pa Tipo Maleng'; ketho ugambre i Yerusalem, man i ng'ete cil i Iluriko, adaru yero lembanyong'a ma juboth ko pa Kristu kot;
- ²⁰eyo, m'akeco nik ayer lembanyong'a ma juboth ko, i ka ma nying' Kristu lwongre i ie ngo, kara kud agom wi kathere pa ng'atu mange;
- ²¹ento, calu egore kumae, Gibineno, gi ju ma pire fokuwok igi ngo, Man ju ma fokuwinjo ngo gibing'eyo.
- ²²Kum kumeno bende yo cere ira wang' udul ma kud abin ko i beng'wu:
- ²³ento kawono, ma kakara dong' umbe kendo i ng'ombuni, man ava bino i beng'wu nega rundi maeni dupa,
- ²⁴kinde ma tek acidho i Spania (kum ageno ya abinenowu i woth para, man wubitera de i yo para ma kuca, tek walar wabedo wakudu ma cwinya kwio ko moko),
- ²⁵ento kawono awacu, acidho Yerusalem, m'atimo ko ni jumaleng'.
- ²⁶Kum ebedo ber ni Makedoni kud Akaya ya gijok ajok moko pi ju ma canpiny unegogi kind jumaleng' ma i Yerusalem.
- ²⁷Eyo, ebedo igi ni mutoro; man gi jubanja migi. Kum tek juketho Thekdhanumange gidok jurib gin migi mi tipo, banja mi joca ni i bang'gi ya gitim igi bende i gin mi kum.
- ²⁸Ka kumeno kan adaru maeni, man adaru mwono ayi kum nying' maeni, abikadhu kud i beng'wu cik i Spania.
- ²⁹Man ang'eyo nia, kan abino i beng'wu, abibino i pong' mi mugisa pa Kristu.
- ³⁰Nie akwayuwu, umego, ni kum Rwoth mwa Yesu Kristu, man ni kum mer mi Tipo, ya wuii karacelo wakudu i rwo mu ni Mungu pira;

³¹kara aboth ni ju ma gi juco i Yahudi, man kara timotim para ma pi Yerusalem uyire ni jumaleng’;

³²kara abin i beng’wu kud anyong’a ni kum yeny ma Mungu yeny, man anwang’ yom karacelo wakudu.

³³Nie Mungu mi kwiocwiny ubed kudu ceke. Amen.

Jurumi 16

¹Aketho Foibe ma nyamegwa i weng’wu, ma en e jatic ma dhaku mi kanisa ma eni i Kenkre:

²kara wujole i Rwoth, calu m’umaku jumaleng’, man kara wukonye i gin ceke ma cande ni i kume i beng’wu: kum en gire bende en e jakonyjo dupa, man ira an nini de.

³Wumoth Priskila man Akula ma gi jutic wada i Kristu Yesu,

⁴ma gipielo ng’utgi gigi piny pi kwo para; amio foyofoc igi a kenda ngo, endre kanisa mi Thekdhanumange ceke bende:

⁵man wumoth kanisa ma ni i ot migi. Wumoth Epaineto ma jamerna, ma en e mwoka mir Asia ni Kristu.

⁶Wumoth Mariamu, m’emule ku tic ma dit iwu.

⁷Wumoth Androniko ku Yunia, ma gi wedina, gi jukol wakugi de, ma pigi yik de kind jukwenda, ma gilar gibedo i Kristu ira.

⁸Wumoth Amplia ma jamerna i Rwoth.

⁹Wumoth Urbano ma jatic wadwa i Kristu, man Stakus ma jamerna.

¹⁰Wumoth Apele m’e ng’atu ma jufoye I Kristu. Wumoth ju ma gi juot pa Aristobulo.

¹¹Wumoth Herodioni ma wada. Wumoth ju ma gi juot pa Narkiso, ma gini i Rwoth.

¹²Wumoth Trufaina ku Trufosa, ma gimuli ku tic i Rwoth. Wumoth Persi ma jamer, m’emule dit ku tic i Rwoth.

¹³Wumoth Rufo ma julwong’e i Rwoth, man min mire ma en e ma de.

¹⁴Wumoth Asunkrito, ku Flegoni, ku Herme, ku Patroba, ku Herma, kud umego ma gibedo gikugi de.

¹⁵Wumoth Filologo ku Yulia, man Nereu ku nyamin mire, man Olumpa ku jumaleng’ ceke ma gibedo gikugi.

¹⁶Wumothru ku cwiocwic ma leng’. Kanisa pa Kristu ceke gimothowu.

- ¹⁷Nie akwayuwu, umego, wunen ju ma giketho pokri man kaka ma ketho dhanu kier, ma tung' ku ponji ma wugamu ng'eyo: man wulokru woko kud i bang'gi.
- ¹⁸Kum ju ma kumeno gitimo ni Rwoth mwa Kristu ngo, endre ni usauigi gigi: man giwondo adunde mi ju m'ung'eyo lembe ngo ku wec migi ma mit ma yom de.
- ¹⁹Kum woro mu uyik tir ba dhanu ceke. Ka kumeno anyong'a nega piwu: endre ayenyo wubed riek kum maeno m'e ber, man cobo ni maeni m'e rac.
- ²⁰Man Mungu mi kwicwiny binyono Jok the tiendwu fodi nyanok. Bero pa Rwoth mwa Yesu Kristu bed i beng'wu.
- ²¹Timoteo ma jatic wada mothowu; man Lukio ku Yason, man Sosipatro, ma wedina.
- ²²An a Tertio, m'agoro waraga maeni, amothowu i Rwoth.
- ²³Gayo ma jagwokna, man mi kanisa ceke de emothowu. Erasto jagwok sente mir adhura de mothowu, man Kwarto m'umego.
- ²⁴Bero pa Rwoth mwa Yesu Kristu bed i beng'wu kpo. Amen.
- ²⁵Nie ire m'ecopo ketho wunyang' calku lembanyong'a para ma juboth ko ku lembayera pa Yesu Kristu, calku lembanyutha mi lembamung'a m'ukandre ling' i nindo ma rondo ku rondo,
- ²⁶ento kawono enyuthie, man ni kum lembagora pa Mungu mi jubila, calku lembang'ola pa Mungu ma nja, juketho eng'eire cil ni thek ni woro mi yioyic:
- ²⁷ni Mungu ma riek e kende, ni kum Yesu Kristu, dwong' ma rondo ku rondo ubed ire. Amen.

1 Jukorinto

1 Jukorinto 1

- ¹Paolo, ma julwong'e ya ebed jakwenda pa Yesu Kristu ni kum yeny ma Mungu yenyo re, man Sosthene m'umegwa,
- ²ni kanisa pa Mungu ma ni i Korinto, cil ju ma judwokogi leng' ni kum Kristu Yesu, ma julwong'ogi ya gibed jumaleng' ku dhanu ceke ma gilwong'o nying Rwoth mwa Yesu Kristu ku kaka ma gini i ie ceke, Rwoth migi ku mwa bende:
- ³Bero iwu ku kwiocwiny m'uai ba Mungu Wegwa man Rwoth Yesu Kristu.
- ⁴Afoyo Mungu para i kumwu thiri thiri, kum bero Mungu m'umire iwu ni kum Kristu Yesu;
- ⁵kum judwokowu julonyo i gin ceke ni kume, i wec ceke man i ng'eyong'ec ceke;
- ⁶cil calu lembatuca pa Kristu nyang' ko i iwu:
- ⁷ketho wubedo cen ungo kum giramia moko; ma wubekuro ko kanyuth pa Rwoth mwa Yesu Kristu;
- ⁸m'ebiketho wunyang' bende cil i kajikne, kara lembe bed umbe i wiwu i ceng' pa Rwoth mwa Yesu Kristu.
- ⁹Mungu en e mandha, ma julwong'owu ni kume i ripocwiny pa Wode ma Yesu Kristu Rwoth mwa.
- ¹⁰Nie abekwayuwu ma tek, umego, ku nying Rwoth mwa Yesu Kristu, ya kewu ceke wuwec lembe ma calacel, man ke pokri kud ubed i kindwu; endre wubed ma wuribru karacelo ku pidoic ma calacel man ku lembapoka ma calacel.
- ¹¹Kum jugolo beng'wu ira, juwada, ku yo ba juot pa Kloe, ya piem ni i kindwu.
- ¹²Nie lembe nini e ende, ya wun kubeng'wu kubeng'wu man wacu kumae, An a pa Paolo; man, An a pa Apolo; man, An a pa Kefa; man, An a pa Kristu.
- ¹³Kristu pokre? juguro Paolo iwu? kadi jumio iwu baputisi ku nying Paolo?
- ¹⁴Afoyo Mungu kum amio baputisi ngo ni ng'atu moko m'i kindwu, ndhu ni Krispo giku Gayo re;
- ¹⁵jumaru wacu ya jumio baputisi iwu ku nyinga.
- ¹⁶Man ke amio baputisi ni juot pa Stefano bende: mange re, ang'eyo ngo tek amio baputisi ni ng'atu moko mange.
- ¹⁷Kum Kristu ora ngo ya ami baputisi, ento kara ayer lembanyong'a ma juboth ko: ku rieke mi lembe ngo, yen m'athara pa Kristu maru doko mananu.
- ¹⁸Kum lembe mi yen m'athara bedo calu lemasegu ni ju ma girwinyo; ento iwa wa ju ma waboth re en e tego pa Mungu.

- ¹⁹Kum egore kumae, Abiroco rieko mi ju ma riek, Man ke abidwoko riu mi ju m'ung'eyo lembe doko mananu.
- ²⁰Jarieko ni kani? jagorcik ni kani? japiem mi rundi maeni ni kani? Mungu dwoko rieko m'i ng'om udoko ni lemcasegu ngo?
- ²¹Kum ni rieko pa Mungu ng'om ku rieko pare ng'eyo Mungu ngo, ebedo ber ni Mungu ya ebodh ju m'uyio ku casegu mi lembayera.
- ²²Kum Juyahudi gipenjo giranyutha, Juyunani ke gibeyenyo migi rieko:
- ²³ento wayero mwa Kristu ma jugure, ni Juyahudi lembene bedo ni gin ma redho jo, ni Thekdhanumange ke ebedo ni lemcasegu;
- ²⁴ento ni ju ma julwong'ogi re, Juyahudi giku Juyunani de, en e Kristu ma ego pa Mungu, ku rieko pa Mungu de.
- ²⁵Kum lemcasegu pa Mungu e riek ma sagu dhanu; man ke ng'ic pa Mungu e tek ma sagu dhanu.
- ²⁶Dong' wunen lwong'o mu, umego, ya ju ma gi riek ku kum gi dupa ngo, ju ma jutego de gi dupa ngo, ju ma gi judwong' de gi dupa ngo, ma julwong'ogi:
- ²⁷ento Mungu foyo gin ma kitgi mbe i ng'om, kara eketh lewic umak ju ma gi riek; man Mungu foyo gin ma ng'ic m'i ng'om, kara eketh lewic umak weg tego;
- ²⁸man ke gin ma rac m'i ng'om, ku gin ma jucayugi de, e ma Mungu foyo, ku gin ma gimbe de, kara eketh gin ma ginuti gidok mananu:
- ²⁹kara kum moko kud uyungre i wang' Mungu.
- ³⁰Ento wun re wuai i bang'e i Kristu Yesu, ma judwoke iwa ni rieko m'uai ba Mungu, man bedopwe ku dwokrileng', man war:
- ³¹kara, calu egore kumae, Ng'atu m'ulule, dong' elule i Rwoth.

1 Jukorinto 2

- ¹An de, umego, kan abino i beng'wu, abino ku bero mi wec ungo kadi mi rieko de ngo m'ayero ko iwu lembatuca pa Mungu.
- ²Kum akeco ya kud ang'ei gin moko m'i kindwu, ndhu Yesu Kristu, en ma jugure.
- ³E abedo i kindwu m'abedo ng'ic, ku lworu, man ku mielkum ma dit.
- ⁴Wec para ku lembayerane de gibedo ni lembacung'a mi rieko ngo, ento i nyuth pa Tipo re man mi tego:
- ⁵kara yioyic mu kud ucung i rieko mi dhanu, ento i tego pa Mungu.
- ⁶Wayero rieko, ento, i kind ju ma wang'gi teng'ni kum lembe: ere rieko m'i ng'om maeni ngo, kadi mi jubim m'i ng'om maeni ngo, ma kakare bibekadhu:

⁷ento wayero rieko pa Mungu i lembamung'a, cil rieko m'ubedo apana, ma Mungu lar uketho ku kwong'a ma fodi ng'om umbe ni dwong' mwa:

⁸ma jubim m'i ng'om maeni moko mbe m'ung'eyo: kum tek ande ging'eyo, kuno di gikuguro Rwoth mi dwong' ungo;

⁹ento calu egore kumae, Gin ma wang' fokuneno ngo, ku ma ith de fokuwinjo ngo, Ma fokumondo de i adunde dhanu ngo, Gin ceke ma Mungu yiko ni ju m'umare.

¹⁰Ento Mungu nyuthogi iwa ku Tipo: kum Tipo beyenyo i gin ceke, eyo, cil lembe pa Mungu ma ng'eyo tek.

¹¹Kum ng'a m'i kind dhanu m'ung'eyo lembe m'i ng'atu moko, ndhu cwiny ng'atuca gire, ma ni i ie ngo? gin pa Mungu de kumeno ng'atu moko mbe m'ung'eyo, ndhu Tipo Mungu kende.

¹²Ento wajolo, tipo m'i ng'om ungo, ento tipo m'uai ba Mungu; kara wang'ei gin ma Mungu mio iwa k'abamba.

¹³Ginduni bende e ma wayero pire, ku lembe ma rieko mi dhanu beponjo re ngo, endre ma Tipo beponjo re; m'ebetuco lembe mi tipo ni ju ma gi weg tipo.

¹⁴Nie ng'atu ma mi kum ejolo gin mi Tipo Mungu ngo: kum gibedo ni lemkaasegu ire; man ecopo ng'eyogi ngo, kum jung'iogi ku tipo.

¹⁵Ento ng'atu ma won tipo re ng'io i gin ceke, man ke en gire ng'atu moko mbe ma ng'io lembe pare.

¹⁶Kum ng'a m'ung'eyo pidoic pa Rwothi, ketho eponje? Ento pidoic pa Kristu ni i bang'wa.

1 Jukorinto 3

¹An de, umego, acopo yero iwu ngo calu ni weg tipo, ento calu ni weg kum, ve ni mukere ma ni i Kristu.

²Akakuwu ku cak, ku ring'o ngo; kum fodi ecopre iwu ngo: eyo, cil ku kawono de ecopre iwu ngo;

³kum fodi wu weg kum: kum ka kumira ku dhau ni i kindwu, meni wu weg kum ungo, man ke wubewotho ve dhanu bewotho gin ungo?

⁴Kum ka ng'atu acel uwacu kumae, An a pa Paolo; mange ke wacu, An a pa Apolo: meni nwang'u wu dhanu ngo?

⁵Ka kumeno Apolo en e girang'o? man ke Paolo de en e girang'o? Gi jutim ma wuyio ni kumgi; man dhanu ceke kubang'gi kubang'gi ng'atuman bedo ko calu Rwoth umio ire.

⁶Apidho, Apolo ke kwoyo pi; ento nyai m'enyai ko Mungu mio en.

- ⁷Ka kumeno ng'atu m'upidho en e gin moko ngo, kadok en m'ekwoyo pi de; ndhu Mungu re m'umio nyai m'enyai ko.
- ⁸Nie ng'atu m'upidho ku ng'atu m'ukwoyo pi de gin acel: ento ng'atuman binwang'u sukulia pare gire rom ku tic pare gire.
- ⁹Kum wan wa jutic ma watimo karacelo waku Mungugi: wun wu girafura pa Mungu, wu giragoma pa Mungu.
- ¹⁰Calku bero pa Mungu ma jumio ira, acaku there ve jabodho ma riek m'ugomo ot; ng'atu mange de begomo yor i wie. Ento wek ng'atuman unen cu ram ebegomo ko yor i wie.
- ¹¹Kum there mange ng'atu moko copo caku ngo ma tung' ku eni ma jucaku, ma en e Yesu Kristu.
- ¹²Ento tek ng'atu moko begomo wi there mola ma kwar, man mola ma tar, ku kidi ma pire tek, ku yen, ku lum, ku soka;
- ¹³ku ba dhanu ceke ng'atuman tic pare binyuthre: kum cing' nino biwodhe ka ma leng', kum enyuthre i mac; man ke mac e ma biponjo tic mi dhanu en kubang'gi kubang'gi ram ebedo ko.
- ¹⁴Tek tic pa ng'atu moko m'egomo yor i wie bipor bo, ebinwang'u sukuliane.
- ¹⁵Tek tic pa ng'atu moko biwang', ruvwa bikwanye: ento en gire re ebiboth; endre calu kud i leb mac.
- ¹⁶Wung'eyo ngo ya wun wu hekalu pa Mungu, man Tipo Mungu de bedo i iwu?
- ¹⁷Tek ng'atu moko nyotho hekalu pa Mungu, Mungu binyothe; kum hekalu pa Mungu e leng', ma wun de wu hekalune.
- ¹⁸Dong' ng'atu moko kud uwondre gire. Tek ng'atu moko m'i kindwu ie wacu nyo e riek i ng'om maeni, wek edok jakasegu, kara edok riek.
- ¹⁹Kum rieko m'i ng'om maeni en e lemkasegu ku ba Mungu. Kum egore kumae, En m'emaku jurieko i riu migi:
- ²⁰man kendo, Rwoth ung'eyo lembapida mi jurieko, ya gi mananu.
- ²¹Kum kumeno dong' ng'atu moko kud ulule pi dhanu. Kum gin ceke en e mu;
- ²²kadok Paolo, kadi Apolo, kadi Kefa, kadi ng'om, kadi kwo, kadi tho, kadi gin ma kawono, kadi gin ma bibino; ceke en e mu;
- ²³wun ke wu pa Kristu; Kristu ke en e pa Mungu.

1 Jukorinto 4

- ¹Wek jukwanwa, calu wa jutim pa Kristu, man ke jukurpiny mi giramung'a pa Mungu.

- ²Mange ke, ebedo aketha ni jukurpiny ya ng'atuman junwang'e e ng'atu mandha.
- ³Ento kud i bang'a en e gin ma nyathigi ya wung'i i lembe para, kadi ya dhanu ging'i gin: eyo, ang'io lembe para gira ngo.
- ⁴Kum ang'eyo lembe moko ngo ma ni i bang'a; ento lembe m'i wia gonjre ni kum lembe maeni ngo: ento ng'atu m'ung'io lembe para en e Rwoth.
- ⁵Kum kumeno kud wupok lembe moko ma fodi nindone kutundo ngo, cil ma Rwoth biwok ko, m'ebiwodho gin m'i mudho m'upondo uwok i der, man ke ebinyutho lembapora mir adunde; e ku ba dhanu ku ba dhanu man bilund bedo ku pak pare m'uai ba Mungu.
- ⁶Nie gin maeni, umego, abeloko ya upore ku para ku pa Apolo bende piwu; kara wuponj ng'eyo ni kumwa ya kud wukadh ku wi lembe m'ubedo agora; kara ng'atu moko m'i kindwu kud utingre wi wadi ma ng'atuman tingre wi wadi man wi wadi.
- ⁷Kum ng'a m'uketho idok tung'i? man ke girang'o m'ibedo ko ma k'igamu agama iri ngo? ento tek igamu agama, idong' iheri nedi calu k'igamu agama ngo e?
- ⁸Wudaru yeng', wudaru doko julonyo, wumaku camu ker ma wambe: eyo an de ayenyo ya wucam ker, kara wan bende wacam ker wakudu.
- ⁹Kum, ia wacu nyo, Mungu wodhowa ni jukwenda m'e dong' jik ko ndhu, calu dhanu ma jugonjogi ni tho: kum judwokowa ni giranena ni ng'om, ni malaika ni dhanu bende.
- ¹⁰Wan wa jukusegu ni kum Kristu, wun re ma wu riek i Kristu; wan wa ng'ic, ento wun re wu tek; wun wu weg yung, ento wan re wabedo umbe yung.
- ¹¹Cil i saa ma kawono nini kec ubenegowa, ku rieu bende, man muneru, man jubesendowa, man ke kabedo mwa ma dhe mbe;
- ¹²man wamula ku tic, ma wabetimo ku cingwa giwa: ka jubecayuwa, e wamio mugisa; ka jubenyayu ragedo i kumwa, e waciro;
- ¹³ka jubecidowa, e wapaku dhogwa: judwokowa ni susu m'i ng'om ni cilo mi gin ceke, cil ku kawono nini.
- ¹⁴Agoro gin maeni ma nia unyai lewic i wiwu ngo, ento kara ajukwu calu nyithindho para ma jumer.
- ¹⁵Kum kadok juponji mu ma i Kristu gi rubanga apar ngi, ento wegwu re gi dupa ngo; kum anyolowu i Kristu Yesu ni kum lembanyong'a.
- ¹⁶Ka kumeno akwayuwu ma tek, wukwany kotha.
- ¹⁷Kum lembe nini aoro Timoteo i beng'wu, ma en e nyathin para ma jamer man mandha bende i Rwoth, m'ebipoyowu kum yo para m'i Kristu, cil calu abeponjo ku kaka ceke i kanisa ceke de.

¹⁸Nie jumoko gitingri, calu ya abebino i beng'wu ngo.

¹⁹Ento fodi nyanok abibino i beng'wu, tek Rwoth uyio; e abing'eyo, lembe mi ju ma gitingri ating'a ngo, ento tego re.

²⁰Kum ker pa Mungu eni i lembe ngo, ento eni i tego re.

²¹Wuyenyo ang'o? abibino i beng'wu kud ukede, kadi ku mer man ku cwiny mi bedoyo?

1 Jukorinto 5

¹Lembe yik andha nia tarwang' ni i kindwu, ma en e tarwang', ma kadok cli kind Thekdhanumange de embe, ya ng'atu acel m'i kindwu bedo ku ci won.

²E wutingru ating'a, man can unegowu ngo, kara ng'atu m'utimo tic maeni ukabre woko kud i kindwu.

³Kum andha, an m'ambe ku kum ento anuti ku cwiny re, adaru poko lembe pa ng'atu m'utimo ginduni kumeno calu ma tek anuti,

⁴i nying Rwoth mwa Yesu, wun ma wucokru karacelo, ku cwinya de, ku tego pa Rwoth mwa Yesu,

⁵kara jumi ng'atu ma kumeno ni Jok pi nyoth ma junyotho ko kum, kara cwiny uboth i ceng' pa Rwoth Yesu.

⁶Kulula mu e ber ungo. Wung'eyo ngo nia thobi ma nyanok thumo i kwen ceke?

⁷Wulwok thobi ma con cen, kara wubed kwen ma nyen, cil calu ma thobi mbe i beng'wu. Kum lam mwa mi kadhukuwijo judaru lamu, ndhu Kristu:

⁸kum kumeno dong' wakwiru agba, ku thobi ma con re ngo, kadok ku thobi mi cwiny mir akece ku dubo de ngo, ento ku kwen ma thobi mbe i ie mi cwiny ma abombi mbe i ie ku lemandha.

⁹Agoro iwu i waraga para ya kud wuribru ku weg tarwang';

¹⁰awacu ngo ma nia kud wuribru ki ku weg tarwang' m'i ng'om maeni, kadi ku ju ma ketho cwiny hai kum piny ku juvugdhanu de, kadi ku ju ma rwo ni ayi gin m'acwia, kum tek ebedo kumeni nwang'u wukoai aaia be kud i ng'ombuni:

¹¹ento calu lembe bedo kumeni, agoro iwu ya kud wuribru, tek ng'atu moko ma julwong'e umego e won tarwang', kadi ng'atu ma ketho cwinye hai kum piny, kadi ng'atu ma rwo ni ayi gin m'acwia, kadi jacai cac, kadi andrej kong'o, kadi javugdhanu; ku wagi ng'atu ma kumeni, kud wucam kude.

¹²Kum en e lembe para awene ma nia apok lembe mi ju ma gini woko? Wupoko lembe mi ju ma gini i ie ngo?

¹³Ento ju ma gini woko re Mungu poko lembe migi en. Dong' wukab jadubo nino woko kud i kindwu.

1 Jukorinto 6

- ¹Ng'atu moko m'i kindwu, ma tek lembe ni i kindgi giku wagi, lworro nege ngo nitere i titi i wang' weg gondri, ma k'etere i wang' jumaleng' ungo?
- ²Kadi wung'eyo ngo nia jumaleng' bipoko lembe mi ng'omi? man tek wupoko lembe mi ng'om, wuromo ngo ya wupok lembe ma nyanoki?
- ³Wung'eyo ngo ya wabipoko lembe mi malaika? mange ma sagu, lembe mi ng'om maeni?
- ⁴Ka kumeno tek en e lembe mu ya wupok lembe mi kwo maeni, wuketho ju ma kitgi mbe i kanisa gipoki?
- ⁵Ayero eni kara lewic unegwu. Ei, jucopo nwang'u jarieko acel ungo i kindwu ma bicopo poko lembe i kind utumin,
- ⁶ento umego cidho i titi kud umego, gicidho de i wang' ju ma gi juyic ungo?
- ⁷Eyo, kawono lembe rocre iwu dit, ma ng'atuman bedo ku lem titi i kindgi giku wadi e. Esagu ngo ya wucir gin ma rac ma jutimo i kumwu? esagu ngo ya wuyi juvugwu?
- ⁸Eyo, ento wutimo rac wun giwu, man wuvugo avugi, joni de gin umegwu.
- ⁹Kadi wung'eyo ngo ya ju ma gi weg gondri gibicamu ker pa Mungu ngo? ku juwondwu: kadok weg tarwang', kadi ju ma rwo ni ayi m'acwia, kadok ju ma gigieri swa, kadi ju ma gi calu mon, kadi ju ma timo sasa ku co wagi,
- ¹⁰kadi jukwo, kadi ju ma ketho cwinygi hai kum piny, kadok ju ma andrej kong'o, kadi jucac, kadi weg kuvuga, gibicamu ker pa Mungu ki ngo.
- ¹¹Jumoko m'i kindwu de naka gi wagi ju ma kumeni: ento julwokowu, ento judwokowu leng', ento lembe m'i wiwu gonjre i nying Rwoth Yesu Kristu, man i Tipo pa Mungu mwa.
- ¹²Cik uyio ira gin ceke; endre gin ceke kubedo ber ira ngo. Cik uyio ira gin ceke; ento akwero ya ku judwoka jamiru mi gin moko.
- ¹³Cemo en e mi jambic, jambic ke mi cemo: ento Mungu biketho jambic ku cemo de doko mananu. Ento kum re en e mi tarwang' ungo, ento ni Rwoth re; Rwoth ke ni kum:
- ¹⁴man Mungu ting'o Rwoth, e ebiting'owa bende malu ku tegone.
- ¹⁵Wung'eyo ngo nia kumwu gi wathkum Kristu? abilund kabu wathkum Kristu woko, man abidwokogi ni wathkum dhaku ma won tarwang'i? Awene.
- ¹⁶Kadi wung'eyo ngo ya ng'atu m'uribre ku dhaku ma won tarwang' gi kum aceli? kum, Gin ario, ewacu, gibidoko kum acel.
- ¹⁷Ento ng'atu m'uribre ku Rwoth en e tipo acel.

¹⁸Wuring tarwang'. Dubo ceke kubang'e ma dhanu betimo ubedo woko i kume; ento ng'atu m'utimo tarwang' meca edubo kum kume gire.

¹⁹Kadi wung'eyo ngo ya kumwu en e hekalu pa Tipo Maleng' ma ni i iwu, ma wubedo ko m'uai ba Mungu? man ke wu mu giwu ngo;

²⁰kum jung'iewowu ku wel piny: ka kumeno dong' wuyung Mungu i kumwu.

1 Jukorinto 7

¹Nie pi gin ma wugoro pire: ebedo ber ni ng'atu ma nico ya kud emul kum nyaku.

²Ento, kum tarwang', wek co kubang'gi kubang'gi ng'atuman ubed ku cege gire, man ke mon de kubang'gi ku.. bang'gi wek ng'atuman ubed ku cware gire.

³Wek ng'atu ma nico uribre ku cege ku mer: dhaku bende kumeno giku cware.

⁴Dhaku tegone mbe kum kume gire, ento cware re: ng'atu ma nico bende kumeno tegone mbe kum kume gire, ento cege re.

⁵Kud wukwer ribru karacelo, ma tek wukuripo pire ngo mi nindo moko, kara wumiru giwu ni rwo, e ka wudong' wubed karacelo kendo, kara Jok kud ubidhwu ku lembe mi dhiro wi kum ungo.

⁶Ento maeni ayero kum ju.. yio ya ayer, ma ang'ola re ngo.

⁷Endre ayenyo ya dhanu ceke bed calu an. Ento ku ba dhanu ceke ng'atuman ubedo ku giramia pare m'uai ba Mungu, acel kumae, mange ke kumae.

⁸Ento awacu ni ju ma aradu man ni mon ma coggi tho de kumae, Maku gibed ndhu calu an.

⁹Ento tek gicopo ciro ava kumgi ngo, wek gigambri: kum tek jugambri ber ma sagu tek kumgi reuni.

¹⁰Ento ni ju ma gigambri ang'olo igi ku.. mae, ere an ungo, ento Rwoth re, Ya dhaku kud uwek cware

¹¹(ento tek eai, wek ebed ndhu musuma, kadi gitit kindgi giku cwarene); man ya nico kud uwek cege.

¹²Ento ni dong dhanu awacu kumae, Rwoth re ngo: Tek umego moko bedo ku cege ma jayic ungo, ma cegene de maru ya gibed gikude, dong' kud eweke.

¹³Man ke dhaku ma tek ubedo ku cware ma jayic ungo, ma cwarene de maru ya gibed gikude, dong' kud ewek cwarene.

¹⁴Kum cware ma jayic ungo judwoke leng' ni kum cege, man ke dhaku ma jayic ungo judwoke leng' ni kum umego: tek ebedo kumeno ngo nwang'u nyithindho mu gibedo ma gi leng' ungo; ento kawono gi leng'.

¹⁵Ento tek ng'atu ma jayic ungo ai, wek eai; umego kadi nyamego de gi jumiru ni wagi lembe ma kumeni ngo; ento Mungu iwong'owa i kwiocwiny.

- 16**Kum ing'eyo nenedi, E dhaku, tek ibibodho cweri? kadi ing'eyo nenedi, E nico, tek ibibodho cegi?
- 17**Ento, calu Rwoth udaru poko ni dhanu kubang'gi kubang'gi, calu Mungu daru lwong'o dhanu kubang'gi kubang'gi, wek ewoth kumeca. E ang'olo lembe kumeno i kanisa ceke.
- 18**Julwong'o ng'atu moko ma judaru timo yaa i kume? dong' kud edok calu ma jutimo yaa i kume ngo. Julwong'o ng'atu moko ma fodi jukutimo yaa i kume ngo? dong' ku jutim yaa i kume.
- 19**Yaa en e gin moko ngo, yaango de en e gin moko ngo; ento woro lembang'ola pa Mungu re.
- 20**Ku ba dhanu ceke wek ng'atuman ubed ku rambe ma julwong'e ko.
- 21**Julwong'i ma nwang'u i jamiru? cwinyi kud upid pire: ento, tek ecopre iri ya ibed agonya, dong' iyi.
- 22**Kum ng'atu ma julwong'e i Rwoth ma nwang'u en e jamiru, en e ng'atu m'agonya pa Rwoth: kumeno de ng'atu ma julwong'e ma nwang'u ebedo agonya de, en e jamiru pa Kristu.
- 23**Jung'iewowu ku wel piny; kud wudok jumiru mi dhanu.
- 24**Umego, ku ba dhanu ceke wek ng'atuman ubed ku Mungu ku rambe m'ebedo ko kinde ma julwong'e.
- 25**Nie pi nyir ma sumba abedo ku lembang'ola pa Rwoth ungo: ento amio lembe ma ia poro, calu ng'atu m'unwang'u kisa ba Rwoth ya ebed mandha.
- 26**Ia wacu kumeno ya eni ber kum lem ma tek ma kawono ma ni i kumwa, ya e ber ni ng'atu ma nico nia ebed ndhu ku rambe m'ebedo ko.
- 27**Ibedo atwia ku dhaku? kud iyeny nia jugonyi. Ibedo agonya ni dhaku? kud iyeny dhaku.
- 28**Ento tek igamu, meca idubo ngo; man tek nyaku ma sumba gomo co, meca edubo ngo. Ento wagi ju ma kumeni binwang'u can i kum: man ayenyo acerwu ni maeni.
- 29**Ento ayero maeni umego, nindo dong' cek, kara ugambre kawono ju ma gidaru gambri gibed calu gikugambri ngo;
- 30**man ju m'uywak, calu gikuywak ungo; man ju ma anyong'a benegogi, calu ma anyong'a negogi ngo; man ju m'ung'iewo ng'ieu, calu gikubedo ku jupiny ungo;
- 31**man ju ma gitimo ni ng'om maeni, gibed calu gikutimo dit ungo: kum ayi ng'om maeni bekadhu woko.
- 32**Ento ayenyo wubed agonya ni gin ma dieng'o cwiny. Ng'atu ma en e jamusuma ie pido pi gin pa Rwoth cu, maram ecopo nyayu ko mutoro i Rwoth:

³³ento ng'atu ma won dhaku re ie pido pi gin m'i ng'om, maram ecopo nyayu ko mutoro i cege.

³⁴Man tung' tung' maeni bende ni i kind dhaku ku nyaku ma sumba. Ng'atu m'ugomo co ngo eparu pi gin pa Rwoth cu, kara ebed leng' i kume kud i cwinye bende: ento ng'atu ma cware nuti re ie pido pi gin m'i ng'om, maram ecopo nyayu ko mutoro i cware.

³⁵Man ayero maeni ni kuloka mu giwu; ma nia abol ko uwic i wiwu re ngo, endre kum maeno ma maku wutim, man kara wutim ni Rwoth ma gin moko mbe m'ucerowu.

³⁶Ento tek ng'atu moko ie wacu nyo etimo rac kum nyare ma sumba, tek nwang'u kagame kadhu, man tek emaku ya ecidhi, wek etim gin m'eyenyo; meca edubo ngo; wek gigambri.

³⁷Ento ng'atu ma adundene cungo tek, ma lembe moko mbe m'ucung'e, ento tego pare nuti kum lembe ma ie caku, man ekeco maeni i adundene gire, ya egwok nyare ma dhe ubed sumba, meca etimo dre.

³⁸Ka kumeno ng'atu m'umio nyare ma dhe ma sumba ya junyom meca etimo dre; man ng'atu m'umio nyare ngo ya junyom etimo ber m'usagu.

³⁹Dhaku bedo atwia maram cware fodubedo kwo; ento tek cware tho, meca egonjre m'ecopo gomo ma ie yenyo; ndhu i Rwoth.

⁴⁰Ento ia poro, nia anyong'a pare sagu tek ebedo kende; man ia wacu nia an bende Tipo Mungu ni kuda.

1 Jukorinto 8

¹Nie pi gin ma julamu ni ayi gin m'acwia: wang'eyo nia kawa ceke wa weg ng'eyong'ec. Ng'eyong'ec ketho jutingri, endre mer ketho juteng'ni ateng'a.

²Tek ng'atu moko ie wacu nia eng'eyo gin moko, meca fodi eng'eyo ngo ma calu maku eng'ei;

³endre tek ng'atu moko maru Mungu, e ng'atuno Mungu ng'eye.

⁴Kumeno de pi camu gin ma julamu ni ayi gin m'acwia, wang'eyo nia ayi gin m'acwia en e gin moko ngo i ng'om, man ke Mungu acel kende mange mbe.

⁵Kum kadok moko nuti ma julwong'ogi ya mungu, kadok i polo kadi i ng'om, calu mungu m'araga gi dupa, man rwodhi de gi dupa,

⁶ento iwa re Mungu en e acel, ma Wego, ma gin ceke ai i bang'e, ku wan bende i bang'e; man ke Rwoth acel, ma Yesu Kristu, ma gin ceke bedo ni kume, wan bende nikume.

⁷Ento ng'eyong'ec maeno ni i dhanu ceke ngo: ento jumoko, ma ging'io kud ayi gin m'acwia cil ku kawono nini, gicamu calu ya gicamu gin ma julamu ni ayi gin m'acwia; e pidocwinygi ma ng'ic ca cido.

⁸Ento cemo dwokowa ber en i wang' Mungu ngo: kadok, tek wacamu ngo, wakubed rac ma sagu ngo; kadok, tek wacamu, wakubed ber ma sagu ngo.

⁹Ento wubed ku weng'wu tego mu maeni maru doko ni gin ma redho jo ni ju ma ng'ic;

¹⁰kum tek ng'atu moko neni m'i won ng'eyong'ec m'ibedo dhu cemo i hekalu mir ayi gin m'acwia, e ng'atu ma tek e ng'ic nica pidocwinye bidoko tek m'ecamu ko gin ma julamu ni ayi gin m'acwia ca ngo?

¹¹Kum ni kum ng'eyong'ec peri ng'atu ma ng'ic nica erwinyo, en e umego ma Kristu tho pire.

¹²E kumeno, ka wudubo kum umego, man wucobo pidocwinygi ma nwang'u e ng'ic, meca wudubo kum Kristu.

¹³Kum kumeno, tek cemo ketho wada kier, abicamu ring'o ngo cil rondo ku rondo, kara kud aketh wada kier.

1 Jukorinto 9

¹Abedo agonya ngo? an a jakwenda ngo? aneno Yesu ma Rwoth mwa ngo? wun wu bodho para ngo i Rwothi?

²Tek an a jakwenda ngo ni jumange, ento iwu re an a jakwenda; kum wun nini e ma wun ayi kwenda para i Rwoth.

³Dhoga m'aloko ni ju m'uluro i lembe para e eni.

⁴Wan tego mwa mbe ma wacamu ko ku ma wamadhu ko de?

⁵Wan tego mwa mbe mawapeyo ko dhaku ma jayici, cil calu dong jukwenda, man utumin Rwoth, ku Kefagi?

⁶Kadi an a kenda waku Barnaba, tego mwa mbe ma wawek ko tici?

⁷Asikari makani ma timo lwiny ku jupiny pare gire? ng'a ma pidho podho mir ulok, ma kucam nyinge ngo? kadi ng'a ma tungo udul lim, ma kumadh cag udul limbe de ngo?

⁸Ayero gin maeni calu dhanu yero? kadi cik bende yero kumeni ngo?

⁹Kum egore i cik pa Musa kumae, Kud wutwi dhu koni dhiang' kinde m'ebeyoko cam. I Mungu bepido pi koni dhiang',

¹⁰kadi eyero lembe maeni ndhu kum lembe mwa? Eyo. kum lembe mwa: kum ng'atu m'ufuro fur maku efur ku genogen, man ng'atu m'ufodo de, maku efod ma ie geno ya ebimaku.

- 11** Tek wacoyo iwu gin mi tipo, en e gin ma dit tek wabikayu gin mu mi kumi?
- 12** Tek jumange gibedo ku tego maeni i wiwu, wabedo kumeno ma sagu ngo? Ento watimo ku tego maeni ngo, endre wamula ku gin ceke, kara ku wacer lembanyong'a ma juboth ko pa Kristu.
- 13** Wung'eyo ngo nia ju ma gitimo kum gin ma leng' gicamu gin mi hekalu, man ju ma gitimo kum pemplam gibedo ku maka migi karacelo ku pemplami?
- 14** Cil kumeno Rwoth uketho ya ju ma giyero lembanyong'a ma juboth ko gibibedo de ni kum lembanyong'a nini.
- 15** Ento atimo gin maeni acel de ngo; man agoro gin maeni ngo ma nia etimbre ira; kum e ber ira tek atho, sagu ma tek ng'atu moko thiro kulula para.
- 16** Kum tek ayero lembanyong'a ma juboth ko, gin moko mbe i bang'a m'alula i kume; kum juketho lembene i kora; kum can i wia, tek ayero lembanyong'a ma juboth ko ngo.
- 17** Kum tek atimo eni ku yeny m'ayenyo ra, anwang'u sukuliane: endre tek ku yeny m'ayenyo an ungo, e judaru ketho tic i kora.
- 18** Kum kumeno sukulia para en e ang'o? Nia, kan ayero lembanyong'a ma juboth ko, aketh lembanyong'ane wok mananu, kara kud atim ku tego ceke i lembanyong'a calu ma nwang'u acopo timo.
- 19** Kum kadok abedo agonya ni dhanu ceke, adwokra gira igi ceke ni ng'eca, kara alim dhanu m'usagu.
- 20** Man ni Juyahudi adoko calu Jayahudi, kara alim Juyahudi; ni ju ma gini the cik ke, calu ani the cik, ma nwang'u an gira ke ani the cik ungo, kara alim ju ma gini the cik;
- 21** ni ju ma cik umbe kugi, calu m'ambe ku cik, ma an ke ambe ku cik ungo ku ba Mungu, endre ani the cik ni Kristu, kara alim ju ma cik umbe kugi.
- 22** Ni ju ma ng'ic adoko ng'ic, kara alim ju ma ng'ic: adoko gin ceke ni dhanu ceke, kara ku yo moko abodh dhanu moko.
- 23** Man atimo gin ceke ni lembanyong'a ma juboth ko, kara an bende agam maka para karacelo ku joca.
- 24** Wung'eyo ngo nia ju ma giringo i kwaya ma jubolo giringo ceke, endre ng'atu acel e ma nwang'u sukulia mi sag m'esagu ko? E wuring kumeni; kara wusagi.
- 25** Man ku ba dhanu nzu m'uponjo ya esag i kwaya ma jubolo edhiro wi ava gin ceke. Nie gitime kara ginwang' jamkermiwic ma nyothre; ento mwa re ma nyothie ngo.
- 26** Ka kumeno aringo kumeni, calu ma swa ngo; abecwanyu kumeni, calu m'acwanyu lietho ngo:

²⁷ento afodo kuma, man adwoke ni ng'eca: kuno nyo ku yo moko, ku yo ng'ei yero lembe ni jumange, an nini e ma jubicora cen.

1 Jukorinto 10

¹Kum ayenyo ngo wubed cobo, umego, ya wegwa ceke yang' gini ther afuru, man kagi ceke gikadhu kud i nam;

²man ke kagi ceke jumio igi baputisi ba Musa i afuru kud i pi bende;

³man ke kagi ceke gicamu cemo mi tipo ma calacel;

⁴man kagi ceke gimadhu giramadha mi tipo ma calacel: kum gimadhu kum kidi mi tipo m'ulubo ng'eigi; e kidine en e Kristu.

⁵Ento Mungu maru pi jukucel ma dit m'i kindgi ngo: kum juredhogi piny i yamba.

⁶Nie gin maeni bedo iwa ni por, kara awanya ma rac kud unegwa kum gin ma rac, calu awanya ma rac yang' unegogi bende.

⁷Kadi kud wubed ju ma rwo ni ayi gin m'acwia, calu jumoko m'i kindgi; calu egore kumae, Dhanu gibedo piny nicamu nimadhu de, man giai malu nituko.

⁸Kadi ku watim tarwang', calu jumoko m'i kindgi timo, man gipodho rubanga pier ario wi adek i ceng' acel.

⁹Kadi ku wabidh Rwoth, calu jumoko m'i kindgi gibidho, man githo ni thwol.

¹⁰Kadi kud wung'ur calu jumoko m'i kindgi ging'ur, man githo ni janyoth piny.

¹¹Nie gin maeni timbre igi ni por; man ke jugoro ni juk mwa, wan ma kajik rundi ni i wiwa.

¹²Kum kumeno wek ng'atu ma ie wacu ya ecungo ebed ku wang'e emaru podho.

¹³Abidhe moko mbe m'uwok i kumwu ma jukucop bedo ko ngo; ento Mungu en e mandha, m'e.. biyio ngo ya jubidhwu ma sagu ma wucopo bedo ko: ento karacelo kud abidhe nica ebiketho yojboth bende, kara wucopo cire.

¹⁴Kum kumeno, jumerna, wuring rwo ma jurwo ko ni ayi gin m'acwia.

¹⁵Ayero calu ni jurieko; wung'i gin m'ayero.

¹⁶Kikombe mi ngisi ma wamio mugisa i wie, eribowa karacelo i rimo pa Kristu ngo? Kwen de ma wang'weko, eribowa karacelo i kum Kristu ngo?

¹⁷kum wan, ma wa dupa, wa kwen acel, wa kum acel: kum wan ceke wang'wenyo kum kwen acel.

¹⁸Nen Israel ma ku kum: gi ju ma gicamu giralama gi juriblembe giku pemblam ungo?

¹⁹Kan ayer ang'o ke? ya gin ma julamu ni ayi gin m'acwia en e gin moko, kadi ya ayi gin m'acwia de en e gin moko?

- ²⁰Ento awacu, nia gin ma Thekdhanumange gilamu, meca gilamu ni pajogi, ni Mungu ngo: man ayenyo ngo ya wuribru ku pajogi.
- ²¹Wucopo madhu kikombe pa Rwoth, ku kikombe mi pajogi de ngo: wucopo ng'wenyo ngo wi par pa Rwoth, ku wi par mi pajogi de.
- ²²Kadi waketh nyeko tim Rwothi? tego mwa sagu pare?
- ²³Cik uyio gin ceke; ento gin ceke ber ungo ya jutim. Cik uyio gin ceke; ento gin ceke teug'o jo ngo.
- ²⁴Ng'atu moko kud uyeny ire gire, ento pa wadi re.
- ²⁵Gin ma tek juloko i katali, wucam, ma wukupenjo penji moko ngo ni cwinywu m'ubepido;
- ²⁶kum ng'om en e pa Rwoth, ku gin ceke m'upong' i ie de.
- ²⁷Tek ng'atu moko m'i kindgi m'uyio ngo lwong'owu i agba, e wun bende wuyenyo wucidhi; e gin ma tek juketho i weng'wu, wucam, ma wukupenjo penji moko ngo ni cwinywu m'ubepido.
- ²⁸Ento tek ng'atu moko wacu iwu kumae, Maeni julamu alama, kud wucam, ni kum ng'atu m'uwe nini, man ni kum cwiny m'ubepido:
- ²⁹cwiny m'ubepido, awacu, peri giri ngo, endre pa ng'atu mange; kum gony m'abedo ko agonya e, cwiny m'ubepido pa ng'atu mange ng'olo lembe pire nedi?
- ³⁰Tek agamu ku foyofoc, juyero pira rac nedi kum gin maeni m'afoyo kume foci?
- ³¹Ka kumeno kadok wucamu, kadi wumadhu, kadi gin ceke ma tek wutimo, wutim ceke ni dwong' pa Mungu.
- ³²Kud wutim gin moko ma ketho jukier, kadi ni Juyahudi, kadi ni Juyunani, kadi ni kanisa pa Mungu:
- ³³cil calu an bende anyayu mutoro i dhanu ceke i gin ceke, m'abeyenyo ko kuloka para gira ngo, ento mi dhanu dupa, kara gibothi.

1 Jukorinto 11

- ¹Wukwany kotha, calu an bende akwanyu koth Kristu.
- ²Nie apakuwu kum wupoi i kuma i gin ceke, man ke wuceru wi lembapoka, cil calu amio kogi iwu.
- ³Ento ayenyo wung'ei, nia wi co ceke kubang'gi kubang'gi en e Kristu; man wi dhaku en e ng'atu ma nico; wi Kristu ke en e Mungu.
- ⁴Co ceke kubang'gi tek eberwo kadi ebeewo, ma wie bedo arieba, meca enyayu lewic i wie.

- ⁵Ento ku ba mon re ceke ma tek eberwo kadi ebeewo ma wie kubedo arieba ngo meca enyayu lewic i wie; kum en e calacel ma tek wie bedo agwara.
- ⁶Kum tek dhaku kuriebo wie ngo, wek wie bed anyara: ento tek en e lewic ni dhaku ya junyar wie kadi jugwar de, e dong' wie bed arieba.
- ⁷Kum ng'atu ma nico maku wie kud ubed arieba, kum en e ayi ku dwong' pa Mungu: ento dhaku re en e dwong' pa ng'atu ma nico.
- ⁸Kum ng'atu ma nico ai ba dhaku ngo; ento dhaku re m'uai ba ng'atu ma nico:
- ⁹kum kadi ng'atu ma nico de kucwire ngo pi dhaku; ento ng'atu ma dhaku re m'ucwire pi ng'atu ma nico:
- ¹⁰kum lembe nini maku dhaku bed ku giranyutha mi ng'ol i wie, ni kum malaika .
- ¹¹Karacelo ku maeni, dhaku bedo umbe ng'atu ma nico ngo, ng'atu ma nico de kubedo umbe dhaku ngo, i Rwoth.
- ¹²Kum calu dhaku ai ba ng'atu ma nico, e kumcno bende ng'atu ma nico de nyole ni kum dhaku; ento gin ceke ai ba Mungu.
- ¹³Wupok wun i kindwu giwu: emaku piny nia dhaku rwo ni Mungu ma wie bedo arieba ngo?
- ¹⁴Cil kurajo de ponjowa ngo, nia, tek ng'atu ma nico yukwie wobo, en e lewic ire?
- ¹⁵Ento dhaku re tek yukwie wobo, en e dwong' ire: kum yukwie mire ire ni girauma.
- ¹⁶Ento tek ng'atu moko nyutho nia eyenyo piem, kura ma kumeno wambe kudo, kadok kanisa pa Mungu de.
- ¹⁷Ento kan amio iwu lembang'ola maeni, apakuwu ngo, kum wucokru ma wutimo ko ber m'usagu ngo, ento ma wutimo ko rac ma sagu.
- ¹⁸Kum ma kwong'a, ma nwang'u wucokru i kanisa, awinjo nia pokri ni i kindwu; nyakanok ci ayenyo yie de.
- ¹⁹Kum yic mi ndra bende gibibedo umbe ngo i kindwu be, kara ju ma jufoyogi ginyuthri i kindwu.
- ²⁰Ka kumeno ka wucokru karacelo, wucopo camu cemo pa Rwoth ungo:
- ²¹kum ka wubecamu dhanu ceke kubang'gi ng'atuman lar maku cemo pare mir uthieno gire ma fodi wagi kumaku ngo; man acel kec unege, mange ke mer amera.
- ²²Ei, wun udi mu mbe ma wucam i ie wumadh de i ie? kadi wucayu kanisa pa Mungu acaya, man wunyayu lewic wi ju ma gimbe ku pinyi? Abiyero ang'o iwu? abipakuwu? I maeni apakuwu ngo.

- ²³Kum agamu ba Rwoth maeno m'amio iwu, nia Rwoth Yesu ting'o kwen i diewor ma jucibe i ie;
- ²⁴e kan efoyo foc, eng'weko ie, man ewacu kumae, Maeni kuma, ma en e piwu; wutim kumeni wupoi ko pira.
- ²⁵Eting'o kikombe bende kumeca, yo ng'ei cemo mir uthieno, ewacu kumae, Kikombe maeni en e lembariba ma nyen i rimba: wutim maeni, ku ba madhu ceke ma wumadhe, i poi ma pira.
- ²⁶Kum ku ba camu kwenduni ma wucamu, man ku ba madhu kikombe ma wumadhu nini, wunyutho tho pa Rwoth cil m'ebino ko.
- ²⁷Kum kumeno ng'atu ma tek bicamu kwenduni kadi ma bimadhu kikombe maeni ma pa Rwoth swa, e lembapoka mi kum Rwoth ku rimbe de bibedo i wie.
- ²⁸Endre wek ng'atuman ung'i i ie gire, e kan edong' ecam kwenduni, emadh kum kikombe de.
- ²⁹Kum ng'atu m'ucamu m'umadhu de, meca ecamu emadhu de lembapoka ire gire, tek eng'io kum nini ngo.
- ³⁰Kum lembe nini dupa m'i kindwu gibedo ng'ic kumgi de jutho, man dupa ginindo.
- ³¹Ento tek wang'io i lembe mwa giwa, kuno di jupoko lembe mwa ngo.
- ³²Ento ka jupoko lembe mwa, e Rwoth ponjowa, kara ku jubin jupok lembe mwa rac karacelo ku ng'om.
- ³³Kum kumeno, juwada, ka wucokru karacelo nicamu. wukur juwedwu man ukur wadi man ukur wadi.
- ³⁴Tek ng'atu moko kec ubenege, dong' ecam ku thugi; kara cok ma wucokru ko karacelo kud ubed ni lembapoka. Dong lembe abiyiko ceng' ma tek awok.

1 Jukorinto 12

- ¹Nie pi giramia mi tipo, umego, ayenyo kud wubed cobo.
- ²Wung'eyo nia kinde ma fodi wu Thekdhanumange jupeyowu bang' ayi gin m'acwia ma ajuba, calu ma tek jutelo wiwu.
- ³Kum kumeno aketho wung'ei, nia ng'atu moko mbe m'ebeyero ku Tipo pa Mungu ma wacu kumae, Yesu en e Anathema; (thelebene kumae, Kwong' ni i wi Yesu); man ke ng'atu moko mbe ma copo wacu kumae, Yesu en e Rwoth, ndhu ku Tipo Maleng' re.
- ⁴Nie giramia gi tung' tung', endre Tipo en e acel.
- ⁵Man tic de gi tung' tung', Rwoth re en e acel.

- ⁶Man tic m'ubetimbre gi tung' tung', endre Mungu en e acel, m'ubetimo gin ceke i ceke.
- ⁷Ento jumio nyuthonyuth mi Tipo ni dhanu kubang'gi kara unyai igi kuloka.
- ⁸Kum ni ng'atu acel jumio lembe mi rieko ni kum Tipo; ni mange ke lembe mi ng'eyo girang'eya, calku Tipo maeni nini:
- ⁹ni ng'atu mange ke yioyic, i Tipo maeni nini, man ni ng'atu mange giramia mi keyokum, de i Tipo acel;
- ¹⁰man ni ng'atu mange tego mi musana; man ni ng'atu mange lembila; man ni ng'atu mange ng'ic ma jung'io ko tipo: ni ng'atu mange dhok ma tung' tung'; man ni ng'atu mange rieko mi loko dhok ma tung' tung':
- ¹¹ento gin maeni ceke Tipo acel maeni nini timo en, m'epoko ni dhanu kubang'gi calu ie yenyo.
- ¹²Kum calu kum en e acel, wadhe de gi dupa, man wathkum ceke mi kum, ma gi dupa, gi kum acel; Kristu bende kumeno.
- ¹³Kum i Tipo acel jumio baputisi iwa kawa ceke i kum acel, kadok Juyahudi kadi Juyunani, kadok jumiru kadi paker; man juketho ceke umadh kum Tipo acel.
- ¹⁴Kum kum en e wathkum acel ungo, endre dupa.
- ¹⁵Tek tielo biwacu kumae, Kum an a cing' ungo, an a mi kum ungo; kum kumeno en e mi kum ungo ngo.
- ¹⁶Man tek ith uwacu kumae, Kum an a wang' ungo, an a mi kum ungo; kum kumeno embe i kum ungo.
- ¹⁷Tek kum kubang'e ceke en e wang', girawinja ke ni kani? Tek ceke en e girawinja, girang'wia ke ni kani?
- ¹⁸Ento kawono Mungu ketho wathkum kubang'gi i kum, cil calu ie yenyo.
- ¹⁹Man tek kagi ceke gi wathkum acel, kum ke ni kani?
- ²⁰Ento kawono gi wathkum dupa, endre kum acel.
- ²¹Man wang' copo wacu ngo ni cing' kumae, Lembe para mbe i beng'i: man kendo kadi wic de copo wacu ni tielo ngo kumae, Lembe para mbe i beng'i.
- ²²Ungo, ma sagu dit, wathkum maeno mi kum ma juwacu nyo gi ng'ic ma sagu wagi e ma maku gibed nuti be:
- ²³man ke wathkum maeno, ma wawacu nyo gi nyaswaswa, joni e ma wayungogi dit ma sagu: man wathkumwa ma gilony hai ungo nini e ma gilony ma sagu;
- ²⁴kum wathkumwa ma gilony can gin moko negogi ngo: ento Mungu ribo kum karacelo, m'emio yung ma sagu ni wathkum ma yung umbe kude;

²⁵kara pokri kud uwok i kum; ento kara wathkum gikungri calacel man ukung wadi man ukung wadi.

²⁶Man tek wathkum acel ubesendre, wathkum ceke gisendri karacelo gikude; kadi tek juyungo wathkum acel, wathkum ceke anyong'a negogi gikude.

²⁷Nie wun wu kum Kristu, man wu wathkume ma tung' tung' kubeng'wu kubeng'wu.

²⁸E Mungu ketho moko i kanisa, ma kwong'ane jukwenda, mir arionde jubila, mir adege ke juponji, macen ke tego mi musana, macen ke giramia mi keyo kum, man konyokony, ku bimobim, ku dhok ma tung'.

²⁹Kagi ceke gi jukwenda? kagi ceke de gi jubila? kagi ceke gi juponji? kagi ceke de gi jutic mi musana?

³⁰kagi ceke gi weg giramia mi kum acanga? kagi ceke giyero ku dhok ma tung'i? kagi ceke giloko lembe mi dhoki?

³¹Ento wuyeny k'amora giramia m'usagu.

1 Jukorinto 13

¹Man ke anyutho iwu yo ma kadhu wi maeni ceke. Tek ayero ku dhok mi dhanu man mi malaika, ma mer ke mbe kuda, meca adoko ni mola m'ubeywak, kadi ngara m'ubeyengre ayenga.

²Man ke tek a won giramia mi lembila, man ang'eyo giramung'a ceke ku girang'eya de ceke; man tek a won yioyic ceke, m'acopo ketho ko gudi ai cen, ento mer umbe kuda, meca an a mananu.

³Man tek awodho piny para ceke ya atung ko jucan, man tek amio kuma juwang'awang'a, ento mer umbe kuda, meca eloko ira gin moko ngo.

⁴Mer ciro lembe hai, man ebedo ber; mer kumira nege ngo; mer yungre gire ngo, etingre ngo,

⁵etimbre rac ungo, eyenyo gin ma pare gire ngo, lembe ton i ie ngo, ekwanu dubo ngo;

⁶anyong'a nege ngo i gondri, ento anyong'a nege karacelo ku lemandha;

⁷emule ku gin ceke, eyio gin ceke, egeno gin ceke, eciro gin ceke.

⁸Mer jik i yo ki ngo: ento kadok lembila nuti, jubikabugi woko; kadok dhok ma tung' nuti, gibiling'; kadok ng'eyong'ec nuti, jubikabe woko.

⁹Kum wang'eyo kucel, waewo de kucel;

¹⁰ento ka maeno ma bedo ndhu cu wok m'ubedo kucel no jubikabu woko.

¹¹Ka fodi a nyathin, aweco va nyathin, yeny ma ia yenyo calu pa nyathin, ia pido de ve nyathin; kawono m'adoko nico, aketho gin mi nyithindho cen.

¹²Kum kawono wabeneno i kieu via via; ento macen wabinendra ku wang'wa: kawono ang'eyo kucel; ento macen abing'eyo cu cil calu an bende jung'eya cu.

¹³Ento kawono yioyic, ku genogen, ku mer, maeni adek ginuti; man ma dit ma kind maeni en e mer.

1 Jukorinto 14

¹Lub tok mer; ento iyeny k'amora giramia mi tipo, ento ma sagu kara wueu.

²Kum ng'atu m'ubeyero ku dhok ma tung' eyero ni dhanu ngo, endre ni Mungu; kum ng'atu moko mbe m'ung'eyo there; ento kud i cwinye ebeyero giramung'a.

³Ento ng'atu m'ubeewo meca eyero ni dhanu gin ma teng'o jo, man ponji, man juk.

⁴Ng'atu m'uyero ku dhok ma tung' eteng'o cwinye gire; ento ng'atu m'uewo eteng'o kanisa.

⁵Nie ayenyo kewu ceke wuwec ku leb ma tung', ento ma sagu re ya wueu: man ng'atu m'uewo esagu ng'atu m'uyero ku dhok ma tung', tek eloko dhokne ngo, kara kanisa teng'ni.

⁶Ento kawono, umego, tek abino i beng'wu m'abeweco ku dhok ma tung', abiloko girang'o iwu, tek ayero iwu ku giranyutha de ngo, kadi ku girang'eya de ngo, kadi ku ewo lembila de ngo, kadi mi ponjo ponji de ngo?

⁷Cil gin ma kwo mbe kugi, m'ubewodho dwal, kadok usegu kadi thum, tek giwodho dwal ma tung' tung' ungo, jubing'eyo gin ma jubekudho kadi ma jubegoyo de nenedi?

⁸Kum tek agwara kuywak ku dwande ma cu ngo, ng'a ma biyikre gire mir ali?

⁹Wun bende kumeno, tek wuweco wec ku dhok ma winjre yot yot ungo, jubing'eyo gin ma juyero nenedi? kum nwang'u wubibeweco i lietho.

¹⁰Andha nyo dwal ma tung' nuti dupa i ng'om, moko mbe de m'unyutho gin moko ngo.

¹¹Ka kumeno tek ang'eyo thelembe m'i dwalne ngo, abibedo calu dhanu ma sai ni ng'atu m'ubeyero, ng'atu m'ubeyero nica de bibedo calu ng'atu ma sai ira bende.

¹²Kumeno wun bende, kum nwang'u ava giramia mi tipo negowu dit, dong' wuyeny kara wusagi ma wuketh ko kanisa teng'ni.

¹³Kum kumeno wek ng'atu m'uyero ku dhok ma tung' ukwai Mungu kara elok dhokne.

¹⁴Kum tek arwo ku dhok ma tung', meca cwinya berwo en, ento ng'eyong'ec para cego nyinge ngo.

- 15**Ka nenedi ke? Abirwo ku cwinya, man abirwo ku ng'eyong'ec bende: man abiwero wer ku cwinya, abiwero wer de ku ng'eyong'ec bende.
- 16**Tek e kumeno ngo tek ibemio mugisa ku cwiny, ng'atu ma sang'na bidong' wacu Amen nenedi kum foc m'ibefoyo, m'eng'eyo gin m'ibeweco ngo e?
- 17**Kum andha ibemio foyofoc dre, ento ng'atu mange re teng'ni ngo.
- 18**Afoyo Mungu, ayero ku dhok ma tung' ma sagu wun ceke:
- 19**ento i kanisa ayenyo ayer lembe abic ku ng'eyong'ec para, kara aponj jumange bende, sagu ma tek ayero lembe rubanga apar ku dhok ma tung'.
- 20**Umego, kud wubed nyithindho i pidoic: endre wubed mukere i lembakece, i pidoiwu re wubed dhanu.
- 21**I cik egore kumae, Rwoth uwacu kumae ku dhanu mi dhok ma tung' man ke ku dendhok mi welo abiyero ni dhanu maeni; ento kadok atim kumeni de gibliwinja ngo.
- 22**Kum kumeno dhok ma tung' en e pi giranyutha, ni juyic ungo, ento ni ju ma gi juyic ungo re: ento ewo en e giranyutha, ni ju ma gi juyic ungo ngo, endre ni ju ma gi juyic.
- 23**Ka kumeno tek kanisa ceke cokri karacelo ma kagi ceke giweco ku dhok ma tung' e dhanu ma gibedo sang'na kadi ma gi juyic ungo gimondo, gibiwacu ya wun abelu ngo?
- 24**Ento tek ceke giewo, man ng'atu ma jayic ungo kadi ng'atu m'ubedo sang'na de mondo, e epoi kum pire ma rac ni kumgi ceke, lembapoka de podho i wie ni kumgi ceke;
- 25**lembamung'a mi cwinye de wok ka ma leng'; kum kumeno ebipodho piny i wang'e man ebirwo ni Mungu, m'ebiwacu ya Mungu ni i kindwu andha.
- 26**Ka ke ang'o, umego? Ka wucokru karacelo, kubeng'wu kubeng'wu ng'atuman ubedo ku zaburi, ubedo ku lem ponji, ubedo ku lembanyutha, ubedo ku dhok ma tung', ubedo ku lok ma juloko ko dhokne. Dong' jutim gin ceke mi teng'oteng'.
- 27**Tek ng'atu moko yero ku dhok ma tung', wek juario kadi juadek ku giyer mange, man gilau alawa; man wek ng'atu acel ulok dhokne;
- 28**ento tek jaloko mbe, wek ebed ling' i kanisa; man wek eyer ire gire, man ni Mungu.
- 29**Man wek jubila ario kadi adek giyer, man wek juwagi ging'i ie.
- 30**Ento tek lembanyutha unyuthie ni wadi m'ubedo i vute, wek ng'atu ma kwong'a bed ling'.
- 31**Kum kewu ceke wucopo ewo acel acel, kara ceke uponj ng'eyo, man ceke de nwang' juk;

- ³²man cwiny mi jubila gibedo wor ni jubila;
- ³³kum Mungu en e Mungu mi yakni ngo, endre mi kwicwiny. Calu kanisa ceke mi jumaleng’,
- ³⁴wek mon gibed ling’ i kanisa: kum juyio igi ngo ya giyer; ento wek gibed wor, calu cik bende yero.
- ³⁵Man tek giyenyo giponj ng’eyo gin moko, wek gipenj coggi gigi ku thugi: kum en e lewic ni mon tek giyero i kanisa.
- ³⁶Ang’o? lembe pa Mungu ai i beng’wu? kadi ebino i beng’wu wu kendwu?
- ³⁷Tek ng’atu moko ie pido ya e jabila, kadi e won tipo, dong’ emak ng’eyo pi gin m’agoro iwu, ya gi lembang’ola pa Rwoth.
- ³⁸Ento tek ng’atu moko bedo cobo, wek ebed cobo.
- ³⁹Kum kumeno, juwada, wuyeny k’amora ya wueu, man kud wukwer ya juyer ku dhok ma tung’.
- ⁴⁰Ento wek jutim gin ceke cu kakare bende.

1 Jukorinto 15

- ¹Nie aketho wung’ei lembanyong’a maeni ma juboth ko m’ayero iwu ma wujolo bende, ma wucungo i ie bende, umego,
- ²ma wuboth de ni kume, tek wutwiru ndhu wi lembe m’ayero iwu, tek wukuyio mananu ngo.
- ³Kum alar amio iwu maeca ma an bende ajolo: ya Kristu tho kum dubo mwa calku lembagora pa Mungu:
- ⁴ya juyike bende; man nia ecer i ceng’ mir adege calku lembagora pa Mungu;
- ⁵man nia enen ni Kefa; macen ke ni juapar wi ario;
- ⁶macen enyuthre ni umego ma sagu dak abic wang’ acel, jumoko m’i kindgi ginindo, ento jukucel ma dit gidong’ cil eni;
- ⁷macen enyuthre ni Yakobo; macen ke ni jukwenda ceke;
- ⁸man yo ng’eye ceke, calu ni nyathin ma junyole ma fodi kanyol pare kutundo ngo, e enyuthre ira bende.
- ⁹Kum an a nok ma sagu jukwenda wada ceke, m’aromo ngo ya julwong’a jakwenda, kum anyayu ragedo kum kanisa pa Mungu.
- ¹⁰Ento ni kum bero pa Mungu abedo ku ramba nini: man ke berone m’emia junwang’u ebedo mananu ngo: ento amula ku tic ma sagugi ceke: endre an ungo, ento bero pa Mungu m’ubedo kuda re.
- ¹¹E kadok an, kadi gin de, wayero kumeni, wun bende wuyio kumeni.

- 12**Nie tek juyero ya Kristu cer uai ku kind ju m'utho, jumoko m'i kindwu giwacu ya cer ma kind ju m'utho mbe nenedi?
- 13**Ento tek cer mi ju m'utho mbe, kadok Kristu de cer ungo:
- 14**man tek Kristu kucer ungo, nwang'u lembayera mwa bedo mananu, yioyic mu bende bedo mananu.
- 15**Eyo, wan de junwang'u wa junyuth mi ndra pa Mungu; kum wanyutho pi Mungu ya eketho Kristu cer eting'e malu: m'eting'e malu ngo, tek ebedo kumeno nia ju m'utho gicer ungo.
- 16**Kum tek ju m'utho gicer ungo, kadok Kristu de cer ungo:
- 17**man tek Kristu kucer ungo, yioyic mu en e mananu; nwang'u fodi wuni i dubo mu.
- 18**E joni bende ma ginindo i Kristu girwinyo.
- 19**Tek wageno Kristu i kwo maeni kende, nwang'u wa jucan ma sagu dhanu mange ceke.
- 20**Endre kawono Kristu cer ku kind ju m'utho, en e mwoka ma kwong'a mi ju m'unindo.
- 21**Kum tho wok ni kum dhanu, cer ma kind ju m'utho bende wok ni kum dhanu.
- 22**Kum calu i Adamu dhanu ceke tho, e kumeno bende i Kristu dhanu ceke binwang'u kwo.
- 23**Ento dhanu acel acel ku kakagi kendgi: Kristu landu wi mwoka; macen ju ma gi pa Kristu, i bino pare.
- 24**E kajikne lund ubino, kan ebimio ker ni Mungu, ma en e Wego; kinde m'ebidaru kabu bimobim ceke ku ng'ol ceke man tego.
- 25**Kum ebikocamu ker be, cil m'ebiketho ko jukwoje ceke the tiende.
- 26**Jakwor macen ma bikabre en e tho.
- 27**Kum, Eketho gin ceke doko wor the tiende. Ento kan ewacu kumae, Gin ceke juketho ubed wor, e jung'eyo nia lembene coko ng'atu m'uketho gin ceke bed wor ire ngo.
- 28**Man ka judwoko gin ceke bed wor ire, e Wod nini bende bilund doko wor ire en e ng'atu m'edwoko gin ceke bed wor ire, kara Mungu bed ceke i ceke.
- 29**Tek ebedo kumeno ngo ju ma jumio baputisi igi kaka ju m'utho gibitimo ang'o? Tek ju m'utho gicer ki ngo, jumio baputisi kakagi mir ang'o?
- 30**nedi wakuno kumwa bende ni tho ku ba saa ceke?

- ³¹Ayero ku ba kulula maeni m'alulo ko piwu, umego, m'abedo ko i Kristu Yesu Rwoth mwa, atho ku ba rupiny.
- ³²Tek ku kura dhanu anyegra ku yedi i Efeso, kuloka para e girang'o? Tek ju m'utho cer ungo, wek wacam wamadhi, kum urwo watho.
- ³³Ku juwondwu: Rib ma juribri ko ku ju ma pigi rac nyotho pi jo ma ber.
- ³⁴Dong' wuceu ni bedonger pwe de, man kud wudubi; kum jumoko ng'eyong'ec pa Mungu mbe kugi: ayero eni kara lewic unegwu.
- ³⁵Ento ng'atu moko biwacu kumae, Ju m'utho gicer nenedi? Giwok ku kum manedi?
- ³⁶I jakasegu, maeno m'icoyo in enwang'u kwo ngo tek ekoetho ngo:
- ³⁷maeno de m'icoyo, icoyo kum ma bibedo ngo, endre kodhi ma kodhi kende, kuno mi nganu, kadi kwond kodhi mange;
- ³⁸ento Mungu mio kum ire cil calu ie yenyo, man emio kum ni kodhi ndri kubang'gi kubang'gi.
- ³⁹Ring'o ceke ring'o acel ungo: ento acel ring'o mi dhanu, ring'o mange ke mi lei, ring'o mange ke mi winyo, mange ke mi rec.
- ⁴⁰Kum m'i polo bende nuti, man kum m'i ng'om: ento dwong' mi m'i polo en e acel, mi m'i ng'om bende en e mange.
- ⁴¹Dwong' mi ceng' de acel, dwong' mange ke mi dwi, dwong' mange ke mi cero; kum dwong' mi cero acel e tung' ku cero mange.
- ⁴²E cer mi ju m'utho bende bedo kumeno. Jucoye i nyoth; ecer umbe nyoth:
- ⁴³jucoye m'umbe yung; ecer i dwong': jucoye i ng'ic; ecer i tego:
- ⁴⁴jucoye m'e kum mi kum; ecer de m'e kum mi tipo. Tek kum mi kum nuti, kum mi tipo bende nuti.
- ⁴⁵Egore kumeno bende kumae, Ng'atu ma kwong'a ma Adamu doko ni ng'eyong'ec ma kwo. Adamu macen udoko ni tipo ma mio kwo.
- ⁴⁶Ento maeno ma mi tipo, en e ma kwong'a ngo, ento maeno ma mi kum re; macen re ma mi tipo.
- ⁴⁷Ng'atu ma ma kwong'a ca eai i ng'om, en e mi ng'om; ng'atu ma mir arionde en e mi polo.
- ⁴⁸Calu gin m'i ng'om ubedo, e ju ma gi mi ng'om bende gibedo kumeca: man calu m'i polo bedo, e ju ma gi mi polo de gibedo kumeca.
- ⁴⁹Man calu wan wadaru bedo kud ayi maeni mi ng'om, e wabibedo kud ayi maeni mi polo bende.

⁵⁰Nie ayero maeni, umego, nia ring'kum ku rimo copo camu pacu mi ker pa Mungu ngo: kadok nyothri de copo camu pacu m'umbe nyothii ngo.

⁵¹Nen, ayero iwu giramung'a: Kawa ceke wabinindo ngo, ento jubelokowa kawa ceke,

⁵²nyapil calu goyowang', kinde ma agwara ywak macen: kum agwara biywak, man ju m'utho bicer m'umbe nyothri, e wan de jubelokowa.

⁵³Kum maeni ma nyothre ekoerony ma nyothre ngo be, man ng'atu ma tho maeni ekoerony ma tho ngo be.

⁵⁴Ento ka ma nyothre maeni daru ronyo ma nyothre ngo, man tek ma tho maeni daru ronyo ma tho ngo, lembe m'ugore bilund timbre kakare m'uwacu kumae, Jumwonyo tho i aloci.

⁵⁵E tho, aloci peri ane? E tho, kwirni ane?

⁵⁶Kwir mi tho en e dubo; man tego mi dubo en e cik:

⁵⁷ento foyofoc ni Mungu, m'umio iwa aloci ni kum Rwoth mwa Yesu Kristu.

⁵⁸Kum kumeno, juwada ma jumer, wucung nging' nging', ma wulokru ngo, ma wusegru thiri thiri i tic pa Rwoth, kum wung'eyo nia tic ma wumulu kudo en e mananu ngo i Rwoth.

1 Jukorinto 16

¹Nie pir ajok ma ni jumaleng', calu ang'olo ni kanisa mi Galatia, e wun bende wutim kumeca.

²I ceng' ma kwong'a ma yenga wun kubeng'wu kubeng'wu wukoi piny wuketh i beng'wu i kakan, calku ma wunwang'u, kara ku jujok ajok moko kan awok.

³E kan awok, dhanu ma tek wufoyogi, e abiro joni ku waraga giter ajok mu Yerusalem;

⁴man tek emaku ya an bende acidhi, e wabacidho wakugi.

⁵Ento abibino i beng'wu, nwang'u akadhu kud i Makedoni; kum abikadhu akadha kud i Makedoni;

⁶ento kuno nyo wabibedo wakudu, kadi cil i nindo mi koyo, kara wuketha i woth para ka ma tek acidho i ie.

⁷Kum ayenyo anenwu kawono ngo m'akadhu akadha; kum ageno wabirio nindo moko wakudu, tek Rwoth uyio.

⁸Ento abibedo Efeso maram Pentekote biwok ko;

⁹kum Mungu daru yabu ira dhugola ma dit mi kuloka ma dit, man ke judegi gi dupa.

- ¹⁰Nie tek Timoteo bino, wunen nia wubed kugi ma lworu mbe i kume; kum etimo tic pa Rwoth, calu an bende atimo:
- ¹¹ka kumeno ng'atu moko kud ucaye. Ento wukethe i woth pare ma cwinye kwio, kara ebin i bang'a: kum abekurogi gikud umego.
- ¹²Ento pi lembe pa Apolo m'umegwa, akwaye wang' udul ya ebin i beng'wu karacelo kud umego: man eyenyo ki ngo ya ebin kawono; ento ebibino nwang'u nindo m'ubedo ber ire wok.
- ¹³Dong' wukuru, wucung ki ki ki i yioyic, wubed ratego pami co, wubed tek.
- ¹⁴Wek gin ceke ma wutimo utimbre i mer.
- ¹⁵Nie abekwayuwu ma tek, umego (wung'eyo ot pa Stefano, nia en e landu wi mwoka mir Akaya, nia gikethri de gigi ya gitim ni jumaleng'),
- ¹⁶ya wun bende wubed wor ni wagi ju ma kumeno, man ni dhanu ceke kubang'gi kubang'gi ma gikonjri gikugi i tic man gimuli i tic.
- ¹⁷Man afoyo kum Stefano giku Fortunato man Akaiko giwok: kum joni giketho maeni m'urem iwu uwok.
- ¹⁸Kum gidwoko cwinya ku mu bende: ka kumeno dong' wung'ei wagi ju ma kumeni.
- ¹⁹Kanisa mir Asia gimothowu. Akula giku Priskila gimothowu dit i Rwoth, karacelo ku kanisa m'i ot migi.
- ²⁰Utumego ceke gimothowu. Wumothru ku cwioctic ma leng'.
- ²¹Moth para an a Paolo gira ku cinga.
- ²²Tek ng'atu moko maru Rwoth ungo, wek ebed anathema. Maranatha.
- ²³Bero pa Rwoth Yesu Kristu bed i beng'wu.
- ²⁴Merna bed i beng'wu ceke i Kristu Yesu. Amen.

2 Jukorinto

2 Jukorinto 1

- ¹Paolo, jakwenda pa Yesu Kristu ni yeny ma Mungu yenyo, man Timoteo m'umegwa, ni kanisa pa Mungu ma ni i Korinto, ku jumaleng' ceke ma ni i Akaya yu:
- ²Bero iwu man kwicwiny m'uai ba Mungu ma Wegwa man Rwoth Yesu Kristu.
- ³Mugisa ni Mungu man Won Rwoth mwa Yesu Kristu, ma Wego mi kisa man Mungu mi jukojuk ceke;
- ⁴m'ejukowa i can mwa ceke, kara wacopo juko ju ma gini i can moko, ni kum jukojuk ma Mungu juko ko wan giwa.
- ⁵Kum calu sendri pa Kristu sagre iwa, e kumeno jukojuk mwa bende sagre ni kum Kristu.
- ⁶Ento kadok wasendra, en e pi jukojuk mu man both mu; kadi kadok wabedo ajuka, en e pi jukojuk mu, m'ubetimbre i ciro can ma calacel ku maeno ma wan bende wasendra kudo ku twicwiny:
- ⁷man genogen mwa piwu cungo tek; ma wang'eyo ko nia, calu wun wugamu kum sendrine, kumeno bende wu jugam jukne.
- ⁸Kum wayenyo ngo, umego, ya wubed cobo kum lembe mi can ma wanwang'u i Asia, ya junurowa piny apila, ma sagu tego mwa, ketho cwinywa ai cil kum kwo:
- ⁹eyo, wan giwa wabedo ku lembang'ola mi tho yor i iwa giwa, kara ku wagendra giwa, ento i Mungu re ma ting'o ju m'utho:
- ¹⁰m'elaruwa kud i tho ma dit kumeni, man ebilaru: e waketho genogen mwa i ie ya ebilaruwa asu bende;
- ¹¹ma wubekonyo karacelo bende piwa ku kwac ma wukwayu; kara, kum giramia ma jumio iwa ni kum dhanu dupa, foyofoc umire ku dhanu dupa ni kumwa.
- ¹²Kum kulula mwa e eni, lembatuca mi pidocwiny mwa, nia i leng'cwiny man cwiny ma abombi mbe i ie pa Mungu, i rieke mi kum de ngo endre i bero pa Mungu, watimbra giwa i ng'om, ma sagu dit yor i beng'wu.
- ¹³Kum wagoro iwu giki mange ngo, ndhu ma wusomo kadi ma wutuco, man ageno de ya wubituco cil i kajikne:
- ¹⁴calu jumoko m'i kindwu bende gituco piwa, ya wan wa kniula mu, cil calu wun bende wu mwa, i ceng' pa Rwoth mwa Yesu.
- ¹⁵E i genogen maeni nwang'u ia pido ya alar abin i beng'wu, kara wunwang' kuloka mir arionde;

¹⁶man abikadhu kud i beng'wu m'acidho ko i Makedoni, man kendo kud i Makedoni abibino i beng'wu, e wun e ma wubicika i woth para m'acidho ko i Yahudi.

¹⁷E kinde ma ia pido kumeno, anyutho lok ma pidoia lokre ko swa? kadi gin m'akeco ya abitimo, akeco calku kum, ya eyo eyo kud ungo ungo ubed nuti i bang'a?

¹⁸Ento calu Mungu en e mandha, lembe mwa ma yor i beng'wu de en e eyo kud ungo de ngo.

¹⁹Kum Wod Mungu, Yesu Kristu, en nini ma pire yere i kindwu ni kuma, ndhu ni kuma waku Siluano man Timoteo, en e eyo kud ungo de ngo, ento i ie re en e eyo.

²⁰Kum kadok lembang'ola pa Mungu gi dupa, e eyo ni i ie: kum kumeno amen bende ni i kume, ni dwong' pa Mungu ni kumwa.

²¹Nie ng'atu m'uketho wanyang' wakudu i Kristu, en m'ewirowa de, en e Mungu;

²²en bende m'eketho ayi i kumwa, man emio mukwatu mi Tipo i adundewa.

²³Ento alwong'o Mungu ni jamulembe mi pidoic para, kum ngisi nega i kumwu ketho akwero bino Korinto.

²⁴En e kum wan wa rwodhi mi yioyic mu ngo, endre wa jukony mi mutoro mu: kum i yioyic wucungo ki.

2 Jukorinto 2

¹Ento akeco mae ira gira, ya kud abin i beng'wu ku can kendo.

²Kum tek anyayu can i iwu, ka ng'a ke ma lund nyayu mutoro i ia ndhu ng'atu m'anyayu can i ie?

³Man agoro gin maeni nini, kara, kinde m'awok, kud anwang' can ba ju ma maku anwang' mutoro re; m'ageno ko wun ceke, nia mutoro para en e mutoro mu ceke.

⁴Kum agoro iwu ku piwang' dupa kud i can ma dit ku ndiba mir adunde de; kara ya anyai can i iwu ngo, ento kara wung'ei mer para ma dit m'usagre yor i beng'wu.

⁵Ento tek ng'atu moko nyayu can, meca enyayu can, ira ngo, ento kume moko iwu ceke (kara kud anurwu ma sagu).

⁶Masendi maeni ma ju ma dupa giketho i wie eromo wagi ng'atu ma kumeni;

⁷kum kumeno ma tung' ku eni maku wuwek lembe pare woko man wujuke, kara ng'atu ma wagi maeni kud umwonjre ku yo moko ni kum can pare m'usagu.

⁸Kum kumeno akwayuwu ma tek ya wunyuth ire mer mu ma wumare ko.

⁹Kum lembe nini bende ketho agoro iwu, kara ang'ei mulo piwu ma jumulo, tek wuwor i gin ceke.

¹⁰Ento ni ng'atu ma wuweko ire gin moko woko, an bende aweko woko: kum gin ma tek an bende adaru weko woko, tek adaru weko gin moko, meca aweke ni kum lembe mu i wang' Kristu;

¹¹kara Jok kud unwang' kuloka i wiwa: kum wan wacobo ngo kum pidoic pare.

¹²Nie kinde m'abino Troa pi lembanyong'a pa Kristu ma juboth ko, man kinde ma dhugola yabre ira i Rwoth,

¹³cwinya kwio ngo, kum anwang'u Tito m'umira ngo: ento kan awekogi, acidho i Makedoni.

¹⁴Ento foyofoc ni Mungu, m'etelo wiwa thiri thiri i sag ma jusagu ko ni kum Kristu, man eketho mido mi ng'eyong'ec pare nyuthie i kaka ceke ni kumwa.

¹⁵Kum wan wa mido ma ng'ar pa Kristu ni Mungu, i ju ma giboth, man i ju ma girwinyo;

¹⁶ni acel mido m'uai ba tho tundo de ba tho; ni mange ke mido m'uai i kwo tundo de i kwo. Ng'a ke m'uromo ni gin maeni?

¹⁷Kum wan wa calu dupa ngo, ma gibenyotho lem pa Mungu: ento wayero mwa i Kristu, endre calu ma abombi mbe i cwinywa, ento calu pa Mungu i wang' Mungu.

2 Jukorinto 3

¹Wan wamaku foira giwa kendo? kadi wayenyo waraga mi foc ma jufoyo ko jo, calu jumoko, ma wabin ko i beng'wu kadi ma waai ko i beng'wu?

²Wun wu waraga mwa, ma jugoro i adundewa, ma dhanu ceke ging'eyo gisomo de;

³ma juketho enyuthre ya wun wu waraga pa Kristu, ni kum tim ma watimo, ma jukugoro ku vino ngo, endre ku Tipo pa Mungu ma kwo; ku ban mi kidi ngo, ento i ban ma adunde mi ring'kum.

⁴Man wabedo ku genogen ma kumeni yo ba Mungu ni kum Kristu:

⁵ya wan waromo giwa wan ungo, ma nia wapor gin moko calu eai i bang'wa wan: endre rom mwa ma waromo kudo ai ba Mungu;

⁶en bende m'eketho waromo calu jutim mi lembariba ma nyen; mi nyiguta ngo, ento mi tipo re: kum nyiguta nego, endre ripo mio kwo.

⁷Ento tek timotim mi tho, ma i nyiguta, ma jutong'o i kidi, uwok ku dwong', ketho ya nyithindho pa Israel gicopo neno wang' Musa tel ungo ni dwong' mi wang'e; ma dwong'ne bekadhu woko:

⁸timotim mi tipo dwong'ne bisagu hai ngo?

⁹Kum tek timotim mi pokolemba rac dwong'ne nuti, e timotim mi bedopwe dwong'ne sagu dit.

- ¹⁰Kum andha maeno m'unwang'u dwong' k'enwang'u dwong' kum gin maeni re ngo, ni kum dwong' m'usagu asaga.
- ¹¹Kum tek maeno m'ubekadhu woko no bedo ku dwong', m'udong' no e m'ubedo i dwong' ma sagu apila.
- ¹²Ka kumeno wan ma wabedo ku genogen ma kumeni, waweco ku tegocwiny ma dit,
- ¹³man wa calu Musa ngo, m'uumo bongu i wang'e, kara nyithindho pa Israel ku ginen kajik mi gino tel m'ubekadhu woko:
- ¹⁴endre pidoic migi bedo nwang': kum cil i ceng' maeni nini ku som ma jusomo ko lembariba ma con bongu nica fodubedo kakare, m'ebenyuthre igi ngo nia lembariba ma con ukabre woko ni kum Kristu.
- ¹⁵Ento cil i ceng' maeni, kinde ma tek jusomo Musa, e bongune umo adundegi.
- ¹⁶Ento kinde ma tek ebilokre ni Rwoth, bongune kabre woko.
- ¹⁷Nie Rwoth en e Tipo maeni: man ka ma Tipo Rwoth ni i ie, e gony de nuti.
- ¹⁸Ento wan ceke, ma bongu mbe i wang'wa ma wabeneno dwong' pa Rwoth calu i kieu, e walokra wadoko calu ayi maeni m'uai i dwong' utundo de i dwong', cil calu m'eai ba Rwoth ma Tipo.

2 Jukorinto 4

- ¹Ka kumeno kum wabedo ku tim maeni, calu wanwang'u kisa, e wavoc ungo:
- ²ento wadaru kwero giramung'a mi lewic, ma wabewotho ko ku rieko mir awondi ngo, kadi ma wabetimo lembe pa Mungu ku ndra de ngo; ento ku nyuthonyuth mi lemandha ma wabefoira ko ni pidocwiny mi dhanu kubang'gi kubang'gi i wang' Mungu.
- ³Man tek lembanyong'a mwa ma juboth ko uumbre ku bongu, meca eumbre ni ju ma girwinyo:
- ⁴i joca mungu mi ng'om maeni yutho wang' pidoic mi ju ma juyic ungo, kara der mi lembanyong'a ma juboth ko mi dwong' pa Kristu, ma en e ayi Mungu kud uler igi.
- ⁵Kum wayero piwa giwa ngo, ento Kristu Yesu re ya Rwoth, man wan nini ya jumiru mu ni kum Yesu.
- ⁶Kum en e Mungu m'uwacu kumae, Der birieny kud i mudho, m'edaru rieny i adundewa, kara emi der mi ng'eyong'ec mi dwong' pa Mungu i wang' Yesu Kristu.
- ⁷Ento wabedo ku piny m'akana maeni i agulu mir ulobo, kara dwong' m'apila mi tego maeni ubed pa Mungu, man m'uai i bang'wa giwa re ngo;

⁸Judiowa yo kun ku kun ceke, ento rititi re ngo; cwinywa ng'abre, endre cwinywa kuai ungo;

⁹Juriemowa, ento jukukunowa de ngo; juredhowa piny, ento jukunyothowa de ngo;

¹⁰wabeyeyo nek pa Yesu thiri thiri i kum, kara kwo pa Yesu bende nyuthre i kumwa.

¹¹Kum wan ma wakwo nini juting'owa thiri thiri wang' tho pi Yesu, kara kwo pa Yesu bende unyuthre i kumwa ma tho.

¹²Ka kumeno tho betimbre i iwa, ento kwo re i iwu.

¹³Ento ma wabedo ku tipo mi yioyic ma calacel, calku maeni m'ugore kumae, Ayio, e kumeno bende ayero; wan bende wayio, e kumeno bende wayero;

¹⁴ma wang'eyo ko nia ng'atu m'uketho Rwoth Yesu cer ebiketho wacer bende karacelo ku Yesu, man ebikethowa i wang'e wakudu.

¹⁵Kum gin ceke en e piwu, kara bero maeni, m'ucikumedre ni kum dhanu dupa, uketh foyofoc usagre ni dwong' pa Mungu.

¹⁶Kum kumeno wavoc ungo; ento kadok ng'atu mwa ma yo woko betop, ento ng'atu mwa ma yor i iwa doko nyen ku ba rupiny ku ba rupiny.

¹⁷Kum can mwa ma yot, ma nyagwil, etimo iwa ter mi dwong' ma nja ku nja ma sagu dit apila;

¹⁸nwang'u fodi wabeneno ngo ba gin ma nen, ento ba gin ma nen ungo re: kum gin ma nen kadhu akadha; ento gin ma nen ungo re bedo rondo ku rondo.

2 Jukorinto 5

¹Kum wang'eyo nia tek ot ma ku ng'om mi hema mwa loi, wabedo ku giragoma m'uai ba Mungu, en e ot ma jutimo ku cing' ungo, ma nja ku nja, i polo.

²Kum andha wacur acura i maeni, ma wabeyenyo dit jurony ot mwa m'uai i polo wi kumwa:

³tek ebedo kumeno nia juronywa e jubinwang'u wabedo muneru ngo.

⁴Kum andha wan ma wani i hema maeni wacur acura, ma jubenurowa; ma nia wayenyo jukab ko kendi mwa ngo, ento wayenyo nia jurony kud i wie, kara mi tho nini umwonjre ku kwo.

⁵Nie ng'atu m'utimowa pi gin maeni nini en e Mungu, m'emio iwa mukwatu mi Tipo.

⁶Ka kumeno wan ma wabedo thiri thiri ku tegocwiny, ma wang'eyo nia, kinde ma wani thuwa i kum, wambe ku Rwoth

⁷(kum wawotho ku yioyic, ku neno re ngo);

⁸wabedo ku tegocwiny, awacu, man wayenyo ma sagu ya wabed umbe kum, man wabed thuwa waku Rwothgi.

⁹Kum kumeno bende wakeco mwa, nia kadok wani thuwa kadi wambe, wabed ma wanyayu mutoro i ie.

¹⁰Kum wan ceke wabikonyuthra be ngbeng' i wang' kom mi ng'olo lembe pa Kristu; kara dhanu ceke kubang'gi kubang'gi ng'atuman unwang' gin m'utimbre i kum, rom ku gin m'etimo, kadok ebeto ber kadi rac.

¹¹Ka kumeno wan ma wang'eyo lwooro pa Rwoth, wathoko dhanu, ento junyuthowa ngbeng' ni Mungu; man ke ageno ya wanyuthra ngbeng' bende i pidocwinywu.

¹²Wafoira kendo ngo iwu, ento calu wabemio iwu kafoiri ma ni kumwa, kara wubed ku gin moko ma wulok ni ju ma gifoiri kum giranena, man ku yo i adunde re ngo.

¹³Kum kadok rieke mwa rwinyo iwa, en e ni Mungu; kadi kadok wa weg pidoic ma nger, en e iwu.

¹⁴Kum mer pa Kristu becwaluwa; kum wang'olo kumeni, ya acel utho pi ceke, ka kumeno ceke tho;

¹⁵man etho pi ceke, kara ju m'ubedo kwo ku gibed kwo i kumgi gigi kendo, endre ire m'etho i kumgi man ecer kendo.

¹⁶Kum kumeno ugambre kawono cil macen wang'eyo ng'atu moko ngo ni kum gin mi kum: kadok wadaru ng'eyo Kristu ni kum gin mi kum, ento kawono wang'eye kumeno kendo ngo.

¹⁷Kum kumeno tek ng'atu moko ni i Kristu, meca en e giracwia ma nyen: gin ma con udaru kadhu; nen, gidoko nyen.

¹⁸Ento gin ceke ai ba Mungu, m'eketho kindwa poto wakugi en ni kum Kristu, man emio iwa tic mi pot;

¹⁹en e kumeni, ya Mungu ni i Kristu m'ebepoto ng'om ire gire, ma k'ebekwanu kier migi igi ngo, nwang'u emio iwa lembe mi pot.

²⁰Ka kumeno wa judhulembe ka Kristu, calu ma tek Mungu bekwayu kudwa: wabekwayuwu ma tek ni kum Kristu, wuketh kindwu pot ku Mungugi.

²¹En m'eng'eyo dubo tak de ngo edwoke ni dubo piwa; kara wadok ni bedopwe pa Mungu ni kume.

2 Jukorinto 6

¹E wan ma wabetimo karacelo wakude wabethokowu bende ya kud wujol bero pa Mungu mananu

- ²(kum ewacu kumae, I nindo m'uyire awinjoi, Man i ceng' both akonyi: nen, kawono en e nindo ma yire; nen, kawono en e ceng' mi both):
- ³ma wabemio ko kakier i gin moko ngo, kara timotim mwa ubed ma titi mbe i wie;
- ⁴endre wabefoira giwa i gin ceke, calu jutim pa Mungu, i twiocwiny ma dit, kud i can, ku can piny m'unegowa, ku lem ma tek,
- ⁵ku wang' goc, ku kol, i yakni, kud i tic ma jumuli ko, kud i kurokur, kud i kwirocam;
- ⁶kud i bedo ma ijo bedo ko leng', i ng'eyong'ec, i mwonyolembe ma jumwonyo hai, ku bedo ber ku dhanu, i Tipo Maleng', i mer ma abombi mbe i ie,
- ⁷i lembe mi lemandha, man i tego pa Mungu; ni kum jamtho mi bedopwe yo ku cing' ma yor acwic ku yo ku cing' ma yor acam bende,
- ⁸ku dwong' man umbe yung, ku rwonglembe ma rac man rwonglembe ma ber; calu jubombi, e karaman andha;
- ⁹calu jukung'eyo ngo, e karaman jung'eyo cu; calu wabetho, karaman nen, wabedo kwo; calu jubeponjo aponja ma tek, e jukunego anega de ngo;
- ¹⁰calu ma can ubenego anega, karaman anyong'a benego thiri thiri; calu can piny ubenego, karaman m'ubelonyo dhanu dupa; calu ju ma weg gin moko ngo, karaman weg gin ceke.
- ¹¹Dhogwa bedo ang'ama iwu, E Jukorinto, adundewa doko dit.
- ¹²Wubedo arida i iwa ngo, ento wubedo arida i iwu giwu.
- ¹³Nie pi culocul ma calcal (ayero calu ni nyithindha), e wun bende wudok dit.
- ¹⁴Kud wutwuru karacelo ku ju ma gi juyic ungo ma pigi tung' ku piwu: kum ribri manedi ma ni i kind bedopwe giku camuco? kadi ribri ma der giribri ko giku mudho ni kani?
- ¹⁵Ribri manedi ma Kristu giribri ko giku Beliali? kadi jayic ubedo ku maka pare manedi giku jayicungo?
- ¹⁶Ribri manedi ma hekalu pa Mungu giribri ko gikud ayi gin m'acwia? kum wan wa hekalu pa Mungu ma kwo; cil calu Mungu wacu kumae, Abibedo i igi, man abiwotho i igi; man abibedo Mungu migi, man gibibedo dhanu para.
- ¹⁷Kum kumeno Wuai woko kud i kindgi, man wubed tung', Rwoth uwacu, Man kud wumul gin m'ucido; E abijolowu.
- ¹⁸Man abibedo iwu ni Wego, Man wubibedo ira ni wota ku nyiga, Rwoth ma Jategokpo wacu.

2 Jukorinto 7

- ¹Ka kumeno, jumer, wan ma wabedo ku lembang'ola maeni, dong' walwokra giwa ni cilo ceke mi kum ku mi tipo, ma wadwok ko leng'cwiny udok ndhu cu i lworu pa Mungu.
- ²Wuyab adundewu iwa: watimo rac ni ng'atu moko ngo, wawingo ng'atu moko de ngo, wavugo ng'atu moko de ngo.
- ³Ayero eni ma nia apoko ko lembe rac i wiwu ngo: kum adaru yero ku kwong'a, ya wuni i adunde mwa nitho karacelo man nibedo kwo de karacelo wakudu.
- ⁴Tegocwiny mi wec para yor i beng'wu e dit, kulula para m'i kumwu e dit: jukojuk uroma thur, anyong'a de roma hau i can mwa ceke.
- ⁵Kum cil ma wawok i Makedoni kumwa kwio ngo, endre junyayu can i iwa yo kun ku kun ceke; yo woko lwiny, yor i ic ke lworu.
- ⁶Endre ng'atu m'ujuko ju ma can unuro cwinygi, ndliu Mungu, ejukowa ku bino ma Tito bino ko i bang'wa;
- ⁷man ku bino pare m'ebino ko kende ngo, endre ni kum juk m'ujuke ni kumwu, kinde m'eyero pir avane m'unegowu, pi can m'unegowu de, kud amora mu de ma pira; ketho anyong'a nega m'usagu.
- ⁸Kum kadok anyayu can i iwu ku waraga para, can unega i kume ngo: kadok naka can unega i kume (kum aneno nia waraga nino nyayu can i iwu, kadok mi nindo moko kende ci),
- ⁹e kawono anyong'a nega, ma nia junyayu can i iwu re ngo, endre nia junyayu can i iwu ni lokocwiny; kum junyayu can i iwu ma wagi can ma ayi Mungu ni i kume, kara kud wunwang' ruvwa ni kumwa i gin moko.
- ¹⁰Kum can ma ayi Mungu ni i kume timo ni lokocwiny ni both, en e lokocwiny ma kelo can ungo: endre can m'i ng'om timbre ni tho.
- ¹¹Kum nen, gin maeni nini, ya junyayu can i iwu ma ayi Mungu ni i kume, etimo i iwu gwokogwok ma tek rokeni ngi, eyo ku kabu lembe m'i wiwu giwu ma rokeni ngi, eyo ku ng'ecwiny de ma rokeni ngi, eyo ku lworu de ma rokeni ngi, eyo kud avane de ma rokeni ngi, eyo kud amora de ma rokeni ngi, eyo ku culo wang' lembe ma rokeni ngi! I gin ceke wunyuthru giwu ya wu leng' i lembe nini.
- ¹²Kum kumeno kadok nyamaca agoro iwu, de agoro kum lembe pa ng'atu m'utimo rac ungo, kadok kum lembe pa ng'atu ma jutimo rac i kume de ngo, endre kara kurokur ma dit ma piwa unyuthie iwu i wang' Mungu.
- ¹³Ka kumeno wanwang'u juk: man i jukojuk mwa anyong'a negowa dit apila ma sagu kum anyong'a m'unego Tito, kum kewu ceke wudwoko cwinye.
- ¹⁴Kum tek adaru lulo piwu ire i gin moko, e lewic uwok i wia ngo; ento calu wayero gin ceke iwu i lemandha, kumeno kulula mwa bende m'aketho wang' Tito junwang'u ebedo lemandha.

¹⁵Man mer pare de sagre dit yor i beng'wu, kinde m'epoi pi wor ma wun ceke wuwor ko, maram wujole ko ku lworu ku mielkum de.

¹⁶Anyong'a nega kum abedo ku tegocwiny ma dit piwu kum gin ceke.

2 Jukorinto 8

¹Mange ke, umego, waketho wung'ei bero pa Mungu m'umire i kanisa ma Makedoni;

²maram ku muloic ma dit mi can e dit mi mutoro migi man can piny migi ma apila usagre ni lonyo mi miomic migi ma ku berocwinygi.

³Kum anyutho, nia calku tego migi, eyo ma kadhu tego migi de, gimio gigi kendgi,

⁴ma gibekwayuwa ku kwac ma dit pi bero maeni man ribri i timotim ma ni jumaleng':

⁵man maeni, calu ma wageno de ngo, endre gilar gimiri gigi ni Rwoth, man iwa ni kum yeny ma Mungu yeny.

⁶Kum kumeno wakwayu Tito, ya calu elar etheko, e kumeno dong' edar bero maeni bende i iwu.

⁷Ento calu wusegru i gin ceke, i yioyic, man i wec, ku ng'eyong'ec de, man i morkum ceke, man i mer mu ma yor i bang'wa, wunen ya wusegru i bero maeni bende.

⁸Ayero ma nia amio ko lembang'ola ngo, endre calu amulo ko kit mer mu maeni bende ni kum amora mi jumange.

⁹Kum wung'eyo bero pa Rwoth mwa Yesu Kristu, nia kadok elony, ento edoko jacan piwu, kara wun wulony ni kum can pare.

¹⁰Man amio lembang'ola para i maeni: kum maeni en e ber iwu, wun ma wular wukwong'o timo kende ngo, ento ayenya bende wuyenyoyi i rundi acel m'ukadhu.

¹¹Ento kawono bende wuketh timne timbre; calu amorane nuti ma wuyenyoyi wutime kudo, e kumeno wuketh timne timbre kakare bende calu ma wucopo.

¹²Kum tek amorane nuti, eyire ni ng'atuca calu m'ebedo ko, calku m'ebedo ko ngo re ngo.

¹³Kum ayero eni ma nia jumange cwinygi kwi ko ngo wun re ma cwinywu dieng';

¹⁴ento kara lembe bed rom rom: sagri mi piny mu ukoukei can m'i kumgi nindo maeni, kara sagri mi piny migi bende ubin ukei can m'i kumwu; kara lembe ubed rom rom;

¹⁵calu egore kumae, Ng'atu m'ucoko dit donge m'udong' umbe; ng'atu m'ucoko nyanok de cande nege ngo.

¹⁶Endre foyofoc ni Mungu, m'eketho amora mi gwokogwok ma calacel i adunde Tito piwu.

¹⁷Kum ejolo dwandwa andha; endre m'ebedo kud amora ma sagu, ecidho i beng'wu gire kende.

¹⁸man waorogi gikud umego acel ma pak pare i lembanyong'a ma juboth ko urweire i kind kanisa ceke;

¹⁹man kumeno kende ngo, ento kanisa goyo nyinge bende ya wawoth wakugi ni bero maeni, m'umire ni kumwa ni dwong' pa Rwoth, ninyutho amora mwa bende:

²⁰ma waura ko kum eni, ya ng'atu moko kud ucok lembe i wiwa kum jukupiny maeni m'umire ni kumwa:

²¹kum iwa pido kum gin m'ubedo alili i wang' Rwoth kende ngo, endre i wang' dhanu bende.

²²Man waoro umegwa gikugi, ma wamulo wang' udul wanwang'u ebedo kud amora kum giki dupa, ento kawono kud amora ma sagu dit, ni kum genogen ma dit m'ebedo ko i kumwu.

²³Tek ng'atu moko penjo pi Tito, en e jaribna man jatic wada yor i beng'wu; kadi juwadwa de, gin gi jukwenda mi kanisa, gin gi dwong' pa Kristu.

²⁴Ka kumeno wunyuth igi kit mer mu i wang' kanisa, man ke kulula mwa ma i kumwu bende.

2 Jukorinto 9

¹Man pi timotim ma ni jumaleng', can goro iwu nega ngo:

²kum ang'eyo amora mu, m'alulo pire i kumwu ni ju ma Makedoni, ya Akaya gamu bedo ayika rundi acel m'ukadhu; man amora mu ketho kindgi dupa yepo.

³Ento aoro umego, kara kulula mwa m'i kumwu kud udok mananu i lembe nini; kara, cil calu awacu, wubed ayika:

⁴kara tek wabino waku jumoko m'i Makedoni, wanwang'u fodi wubedo ayika ngo de, (e wawacu wun ungo) ere wan lewic kud ubin umakwa i yo moko kum genogen maeni.

⁵Ka kumeno ia pido ya emaku piny ya akoakwai umego be, ya gilar gicidh i beng'wu, gilar gidok giramia mu ma wular wung'olo, man kara ebed ayika calu en e ajok, man kud amaci de ngo.

⁶Ento ayero maeni, ng'atu m'ucoyo ku mutwi ebikayu de ku mutwi; man ng'atu m'ucoyo ku mwora ebikayu de ku mwora.

⁷Dong' dhanu ceke kubang'gi kubang'gi ng'atuman utim calu ekeco ku i adundene: ku minowang' ungo, kadi kum acung'a de ngo: kum Mungu maru jamic ma mio kud anyong'a.

⁸Man Mungu copo dwoko bero ceke sagre iwu; kara wun, ma wubedo kudo m'uromowu pet kum gin ceke, wusegru ni tic ceke ma ber kubang'e kubang'e:

⁹calu egore kumae, Elalu mba, emio ni jucan: Bedopwe pare bedo rondo ku rondo.

¹⁰Man ng'atu m'umio kodhi ni jacoikodhi, ku kwen mi cemo, ebimio man ebimedo kodhi mu mir acoya, man ebinyayu nying' bedopwe mu:

¹¹wun ma wucikubelony ku gin ceke ni miomic ceke ma ku berocwiny, m'utimbre ni kumwa ukelo foyofoc ni Mungu.

¹²Kum timotim mi tic maeni upong'o mukero mi can ma ni i kum jumaleng' kende ngo, ento esagre bende ni kum foyofoc dupa ni Mungu;

¹³kum ni kum mulo iwu ku timotim maeni giyungo Mungu kum woro mu mi tuc ma wutuco ni lembanyong'a pa Kristu ma juboth ko, man kum niic ma ku berocwiny mir ajok mu igi man ni ceke:

¹⁴kinde ma gin gigi bende, ku kwac ma gikwayu i kumwu, ava wu benegogi ni kum bero ma apila pa Mungu ma ni i iwu.

¹⁵Foyofoc ubed ni Mungu kum giramia pare ma sagu ma aweca.

2 Jukorinto 10

¹Nie an a Paolo ku kita abekwayuwu ku molcwiny ku bedoyo de pa Kristu, an ma kan ani i vutwu abedo ming' i kindwu endre kan ambe abedo ku tegocwiny yor i beng'wu:

²eyo, abekwayuwu ma tek, kara kan anuti kud anyuth tegocwiny ku genogen maeno m'akwanu ya abedo kudo kum jumoko, m'ukwanu piwa calu ma tek wan de wawotho calku kum.

³Kum kadok wawotho ku kum, watimo lwiny calku kum ungo

⁴kum jamtho mwa mi lwiny gi mi kum ungo, endre gi tek apila i wang' Mungu ma giredho ko gin ma tek piny;

⁵ma giredho ko pidoic m'udhunjo piny, man ku gin ma tingre kum ng'eyong'ec pa Mungu, ma kelo pidoic ceke kubang'gi ni kol m'edoko ko wor ni Kristu;

⁶m'ebedo ko ayika niculo kwor kum camuco ceke, kinde ma woro mu uromo kakare.

⁷Wuneno gin ma ni i weng'wu. Tek ng'atu moko begendre gire ya en e pa Kristu, dong' ie pid maeni kendo gire, nia, cil calu en e pa Kristu, wan bende wabedo kumeno.

⁸Kum kadok alula moko ma dit pi ng'ol mwa (ma Rwoth umio ya ugomwu agoma, m'ubamwu abama re ngo), e lewic binega ngo.

⁹kara kud i weng'wu kud abed calu ma nia ang'oyo ndiri i iwu ku waraga para.

¹⁰Kum, giwacu kumae, Waraga pare gi pek gi tek de; ento ku kume e ng'ic, wec pare de en e mananu.

¹¹Dong' ng'atu ma wagi maeni ie pid kumeni, nia calu wabedo i lembe ku waraga ka wambe, wabedo kumeno bende i tic kinde ma wanuti.

¹²Kum wa weg tegocwiny ungo ma wakwandra ko giwa kadi ma wapura ko giwa ku jumoko m'i kindgi ma gifoiri gigi: endre gin gigi, ma gibepori gigi, ma gibenyuthri gigi de gibedo ma ng'eyong'ec umbe kugi.

¹³Endre wabilula giwa ngo ma sagu kapor mwa, endre calu kapor maeni mi jampor ma Mungu poko iwa calu kapor, m'etundo ko cil i beng'wu bende.

¹⁴Kum wan giwa wakukadhu jampor mwa giwa ngo, calu waktundo i beng'wu ngo: kum wabino agbele i beng'wu i lembanyong'a ma juboth ko pa Kristu:

¹⁵ma wakulula ko ngo ma sagu kapor mwa, i tic ma jumange gimuli ko; endre ma wabedo ku genogen nia, calu yioyic mu bedongo, e wabidoko dit ni kumwu calku jampor mwa ni sag ma jusagri ko,

¹⁶kara wayer lembanyong'a ma juboth ko cil i ng'et ng'om m'ukadhuwu, man kud alula i jampor pa ng'atu mange pi gin maeni m'ubedo ayika i cingwa.

¹⁷Ento ng'atu m'ulule, dong' elule i Rwoth.

¹⁸Kum juyio ng'atu ma foire gire ngo, ento ng'atu ma Rwoth foyo re.

2 Jukorinto 11

¹Wukowutwi cwinywu i kuma tundu kum wec ma nok ma kite mbe: ento wutwio cwinywu i kuma andha.

²Kum ngiri benega piwu en e ngiri ma ayi Mungu ni i kume: kum adhumowu ni nico acel, kara aterwu ni Kristu calu nyaku ma leng' ma sumba.

³Ento alworo, kuno nyo ku yo moko, calu thwol ubombo Eva ku rieke pare, e pidoiwu binyothre kud i bedo m'ebedo ma abombi mbe i ie man i leng' m'e leng' ko yo ba Kristu.

⁴Kum tek ng'atu m'ubino eyero Yesu mange, ma wayero pire ngo, kadi tek wujolo tipo ma tung', ma fodi wukujolo ngo, kadi lembanyong'a ma juboth ko ma tung', ma wujolo ngo, meca wutimo dre kum wutwio cwinywu i kume.

- ⁵Kum akwanu nia adong' cen ng'ei jukwenda ma gisagu juwadi ceke ki ngo.
- ⁶Ento kadok acanyu wec acanya, endre ng'eyong'ec para re kumeno ngo; eyo, i yo ceke waketho maeni nyuthie iwu i gin ceke.
- ⁷Kadi atimo dubo kum ajwigra gira kara judodwu malu, kum ayero iwu lembanyong'a ma juboth ko pa Mungu mananu?
- ⁸Ayaku kanisa mange m'agamu ko sukulia i bang'gi kara atim ko iwu;
- ⁹man kinde ma ani i beng'wu ma can piny bende ni i kuma, abedo ter ni ng'atu moko ngo: kum umego, kinde ma giai i Makedoni, gin e ma gimio m'ukabu can piny ma ni i kuma; man i gin ceke akura gira kara kud abed ni ter iwu, man abigwokra gira kumeno.
- ¹⁰Calu lemandha pa Kristu ni i ia, ng'atu moko mbe ma bicera kum kulula maeni i ng'om mir Akaya.
- ¹¹Kum lebang'o? kum amaruwu ngo? Mungu ng'eyo.
- ¹²Ento gin m'atimo, maeno abitimo, kara acer kaka ni ju ma giyenyo kaka moko; kara i gin maeni ma giluli i ie, e jubinwang'u gin de ndhu calu wan.
- ¹³Kum wagi dhanu ma kumeno gi jukwenda mi ndra, jutic ma weg abombi, ma gibelokri gigi ni jukwenda pa Kristu.
- ¹⁴Man wang'uijo mbe; kum cil Jok loko kite gire, ni malaika mi der.
- ¹⁵Ka kumeno en e gin ma dit ungo tek jutic pare bende gilokri gigi ve jutic mi bedopwe, ma kajik migi bibedo calku tic migi.
- ¹⁶Ayero kendo, ng'atu moko ie kud uwac nia a jakasegu; ento tek iwu wacu kumeno, wujola asu ma kita mbe, kara an bende alula nyanok.
- ¹⁷Maeno m'ayero no, ayero m'uai ba Rwoth ungo, ento calu ma kite mbe i genogen maeni mi kulula.
- ¹⁸Kum nwang'u dupa giluli calku kum, an bende abilula.
- ¹⁹Kum wutwio cwinywu kum jukusegu ku mutoro, ma wun wu riek.
- ²⁰Kum wutwio cwinywu kum ng'atu moko, tek ekelowu ni ng'eca, tek ecamuwu, tek eyakuwu de, tek eyungre gire, tek epadu weng'wu de.
- ²¹Abeyero ma yung umbe i kume, calu ya wan wa ng'ic. Endre ka ma tek ju.. moko gibedo ie ku tegocwiny (ayero ku lembe ma kite mbe), abedo ku tegocwiny bende.
- ²²Gin gi Juebrania? an bende abedo kumeno. Gin gi Juisraeli? an bende abedo kumeno. Gin gi nyikwai Ibrahimu? an bende abedo kumeno.
- ²³Gin gi jutim pa Kristu? (Ayero calu abelu) an e m'asagu; i tic m'amula ko ma sagu drt, i kol ma sagu dit, ku wang' goc ma kaporne mbe, i tho wang' udul.

- ²⁴Ba Juyahudi wang' abic amaku goc pier ang'wen udong' acel.
- ²⁵Bang' adek jugoya ku dul, wang' acel ke jucanya ku kidi, wang' adek ke asendra i combo m'ung'eny, diewor acel ku dieceng' acel ani i nam;
- ²⁶i woth ma wang' udul, ceng'ni tho mi kulo, ceng'ni tho ni weg ayeki, ceng'ni tho ni juthuwa, ceng'ni tho ni Thekdhanumange, ceng'ni tho i adhura de, ceng'ni tho i yamba, ceng'ni tho i nam de, ceng'ni tho i kind umego mi ndra;
- ²⁷i tic ma jumuli ko ku sendri, i kurokur wang' udul, ku kec ku rieu de, ku kwirocam de wang' udul, ku koyo ku muneru de.
- ²⁸M'umedre kum gin maeno ma yo woko, gin moko nuti m'unura ku ba rupiny, en e adiang'acwiny pi kanisa ceke.
- ²⁹Ng'a ma ng'ici, ma an a ng'ic ungo? ng'a ma juketho ekier, ma a kuwang' ungo?
- ³⁰Tek emaku ya alula, abilula kum gin mi ng'ic para m'ang'ic ko.
- ³¹Mungu ma Won Rwoth Yesu, en m'e jamugisa rondo ku rondo eng'eyo ya ayero ndra ngo.
- ³²I Dameski jabim ma the cing Areta m'ubimo ekuro adhura mi Judameski kara emaka:
- ³³man ku wang'ot julura piny ku wi gang' ku i kukunju, e aboth ve kud i cinge.

2 Jukorinto 12

- ¹Abikolula be, kadok e ber ungo; endre abibino ba ginmawokiwang' ku nyuthonyuth pa Rwoth.
- ²Ang'eyo ng'atu moko i Kristu, rundi apar wi ang'wen m'ukadhu (tek eni i kum, ang'eyo ngo; kadi tek embe i kum, ang'eyo ngo; Mungu ng'eyo), ng'atu ma kumeca juring'e malu cil i polo mir adege.
- ³Man ang'eyo wagi ng'atuca (tek eni i kum, kadi e nge ku kum, ang'eyo ngo; Mungu ng'eyo),
- ⁴maram juting'e ko malu i Paradis, m'ewinjo ko lembe de ma sagu aweca, ma cik uyio ngo ya dhanu weci.
- ⁵Ni kum ng'atu ma kumeca abilula: endre ni kuma gira abilula ngo, ndhu i ng'ic para m'a ng'ic ko.
- ⁶Kum tek ayenyo alula, abibedo jakasegu ngo; kum abiyero lemandha; endre aweko, kara ng'atu moko kud ukwana ma sagu ramba m'enenno abedo ko, kadi m'ewinjo i bang'a de.
- ⁷Man kara kud atingra malu ma sagu ni kum giranyutha ma dit apila, ukudho ma i ring'kum umire ira, jakwenda pa Jok kara epada, kara kud atingra ma sagu.
- ⁸Pi gin maeni akwayu Rwoth bang' adek, kara eai i kuma.

⁹Man ewacu ira kumae, Berona romi: kum tegona doko ndhu cu i ng'ic. Kum kumeno abilula kum ng'ic para kud anyong'a m'usagu dit, kara tego pa Kristu bed i kuma.

¹⁰Kum kumeno anyong'a nega i ng'ic, i acidi de, i can piny, i ragedo, i can m'alimo, ni kum Kristu: kum kinde ma a ng'ic, kinde maeca a tek.

¹¹Adoko jakasegu: wucwala; kum emaku ya wufoya: kum adong' cen ki ngo i gin moko mi jukwenda ma sagu juwagi ceke, kadok an a gin moko ngo.

¹²Andha giranyutha pa jakwenda utimbre i kindwu i twiocwiny ceke, ku giranyutha man musana ku tego ma dit de.

¹³Kum girang'o ma wujwik i ie ma sagu kanisa mange, tek en e ma nia an gira abedo ni ter iwu ngo? wek timo rac maeni woko ira.

¹⁴Nen, maeni wang' adege m'abedo ko ayika m'abin ko i beng'wu; man abibedo ni ter iwu ngo: kum ayenyo gin mu ngo, ento wun re: kum emaku ya nyithindho gikan piny ni junyodo migi ngo, ento junyodo re ni nyithindho.

¹⁵Man abilalu ndhu alala ku mutoro ma dit man abidaru tekna de piwu. Tek amaruwu dit ma sagu, an ke jumara nok ma sagu?

¹⁶Ento kadok ebedo kumeno, an gira anurowu ngo; ento, kum a riek, amakuwu kud abombi.

¹⁷Avugowu ku jumoko m'aoro i beng'wu?

¹⁸Ajuko Tito, man aoro umego gikude. Tito vugowu? wawotho ku tipo ma calacel ungo? wawotho ku ba tielo ma calacel ungo?

¹⁹Iwu wacu nyo cil unyoni wabegonyo lembe m'i wiwa giwa iwu. I wang' Mungu wabeyero i Kristu. Ento gin ceke, jumer, gi pi teng'oteng' mu.

²⁰Kum alworo, kara ku yo moko, kinde m'awok, abinwang'uwu calu wagi m'amaru ngo, an bende jubinwang'a calu wagi ma wumaru ngo; kara dhau kud ubed nuti ku yo moko, ku ngiri, ku kwinyo, ku pokri, ku yero nying', ku yero nying' ma kwe kwe, ku yakni;

²¹kara kinde m'abino kendo Mungu para kud ubin ujwiga i weng'wu man abin aywak kum dupa m'i kindgi ma gilar gidubo, ma gikuloko cwinygi ngo kum sasa man tarwang' man awanya ma rac ma gitimo.

2 Jukorinto 13

¹Maeni wang' adek m'abebino ko i beng'wu. Ku dhu jumulembe ario kadi adek lembe ceke bicungo.

²Alar ayero iwu, man alar abeyero, calu kinde m'anuti i beng'wu mir arionde, e kawono bende, m'ambe, ni ju ma gilar gidubo man ni dhanu ceke m'udong' de, nia, tek awok kendo, abiweko ng'olo lembe migi ngo;

- ³kum nwang'u wubeyenyo giranyutha pa Kristu m'ubeyero i ia; ma ku yor i beng'wu en e ng'ic ungo, endre e tek i iwu:
- ⁴kum jugure i ng'ic, endre ebedo kwo ni kum tego pa Mungu. Kum wan bende wa ng'ic i ie, endre wabibedo kwo wakude ni kum tego pa Mungu yor i beng'wu.
- ⁵Wumulu giwu, tek wuni i yioyic; wuponjru giwu. Kadi wung'eyo ngo piwu giwu, ya Yesu Kristu ni i iwu? tek ebedo andha ma jukukwerowu ngo.
- ⁶Ento ageno ya wubing'eyo nia wan wa ju ma jukwerowa ngo.
- ⁷Nie waberwo ni Mungu kara kud wudubi; ma nia wanyuthra ko ngo ya jufoiwa, endre kara wutim maeno ma mi yung, kadok wabedo calu ju ma jukwero.
- ⁸Kum wacopo timo gin moko ngo ma wacer ko lemandha, ento pi lemandha re.
- ⁹Kum anyong'a negowa, kinde ma wa ng'ic e wun wu tek: maeni bende wakwayu pire, cil dokocu mu.
- ¹⁰Kum lembe nini agoro gin maeni kan ambe, kara kan anuti kud atim iwu ku kwinyo, calku tego ma Rwoth umio ira mi gomogom, man pi bamu abama re ngo.
- ¹¹Aha a, umego, dong' wubedi. Wudok ndhu cu; wujukru; wubed ku pidoic acel; wubed i kwiocwiny: man Mungu mi mer ku kwiocwiny de bibedo kudu.
- ¹²Wumothru ku cwiocwic ma leng'.
- ¹³Jumaleng' ceke gimothowu.
- ¹⁴Bero pa Rwoth Yesu Kristu, ku mer pa Mungu, man ribri pa Tipo Maleng', ubed i beng'wu kpo.

Jugalatia

Jugalatia 1

- ¹Paolo, jakwenda (ma dhanu ketho re ngo, kadi ni kum dhanu de ngo, ento ni kum Yesu Kristu, man Mungu ma Wego, m'uting'e kud i kind ju m'utho),
- ²wakud umego ceke de ma wanuti wakugi, ni kanisa mi Galatia:
- ³Bero iwu ku kwicwiny m'uai ba Mungu ma Wego, man Rwoth mwa Yesu Kristu,
- ⁴m'umire gire kum dubo mwa, kara elarwa kud i rundi maeni ma rac ma kawono, calu i Mungu mwa ma Wegwa yenyo:
- ⁵dwong' ma rondo ku rondo ubed ire. Amen.
- ⁶Ia wang' lii ka wuai pio kumeno ba ng'atu m'ulwong'owu i bero pa Kristu wudok ba lembanyong'a ma tung';
- ⁷ma en e mange ngo: ento jumoko nuti ma gibeng'abu cwinywu, gibeyenyo gilok lembanyong'a ma juboth ko pa Kristu dok tung'.
- ⁸Ento kadok wan, kadi malaika m'uai i polo de, biyero iwu lembanyong'a ma juboth ko ma tung' ku maeni ma wayero iwu, wek kwong' ubed i wie.
- ⁹Calu walar wawacu, awacu kumeca kendo kawono kumae, Tek ng'atu moko yero iwu lembanyong'a ma juboth ko ma tung' ku maeno ma wujolo no, wek kwong' ubed i wie.
- ¹⁰Kum kawono abeyenyo dhanu e m'ufoya, kadi Mungu? kadi abeponjo nyayu mutoro i dhanu? tek abeyenyo nyayu mutoro i dhanu, meca an a jamiru pa Kristu ngo.
- ¹¹Kum abeketho wung'ei, umego, pi lembanyong'a ma juboth ko m'ayero iwu, ya en e mi dhanu ngo.
- ¹²Kum agame ba dhanu ngo, kadi juponja kude aponja de ngo, ento ewok i bang'a ni kum nyuth pa Yesu Kristu.
- ¹³Kum wuwinjo pira i rundi m'ukadhu i kisoma mi Juyahudi, maram anyayu ko ragedo kum kanisa pa Mungu hai, man anyothe:
- ¹⁴man ang'eyo kisoma mi Juyahudi ma sagu juwada dupa ma rundi migi ro ku para kind dhanu m'i ng'om ma thuwa, ma ava lemkei pa wegwa nega dit apila.
- ¹⁵Ento kan ebeto ber ni Mungu, m'ukoya, cil kud i ma, man elwong'a ku berone,
- ¹⁶ya enyuth Wode i ia, kara ayer pire kind Thekdhanumange; e pio pio nica wapido lembe waku kum ku rimo de ngo:

¹⁷kadok aidho malu Yerusalem de ngo ba ju ma gilar gibedo jukwenda i wang'a: ento acidho para i Arabia; man adwogo kendo Dameski.

¹⁸Ka rundi adek ukadhu alund aidho malu Yerusalem niliewo Kefa, wario wakugi de ceng' apar wi abic.

¹⁹Ento jukwenda mange aneno ngo, ndhu Yakobo m'umin Rwoth.

²⁰Nie pi lembe m'agoro iwu no, wunen, i wang' Mungu, abecwayu ndra ngo.

²¹Macen abino i ng'om mi Cami ku Kilikia de.

²²Nwang'u kanisa mi Juyahudi ma gini i Kristu fodi ging'eyo wang'a ngo:

²³ento giwinjo awinja kende kumae, Ng'atu ma naka bedunyayu ragedo i kumwa kawono ebeyero lembe mi yioyic ma naka enyotho;

²⁴e gifoyo Mungu i kuma.

Jugalatia 2

¹Ka nindo mi rundi apar wi ang'wen ukadhu alund aidho Yerusalem kendo waku Barnaba, m'agamu ko Tito bende wacidho wakugi.

²E aidho ni kum nyuth ma Mungu nyutho; man apedho lembanyong'a ma juboth ko m'ayero i kind Thekdhanumange i wang'gi ento nyalwe i wang' ju ma pigi yik, tek kuno nyo aberingo, kadi adaru ringo, mananu.

³Ento cil Tito ma wabedo wakude, ma Jayunani, jucung'e ngo ya jutim yaa i kume:

⁴ento en e kum umego mi ndra ma jukelo i ie nyalwe, ma gimondo nyalwe nilibo gony mwa ma wabedo ko i Kristu Yesu, kara gidwokwa ni ng'eca:

⁵e waweko igi kamoko ngo ma nia wawor kogi, ungo, kadok saa acel de ngo; kara lemandha mi lembanyong'a ma juboth ko bed kudu asu.

⁶Ento ju ma pigi yik ya gi dit (bedo ma naka gibedo ko, en e gin moko ngo ira: Mungu jolo kit dhanu ngo) joni, awacu, gi ju ma pigi yik nini gimedo lembe moko ira ngo:

⁷ento ma tung' ku eni: kinde ma gineno nia juketho lembanyong'a ma yaa mbe i ie i kora, calu juketho lembanyong'a ma ie ju yaa i kor Petro

⁸(kum ng'atu m'utimo ni Petro nica eketho ebeto jakwenda mi yaa etimo ira bende ni Thekdhanumange);

⁹e ka ging'eyo bero m'umire ira, Yakobo giku Kefa man Yohana, ju ma pigi yik nia gi mbegi, gimio cing'gi ma yor acwic mi ribri iwa waku Barnaba, ya waci ba Thekdhanumange, gin ke gici migi ba weg yaa;

¹⁰mae kende ma giyenyo nia wapoi kum jucan; e eni ma an bende ayenyo dit atim.

- ¹¹Ento kinde ma Kefa bino Antiokia, ajai ire i wang'e, kum lembe ni i wie.
- ¹²Kum ka fodi dhanu m'uai ba Yakobo foduwok ungo, ecamu ku Thekdhanumange; ento ka giwok, ecoro cen man ekoire gire, m'elworo ko ju ma weg yaa.
- ¹³Juyahudi m'udong' de gipali kumeno gikugi; ketho cil Barnaba de wingre woko ku pali migi.
- ¹⁴Ento kan aneno nia giwotho atira ngo calku lemandha mi lembanyong'a ma juboth ko, awacu ni Kefa i wang'gi ceke kumae, Tek in, m'i Jayahudi, ikwanyu koth lembe mi Thekdhanumange, ma k'ikwanyu koth lembe mi Juyahudi ngo, idong' icung'o Thekdhanumange ya gikwany koth lembe mi Juyahudi nedi?
- ¹⁵Wan ma wa Juyahudi ku koth kum, man wa weg dubo ngo mi Thekdhanumange,
- ¹⁶ento wang'eyo nia ng'atu moko mbe ma lembe m'i wie gonjre ku tic mi cik, ndhu ku yic ma juyio ko Yesu Kristu re, e cil wan de wayio Kristu Yesu, kara lembe m'i wiwa gonjre ku yic ma wayio ko Kristu, ni kum tic mi cik re ngo: kum ng'atu moko mbe ma lembe m'i wie bigonjre ku tic mi cik.
- ¹⁷Ento tek, kinde ma wabeyenyo lembe m'i wiwa gonjre ni kum Kristu, wan nini bende junwang'uwa wa judubo, Kristu en e jatic mi lem dubo? Awene.
- ¹⁸Kum tek agomo gin maeno kendo m'anyotho, meca anyuthra gira nia a jadubo.
- ¹⁹Kum an ni lembe mi cik atho ni cik, kara abed kwo ni Mungu.
- ²⁰An judaru gura waku Kristu; man en e an kendo ngo m'ukwo ento Kristu e m'ubedo i ia; man kwo maeno m'abedo ko i kum akwo i yioyic, yioyic ma ni i Wod Mungu, m'umara, m'umire gire pira.
- ²¹Adwoko bero pa Mungu mananu ngo: kum tek bedopwe ubino ni kum ciki, meca Kristu tho mananu.

Jugalatia 3

- ¹E Jugalatia ma wun adhura, ng'a m'urambuwu, ma juketho Yesu Kristu ma juguro kele i weng'wu?
- ²Maeni kende m'ayenyo ang'ei i beng'wu, Wujolo Tipo ni kum tic mi ciki kadi ni kum winjo mi yioyici?
- ³Wun wun adhura kumeno ngi? wun ma wutheko lembe ni kum Tipo, meno be kawono wudoko ndhu cu ni kum kumi?
- ⁴Wusendru ku giki dupa kumeni ngi mananu? tek en e mananu andha.
- ⁵Ka kumeno ng'atu m'umio iwu Tipo, etimo musana de i kindwu, etimo ku tic mi ciki, kadi ku winjo mi yioyici?

- ⁶Cil calu Ibrahim uyio Mungu, man jukwane ire ni bedopwe.
- ⁷Dong' wung'ei kumeno nia ju ma gi mi yioyic, gin e ma gi wot Ibrahim.
- ⁸Man lembagora pa Mungu, m'ular uneno nia Mungu bigonyo lembe ma wi Thekdhanumange ku yioyic, elar eyero lembanyong'a ma juboth ko ni Ibrahim, ewacu kumae, Thek ceke bibedo jumugisa ni kumi.
- ⁹Ka kumeno ju ma gi weg yioyic gidoko jumugisa gikud Ibrahimgi ma ng'atu mandha.
- ¹⁰Kum dhanu ceke ma gi weg tic mi cik gini the kwong': kum egore kumae, Kwong' ni wi dhanu ceke ma gikubedo ngo ku gin ceke m'ugore i kitabu mi cik, ma gitim kogi de.
- ¹¹Nie ebedo ngbeng', ya ng'atu moko mbe ma lembe m'i wie gonjre i wang' Mungu ku tic mi cik: kum weg bedopwe gibikwo ni kum yioyic;
- ¹²man cik en e mi yioyic ungo; ento, Ng'atu m'utimogi ebikwo ni kumgi.
- ¹³Kristu waruwa kud i kwong' mi cik, en e m'edong' ecopo dhu kwong' kakawa; kum egore kumae, Kwong' ni i wi dhanu kubang'gi kubang'gi ma julierogi kor yen:
- ¹⁴kara mugisa pa Ibrahim umak Thekdhanumange ni kum Kristu Yesu: kara wajol lebang'ola mi Tipo ni kum yioyic.
- ¹⁵Umego, awacu calu ma dhanu wacu: Kadok en e lembariba mi dhanu kende, ento ka judaru ketho ecungo, ng'atu moko mbe ma thire, kadi ma mede de.
- ¹⁶Nie lebang'ola pa Mungu jung'olo ni Ibrahim, man ni nyakware. Ewacu ngo kumae, Man ni nyikwaye, calu ya gi dupa; ento calu ma acel, Man ni nyakweri, ma en e Kristu.
- ¹⁷Kawono awacu maeni: Lembariba ma Mungu yang' ular uketho ecungo, e cik, m'ubino rundi dak ang'wen ku pier adek yo ng'eye, uketho edoko mananu ngo, ma nia ebin ethir lebang'ola.
- ¹⁸Kum tek camupacu en e mi ciki, nwang'u en e mi lebang'ola ngo kendo: ento Mungu mie ni Ibrahim ku lebang'ola.
- ¹⁹Cik ulund ubedo girang'o? Emedre ni kum dubo, cil maram nyakware biwok ko ma lebang'ola yere i kume; man ekethre ni kum malaika ku cing' jarib.
- ²⁰Nie jarib en e jarib pa ng'atu acel ungo; ento Mungu en e acel.
- ²¹Ka kumeno cik ujai kum lebang'ola pa Mungu? Awene: kum tek cik umire ma copo ketho kwo, meca bedopwe copo bino ni kum cik andha.
- ²²Ento lembagora pa Mungu ciko ba gin ceke the dubo, kara lebang'ola mi yioyic i Yesu Kristu umire ni ju m'uyio.

²³Ento ma fodi yioyic kuwok ungo, juketho wabedo akura the cik, juciko bang'wa cil maram yioyic maeni binyuthre ko macen.

²⁴Kum kumeno cik ubedo ni japonji mwa m'ukelowa ba Kristu, kara lembe m'i wiwa gonjre ku yioyic.

²⁵Ento kawono ma yioyic uwok, wabedo the tiend japonji kendo ngo.

²⁶Kum wun ceke wu wot Mungu, ni kum yioyic, i Kristu Yesu.

²⁷Kum wun ceke ma jumio baputisi iwu i Kristu wuronyo Kristu.

²⁸Jayahudi kadi Jayunani de mbe, jamiru kadi ng'atu ma jamiru ngo de mbe, nico kadi nyaku de mbe; kum kewu ceke wu ng'atu acel i Kristu Yesu.

²⁹Man tek wu pa Kristu, meca wu nyikwai Ibrahim, wu jucampacu calku lembang'ola.

Jugalatia 4

¹Ento awacu nia cil ma jacampacu fodi nyathin, ebedo tung' ungo ku jamiru kadok en e rwoth mi ceke;

²ento eni the cing' jugwokne ku jukurpiny bende cil i nindo ma won ung'olo.

³Wan bende kumeno, ma fodi wa nyithindho, wakowabedo ng'eca the cik ma kwong'a mi ng'om:

⁴ento ka nindo m'uromo wok, Mungu oro Wode, ma nyaku nyolo, ma junyolo the cik,

⁵kara ewar ju ma gini the cik, kara wanwang' dwok ma judwoko kowa ni wote.

⁶Man kum wubedo wote, Mungu oro Tipo pa Wode i adundewa, m'uywak kumae, Abba, Vwa.

⁷Ka kumeno in i jamiru kendo ngo, ento i wode re: man tek i wode, meca in i jacampacu ni kum Mungu.

⁸Ento i rundi maeca, ma fodi wung'eyo Mungu ngo, wu ng'eca igi ma ku koth kum gi mungu ngo;

⁹ento kawono ma wudaru ng'eyo Mungu kadi ma sagu Mungu daru ng'eyowu, wulokru kendo nedi wudok kum cik ma kwong'a ma ng'ic mi can de, ma wuyenyo wubed ng'eca i ie kendo?

¹⁰Wukwiro ceng', ku dwi, ku nindo, ku rundi de.

¹¹Abelworowu, kuno nyo amula iwu ku tic mananu.

¹²Abekwayuwu, umego, ya wubed calu an, kum an bende adoko calu wun. Wutima rac ungo i gin moko:

- 13** ento wung'eyo nia kum mulima m'i kuma ayero lembanyong'a ma juboth ko iwu ku kwong'a:
- 14** e maeno ma en e abidhe iwu i kuma wucayu ngo, kadi wukwero de ngo; ento wujola calu malaika pa Mungu, cil calu Kristu Yesu.
- 15** Ka kumeno kulula mu lund ubedo kani? kum ayero piwu, nia, tek ecopre, kuno di wuwodho weng'wu woko wudong' wumiogi ira.
- 16** Ka kumeno adoko jadegi mu kum ayero iwu lemandha?
- 17** Githokowu kud avane ku yo ma ber ungo; eyo, giyenyoy gigeng'wu, kara wuyenygi.
- 18** Ento e ber tek juthokowu kud avane kum lembe ma ber i nindo ceke, ere kinde m'ani i beng'wu kende ngo.
- 19** Nyithindho para ma thindho, m'abesendra i kumwu ku masendi ma junyol ko cil maram Kristu bidongo ko i iwu,
- 20** ento nwang'u ayenyo nia wabed wakudu kawono, man alok dwanda; kum cwinya bedo jiji i kumwu.
- 21** Wuwac ira, wun ma wuyenyo wubed the cik, wuwino cik ungo:
- 22** Kum egore, nia Ibrahim wote nuti ario, acel m'nyolo ku nyaku ma nyalwak, acel ke ku nyaku m'anyoma.
- 23** Ento wod nyalwak junyolo ni kum kum; ento wod nyaku m'anyoma re ni kum lembang'ola.
- 24** Gin maeni lembabola ni i igi: kum mon maeni gi lembariba ario; acel m'uai wi got Sinai, m'unyolo nyithindho ni ng'eca, ma en e Hagar.
- 25** Nie Hagar maeni en e got Sinai i Arabia, man jupore ku Yerusalem ma kawono: kum en eni i ng'eca ku nyithindho pare.
- 26** Ento Yerusalem ma malu bedo agonya, ma en e megwa.
- 27** Kum egore kumae, Anyong'a negi, in i jamugumba m'i nyol ungo; Goi dhogi man ikok akoka, in m'ise ndri ngo ku nyolo nyodo: Kum nyithindho pa ng'atu m'ubedo kende sagu pa ng'atu ma ju cware.
- 28** Nie wan, umego, calu Isak ubedo, wabedo nyithindho mi lembang'ola.
- 29** Ento calu ng'atu ma yang' junyolo ni kum kum unyayu ragedo kum ng'atu ma junyolo ni kum Tipo, e ebedo kumeno kawono bende.
- 30** Ento lembagora pa Mungu wacu nik ang'o? Riem nyalwak woko giku wode: kum wod nyalwak bicamu pacu ngo giku wod nyaku m'anyoma.
- 31** Kum kumeno, umego, wan wa nyithindho pa nyalwak ungo, ento pa nyaku m'anyoma.

Jugalatia 5

- ¹Pir agonya Kristu gonyowa: wucung ki ki ki kumeno, man kud wudok wutwiru kendo i mberembere mi ng'eca.
- ²Nen, an a Paolo abeyero iwu, nia, tek jutimo yaa i kumwu Kristu biloko iwu gin moko ngo.
- ³Eyo, atuco kendo ni dhanu kubang'gi nzu ma jutimo yaa i kumgi, nia gi jubanja mi timo cik kpo.
- ⁴Wukoc ku Kristu, wun ma wuyenyo lembe m'i wiwu gonjre ku cik; wukiewo ku bero.
- ⁵Kum wan ni kum Tipo ku yioyic wabekuro genogen mi bedopwe.
- ⁶Kum i Kristu Yesu yaa loko gin moko ngo, kadok yaango bende; ento yioyic re m'ubetimbre ni kum mer.
- ⁷Naka wuberingo dre; ug'a m'ucerowu kara kud wuwor lemandha?
- ⁸Lembacung'a maeni ai ba ng'atu m'ulwong'owu ngo.
- ⁹Ihobi ma nyanok romo i kwen ceke.
- ¹⁰Abedo m'ageno Rwoth piwu, nia wubibedo ku pidoic ma tung' ungo: ento ng'atu m'ubesendowu biyeyo lembapoka pare, en e ng'atu ma tek enuti.
- ¹¹Ento an, umego, tek fodi abeyero lembyaa asu, ka ke jubenyayu ragedo i kuma asu nedi? cudho mi kier mi yen m'athara ulund ukadhu woko.
- ¹²Ayenyo nia ju m'uketho cwinywu beringo rr githumbri gigi.
- ¹³Kum wun, umego, julwong'owu mi gony; endre gony mu kud udwokwu yaca kum lembe mi kum, ento ni kum mer ma jumari ko dong' wubed jutic mi juwedwu man ni wadi man ni wadi.
- ¹⁴Kum cik kpo timbre kakare i lembe acel, ndhu i maeni: Ibimaru wedu calu imeri giri.
- ¹⁵Ento tek wukeiru man wucembru, e wubed ku weng'wu ba wumaru mwonjru.
- ¹⁶Ento awacu kumae, Wuwoth ku Tipo, e wubiketho awanya ma rac mi kum timbre kakare ngo.
- ¹⁷Kum kum bedo ku kumira kum Tipo, Tipo ke kum kum; kum maeni gi tung' tung' ku wadi; kara kud wutim gin ma wuyenyo wutim.
- ¹⁸Ento tek Tipo bepeyowu en, nwang'u wuni the cik ungo.
- ¹⁹Nie tic mi kum ginyuthii, ma gi eni: tarwang', ku sasa, kud awanya ma rac,
- ²⁰ku rwo ni ayi gin m'acwia, kud ajoga ma jutimo, kud adegi, ku por, ku ngiri, ku kwinyo, kud ali, ku pokri, ku yic ma tung' tung',

²¹ku kumira, ku mer ma jumer ko ku kong'o, ku miel ma rac, ku wagi gin ma kumeno de; alar apoyowu pi maeni, cil calu yang' akoapoyowu, nia ju m'ucikutimo wagi gin ma kumeni gibicamu pacu mi ker pa Mungu ngo.

²²Ento nying' Tipo en e mer, ku mutoro, ku kwicwiny, ku mwonyolembe hai, ku bedo ber ku dhanu, ku berocwiny, ku bedo mandha,

²³ku molcwiny, ku kwerigijo, cik umbe kum wagi gin maeni.

²⁴Man ju ma gi pa Kristu Yesu giguro kum kud avane man awanya ma racne de kor yen m'athara.

²⁵Tek wabedo ni kum Tipo, dong' wawothu bende ni kum Tipo.

²⁶Ku wayeny yung ma juyung kowa mananu, ma wasend ko juwadwa ma nia ng'atuman usend wadi man usend wadi, ma kumua de negwa kum juwadwa man kum wadi man kum wadi.

Jugalatia 6

¹Umego, tek junwang'u ng'atu moko i kier moko, wun ma wu weg tipo, wulok ng'atu ma kumeni ku cwiny mi bedoyo; m'ibedo giri ku weng'i bende, abidhe maru nwang'u in bende.

²Wuyei ter mi juwedwu man pa wadi man pa wadi, e wuketh cik pa Kristu timbre kakare kumeno.

³Kum tek ng'atu moko ie wacu ya en e m'e en, ma en ke k'e gin moko ngo, meca ewondre gire.

⁴Ento dong' ng'atuman ukor i tic pare cu, e kulula bilund nege i kume gire kende, man kum wadi re ngo.

⁵Kum dhanu ceke ng'atuman biyeyo ter pare gire.

⁶Ento dong' ng'atu ma juponje ku lembe eribre ku ng'atu m'uponje i gin ceke ma ber.

⁷Kud wuwondru giwu; jucopo cayu Mungu ngo: kum gin ma tek ng'atu moko coyo, gica ebikayu bende.

⁸Kum ng'atu m'ucoyo i kume gire ebikayu top mi kum; ento ng'atu m'ucoyo i Tipo re ebikayu kwo ma rondo ku rondp ba Tipo.

⁹Man ku waol ku timo tic ma ber: kum ka kakare tuudo wabikayu, tek wavoc ungo.

¹⁰Kum kumeno, ka fodi kakare nuti iwa, dong' watim ber ni dhanu ceke, endre ma dhene re ni juot mi yioyic.

¹¹Wunen maram agoro ko iwu ku mege thelembe ma dongo no gira ku cinga.

- ¹²Dhanu ceke ma giyenyo ginyuth berokum, gicung'owu ya jutim yaa i kumwu; ndhu kara ku junyai ragedo i kumgi kum lembe mi yen m'athara pa Kristu.
- ¹³Kum cil ju ma gijolo yaa giworo cik uugo; ento giyenyo jutim yaa i kumwu, kara giluli i kumwu.
- ¹⁴Ento ayenyo ya kud alula, ento kum yen m'athara pa Rwoth mwa ma Yesu Kristu kende, ma ng'om ubedo agura ira ni kume, an de ni ng'om.
- ¹⁵Kum yaa en e gin moko ngo, kadi yaango bende, ento ng'atu ma nyen re.
- ¹⁶Dhanu ceke ma gibiwotoho ku cik maeni, dong' kwiochwiny ubed i wigi, ku kisa de, man wi Israel pa Mungu.
- ¹⁷Ugambre kawono cil macen ng'atu moko kud unyai can i ia; kum acoko poyo pa Yesu ma junyayu i kuma.
- ¹⁸Bero pa Rwoth mwa Yesu Kristu ubed ku cwinywu, umego. Amen.

Juefeso

Juefeso 1

- ¹Paolo, ma jakwenda pa Kristu Yesu ni kum yeny ma Mungu yeny, ni jumaleng' ma ni i Efeso, man jumandha i Kristu Yesu:
- ²Bero iwu man kwicwiny m'uai ba Mungu ma Wegwa man Rwoth Yesu Kristu.
- ³Mugisa ni Mungu ma Won Rwoth mwa Yesu Kristu, m'umio mugisa iwa ku ba mugisa ceke mi tipo i ka mi polo i Kristu:
- ⁴cil calu yang' elwong'owa i ie ka fodi theng'om kuthekere ngo, nia wabed leng' ma poyo de mbe i wang'e i mer:
- ⁵nwang'u elar ekethowa ni dwok ma judwoko kowa ni wote ire gire ni kum Yesu Kristu, calku mutoro mi yeny ma ie yeny,
- ⁶ni pak mi dwong' mi berone, m'edhenyo bwom iwa i Jamer;
- ⁷ma wanwang'u war i ie ni kum rimbe, ni wek mi kier mwa, calku lonyo mi berone,
- ⁸m'eketho usagre i bang'wa i rieko ceke ku riu de,
- ⁹m'eketho wang'eyo giramung'a mi yeny m'eyeny, calku mutoro ma ie wacu nik ebitimo i ie
- ¹⁰kara i nindo mi pong' mi rundi, ecok kwai giki ceke i Kristu, giki m'i polo, ku giki ma wi ng'om bende; i ie, awacu,
- ¹¹ma i ie bende judwokowa ni camupacu, nwang'u elar ebedo aketha ku kwong'a calku yeny ma ie yeny m'etimo gin ceke m'elubo ko lembapora mi yeny ma ie yeny;
- ¹²kara wabed ni pak mi dwong' pare, wan ma walar wageno i Kristu;
- ¹³i ie wun bende, ma wudaru winjo lembe mi lemandha, ma en e lembanyong'a mi both ma juboth ko, i ie, nwang'u wudaru yio bende, juketho ayi i kumwu ni kum Tipo Maleng' mi lembang'ola,
- ¹⁴ma en e mukwatu mi camupacu mwa, ni war mi piny pare gire, ni pak mi dwong' pare.
- ¹⁵Kum lembe nini an bende, m'adaru winjo pi yioyic ma ni i kindwu i Rwoth Yesu, man ke mer ma wunyutho yo ba jumaleng' ceke,
- ¹⁶aweko ki ngo nifoyo foc piwu, m'ayero ko piwu i rwo para;
- ¹⁷kara Mungu pa Rwoth mwa Yesu Kristu, ma Wego mi dwong', umi iwu tipo mi rieko ku nyuth mi ng'ec ma jung'eye ko;

¹⁸ma wang' mir adunde mu bedo ma der ucare, kara wung'ei karamb genogen mi lwong'o pare, karamb lonyo mi dwong' mi camupacu pare i jumaleng',

¹⁹man karamb dwong' ma apila mi tego pare yor i bang'wa ma wayio, calku timo maeno mi tego mi tek pare

²⁰m'etimo i Kristu, kan eting'e ku kind ju m'utho, man eketho ejany yo ku cinge ma yor acwic i ka mi polo,

²¹malu ngbir wi bimobim, ku ng'ol, man tego, ku kero, man wi nying' ceke kubang'gi kubang'gi ma jucaku, i ng'om maeni kende ngo, ento i maeno ma bibino bende;

²²man eketho gin ceke bed wor the tiende, man emie ya ebed wic wi gin ceke ni kanisa,

²³ma en e kume, pong' pare m'epong'o ceke i ceke.

Juefeso 2

¹E wun eketho wukwo, ma nwang'u wun avu ni kum kier mu ku dubo mu,

²ma naka wuwotho i ie calku kura mi ng'om maeni, calku jadit mi tego mi lietho, mi tipo ma kawono ubetimo i wot juco;

³ma wan ceke bende naka wabedo i kindgi i awanya ma rac mi kumwa, ma watimo ava mi kum ku mi pidoic, man ku kura wa nyithindho mi kwinyo, cil calu dong' dhanu:

⁴ento Mungu, m'usagre ku kisa, ni kum mer pare ma dit m'emaru kowa,

⁵cil ma fodi wan avu ni kum kier mwa, eketho wakwo karacelo ku Kristu (wuboth ni kum bero),

⁶man eketho wacer wakugi, man eketho wajany karacelo wakugi i ka mi polo, i Kristu Yesu:

⁷kara i rundi ma bibino enyuth lonyo ma apila mi berone i bedober ma yor i bang'wa i Kristu Yesu:

⁸kum wuboth ku bero ni kum yioyic; man maeno ai i beng'wu giwu ngo, en e giramia pa Mungu;

⁹en e mi tic ungo, kara ng'atu moko kud ulule.

¹⁰Kum wan wa bodho pare, ma jucwiowa i Kristu Yesu pi tic ma ber, ma Mungu lar uyiko kara wawoth i igi.

¹¹Kum kumeno dong' wupoi, nia naka wun, ma wu Thekdhanumange i kum, ma wulwongru Yaango ni maeno ma juiwong'o Yaa, i kum, ma jutimo ku cing'.

¹²ya nwang'u i nindo maeca wukoc ku Kristu, ma judwokowu tung' kud udui pa Israel, ku welo de ni lembariba mi lembang'ola, ma genogen umbe kudu, Mungu de mbe kudu, i ng'om.

¹³Ento kawono i Kristu Yesu wun ma naka wuni bor judwokowu ceng'ni i rimo pa Kristu.

¹⁴Kum en e kwiocwiny mwa, m'edwoko ario doko ni acel, man emoro gang' m'i diere mir apoka woko,

¹⁵ma nwang'u ekabu adegi i kume, ndhu cik mi lembang'ola ma ni i lembapoka; kara ecwi ng'atu acel ma nyen i ie gire kud ario, m'etimo ko kwiocwiny;

¹⁶man kara epot kindgi ni Mungu gin ario i kum acel ni kum yen m'athara, nwang'u edaru nego adegine kude:

¹⁷man ebino ekelo kwiocwiny iwu ma nwang'u wuni bor ngbir, man kwiocwiny ni ju ma gini ceng'ni:

¹⁸kum ni kume wan ario wanwang'u mondo mwa ma wamondo ko ba Wego i Tipo acel.

¹⁹Kum kumeno wun wu welo ku juwoth de kendo ngo, endre wu jung'om karacelo ku jumaleng' man mi j uot pa Mungu,

²⁰ma wugombru wi kathere mi jukwenda ku jubila, Yesu Kristu en e m'e kidi ma dwong' mi gul;

²¹ma giragoma ceke kubang'gi kubang'gi ni i ie, m'umoko karacelo cu, m'ebedongo ni hekalu ma leng' i Rwoth;

²²ma wun bende wugombru karacelo i ie ni kabedo pa Mungu i Tipo.

Juefeso 3

¹Kum lembe nini an a Paolo, ma jakol pa Kristu Yesu pi wun ma wu Thekdhanumange,

²tek ebedo kumeno ya wuwino pi tic mi pokopok mi bero maeni pa Mungu m'umire ira iwu;

³maram juketho ang'eyo ko giramung'a ni kum nyuthonyuth calu alar agoro ku lembe ma nyanok,

⁴ku maeni, ka wusomo, wucopo ng'eyo ng'eyong'ec para i giramung'a pa Kristu;

⁵ma kum dhanum'utuk mange juketho eng'eire ngo ni wot dhanu, calu ma kawono enyuthre ni jukwenda pare ma leng' man jubila i Tipo;

⁶ya, Thekdhanumange gi juwagi jucampacu, man gi juwagi wathkum mi kum acel, man juwagi jugam kum lembang'ola i Kristu Yesu ni kum lembanyong'a ma. juboth ko,

⁷ma judwoka jatimne, calku giramia mi bero maeno pa Mungu m'umire ira calku tim m'etimo mi tego pare.

⁸Bero maeni jumio ira, an nini m'a nok ma sagu jumaleng' ceke, ya ayer pi lonyo pa Kristu ma yenjre ngo ni Thekdhanumange;

⁹ya aketh dhanu ceke de ginen karamb tic mi pokopok mi giramung'a m'ugamu pandre por yang' con i Mungu m'ucwio gin ceke;

¹⁰kara kwond rieko pa Mungu ma dupa ung'eire kawono ni ker man tego i ka mi polo ni kum kanisa,

¹¹calku yeny ma ie yeny ma nja i Kristu Yesu Rwoth mwa:

¹²ma wabedo ku tegocwiny i ie, ku mondo ma wamondo ko i bang'e, ku genogen, ni kum yioyic mwa ma wayie ko.

¹³Kum kumeno akwayu ya cwinywu kud udieng' kum masendi m'asendra ko piwu, ma en e dwong' mu.

¹⁴Kum lembe nini arum wi conga ni Wego,

¹⁵ma julwong'o ire nying wat ceke kubang'gi kubang'gi mi polo ku ma wi ng'om bende,

¹⁶kara emi iwu, calku lonyo mi dwong' pare, ya tego medre iwu ni kum Tipo pare i ng'atu m'i iwu;

¹⁷kara Kristu bed i adundewu ni kum yioyic; kara wun, ma ulegwu daru mondo unyang' de i mer,

¹⁸wubed ku tego karacelo ku jumaleng' ceke ma wung'ei ko karamb lacne ku kaborne man kadongone ku kathuthne,

¹⁹man kung'eyo mer pa Kristu ma sagu ang'eya, kara jupong'wu ni pong' pa Mungu ceke.

²⁰Nie ni ng'atu m'ecopo timo dit apila ma sagu gin ceke ma wapenjo kadi ma wapido pire, calku tego m'ubetimbre i iwa,

²¹dong' dwong' ma i kanisa ku ma i Kristu Yesu ubed ire cil ku dhanum'utuk ceke rondo ku rondo de. Amen.

Juefeso 4

¹Ka kumeno an, m'a jakol pa Rwoth, akwayuwu ya wuwoth m'uromo ku lwong' ma julwong'o kowu,

²ku ming'o ceke ku molcwiny, ku mwonyo lembe hai, ku reyo lembe the tielo i mer ma ng'atuman reyo lembe ma kum wadi man kum wadi;

³ma wubeponjo bedo ku lembe acel i Tipo kud amora i twic mi twiocwiny.

- ⁴Kum acel, Tipo de acel, cil calu julwong'owu i genogen acel mi lwong'o mu;
- ⁵Rwoth acel, yioyic de acel, baputisi de acel,
- ⁶Mungu de acel ma ceke e Wego, ma ceke ebedo i wie, ma ceke de timbre ni kume, man ke ceke ebedo i ie.
- ⁷Ento jumio bero iwa kubang'wa kubang'wa ceke calku mukero mi giramia pa Kristu.
- ⁸Kum kumeno ewacu kumae, Kan eidho malu, eyaku weg ayeki, Man emio giramia ni dhanu.
- ⁹(Nie lembene e eni, Eidho, e girang'o ento ya eloro i ng'et ng'om m'i the ng'om bende?)
- ¹⁰Ng'atu m'uloro e en nini m'uidho ngbir wi polo ceke, kara epong' gin ceke.)
- ¹¹Man emio jumoko ya gibed jukwenda; jumoko ke, jubila; jumoko ke, juyer lembanyong'a ma juboth ko; jumoko ke, jugwok kanisa man juponji;
- ¹²pi teng'ni mi jumaleng' ni ric mi timotim, ni gomogom mi kum kanisa:
- ¹³cil, ma wan ceke watundo kum yioyic ma calacel, man kum ng'eyong'ec pa Wod Mungu, ni ng'atu ma kadongone jik, ni mukero mi kadongo mi pong' pa Kristu:
- ¹⁴kara ku wabed nyithindho kendo, ma juthoro ku ku ku ma yamu mi ponji ma tung' tung' ting'o mberembere, ku rieko mi dhanu, i riu, tok abombi mi kier;
- ¹⁵ento ma wubeweco lemandha i mer, wucopo dongo i gin ceke i ie, ma en e wic, ndhu Kristu;
- ¹⁶kud i bang'e kum dho moko karacelo man eribre ber ni kum maeno ma ujonje ceke kelo calku timo mi mukero mi wathkum kubang'gi kubang'gi, uketho kum unyai ni gomogom gire i mer.
- ¹⁷Ka kumeno awacu lembe maeni, man atuco i Rwoth, ya kud wuwoth kendo calu Thekdhanumange bende giwotho, i pidoigi ma kite mbe,
- ¹⁸ma ng'eyong'ec migi yutho, ma gikoc tung' ku kwo pa Mungu, kum cobo ma gibedo ko cobo i igi, kum nwang' mir adundegi;
- ¹⁹gin ma cwinygi doko nwang' ndhu gi, miri gigi ni awanya ma rac, ni timo sasa ceke ku mbo.
- ²⁰Ento wun wugamu ng'eyo Kristu con kumeno ngo;
- ²¹tek ebedo kumeno ya wuwinje, man juponjowu i ie, cil calu lemandha ni i Yesu:
- ²²pi kura bedo mu ma kwong'a, e dong' wuketh ng'atu ma con cen, m'umaku top tok awanya ma rac mir abombi;
- ²³man nia wudok nyen i tipo mi pidoiwu,

²⁴man wurony ng'atu ma nyen ma calku koth Mungu ecwire i bedopwe ku leng'cwiny mi lemandha.

²⁵Kum kumeno, ma wubeketho ndra cen, ku ba dhanu ku ba dhanu ng'atuman uwec lemandha ku wadi: kum wan wa wathkum ng'atuman pa wadi man pa wad.

²⁶Bed ku ng'ecwiny, man kud wudubi: kud wuwek ceng' umwony wi kwinyo mu:

²⁷kadi kud wumi kaka ni wonabali.

²⁸Dong' ng'atu ma kwalu kud ekwal kendo: ento ma sagu dong' etim tic, m'etimo ku cinge gin maeno ma dre, kara ebed ku gin m'emi ni ng'atu ma canpiny ni i kume.

²⁹Dong' sosiwec kud uai kud i dhogwu, ento wagi wec ma calu e ber pi teng'oteng' calu cande bedo, kara emi bero ni ju m'uwinjo.

³⁰Man kud wunyai can i Tipo Maleng' pa Mungu, ma juketho ayi i kumwu i ie cil i ceng' mi war.

³¹Dong' wukab akece ceke woko kud i beng'wu, ku kwinyo, man ng'ecwiny, ku lele ma rac, ku cayucac, karacelo kud amone ceke:

³²man wubed ber ng'atuman ku wadi man ku wadi, kud adunde mi ngisi, ma wuwek ko lembe m'i kumwu, ma ng'atuman uwec lembe ma kum wadi man kum wadi, cil calu Mungu bende i Kristu uweko lembe mu.

Juefeso 5

¹Ka kumeno wubed jukwany ba Mungu, va nyithindho ma jumer;

²man wuwoth i mer, cil calu Kristu bende maruwa, man emire gire piwa, ni giramia ku lam de ni Mungu ni ng'wic gin ma ng'wi ng'ar.

³Ento tarwang', ku sasa ceke, ku kethocwiny hai kum piny, dong' kud elwongre i kindwu ki, calu m'umaku jumaleng';

⁴kadok lemblewic, kadi sosiwec, kadi lele, m'umaku piny ungo: ento ma sagu re mio foyofoc.

⁵Kum maeni wung'eyo andhandha, nia won tarwang', kadok jasasa de, kadok ng'atu ma ketho cwinye hai kum piny, ma en e jarwo ma ni ayi gin ma acwia, umbe ku camupacu i ker pa Kristu ku pa Mungu.

⁶Kud wuyi ng'atu moko wondwu ku lembe ma ie nanu: kum kwinyo pa Mungu wok wi wot juco ni kum gin maeni.

⁷Ka kumeno kud wuribru karacelo kugi;

⁸kum naka wun wu mudho, ento kawono dong' wun wu der ni kum Rwoth: wuwoth pami nyithindho mi der

⁹(kum nying' der eni i berocwiny ceke man bedopwe ku lemandha de),

- ¹⁰ma wubeponjo ya girang'o ma nyayu mutoro i Rwoth;
- ¹¹man kud wuribru ki ku tic mi mudho ma cego nyinge ngo, ento ma sagu re wuketh ging'ei pi dubo migi;
- ¹²kum en e lewic niweco pi gin m'utimbre ni kumgi ling'.
- ¹³Ento gin ceke ma tek juketho jung'eyo pi dubo enyuthie ni kum der: kum gin ceke m'unyuthre en e der.
- ¹⁴Kum kumeno ewacu kumae, Dong' iceu, in ni'ibenindo, man iai i kind ju m'utho, man Kristu birieny i wii.
- ¹⁵Ka kumeno wubed ku weng'wu maram wuwotho ko, calu ju ma jurieko ngo, endre calu jurieko;
- ¹⁶ma wubeng'iewo nindo, kum ceng' gi rac.
- ¹⁷Kum kumeno kud wubed jukusegu, ento dong' wung'ei karamb yeny ma Rwoth uyenyo.
- ¹⁸Man kud wumer ku pigulok, ma ie ju rop, ento dong' Tipo re m'uromwu;
- ¹⁹ma wubewecru ku lembwer man wer ku wer mi tipo de, ma wubewero man wubeketho ko badwal ma mit ku i adundewu ni Rwoth;
- ²⁰ma wubemio ko foyofoc thiri thiri pi gin ceke i nying Rwoth mwa Yesu Kristu ni Mungu ma Wego.
- ²¹Ma wubekethru ko giwu ya wubed wor ni juwedu i lworu pa Kristu.
- ²²Mon, wubed wor ni cogwu ma dhe, calu ni Rwoth.
- ²³Kum cwar dhaku en e wic ni dhaku, calu Kristu en e wic ni kanisa, ma en gire en e jalar mi kum.
- ²⁴Ento calu kanisa bedo wor ni Kristu, e mon bende dong' gibed kumeno ni coggi i gin ceke.
- ²⁵Cogmon, wumar mondwu, cil calu Kristu bende maru kanisa, man emire gire pire;
- ²⁶kara edwoke leng', m'edaru lonye ku lwok mi pi ku lembe,
- ²⁷kara ethier ire gire kanisa ma en e dwong', ma poyo de mbe kadi bel de mbe kadok wagi gin ma kumeno de; ento kara ebed leng' ma mulima de mbe.
- ²⁸Cil kumeno maku cogmon bende gimar mondgi ma dhe calu kumgi gigi. Ng'atu m'umaru cege ma dhe nwang'u emare gire;
- ²⁹kum ng'atu moko mbe m'udagu kume gire; ento etunge man egwoke, cil calu Kristu bende gwoko kanisa;
- ³⁰kum wan wa wathkum mi kume.

³¹Kum kum lembe nini ng'atu ma nico biweko won ku min, man ebimoko kum cege; man gin ario gibidoko kum acel.

³²Giramung'a maeni e dit; ento ayero pi Kristu man pi kanisa.

³³Endre wun bende kubeng'wu kubeng'wu ng'atuman umar cege gire cil calu en gire; man dhakune bed ku wang'e m'elwor ko cware.

Juefeso 6

¹Nyithindho, wuwor junyodo mu i Rwoth: kum maeni en e cu.

²Yung wuru ku meru (maeni cik ma kwong'a ma ku lembang'ola),

³kara ebed ber iri, man ibed hai de wi ng'om.

⁴Man kendo, wu wego, kud wunyai ng'ecwiny i nyithindho mu: endre wutunggi i ponji man juk pa Rwoth.

⁵Jumiru, wuwor judongo m'i wiwu ma ku kum, ku lworu man ku mielkum, kud adundewu m'ucungo acel, calu ni Kristu;

⁶ku tic mi wang' ungo, calu ma dhanu maru; ento calu jumiru pa Kristu, ma wubetimo kayeny pa Mungu ku i adundewu:

⁷ma wubetimo ku morcwinywu, calu ni Rwoth, ni dhanu ngo:

⁸ma wung'eyo ko nia gin ma ber ma tek dhanu kubang'gi kubang'gi gitimo, e ebigamu gica kendo ba Rwoth, kadok en e ng'eca kadi paker.

⁹Man ke, wu judongo, wutim igi wagi gin maeno, man kud wucim cim: ma wung'eyo ko ya ng'atu ma en e Jadit migi ku mu de ni i polo, man kud i bang'e dhanu tung' tung' ungo.

¹⁰Aha a, wubed tek i Rwoth, man i tego mi tek pare.

¹¹Wurony jamtho pa Mungu kpo, kara wucung ki ni rieko pa wonabali.

¹²Kum anyego mwa en e kum ring'kum ku rimo de ngo, endre kum ker, kum tego, kum jubim mi mudho mi ng'om maeni, kum udul tipo mi dubo i ka mi polo.

¹³Kum kumeno ting' jamtho pa Mungu kpo, kara wubin wucung kr i ceng' maeni ma rac, man, ma wudaru timo ceke, wucungi.

¹⁴Wucung kumeno, ma wudaru twio pierwu ku lemandha, man wudaru royo asi mi bedopwe,

¹⁵ma wudaru royo girayika mi lembanyong'a ma juboth ko mi kwiocwiny i tiendwu;

¹⁶karacelo ku maeni wuting' thungu mi yioyic, ma wubicopo nego ku.. do lak athero mi mac ceke pa ng'atu ma rac.

17Man wugam sabu mi both ma juboth ko, ku palamularu mi Tipo, ma en e lem pa Mungu:

18ku rwo man kwayukwac ceke ma wuberwo ko ku ba nindo ceke i Tipo, ma wubekuro bang'e awe, ku kwayu kwac de pi jumaleng' ceke,

19man pira, kara wec umire ira i yabu dhoga, kara aketh jung'ei giramung'a mi lembanyong'a ma juboth ko ku tegocwiny,

20ma an a jadhulembe pire i nyoro; kara ayer ku tegocwiuy i ie, calu ma maku ayer.

21Ento kara wun bende wung'ei lembe para, maram abedo ko, Tukiko, m'umego ma jamer, man jatim mandha i Rwoth, ebiketho wung'ei gin ceke:

22m'aore i beng'wu pi lembe maeni nini, kara wung'ei bedo mwa, man kara ejuk adundewu.

23Kwiocwiny ubed ba utumego, man mer ku yioyic, m'uai ba Mungu ma Wego ku Rwoth Yesu Kristu.

24Bero bed ba ju m'umaru Rwoth Yesu Kristu mwa ceke ku mer ma nyothre ngo.

Jupilipi

Jupilipi 1

- 1**Paolo ku Timoteo, jumiru pa Kristu Yesu, ni jumaleng' ceke i Kristu Yesu ma gini i Filipi, ku julieu man jukony:
- 2**Bero iwu ku kwicwiny m'uai ba Mungu ma Wegwa man Rwoth Yesu Kristu.
- 3**Afoyo Mungu para ku ba poi ceke m'apoi ko piwu,
- 4**thiri thiri ku ba kwac para ceke m'akwayu piwu kpo akwayu ku mutoro,
- 5**kum ribri mwa ma wakudu i rweyo lembanyong'a ma juboth ko ugambre i ceng' ma kwong'a cil ku kawono de;
- 6**m'ageno ko gin maeni nini, nia ng'atu m'utheko tic ma ber i iwu ebidare cu cil i ceng' pa Yesu Kristu:
- 7**cil calu ebedo cu ira ya ia pid piwu kewu ceke kumeno, kum wuni i adundena, kum, i kol para man i cungo kum lembanyong'a ma juboth ko ku ketho ebed ko tek de, wun ceke waribra wakudu i gamu bero.
- 8**Kum Mungu en e jamulembe para, maram ava wu ceke betima dit i kisa ma ng'ic pa Kristu Yesu.
- 9**Man aberwo, nia mer mu ucikusagu asaga i ng'eyong'ec ku riu ceke;
- 10**kara wung'i gin ma ber ku gin ma rac de; kara wubed ma awondi mbe kudu ma kier de mbe kudu cil i ceng' pa Kristu;
- 11**ma nying' bedopwe, ma ni kum Yesu Kristu, e m'uyeng'wu, ni dwong' pa Mungu ku pak ma jupake ko.
- 12**Nie ayenyo wung'ei, umego, nia giki m'uwok i kuma e etimbre nia lembanyong'a ma juboth ko urweire m'usagu ni kume;
- 13**uketho kol para ma ni kum Kristu unyuthre cil i kind jukur ceke p'ubimo, man ni ju m'udong' ceke bende;
- 14**man nia umego kucel ma dit ma gini i Rwoth, ma ginwang'u tego ni kum kol para, gisagu ku tegocwinygi ku yero lembe pa Mungu ma lworu mbe i kumgi.
- 15**Andha jumoko giyero pi Kristu cil ku kumira ku por bende; jumoko ke ku berocwinygi bende:
- 16**ju maeni betime ni kum mer, ma ging'eyo ko nia juketha kara acung kum lembanyong'a ma juboth ko:
- 17**ento ju maeno giyero pi Kristu mir athube, ku cwinygi m'umbe abombi ngo, ma igi pido ya ginyai can i kuma i kol para.

- ¹⁸Ka ke ang'o? mae kende nia i yo ceke, kadok kud abombi kadi ku lemandha, juyero pi Kristu; e i lembe nini anyong'a nega, eyo, man anyong'a binega.
- ¹⁹Kum ang'eyo nia maeni bilokre ni both para, ni kum kwac ma wukwayu man ke ku kony pa Tipo Yesu Kristu,
- ²⁰calku kur para ma ku cwinya ceke ku genogen para, kara lewic kud unega ni kum gin moko, ento nia ku tegocwiny ceke, calu ma thiri thiri, e kawono bende Kristu bidoko dwong' ni kuma, kadok ku kwo, kadi ku tho.
- ²¹Kum ira bedo kwo en e Kristu, tho ke en e kuloka.
- ²²Ento tek bedo kwo i kum, tek maeni en e nying' tic para, ka kumeno makani m'afoyo ang'eyo ngo.
- ²³Ento lembe bewira i kindgi gin ario, ma ava ai benega kara wabed waku Kristu; kum eni e ber ma sagu dit:
- ²⁴ento bedo i kum piwu cande negowu ma sagu.
- ²⁵E ku genogen maeni, ang'eyo nia abidong', eyo, man wabibedo karacelo wakudu ceke, kara wucikusagu asaga wubed ku mutoro de i yioyic;
- ²⁶kara kulula mu usagre i Kristu Yesu ni kuma kum bedo para m'i kindwu kendo.
- ²⁷Mae kende wuwek bedo mu urom lembanyong'a ma juboth ko pa Kristu: kara, kadok abino man anenowu kadi ambe de, awinj piwu, ya wucungo ki ku cwinywu acel, ku pidoic de acel ma wubeii ko aiaa kum yioyic mi lembanyong'a ma juboth ko;
- ²⁸ma ndiri ng'oi i iwu ngo kum weg amone kum gin moko: maeni giranyutha ma ngbeng' igi mi nyoth ma junyothri ko, ento mi both mu, m'uai ba Mungu;
- ²⁹kum emire iwu ni kum Kristu, ya wuyie ayia kende ngo, endre ya wusendru pire bende:
- ³⁰ma wubeii aiaa calu ma wuneno i ia, man kawono bende wuwinjo nia eni i ia.

Jufilipi 2

- ¹Ka kumeno tek juk moko nuti i Kristu, tek thokothok moko mi mer de nuti, tek ripocwiny moko mi Tipo nuti, tek kisa ma ng'ic ku ngisi moko nuti,
- ²wuketh mutoro para pong' kara pidoiwu bed calacel, ma wubedo ku mer ma calacel, ma wubedo ku cwinywu de m'uripo acel, ku pidoiwu de acel;
- ³ma wubetimo gin moko ngo kud ali kadok ku kulula mananu, ento ku pidoic ma mol wek ng'atuman ie pid ya wadi ber ma sagu en;
- ⁴ma wun kubeng'wu kubeng'wu ng'atuman ie ku pido kum piny pare kende ngo, ento ng'atuman ie pid kum piny mi juwadi bende.
- ⁵Dong' pidoic maeni e m'ubed i iwu, ma yang' ubedo i Kristu Yesu bende:

⁶en, ma nwang'u e Mungu ku kite ngi, kud i wang'e bedo ma jubedo ko ro ku Mungu en e gin ma juketho cwiny i kume ngo kara jubed ndhu kude,

⁷ento ewenjre gire, edong' egamu kum ng'eca re, e edoko ni ayi dhanu;

⁸e kan enwangre i ayi mi dhanu, e ejwigre gire, edoko jaworo cil mi tho ngi, eyo, tho mi yen m'athara.

⁹Kum kumeno bende Mungu dode dit apila, man emio ire nying' ma sagu nying' ceke;

¹⁰kara i nying' Yesu cong ceke rum, m'i polo ku m'i ng'om ku ma the ng'om,

¹¹man kara leb ceke kubang'gi kubang'gi ubin utuc nia Yesu Kristu en e Rwoth, ni dwong' pa Mungu ma Wego.

¹²Kum kumeno, jumerna, cil calu wubeduworo thiri thiri, calu i vuta kende ngo, ento kawono m'usagu dit m'ambe, wutim tic mi both mu giwu ku lworu ku mielkum;

¹³kum en e Mungu m'etimo i iwu ku yenyo ku timo bende, ni kum mutoro pare.

¹⁴Wutim gin ceke umbe ng' ur umbe piem de;

¹⁵kara wubed ma lembe mbe iwiwuwubed mol de, nyithindho pa Mungu ma poyo de mbe i kind dhanum'utuk m'ugondri ma gi juco de, ma kud i kind joca wubenen calu der i ng'om,

¹⁶ma wubethiero lembe mi kwo; kara abed ku gin moko m'abin alula i kume i ceng' pa Kristu, ya aringo mananu ngo kadi amula ku tic de mananu ngo.

¹⁷Eyo, man tek jubekonja wi lam man wi tic mi yioyic mu, e anyong'a benega, man anyong'a benega wakudu ceke:

¹⁸man ke wun bende anyong'a benegowu kumeno, man anyong'a negwu wakudu.

¹⁹Ento ageno i Rwoth Yesu ya fodi nyanok abioro Timoteo i beng'wu, kara an bende cwinya jukre kinde m'ang'eyo rama wubedo ko.

²⁰Kum ng'atu moko mbe i bang'a ma pidoie calu para, ma ie pido piwu andha.

²¹Kum gin ceke gibeyenyo gin migi gigi, gin pa Yesu Kristu re ngo.

²²Ento wung'eyo maram pire nyuthie ko, nia, calu nyathin konyo won, en bende ekonya kumeca ku nyayu lembanyong'a ma juboth ko.

²³Ka kumeno ageno ya abiore i beng'wu kawono, kinde m'aneno rama lembe para bitimbre ko:

²⁴endre ageno i Rwoth nia an bende ku kita abibino nyakawono.

²⁵Ento akwanu nia emaku piny ya aor Epafrodito m'umira i beng'wu ma wa jutic wakude, wan asikari de wakude, man jakwenda mu m'e jakony mi can m'unega;

²⁶kum ava wu kewu ceke nege dit, man cwinye dieng' dit, kum wuwinjo nia kume lith:

²⁷kum andha kume make m'uyenyo nege anega: ento Mungu timo ku kisa i kume; man i kume kende ngo, ento i kuma bende, kara kud anwang' can wi can wagi.

²⁸Ka kumeno aore nyadwedwe ma sagu, kara, ka wunene kendo anyong'a negwu, man ke kara can para dok nok.

²⁹Wujole kumeno i Rwoth ku mutoro ceke; e wuyung wagi dhanu ma kumeno:

³⁰kum evotho pi tic pa Kristu, m'ekuno kume kara eketh tic mu ma ira m'urem urom kakare.

Jupilipi 3

¹Aha a, umego, anyong'a negwu i Rwoth. Goro iwu ma calku ma kwong'a, eola ngo, ento e ber iwu.

²Wubed ku weng'wu kum gwogi, wubed ku weng'wu kum jutic ma rac, wubed ku weng'wu kum ju ma thumo kum:

³kum wan wa weg yaa, ma warwo ku Tipo pa Mungu, e walula i Kristu Yesu, man wageno mwa kum ungo:

⁴nwang'u an nini e m'acopo geno cli i kum: tek ng'atu mange ie wacu ya egen kum, nwang'u an e m'asagu:

⁵jutimo yaa i kuma i ceng' mir aborane, ma a nyakwar Israel, mi suru pa Benyamin, Jaebrania mi Juebrania; pi lembe mi cik, a Jafarisayo;

⁶pir ava tic ke, anyayu ragedo kum kanisa; pi bedopwe ma ni i cik ke, junwang'a ma lembe mbe i wia.

⁷Ento giki ma naka gi kuloka ira, maeni akwanugi ni gin m'uai mananu kum Kristu.

⁸Eyo andha, man akwanu gin ceke ni gin m'uai mananu kum bero mi ng'eyong'ec pa Kristu Yesu ma Rwoth para: gin ceke oi mananu ira pire, man akwanugi ni usabu kende, kara anwang' Kristu,

⁹man junwang'a i ie, m'abedo ku bedopwe para an ungo, cil maeno ma mi cik, ento maeno ma en e mi yioyic pa Kristu re, bedopwe m'uai ba Mungu ni kum yioyic:

¹⁰kara ang'eye, ku tego mi cer m'ecer ko, ku ripocwiny mi sendri pare, m'abedo ko ni ayi tho pare;

¹¹tek acopo tundo kum cer ma kind ju m'utho ku yo moko.

¹²Calu m'adaru nwang'u ngo, kadi judaru dwoka ndhu cu de ngo: ento abecikucwala, tek kuno nyo acopo maku maeca ma Kristu Yesu bende maka ni kume.

¹³Umego, fodi akwandra gira ngo ya amaku: endre gin acel abetimo, ma wia wil kum gin ma ni i ng'eya, m'abecwala rut kum gin ma ni i wang'a de,

¹⁴abecwala kara atund kakara kum sukulia mi lwong'o ma malu pa Mungu ni kum Kristu Yesu.

¹⁵Ka kumeno, dong' wan ma wang'wa teng'ni kum lembe, wabed ku pidoic ma kumeno: man ke tek wubedo ku pidoic ma tung' i gin moko, e Mungu binyutho maeni bende iwu:

¹⁶mae kende, i maeni ma wadaru wok i ie, dong' wawothu ku lembe ma calacel.

¹⁷Umego, wukwany bang'a karacelo, man wunen ju ma giwotho kumeni cil calu wan ma wa jupor i weng'wu.

¹⁸Kum dupa giwotho, m'adaru yero pigi iwu wang' udul, kawono de ayero iwu cil ku ywak, nia gi judegi mi yen m'athara pa Kristu:

¹⁹ma kajik migi en e nyoth, usauigi e ma mungu migi, man kulula migi ni i lewic migi, ma giketho migi pidoigi kum gin m'i ng'om.

²⁰Kum thuwa ni i polo; wabekuro Jalar bende m'ebiai kuca, en e Rwoth Yesu Kristu:

²¹m'ebiloko kumwa mi lewic udok nyen, kara edok pami kume mi dwong' pare, calku tego m'ecopo bimo ko wi gin ceke i bang'e gire.

Jufilepi 4

¹Kum kumeno, umego ma jumer ma avawu benega, ma mutoro para man jamkermiwic, wucung ki ki ki kumeno i Rwoth, jumerna.

²Ajuko Euodia, man ajuko Suntuke, ya gibed ku pidoic acel i Rwoth.

³Eyo, akwei ma tek bende, jatic ma ku mberembere andha, kony mon maeni, kum wamula ku tic wakugi i lembanyong'a ma juboth ko, ku Klement bende, man jutic wada m'udong' de, ma nying'gi ni i kitabu mi kwo.

⁴Anyong'a negwu thiri thiri i Rwoth: awacu kendo, Anyong'a negwu.

⁵Wek mwonyolembem mu ung'eire ni dhanu ceke. Rwoth ni ceng'ni.

⁶Cwinywu kud uring kum gin moko ki; ento i gin ceke ku rwo man kwayukwac ku foyofoc wuwek penji mu ung'eire ni Mungu.

⁷Man kwiochwiny pa Mungu, ma sagu ng'eyong'ec ceke, bikuro adundewu ku pidoiwu i Kristu Yesu.

- ⁸Aha a, umego, gin ma tek gin andha, gin ma tek gi mi yung, gin ma tek gi pwe, gin ma tek gi leng', gin ma tek gi mi mer, gin ma tek gi rwonglembe ma ber; tek bero moko ni i kume, tek pak moko ni i kume, e iwu pid kum giki maeni.
- ⁹Gin ma wugamu ng'eyo con, man wujolo man wuwino man wuneno i ia de, wutim gin maeni: e Mungu mi kwicwiny bibedo kudu.
- ¹⁰Ento anyong'a nega dit i Rwoth, kum kawono dong' pidoic mu ma kum lembe para yepo; i maeni iwu pido andha, ento fodi wunwang'u nindo ma kakare ngo.
- ¹¹Ayero kum canpiny m'unega ngo: kum agamu ng'eyo con, i bedo ma tek abedo ko, e cwinya bedo m'ecungo i ie.
- ¹²Ang'eyo maram jujwigri ko, ang'eyo maram jusagri ko bende: i gin ceke man i gin ceke kubang'gi kubang'gi agamu ng'eyo lembamung'a nini con, ku bedo ku yeng'o man ku kec bende, ku sagri ku bedo ku canpiny bende.
- ¹³Acopo timo gin ceke ni kume m'emio ira tego.
- ¹⁴Ento wutimo dre ya waribra wakudu i can para.
- ¹⁵E wun bende wung'eyo giwu, wu Jufilipi, nia i thekri mi lembanyong'a ma juboth ko, kinde m'aai i Makedoni, kanisa moko mbe ma waribra wakugi i lembe mi mio ku gamu de ndhu wun wu kendwu;
- ¹⁶kum cil i Tesaloniki wuro wang' acel man kendo kum lembe mi canpiny m'unega.
- ¹⁷Ene kum giramia ma nia ayenyo ngo; ento ayenyo nyingwu e m'ucikusagu asaga ni wel mu.
- ¹⁸Ento abedo ku gin ceke, man asagra: ayeng', kum adaru gamu giki m'uai i beng'wu bang' Epafrodito, en e ng'wic gin ma ng'wi ng'ar, en e lam ma yire, ma nyayu mutoro i Mungu.
- ¹⁹Man Mungu para bimio iwu gin ceke ma cande ni i kumwu calku lonyo pare i dwong' ni kum Kristu Yesu.
- ²⁰Nie dwong' ma rondo ku rondo ubed ni Mungu mwa man Wegwa. Amen.
- ²¹Wumoth jumaleng' ceke kubang'gi kubang'gi ma gini i Kristu Yesu. Umego ma wabedo wakugi de gimothowu.
- ²²Jumaleng' ceke gimothowu, ma sagu dit ju ma gi juot pa Kaisari.
- ²³Bero pa Rwoth Yesu Kristu bed ku cwinywu.

Jukolosai

Jukolosai 1

- ¹Paolo, jakwenda pa Kristu Yesu ni kum yeny ma Mungu yenyo, man Timoteo m'umegwa,
- ²ni jumaleng' man umego mandha i Kristu ma gini i Kolosai: Bero iwu man kwiocwiny m'uai ba Mungu ma Wegwa.
- ³Wafoyo Mungu ma Won Rwoth mwa Yesu Kristu, ma warwo ko thiri thiri piwu,
- ⁴ma wadaru winjo pi yioyic mu i Kristu Yesu, man pi mer mu ma wubedo ko yo ba jumaleng' ceke,
- ⁵kum genogen ma jukanu iwu i polo, ma wular wuwinjo pire i lembe mi lemandha mi lembanyong'a ma juboth ko,
- ⁶m'uwok i beng'wu: cil calu ebedo i ng'om ceke bende m'cego nyinge man ecikumedre, calu ma i iwu bende, ugambre i ceng' ma wuwinjo wung'eyo de bero pa Mungu i lemandha;
- ⁷cil calu wugamu ng'eyo con bang' Epafra ma en e jatic wadwa ma jamer mwa, m'e jatic mandha pa Kristu piwa,
- ⁸m'eyero iwa pi mer mu bende ma i Tipo.
- ⁹Kum lembe nini wan bende, ugambre i ceng' ma wawinjo, waweko ki ngo nirwo ku kwayu kwac piwu, kara ng'eyong'ec mi yeny ma ie yenyo uromwu i rieko ceke ku ng'eyong'ec mi tipo bende,
- ¹⁰kara wuwoth calu m'uromo ku Rwoth ma wubenyayu ko mutoro kwa, ku cego nyingwu i tic ma ber ceke kubang'gi kubang'gi, ku teng'ni i ng'eyong'ec pa Mungu;
- ¹¹ma wudoko tek ku tego ceke, calku tek mi dwong' pare, ni twiocwiny ceke ku mwonyolembe ma jumwonyo hai ku mutoro:
- ¹²ma wubefoyo ko Wego, m'udwokowa dre ni jurib mi camupacu mi jumaleng' i der;
- ¹³m'elaruwa kud i tego mi mudho, man elokowa i ker pa Wode mi mer pare;
- ¹⁴ma wanwang'u war ma juwaru kowa ni kume, ni wek mi dubo mwa:
- ¹⁵ma en e ayi Mungu ma nen ungo, kayu mi giracwia ceke pa Mungu;
- ¹⁶kum gin ceke cwire ni kume, ma ni i polo ku ma wi ng'om bende, gin ma nen ku gin ma nen ungo bende, kadok komker kadi kero kadi ker kadi tego; gin ceke cwire ni kume, pire bende;
- ¹⁷man en e kwong'a mi gin ceke, man gin ceke de bedo karacelo ni kume.

- ¹⁸Man en e wic mi kum, ma en e kanisa: ma en e thangambere, en e kayu mi cer ma kud i kind ju m'utho; kara ebed jawipiro i gin ceke.
- ¹⁹Kum ebedo ber ni Wego ya pong' mi gin ceke bed i ie;
- ²⁰ya ekwi gin ceke ire gire, m'edaru timo kwicwiny ni kum rimo mi yen m'athara pare; ni kume, awacu, kadok gin ma wi ng'om, kadi gin ma ni i polo.
- ²¹Wun de, ma naka wukoc tung' wu jukwor de i pidoiwu i tic ma rac mu,
- ²²ento kawono re dong' ekwiowu i kum mi ring'kume ni kum tho, kara ethierwu i wang'e gire ma wu leng' ma poyo de mbe adote de mbe:
- ²³tek ebedo kumeno ya wubed i yioyic, ma ulegwu nyang' ucungo tek de, ma wukucoro cen ungo kum genogen mi lembanyong'a ma juboth ko ma wuwinjo, ma juyero i giracwia pa Mungu ceke the polo; ma an a Paolo judwoka ni jatije.
- ²⁴Nie anyong'a nega i masendi m'asendra ko piwu, man apong'o gin maka para mi masendi pa Kristu m'urem i ring'kuma pi kume, ma en e kanisa;
- ²⁵ma juketha ni jatije, calku tic mi pokopok pa Mungu ma jumio ira piwu, kara aketh lembe pa Mungu timbre kakare,
- ²⁶cil giramung'a m'ugamu pandre por con ku ba dhanu m'ucikutuk de: ento kawono dong' junyuthe ni jumaleng' pare,
- ²⁷e ebedo ber ni Mungu ya eketh ging'ei karamb lonyo mi dwong' mi giramung'a maeni i kind Thekdhanumange, ma en e Kristu i iwu, genogen mi dwong':
- ²⁸ma wayero pire, wacikujuko ko dhanu kubang'gi kubang'gi man wacikuponjo ko dhanu kubang'gi kubang'gi i rieko ceke, kara wathier dhanu kubang'gi kubang'gi ma gibedo ndhu cu i Kristu;
- ²⁹e amula ku tic bende pi eni, m'abeii ko aiaa calku tim m'ebetimo, m'ubetimo i ia ma tek.

Jukolosai 2

- ¹Kum ayenyo wung'ei maram aii ko aiaa piwu, man pi ju ma Laodikia, man pi ju ma fodi gikuneno wang'a mi kum ungo;
- ²kara adundegi jukre, gi ju ma juribogi karacelo i mer, man ni lonyo ceke mi kwicwiny ma pong' mi ng'eyong'ec, kara ging'ei giramung'a pa Mungu, ma Kristu,
- ³ma piny m'akana ceke mi rieko ku ng'eyong'ec de ubedo apana i ie.
- ⁴Ayero maeni, kara ng'atu moko kud ubombwu ku lembacung'a mi wec.
- ⁵Kum kadok ambe i beng'wu ku kum, endre wanuti wakudu i cwiny, ma mutoro benega kan abeneno bedo mu ma kakare, man ke cungo mi yioyic mu i Kristu.
- ⁶Ka kumeno calu wudaru jolo Kristu Yesu ma Rwoth, e wuwoth i ie kumeno,

⁷ma ulegwu nyang' ma wugombru de i ie, ma wunyang' i yioyic mu de, cil calu juponjowu, ma wusegru ko i foyofoc bende.

⁸Wubed ku weng'wu kara ng'atu moko kud udwokwu ni jambayeki ku lembrieko pare man kud abombi mananu, tok lembkei mi dhanu, tok ponji ma kwong'a m'i ng'om, ma ku tok Kristu ngo:

⁹kum Rucwic upong' thur i ie ma ku kum,

¹⁰man i ie wun de wupong'o thur, ma en e wi ker ku tego ceke:

¹¹i ie de jutimo yaa i kumwu bende ku yaa ma jutimo ku cing' ungo, i roc ma kum mi ring'kum roc ko, i yaa pa Kristu;

¹²ma judaru yikowu wukugi i baputisi, man juting'owu bende i ie wukugi ni kum yioyic i timotim pa Mungu, m'uting'e ku kind ju m'utho.

¹³E wun, kinde ma nwang'u wuni i tho kum kier mu man kumwu ma jukutimo yaa i kume ngo, wun, awacu, edwokowu kwo karacelo kude, nwang'u eweko iwa kier mwa ceke;

¹⁴nwang'u eruco lembagora mi cik m'utuco wiwa, m'eketho wang'e i kumwa: man ekabe cen kud i yo, m'egure ko kor yen m'athara ku musumali;

¹⁵nwang'u enyotho ker ku tego de, eketho gibedo giranena ma ngbeng', m'eloyogi ma gwei i ie.

¹⁶Ka kumeno ng'atu moko kud upok lembe iwu kum giracama, kadi kum giramadha, kadi kum ceng' agba kadi mi dwi ma por kadi ceng' sabatu;

¹⁷ma en e tipopiny mi gin ma bibino; endre kum en e pa Kristu.

¹⁸Ng'atu moko kud umai giragama mi kwaya mu ku yeny ma ie yeny mi molcwiny ku rwo ma ni malaika de, m'ebedo ndhu i gin m'enido, m'etingre mananu kum pidoic mi kum,

¹⁹m'emoko kr ngo kum Wic ma kum dho gamu gin m'ucupe i bang'e, m'eribre de karacelo ni kum ujonje ku ler, ebenyai de ku nyai pa Mungu.

²⁰Tek wutho ku Kristu ni ponji ma kwong'a m'i ng'om, nedi, wudong' wumiru giwu ni lembapoka, calu ju ma gibedo i ng'om,

²¹Kud wumaki, kadok abila de, kadok amula de

²²(gin ceke ma gibinyothri i tim), tok lembang'ola ku lemponji mi dhanu?

²³Gin maeni bedo andha ni giranena mi rioko i rwo ma ijo maru, ku jwigri gijo, ku sendo kum: ento gin maeni kulokane mbe ma dhiro wi awanyakum.

Jukolosai 3

¹Ka kumeno tek juting'owu karacelo ku Kristu, wuyeny gin ma ni malu, ka ma Kristu ni i ie, m'ejany ko yo ku cing' Mungu ma yor acwic.

- ²Wuketh pidoiwu kum gin ma malu, kum gin ma wi ng'om ungo.
- ³Kum wutho, man kwo mu bedo apana karacelo ku Kristu i Mungu.
- ⁴Ka Kristu, ma kwo mwa, binyuthie, e wun bende wubilund nyuthiu wukugi i dwong'.
- ⁵Ka kumeno wuneg wathkumwu ma gini i ng'om: tarwang', sasa, awanya ma rac, ayiri, ku ketho cwiny hai kum piny, ma en e rwo ma ni gin m'acwia;
- ⁶kum gin maeni kwinyo pa Mungu wok wi wot juco:
- ⁷ma wun bende yang' wuwotho i ie, kinde ma fodi wubedo i gin maeni;
- ⁸ento kawono wun bende dong' wucorgi ceke cen: ng'ecwiny, ku kwinyo, kud akece, ku cayucac, ku lemblewic ma ai kud i dhogwu:
- ⁹kud wucwai ndra ma nia ng'atuman ucwai ni wadi man ni wadi: kum wudaru wanyu ng'atu ma con cen ku tic pare de,
- ¹⁰man wuronyo ng'atu ma nyen, m'ubecikudoko nyen ku ng'eyong'ec calu ayi ng'atu m'ucwie: .
- ¹¹ma kadok Jayunani kadi Jayahudi, kadi yaa, kadok yaango de, kadi dhanu ma sai, kadok Jakuthi, kadi ng'eca, kadi paker de ceke gicopo bedo i ie ngo; ento Kristu re en e gin ceke, man i gin ceke.
- ¹²Ka kumeno wurony, calu dhanu ma Mungu goyo wigi, ma leng' man jumer de, adunde mi ngisi, ku bedo ber ku dhanu, ku ming'o, ku molcwiny, ku mwonyo lembe hai;
- ¹³ma wuoi ko lembe ma kum juwedu ma ng'atuman uoi lembe ma kum wadi man kum wadi, ma wuwek ko lembe ma kum juwedu ma ng'atuman uwek lembe ma kum wadi man kum wadi, tek ng'atu moko lembe ni i ie kum ng'atu moko: cil calu Rwoth uweko lembe mu, e wun bende wutim kumeno:
- ¹⁴man ma sagu gin maeni ceke wurony mer, ma en e twic mi doko cu ma ndhu.
- ¹⁵Man wek kwiocwiny pa Kristu bim wi adundewu, ni maeni bende julwong'owu i kum acel: man wubed ma wufoyo foc.
- ¹⁶Wek lembe pa Kristu sagre i iwu; i rieko ceke ma wubeponjru man wubejukru ku lembwer man wer ku wer mi tipo, ma wubewero ku bero i adundewu ni Mungu.
- ¹⁷Man gin ceke ma tek wutimo, i lembe kadi i tic, tim ceke i nying Rwoth Yesu, ma wufoi ko Mungu ma Wego ni kume.
- ¹⁸Mon, wubed wor ni cogwu, calu m'umaku piny i Rwoth.
- ¹⁹Wu cogmon de, wumar mondwu, man kud wukecgi.
- ²⁰Nyithindho, wuwor junyodo mu i gin ceke, kum maeni nyayu mutoro i Rwoth.

²¹Wego, kud wunyai ng'ecwiny i nyithindho mu, kara kud wukab cwinygi.

²²Jumiru, wuwinj dwand judongo m'i wiwu ma ku kum i gin ceke; ku tic ma ku wang' ungo, calu ma dhanu maru, ento kud adunde acel, mi lworu Rwoth:

²³gin ceke ma tek wutimo, wutim ku cwinywu ceke, calu ni Rwoth, ni dhanu de ngo;

²⁴ma wung'eyo ko nia wubigamu sukulia mi camupacu ba Rwoth: wutimo ni Rwoth Kristu.

²⁵Kum ng'atu m'utimo rac ebinwang'u kendo en nini m'etimo rac: man dhanu tung' tung' ungo.

Jukolosai 4

¹Judongo, wumi ni jumiru mu gin m'umaku piny m'uromo kugi de; ma wung'eyo ko ya wun bende wutie ku Jadit i polo.

²Wubed kr kum rwo, ma wuki ko i ie ku foyofoc;

³karacelo ku maeni wurwo iwa bende, kara Mungu yab iwa dhugola ni lembe, kara wayer giramung'a pa Kristu, ma an bende ani i kol pire;

⁴kara anyuthe, calu emaku ya

⁵Woth ku rieko yo ba ju woko, ma wubeng'iewo ko nindo.

⁶Wek wec mu bed ku bero thiri thiri, ma kadu rome, kara wung'ei maram wulok ko lembe ni dhanu kubang'gi kubang'gi.

⁷Lembe para ceke Tukiko biketho wung'eyo, ma en e umego ma jamer m'e jatim mandha man e jatic wakude i Rwoth:

⁸m'aoro i beng'wu pi lembe maeni nini, kara wung'ei bedo mwa ma wabedo ko, man kara ejuk adundewu bende;

⁹karacelo kud Onesimo, ma umego mandha ma jamer bende, ma en e ng'atu acel m'i kindwu. Gibiketho wung'ei gin ceke m'utimbre kuni.

¹⁰Aristarko ma jakol wada umothowu, man Marko, ma wod nyamin Barnaba (ma wujolo leembang'ola pire; tek ewok i beng'wu, wujole),

¹¹man Yesu ma jniwong'o Yustu, ma gi weg yaa: joni kendgi e ma wa jutic mi ker pa Mungu wakugi, dhanu ma gibedo ira ni juk.

¹²Epafra, ma en e ng'atu acel m'i kindwu, m'e jamiru pa Yesu Kristu, emothowu, m'ebeli aia thiri thiri piwu i rwo pare, kara wucung ndhu cu wung'ei andha de yeny ma Mungu yeny ceke.

¹³Kum anyutho pire, ya emule dit ku tic piwu, man pi ju ma i Laodikia, man pi ju ma ni i Hieropoli.

- ¹⁴Luka, ma jakeikum ma jamer, giku Dema bende gimothowu.
- ¹⁵Wumoth utumego ma gini i Laodikia, ku Numfa bende, man kanisa ma ni i ot migi.
- ¹⁶Man tek judaru somo waraga maeni i kindwu, wuketh jusome i kanisa mi Julaodikia bende; man wun bende wusom waraga m'uai i Laodikia.
- ¹⁷Wuwac ni Arkipo kumae, Dong' iketh weng'i kum tic m'ijolo i Rwoth, kara itime kakare.
- ¹⁸Moth para an a Paolo gira ku cinga. Wupoi pi kol para. Dong' bero bed kudu.

1 Jutesaloniki

1 Jutesaloniki 1

- ¹Paolo, ku Siluano, man Timoteo, ni kanisa mi Jutesaloniki i Mungu ma Wego man Rwoth Yesu Kristu: Bero iwu man kwiocwiny.
- ²Wamio foyofoc ni Mungu thiri thiri piwu ceke, ma wayero ko piwu i rwo mwa;
- ³ma wapo ko areri kum tic mu i yioyic man tic mu i mer ma wumulu kudo ku twiocwiny mu mi genogen i Rwoth mwa ma Yesu Kristu, i wang' Mungu mwa ku Wegwa;
- ⁴ma wang'eyo ko goyo nying' mu, juwadwa ma jumer pa Mungu,
- ⁵maram lembanyong'a mwa ma juboth ko bino ko i beng'wu i lembe kende ngo, ento i tego bende, man i Tipo Maleng', man i kwiocwiny ma dit; cil calu wung'eyo maram piwa ma wanyuthia ko iwu ni kumwu bedo ko.
- ⁶Man wudoko jupor mwa, ku pa Rwoth, wun ma wudaru jolo lembe i can ma dit, kud anyong'a mi Tipo Maleng';
- ⁷ketho wudoko ni por ni dhanu ceke m'uyio i Makedoni ku i Akaya bende.
- ⁸Kum lembe pa Rwoth umeny kud i beng'wu, i Makedoni ku Akaya kende ngo, ento i kaka ceke yioyic mu ma yo ba Mungu yik tirr; ketho can yero gin moko kud unegwa.
- ⁹Kum joni giyero piwa gigi pi mondo mwa m'i beng'wu maram ebedo ko; man ke maram wulokru ko ni Mungu ku kum ayi gin m'acwia, kara wutim ni Mungu ma kwo mandha de,
- ¹⁰wukur Wode de m'ebiai i polo, m'eting'e ku kind ju m'utho, en e Yesu, m'ebodhowa ni kwinyo ma bibino.

1 Jutesaloniki 2

- ¹Kum wun giwu, umego, wung'eyo mondo mwa m'i beng'wu, ya junwang'u ebedo mananu ngo:
- ²ento wan ma walar wasendra man jutimowa rac dit, calu wung'eyo, i Filipi, cwinywa doko tek i Mungu mwa ma wayero ko iwu lembanyong'a ma juboth ko pa Mungu ma waii ko aiia.
- ³Kum juk mwa en e mi ndra ngo, kadi mi sasa de ngo, kadi i abombi de ngo:
- ⁴ento cil calu Mungu ufoyo ya wagwok lembanyong'a ma juboth ko, kumeno wayero; calu ma nyayu mutoro i dhanu ngo, ento ma nyayu mutoro i Mungu m'umulo adundewa.
- ⁵Kum nindo moko junwang'u watimo lembe mi pak mananu ngo, calu wung'eyo, kadi ku jambomb mi ketho cwiny hai kum piny de ngo, Mungu en e jamulembe;

⁶kadi wabeyenyo dwong' mi dhanu de ngo, kadok m'uai i beng'wu kadi ba jumange de, nwang'u wacopo wacu ya wa weg ng'ol calu jukwenda pa Kristu.

⁷Ento wabedo yo i kindwu, calu ka japidi bepido nyithindho pare ma dhe:

⁸cil kumeno, wan ma waketho cwinywa i kumwu ku mer, ebedo ni mutoro ma dit iwa ya wami iwu, lembanyong'a ma juboth ko pa Mungu kende ngo, ento kwo mwa bende, kum wudoko ju ma kacwinywa.

⁹Kum wupoi, umego, pi tic ma wamula ko ku sendri: ma wabewatimo diewor ku dieceng', kara ku wanur kindwu moko, wayero iwu lembanyong'a ma juboth ko pa Mungu.

¹⁰Wun wu jumulembe, ku Mungu bende, maram watimbra ko leng', man pwe, man umbe adote iwu wu ju m'uyio:

¹¹calu wung'eyo maram watimo ko iwu kubeng'wu kubeng'wu, calu wego timo ni nyithindhe ma dhe, ma wabewajukowu, wabewapiko lembe i iwu, wabewatuco de,

¹²kara nia wuwoth calu uromo ku Mungu, m'elwong'owu i ker pare gire man i dwong'.

¹³Man pi lembe nini wafoyo Mungu areri, nia, ka wujolo lembe mi kwenda i bang'wa, ndhu lem pa Mungu, wujole calu en e lenibe mi dhanu ngo, ento, calu ebedo andha, lembe pa Mungu, m'etimo bende i iwu wu ju m'uyio.

¹⁴Kum wun, umego, wudoko jupor mi kanisa pa Mungu ma gini i Kristu Yesu i Yahudi: kum wun bende wusendru ku gin ma cal cal ni juthu, cil calu joca ke ni Juyahudi;

¹⁵ma ginego Rwoth Yesu ku jubila, giriemo wan de woko, ginyayu mutoro ngo i Mungu, man gi tung' ku dhanu ceke;

¹⁶gikwero ya ku wayer ni Thekdhanumange kara gibothi; kara gipong' dubo migi thiri thiri: ento kwinyo wok i wigi cil i kajikne.

¹⁷Ento wan, umego, ma jupokowa wakudu mi nindo ma nyanok, mi nendri ku wang' kud adunde re ngo, waponjo apila ma sagu ya wanen weng'wu kud amora ma dit:

¹⁸kum nwang'u wayenyo dit wabin i beng'wu, an a Paolo wang' acel man kendo; e Jok ucerowa.

¹⁹Kum genogen mwa en e ang'o, kadi anyong'a mwa, kadi jamkermiwic mwa mi kulula? Ndhu wun ungo, i wang' Rwoth mwa ma Yesu i bino pare?

²⁰Kum wun wu dwong' mwa man mutoro mwa.

1 Jutesaloniki 3

- ¹Kum kumeno ka wacopo twio cwinywa kendo ngo, iwa pido nia e ber ya wadong' i Athene kendwa;
- ²e waoro Timoteo, m'umegwa man jatic pa Mungu i lembanyong'a ma juboth ko pa Kristu, kara eketh wucungi, man kara ejukwu kum yioyic mu;
- ³kara ng'atu moko cwinye kud uringi kum ruvwa maeni; kum wung'eyo giwu nia jukethowa pi maeni.
- ⁴Kum andha, kinde ma wanuti wakudu, walar wayero iwu nia wabisendra ku ruvwa; cil calu etimbre, e wun wung'eyo.
- ⁵Kum lembe nini an bende, kan acopo twio cwinya kendo ngo, aoro kara ang'ei yioyic mu, kara jabidhe kud ubidhwu ku yo moko, tic ma wamula kudo maru bedo mananu.
- ⁶Ento ka Timoteo dwogo i bang'a kawono m'eai ko i beng'wu, man ekelo iwa rwonglembe ma ber mi yioyic mu ku mer mu, ya poi mu ma thiri thiri piwa e dre, ma ava nenowa benegowu, cil calu ava nenowu benegowa;
- ⁷kum lembe nini, umego, wajukra piwu i mono mwa ku ruvwa mwa ni kum yioyic mu:
- ⁸kum kawono wabedo, tek wucungo ki i Rwoth.
- ⁹Kum foyofoc ma nedi ma wacopo mio kendo ni Mungu piwu, kum anyong'a ceke m'unegowa piwu wang' Mungu mwa,
- ¹⁰ma diewor ku dieceng' de warwo apila kara wanen weng'wu, man kara waketh gin m'urem i yioyic mu dok ndhu cu?
- ¹¹Nie dong' Mungu mwa man Wegwa en, ku Rwoth mwa Yesu, unyuth yo mwa i beng'wu:
- ¹²man Rwoth uketh mer mu unyai esagre de ng'atuman ni wadi man ni wadi, man ni dhanu ceke, cil calu wan bende iwu;
- ¹³kara eketh adundewu cung ma adote mbe i leng'cwiny wang' Mungu mwa man Wegwa, i bino pa Rwoth Yesu mwa ku jupare maleng' ceke.

1 Jutesaloniki 4

- ¹Aha a, umego, wakwayuwu man wajukowu i Rwoth Yesu, nia, calu wu jolo i bang'wa maram maku wuwoth ko wunyai ko mutoro Mungu, cil wubewotho, kara wusegru kendo kendo.
- ²Kum wung'eyo maram lembang'ola ma wamio iwu ni kum Rwoth Yesu bedo ko.
- ³Kum maeni en e yeny ma Mungu yeny, ndhu dwokrileng' mu, nia wuceru ni tarwang';

- ⁴nia ku ba dhanu nzu m'i kindwu ng'atuman ung'ei bimo kume gire i dwokrileng' man i yung,
- ⁵i ayiri mir awanya ma rac ungo, cil calu Thekdhanumange ma kung'eyo Mungu ngo;
- ⁶ng'atu moko kud ukadh kieu, etim rac de bang' umin i lembe nini: kum Rwoth en e jacul kwor kum gin maeni ceke, calu wan bende walar wapoyowu man watuco.
- ⁷Kum Mungu lwong'owa pi sasa ngo, endre i dwokrileng'.
- ⁸Ka kumeno ng'atu m'ukwero, meca ekwero dhanu ngo, ento Mungu, m'emio Tipo Maleng' pare iwu.
- ⁹Ento pi mer mi utumego can lembe ma nia ng'atu moko gor iwu negowu ngo: kum Mungu ponjowu giwu ya wumeru;
- ¹⁰kum wutime andha ni umego ceke ma gini i Makedoni ngung'. Ento wajukowu, umego, kara wusegru asaga;
- ¹¹man iwu pid ya wubed yo, ya wutim tic ma mu bende, ya wutim tic ku cingwu, cil calu wang'olo iwu;
- ¹²kara wuwoth calu m'umaku piny ni ju ma woko, man kara can gin moko kud unegwu.
- ¹³Ento wayenyo kud wubed cobo pi ju m'unindo, umego; kara can kud unegwu, cil calu dong dhanu, ma genogen umbe kugi.
- ¹⁴Kum tek wayio nia Yesu tho man ecer kendo, kumeno ju ma ginindo i Yesu bende Mungu bikelogi gikugi.
- ¹⁵Kum wawacu maeni iwu ku lembe pa Rwoth, nia wan ma wabedo kwo, ma wadong' ni bino pa Rwoth, wabitelo yo ki ngo ni ju ma ginindo.
- ¹⁶Kum Rwoth ku kite biai i polo biloro piny, ku kok ma dit, ku dwand malaika ma dit de, man kud agwara pa Mungu bende: e ju m'utho i Kristu gibilar cer;
- ¹⁷e ka wan ma wabedo kwo, ma wadong', jubilund ting'owa malu wakugi i afuru, nirombo ku Rwoth i lietho; e kumeno wabidong' bedo nja ku Rwoth.
- ¹⁸Kum kumeno dong' wujukru ku lembe maeni.

1 Jutesaloniki 5

- ¹Ento pi nindo ku oro, umego, can lembe moko ma nia jugor iwu negowu ngo.
- ²Kum wung'eyo giwu cu nia ceng' pa Rwoth ubino kumeno calu jakwo ku diewor.
- ³Kinde ma gibewacu kumae, KwioCWiny ku bedomoth e nyoth ulund ubino i wigi ndhu ndhu nica, calu moc ma goyo dhaku ma ie nuti; man gibiboth ki ngo.
- ⁴Ento wun, umego, wuni i mudho ngo, ma nia ceng' nino unwang'wu calu jakwo:

- ⁵kum kewu ceke wu wot mi der, man wu wot mi ceng': wan wa mi diewor ungo, kadi mi piny ma col de ngo;
- ⁶kum kumeno dong' ku wanindu, calu dong dhanu, ento dong' wakur wabed nger de.
- ⁷Kum ju m'unindo ginindo ku diewor; man ju ma gimer amera gimer ku diewor.
- ⁸Ento dong' wan, kum wa mi ceng', wabed nger, waroi asi mi yioyic ku mer bende; man ka sabu mir umbu, waketh genogen mi both.
- ⁹Kum Mungu kethowa ngo ni kwinyo, ento kara wanwang' both ni kum Rwoth mwa Yesu Kristu,
- ¹⁰m'utho piwa, kara, kadok wabedo neno kadi wanindo, wabed karacelo wakugi.
- ¹¹Kum kumeno dong' wujukru, man wutengru, cil calu wubetimo bende.
- ¹²Ento wakwayuwu, umego, ya wung'ei ju ma gimuli ku tic i kindwu, man gini i wiwu i Rwoth, man gijukowu;
- ¹³man wufoigi dit apila i mer kum tic migi. Wubed ku kwiocwiny i kindwu giwu.
- ¹⁴Man wakwayuwu, umego, wujuk ju ma gitimbri rac, wudwok cwiny ju ma cwinygi tek ungo, wujeng ju m'ubedo ng'ic, wubed ku mwonyolembe ma jumwonyo hai yo ba dhanu ceke.
- ¹⁵Nen nia ng'atu moko kud ucul gin ma rac ni wadi ka wang' gin ma rac; ento elub pare tok gin ma ber thiri thiri, ng'atuman ni wadi man ni wadi, man ni dhanu ceke.
- ¹⁶Anyong'a negwu thiri thiri;
- ¹⁷wurwo areri;
- ¹⁸wumi foyofoc i gin ceke: kum maeni yeny ma Mungu yeny i Kristu Yesu yor i beng'wu.
- ¹⁹Kud wucer Tipo;
- ²⁰kud wuca i lembila;
- ²¹wuponj gin ceke; wuceru wi maeno m'e ber;
- ²²wuceru ni dubo ma mba mba ceke.
- ²³Man Mungu mi kwiocwiny en edwokwu leng' njwa; man dong' cwinywu ku kwo mu ku kumwu gibed kubang'gi: ma adote mbe i bino pa Rwoth mwa Yesu Kristu.
- ²⁴En e ng'atu mandha m'ebelwong'owu, m'ebitime bende.
- ²⁵Umego, wurwo i kumwa.

²⁶Wumoth umego ceke ku cwiocwic ma leng’.

²⁷Ang’olo iwu ku Rwoth ya jusom waraga nini ni umego ceke.

²⁸Dong’ bero pa Rwoth mwa Yesu Kristu bed kudu.

2 Jutesaloniki

2 Jutesaloniki 1

¹Paolo, ku Siluano, man Timoteo, ni kanisa mi Jutesaloniki i Mungu ma Wegwa man Rwoth Yesu Kristu;

²Bero iwu man kwicwiny m'uai ba Mungu ma Wego man Rwoth Yesu Kristu.

³Emaku ya wami foyofoc ni Mungu thiri thiri piwu be, umego, cil calu ebedo adre, kum yioyic mu bemedre dit apila, man ke mer ma wumeru ko ku juwedu ceke sagre;

⁴ketho wan giwa walula i kumwu i kanisa pa Mungu kum twicwiny ku yioyic mu i ragedo mu ceke man i ruvwa ma wuciro;

⁵m'e giranyutha ngbeng' mi pokolembe ma pwe pa Mungu; kara jukwanwu ya wuromo ku ker pa Mungu, ma wuneno can pire bende:

⁶tek ebedo kumeno ya en e gin ma pwe ni Mungu ya ecul ruvwa ni ju m'unyayu ruvwa i kumwu,

⁷e iwu, wun ma jubenyayu ruvwa i kumwu, wayom wakudu, i nyuth pa Rwoth Yesu kud i polo ku malaika mi tego pare i mac m'uliel,

⁸m'eculo ko kwor ni ju m'ung'eyo Mungu ngo, man ni ju m'uwooro lembanyong'a ma juboth ko pa Rwoth mwa Yesu ngo:

⁹ma gibisendri ku masendi, cil nyoth ma nja kud i wang' Rwoth man kud i dwong' mi tek pare,

¹⁰kan ebibino kara juyunge i jumaleng' pare, man kara dhanu ceke ma giyio igi wang' lii i kume (kum juyio lembatuca mwa iwu) i ceng' maeno.

¹¹Kum lembe nini wan bende warwo iwu thiri thiri, kara Mungu mwa kwan ya wuromo ku lwong'o mu, man eketh yeny ceke mi berocwiny, ku tic ceke mi yioyic de utimbre kakare, ku tego:

¹²kara nying Rwoth mwa ma Yesu dok dwong' ni kumwu, wun ke ni kume, calku bero pa Mungu mwa man Rwoth Yesu Kristu.

2 Jutesaloniki 2

¹Nie wakwayuwu, umego, pi bino pa Rwoth mwa Yesu Kristu, man cokri mwa ma karacelo i bang'e;

²kara pidoiwu kud uring rr pio pio, kadok ang'aba de kud eng'abre, kadi ni kum tipo, kadi ni kum lembe, kadi ni kum waraga ma juwacu nyo ai i bang'wa, nia ceng' pa Rwoth udhingo;

³kud wuyi ng'atu moko bombwu i yo moko ki: kum ceng' nino biwok ungo, tek wingri kularuwok ungo, man ng'atu mi dubo de fokunyuthre ngo, ma en e wod nyoth,

⁴en m'ejai etingre gire kum gin ceke ma julwong'o ya Mungu kadi ma jurwo i bang'gi de; ketho ebedo i hekalu pa Mungu, m'ekethre gire ya en e Mungu.

⁵Wupoi ungo, nia, ma fodi wanuti wakudu, ayero iwu gin maeni?

⁶Man kawono wung'eyo maeno m'ucero, kara ebin enyuthre i nindo pare gire.

⁷Kum giramung'a mi camuco ubetimbre kawono: ento ng'atu acel nuti m'ubecero kawono, cil ma jubikabe woko kud i yo.

⁸E jaco nino bilund nyuthre, ma Rwoth Yesu binege ku lietho m'i dhoge, man ebidwoke mananu ku nyuth mi bino pare:

⁹en e ng'atuca, ma bino pare en e calku tim pa Jok ku tego ceke man giranyutha ku musana mi ndra,

¹⁰man i abombi ceke mi gondri ni ju m'urwinyo; kum gijolo mer mi lemandha ngo, kara gibothi.

¹¹Kum lembe nini Mungu oro igi tego mir awondi, kara giyi ndra:

¹²kara gin ceke jubin jupok lem migi gi ju m'uyio lemandha ngo, ento gibedo migi kud anyong'a i gondri.

¹³Ento maku wami foyofoc ni Mungu thiri thiri piwu be, umego ma jumer pa Rwoth, kum nia Mungu goyo wiwu ku kwong'a ni both i dwokrileng' mi Tipo ku yioyic nn lemandha:

¹⁴elwong'owu ni maeni ni kum lembanyong'a mwa ma juboth ko, kara wunwang' dwong' pa Rwoth mwa Yesu Kristu.

¹⁵Kum kumeno, umego, wucung ki ki ki, wumok kum ponji ma juponjo kowu, kadok ku lembe, kadi ku waraga mwa.

¹⁶Nie Rwoth mwa ma Yesu Kristu en, man Mungu ma Wegwa m'amaruwa m'emio iwa juk mi nja ku genogen ma ber ni kum bero,

¹⁷ejuk adundewu man eketh ginyang' i tic ceke ma ber kubang'gi kubang'gi ku lembe bende.

2 Jutesaloniki 3

¹Aha a, umego, dong' wurwo piwa, kara lembe pa Rwoth uringi man edok dwong', cil calu ebedo bende kudu;

²man kara wabodhra ni dhanu m'udhuko ma gi judubo bende; kum dhanu ceke bedo ku yioyic ungo.

- ³Ento Rwoth en e mandha, m'ebiketho wunyang', m'ebigwokowu de ni ng'atu ma rac.
- ⁴Man wabedo ku genogen i Rwoth piwu, ya wutimo man wubitimo gin ma wang'olo.
- ⁵Dong' Rwoth utel adundewu i mer pa Mungu, man i twiocwiny pa Kristu.
- ⁶Nie wang'olo iwu, umego, ku nying Rwoth mwa ma Yesu Kristu, ya wukoiru giwu ni umego kubang'gi nzu ma giwotho ariri swa, man gilubo ponji ma gijolo i bang'wa ngo.
- ⁷Kum wung'eyo giwu maram maku wukwany ko kothwa: kum watimbra swa ngo i kindwu,
- ⁸kadi wacamu kwen mananu de ngo i cing' ng'atu moko, ento i muli mi tic man i sendri, watimo diewor ku dieceng', kara ku wanur ng'atu moko m'i kindwu:
- ⁹en e kum nia ng'ol umbe kudwa ngo, ento kara wadwokra ni por iwu, kara wukwany kothwa.
- ¹⁰Kum cil ma fodi wanuti wakudu, wang'olo iwu maeni kumae, Tek ng'atu moko kwero timo tici, kadok acama de kud ecam.
- ¹¹Kum wawinjo pi jumoko m'uwotho i kindwu ariri swa, ma gitimo tic ki ngo, ento gi juthubganda.
- ¹²Nie wagi joni wabeng'olo man wajuko i Rwoth Yesu Kristu, nia gitim tic ling' ling', man gicam kwen migi ma dhe.
- ¹³Ento wun, umego, kud wuol ku timo ber.
- ¹⁴Man tek ng'atu moko woro lembe mwa ma i waraga nini ngo, wunen ng'atuca, kara kud wuribru wukugi, kara lewic unege.
- ¹⁵Ento kud wukwane calu jadegi, endre wujuke calu en e umego.
- ¹⁶Nie dong' Rwoth mi kwiocwiny en emi iwu kwiocwiny i nindo ceke i yo ceke de. Dong' Rwoth ubed kudu ceke.
- ¹⁷Moth para an a Paolo gira ku cinga, ma en e giranyutha ku ba waraga ceke: kumeno agoro.
- ¹⁸Bero pa Rwoth mwa Yesu Kristu bed kudu ceke.

1 Timoteo

1 Timoteo 1

- ¹Paolo, ma jakwenda pa Kristu Yesu calku lembang'ola pa Mungu ma Jalar mwa, man Kristu Yesu ma en e genogen mwa;
- ²ni Timoteo, ma nyathin para mandha i yioyic: Bero, ku kisa, man kwiocwiny m'uai ba Mungu ma Wego man Kristu Yesu ma Rwoth mwa.
- ³Calu ayero iri ikoibed i Efeso, kinde ma fodi abecidho i Makedoni, kara ing'ol lembe ya jumoko kud uponj ponji ma tung',
- ⁴kadi ku giwinj lembuda man kathekdhenu ma thum ungo, ma nyayu penji mi piem re, ma sagu kuro lembe pa Mungu ma jukuro i yioyic.
- ⁵Ento kajik mi lembang'ola en e mer ma ai yo i adunde ma njwa, ku pidocwiny ma ber, man yioyic ma abombi mbe i ie:
- ⁶jumoko giweko gini gidong' gikier kum lembe ma kite mbe;
- ⁷ayenya giyenyo gibed juponji mi cik, enke ging'eyo ngo gin ma giyero, kadok gin ma giyio bende.
- ⁸Ento wang'eyo nia cik en e ber, tek ng'atu moko time kakare,
- ⁹ma wang'eyo ko lembe nini, ya cik juciko ni ng'atu ma pwe ngo, ento ni ju ma juco, ku ju ma giwor ungo, man ni ju ma ayi Mungu mbe i kumgi, ku judubo bende, ni ju ma leng' ungo, ku ju ma yero lembacidi, man ni ju ma nego wego, ku ju ma nego mego, ni ju ma nego nek,
- ¹⁰man ke ni ju ma timo tarwang', ni ju ma gitimo sasa ku co wagi, ku ju ma kwalu dhanu, ku jundra, ku ju ma kwong'o kwong' mi ndra, man ke ni gin mange ceke ma tek ukier kum lem ponji m'alili bende;
- ¹¹calku lembanyong'a ma juboth ko mi dwong' pa Mungu ma Jamugisa, ma juketho i kora.
- ¹²Afoye m'emio ira tego, en e Kristu Yesu Rwoth mwa, kum ekwana ya an a ng'atu mandha m'egoyo wia eketha ko kum tic pare;
- ¹³ma naka an a jayer lembacidi, man jaragedo, man jarop bende: ento anwang'u kisa, kum atime cobo ma yioyic umbe;
- ¹⁴e bero Rwoth mwa usagre dit apila ku yioyic man mer ma ni i Kristu Yesu.
- ¹⁵Maeni lemandha, ma maku dhanu ceke giyi, nia Kristu Yesu bino i ng'om kara elar judubo; ma an a jadtne:
- ¹⁶endre kum lembe maeni anwang'u kisa, kara Yesu Kristu nyuth mwonyolembe pare ceke m'emwonyo hai i kuma, ma an a jadtne, ni lembapora ni ju ma bidong' yie cen, cil i kwo ma rondo ku rondo.

¹⁷Nie dong' yung ku dwong' bende ubed ni Ubimo rondo ku rondo, m'etho ngo, m'enen ungo, m'e Mungu e kende, rondo ku rondo. Amen.

¹⁸Lembang'ola maeni ajengo i kori, nyathin para Timoteo, calku bila m'uyero piri, kara ikied lwiny ma ber kum lembe maeni;

¹⁹m'ibeceri wi yic m'iyio, ku pidocwiny ma cu; lembene jumoko giweko ketho yioyic migi nyothre:

²⁰Humenayo giku Iskander gini i kind joca; man amiogi ni Jok, kara juponjgi ya ku giyer lembacidi.

1 Timoteo 2

¹Ka kumeno aponjowu, nia ka fodi wukularwukwayu kum gin mange ngo, wutim penji, ku rwo, ku kwayukwac, ku foyofoc, ni Mungu kum dhanu ceke;

²kum ju m'ubimo man ju ma ni wi jo ceke; kara wanwang' bedo mi kwiochwiny man yo ma ayi Mungu ni i kumwa ku pidoic ma cu de.

³Maeni e ber eyire de i wang' Mungu ma. Jalar mwa;

⁴m'eyenyo dhanu ceke bothi, ku bino ba ng'eyong'ec mi lemandha.

⁵Kum Mungu en e acel, jakind Mungu ku dhanu de acel, en de e dhanu, ma Kristu Yesu,

⁶m'emire gire ni jamgony ni dhanu ceke; nyuthonyuth maeni binyuthre nwang'u kakare tundo;

⁷kum eni juketha ni jayerlembe ku jakwenda de (ayero lemandha, acwayu ndra ngo), an a japonji mi Thekdhanumange i yioyic ku lemandha.

⁸Ka kumeno ayenyo jumaco rwo ku kaka ma gini i ie ceke, giting' ko cing'gi malu ma gi leng', ma kwinyo ku lem piem de mbe.

⁹Jumamon bende kumeca, gikend kendi m'uromo kakendi, karacelo ku lworo ku bedo nger de; ku yukwigi m'akieda ngo, ku mola ma kwar kadi kidi ma i upal de ngo, kadi kendi de ma ng'ieune tek;

¹⁰endre (m'umaku mon m'utuco ya ayi Mungu ni i kumgi) ni kum tic ma ber.

¹¹Dong' dhaku ponj ng eyo lembe yo ku woro m'ewor ko.

¹²Ento ayio ngo ya dhaku ponj ponji, kadi ebim wi co, endre ebed pare yo.

¹³Kum jular jucwio Adamu, ka judong' jucwio Eva;

¹⁴man ke jukuwondo Adamu ngo, ento juwondo dhaku e m'upodho i dubo:

¹⁵ento ebiboth ku nyolo nyodo, tek gibedo asu ku yioyic ku mer ku dwokrileng' ku bedonger bende.

1 Timoteo 3

- ¹Maeni lembe mandha, Tek ng'atu moko beyenyo tic pa jalieu, nwang'u ebeyenyo tic ma ber.
- ²Ka kumeno jalieu ukoubed ma adote mbe i kume be, cwar dhaku acel, ng'atu ma dhiro wi ava gin ceke, ma pidoie nger, ng'atu ma ketho tic cungo cu, ng'atu ma gwoko welo ber, ng'atu m'ung'eyo rieko mi ponji;
- ³ng'atu ma jakwakwa ngo wi pigulok, ma goyo jo de ngo; ento ng'atu ma mol, ma japiem ungo, ng'atu ma jamar sente hai ngo;
- ⁴ng'atu ma bimo wi juode cu, ma nyithindhe de giwore umbe lele;
- ⁵(ento tek ng'atu m'ung'eyo bimo wi juode gire ngo, ebing'ei gwoko kanisa pa Mungu nenedi?)
- ⁶ng'atu ma foduyio kawono re ngo, kum marmoko ebitingre ebipodho i lembapoka pa Jok.
- ⁷Man ke ekoebed ng'atu ma ju ma woko de gibegiwacu ya pire ber be; kara kud epodh i agobe kud uwic pa wonabali bende.
- ⁸Jukony bende kumeno gikogibed be umbe lele, ma dhoggi ario de ngo, ma madhu pigulok hai ngo, ma ava kuloka ma rac timogi hai ngo;
- ⁹m'egwoko giramung'a mi yioyic ku pidocwiny ma leng'.
- ¹⁰Maku joni bende jular juponjgi; tek gibedo umbe adote, wuwek gibed jukony.
- ¹¹Mon bende kumeca gikogibed be umbe lele, ma gibalu abali ngo, ma gidhiro wi ava gin ceke, ma gi mandha kum gin ceke.
- ¹²Dong' jukony gibed cog mon acel acel, ma gibimo wi nyithindhgi ku udigi bende ber.
- ¹³Kum ju ma gitimo tic mi jukony adre ginwang'u kacungo migi gigi ma gicungo ko ber, ku tegocwiny ma dit i yioyic ma ni i Kristu Yesu.
- ¹⁴Lembe maeni agoro iri, m'ageno ko ya abibino i beng'i fodi nyanok; tek agalu hai, kara ing'ei maram maku jutrm i ot pa Mungu,ma en e kanisa pa Mungu ma kwo, mbegi ku tiend ot mi lemandha.
- ¹⁶Ebedo mi piem ungo nia giramung'a mi bedo ma ayi Mungu ni kume e dit; Ng'atu m'unyuthre ku kum, Tipu nwang'u lembe pare ber, Malaika de gineno, Juyero pire de i kind thek, Juyie de i ng'om, Jujole de malu i dwong'.

1 Timoteo 4

- ¹Ento Tipu wacu gbe, ya i nindo macen jumoko bibadhri kum yioyic, gibiciko ithgi ba tipu mir abidhe ku ponji mi pajogi,

²ni kum dhanu ma gi weg ambili m'uyero lemndra, ma calu ya junyelo pidocwinygi gigi ku nyunyu ma lieth:

³ma gikwero ko ya ku jugambri, ma ging'olo de ya jukwir ring'o, ma Mungu cwio ya ju ma gi weg yioyic ma ging'eyo lemandha de gijol ku foyofoc.

⁴Kum giracwia ma kwo pa Mungu ceke gi ber kubang'gi ndri, moko de mbe ma jukwero, tek jujole ku foyofoc:

⁵kum judwoke leng' ni kum lem pa Mungu ku rwo bende.

⁶Tek ipoyo umego pi ginduni, meca ibidoko jatic ma ber pa Kristu Yesu, ibidoko tek i lembe mi yioyic, man mi lem ponji ma ber m'ibelubo toke cil eni:

⁷ento dong' ikwer lembuda mir acidi mi mondongo. Man dong' iponjri giri ni bedo ma ayi Mungu ni kume:

⁸kum riyokum gin moko ma jukwanyu ie cu mbe; ento bedo ma ayi Mungu ni kume kulokane nuti kum gin ceke, m'ebedo ku lemband'ola mi kwo ma wakwo ko kawono, ku mi maeca ma bibino bende.

⁹Maeni lembe mandha, m'uromo ya dhanu ceke gijole.

¹⁰Kum lembe nini wabemula ku tic man wabeii aiia, kum genogen mwa ndhu ni yo ba Mungu ma kwo, m'e Jalar mi dhanu yu, ndhu mi ju m'uyie.

¹¹Ng'ol gin maeni man iponj de.

¹²Kud iyi ng'atu moko cei ya fodi i nyathin; ento dong' ibed ni por mi ju m'uyio, i lembe, i bedo, i mer, i yioyic, i leng'cwiny.

¹³Dong' iketh weng'i kum somo lembe, man kum jukojuk, ku ponji bende, cil m'abino ko kuno.

¹⁴Kud igal kum giramia ma ni ii, ma jumio iri ni kum lembila, ku cing' ma judongo ketho i wii bende.

¹⁵Tim gin maeni ku cwinyi ceke; tingri dho kum lembe nini; kara teng'ni m'ibeteng'ni ko nyuthre ni dhanu ceke.

¹⁶Dong' ibed ku weng'i i kumi giri, man kum ponji peri. Bed asu i gin maeni; kum tek itimo kumeni ibibodhri giri ku dhanu m'ubeduwinji bende.

1 Timoteo 5

¹Kud irwodh arwodha wi jadit, ento dong' ijuke calu en e wego; awobi ke calu utumego:

²mon ma dongo ke calu mego; mon ma nyir ke calu nyimego, ku leng'cwiny ceke.

³Yung mon ma coggi tho ma gi mon ma coggi tho andha.

- ⁴Ento tek dhaku moko ma cware tho etie ku nyithindhe kadi nyikwaye de, wek gilar giponj ng'eyo nyutho bero migi kum juot migi gigi, ma gidwok kudo wang' gwok ma junyodo migi gwoko kogi: kum maeni yire i wang' Mungu.
- ⁵Nie ng'atu ma dhaku ma cware tho andha, man ebedo e kende, e genogen pare ni ba Mungu, man ebedo kokro ku kwayukwac ku rwo diwor ku dieceng' de.
- ⁶Ento ng'atu m'uketho wang'e gire kum mutoro meca en e avu ma fodi en ke e kwo.
- ⁷Ng'ol gin maeni bende, kara lembacaya bed umbe i kumgi.
- ⁸Ento tek ng'atu moko gwoko dhanu pare gire ngo, e ka juode ma dhe de k'egwokogi ngo, meca ekwero yioyic, man edoko rac ma sagu ng'atu ma jayic ungo.
- ⁹Ku jugor nying dhaku ma cware tho ma fodi oro pare ku tundo pier abusiel ungo, ma k'ebedo kor nico acel kende ngo,
- ¹⁰ma rwong tic ma ber pare ku yik ungo; tek etungo nyithindho, tek egwoko welo, tek elwoko tiend jumaleng' de, tek ekonyo jucan de, tek elubo tic ma ber ceke kubang'gi kud amora, a dong' jugor nyinge.
- ¹¹Ento mon ma thindho re ma coggi tho kwergi: kum ka gibijai kum Kristu kum ava gin m'utimogi, e gibiyenyo gigambri;
- ¹²meca gitie ku lembe i wigi, kum gidaru kwero yioyic migi ma kwong'a.
- ¹³Ku sagri ma gisagri ko nini ging'io ku bedo ma swa swa, ma giwotho ko ku ba udi ku ba udi; ma gi juswa kende ngo, endre gi jurwei lembe arweya bende man gi juthub athube, gibegiyero lembe ma maku ku giyer.
- ¹⁴Ka kumeno ayenyo mon ma thindho ma coggi tho jugamgi, ginyol nyithindho, gibim wi udigi, ku giketh lembe moko wok ma jadegiwa bicayu kume cac:
- ¹⁵kum jumoko daru kier ngi gilubo tok Jok.
- ¹⁶Tek dhaku moko ma jayic tie ku mon ma coggi tho, wek egwokgi, lembene kud unur kanisa; kara egwok pare mon ma coggi tho mandha.
- ¹⁷Maku judongo m'ubimo bim cu dong' jukwan ya giromo ku yung ma juyungo kojo wang' ario, ma dhene re ju ma gimuli ku tic mi lembe ku mi ponji de.
- ¹⁸Kum lembagora pa Mungu wacu kumae, Kud wutwi dhu koni dhiang' kan ebeyoko anyogi. Man ke, Ng'atu m'umule ku tic uromo ku sukulia pare.
- ¹⁹Lembe ma jucuko kum jadit kud iyi, tek jumulembene kubedo ario kadi adek ungo.
- ²⁰Ju ma gidubo lembe jukgi i wang' dhanu ceke, kara ju m'udong' bende gilwor.

²¹Ang'olo iri i wang' Mungu, ku Kristu Yesu, ku malaika ma jugoyo nying'gi, ya iwor gin maeni ma fodi ikung'olo pire ngo, ma k'itimo gin moko ngo ni kum mer m'imaru ko jumoko.

²²Kud iketh cingi vur vur kum ng'atu moko, kadi kud iribri i dubo mi jumange: igwokri giri leng'.

²³Kud ibed jamadh pi kendo, ento imadh pigulok nyanok ni cino ii man ni tho peri ma betimi bende.

²⁴Dubo mi dhanu moko nyuthre ngbeng', gilar gicidho i poko lembe; mi jumoko bende lubo ng'eigi.

²⁵Ka kumeno tic ma ber moko ginyuthri ngbeng': m'ubedo tung' bende copo mungre ngo.

1 Timoteo 6

¹Wek ju ma gini the mberembere ma gi jumiru gikwan judongo m'i wigi ya uromo ku yung ceke, kara nying Mungu ku ponjine de kud ucidre.

²Ju ma judongo m'i wigi de gi juyic, ku gicaigi, kum gi utumego; endre ma sagu wek gitim igi, kum gi juyic ku jumer bende ma ginwang'u kuloka ku timo ber. Ponj gin maeni man ijuk juk de.

³Tek ng'atu moko ponjo ponji ma tung', ma k'eyio lembe ma alili de ngo, ma en e lembe pa Rwoth mwa Yesu Kristu, ku ponji de ma k'e calku bedo ma ayi Mungu ni kume ngo;

⁴meca etingre, m'eng'eyo gin moko de ngo, endre ebedo kud awanya va ng'atu ma kume lith kum penji ku piem mi lembe, kumira ai i maeni, ku por, ku cayucac, ku cwiny ma dieng' kum lembe ma jukung'eyo there ngo,

⁵ku dhau mi dhanu ma rieke migi nyothie ma gimbe ku lemandha, ma giwacu nyo bedo ma ayi Mungu ni kume en e yoj kuloka.

⁶Ento bedo ma ayi Mungu ni i kume ku cwinyjo m'ucungo ti en e kuloka ma dit:

⁷kum wakelo gin moko i ng'om ungo, kadi wacopo ai ku gin moko de ngo;

⁸ento ka cemo ku kendi de nuti kudwa cwinywa bicungo kum gino.

⁹Endre ju ma giyenyo gibed julonyo gipodho i abidhe ku i uwic de man i kasegu ku i awanya ma rac ma akeca, wagi gin ma mwonyo dhanu i rwinyo ma jurwinyo man i kanyoth ma junyothri i ie bende.

¹⁰Kum mer ma jumaru ko sente en e ulag kwond dubo ceke: ma jumoko ma ava piny sagugi gikier kum yioyic, man gidhuiri gigi ku can ma dupa.

¹¹Ento in re, in i dhanu pa Mungu, ring gini; man ilub peri tok bedopwe, ku bedo ma ayi Mungu ni kume, ku yioyic, ku mer, ku twiocwiny, ku molcwiny.

- 12**Kied lwiny ma ber mi yioyic, mok kum kwo ma rondo ku rondo, kum eni ma yang' julwong'i i kume, man ituco lembatuca peri ma ber de i wang' jumulembe dupa.
- 13**Ang'olo lembe maeni iri i wang' Mungu, m'umio kwo ni gin ceke, man i wang' Kristu Yesu, m'unyutho lembatuca pare ma ber i wang' Pontio Pilato;
- 14**ya igwok leembang'olane, ma k'ecido ngo, ma cacne mbe, cil i nyuth pa Rwoth mwa Yesu Kristu:
- 15**m'ebinyutho i rundi pare gire, ng'atu ma Acwic ma Jamugisa e kende, Ubimo ma wi ju m'ubimo bim, Rwoth mi rwodhi;
- 16**m'e kende m'e won kwo ma rondo ku rondo, m'ebedo i der ma jukucoptundo i vute ngo; ma ng'atu moko foduneno ngo, kadi m'ecopo nendre de ngo: yung ubed ire ku tego rondo ku rondo. Amen.
- 17**Ng'ol ni ju ma gi julonyo i ng'om maeni ma kawono, kara pidoigi kud ubed dit, kadi ku giketh genogen migi kum lonyo ma kare kadhu, ento kum Mungu re, m'emio iwa gin ceke ku berocwinye ni mutoro mwa;
- 18**kara gitim ber, kara gilony i tic ma ber, kara gibed ayika mi miomic, gibed jungisi de;
- 19**ma gikanu ko ther ukungu lembe ma ber gigi pi rundi ma bibino, kara ginwang' kwo ma en e kwo mandha.
- 20**E Timoteo, gwok maeno ma juketho i kori no, m'iloko ko ng'ei kum wec mananu mir acidi ku piem mi ng'eyong'ec ma en e ng'eyong'ec mi ndra;
- 21**ma jumoko gituco e gikier kum yioyic. Dong' bero bed i beng'i.

2 Timoteo

2 Timoteo 1

- ¹Paolo, ma jakwenda pa Yesu Kristu ku yeny ma Mungu yenyo, calku lembang'ola mi kwo ma ni i Yesu Kristu
- ²ni Timoteo, ma nyathin para ma jamer: bero, ku kisa, ku kwicwiny, m'uai ba Mungu ma Wego ku Kristu Yesu ma Rwoth mwa ubed iri.
- ³Afoyo Mungu, m'atimo ire ku pidocwinya ma leng' ugambre kum kwara, ma ia kuweko poyo piri ngo i kwac para m'akwayu, diewor ku dieceng' de
- ⁴ma ava neno i benega, ma ia bepido kum piweng'i, kara anyong'a nega;
- ⁵m'apoi ko pi yioyic ma abombi mbe i ie ma ni ii; m'ular ubedo i wang'u ma Lois, man i meru ma Eunike; man, ang'eyo andhandha ya eni ii bende.
- ⁶Kum lembe nini apoyoi ya iyau giramia pa Mungu, ma ni ii m'inwang'u ni kum cinga m'aketho.
- ⁷Kum Mungu ku mio iwa cwiny mi lworo ngo; ento mi tego, ku mi mer, ku kweri ma jukweri ko gijo.
- ⁸Ka kumeno lewic kud unegi kum lembatuca pa Rwoth mwa, kadi i kuma de m'a jakol pare: ento dong' ibed jacir masendi ma wok kum lembanyong'a ma juboth ko calku tego pa Mungu;
- ⁹m'elaruwa, m'elwong'owa de ku lwong'o ma leng', ni kum tic ma watimo wan ungo, ento calu ie yenyo en ku bero, m'umire iwa ni kum Kristu Yesu ku kwong'a,
- ¹⁰ento kawono dong' edaru nyuthre ni kum kawok ma Jalar mwa ma Yesu Kristu wok ko, m'ekabu tho, m'ekelo kwo, man kwo ma rondo ku rondo i der ni kum lembanyong'a ma juboth ko,
- ¹¹kum lembe nini juketha ni jayer lembe, man jakwenda, man japonji bende.
- ¹²Kum lembe nini abemula ku can kum giki maeni bende: endre lewic ubenega ngo; kum ang'eyo ng'atu m'ayio, man ang'eyo andhandha nia ecopo gwoko lembe m'aketho i kore cil i ceng' maeca.
- ¹³Ceri wi kit lembe ma cu m'iwinjo i bang'a, ku yioyic ku mer ma ni i Kristu Yesu.
- ¹⁴Gin ma ber maeni ma juketho i kori no gwoke ku Tipo Maleng' m'ubedo i iwa.
- ¹⁵Ing'eyo eni, nia ju ma gini i Asia ceke ging'eny i kuma; Fijelo giku Hermogene de gini i kindgi.
- ¹⁶Dong' kisa neg Rwoth kum juot pa Onesiforo: kum edwoko cwinya wang' udul, lewic de kunege ngo kum nyoro para;
- ¹⁷ento, kan eni i Rumi, eyenya kle kle, man enwang'a

¹⁸(dong' Rwoth ubin uketh enwang' kisa i bang'e i ceng' maeca); man kwai gin dupa m'ebederimo ira i Efeso, in ing'eyo cu.

2 Timoteo 2

¹Ka kumeno in, nyathin para, bed ku tego i bero ma ni i Kristu Yesu.

²Man gin m'iwinjo i bang'a i kind jumulembe dupa, lembene dong' imi ni jumandha, ma gibicopo ponjo dhanu mange bende.

³Ibed jacir can wakudi, calu asikari ma ber pa Kristu Yesu.

⁴Asikari moko mbe ma tek eni i tic m'etwire gire ku lembe mi kwo maeni; kara enyai mutoro i ng'atu m'ugoro nyinge ya ebed asikari.

⁵Tek ng'atu moko beponjo ya esag i piem m'abola, enwang'u jamkermiwic ungo, tek etime kacikne ngo.

⁶Jatipodho m'etio tic ekoelar egamu kum nying yenne be.

⁷Ii pid pi gin m'ayero; kum Rwoth bimio iri ng'eyong'ec i gin ceke.

⁸Poi kum Yesu Kristu, m'eai ku kind ju m'utho, mi kodhi pa Daudi, calku lembanyong'a para ma juboth ko:

⁹i lembene abesendra cil i kol, calu ng'atu ma jugonjo agonja; ento lembe pa Mungu bedo atwia ngo.

¹⁰Kum kumeno aciro gin ceke pi ju ma jugoyo nying'gi, kara gin bende ginwang' both ma juboth ko ma ni i Yesu Kristu karacelo ku dwong' ma nja ku nja de.

¹¹Maeni lemandha: Kum tek watho wakugi, wabibedo kwo bende wakugi:

¹²tek wamula ku cani, wabicamu ker wakugi: tek wabikwere, en bende ebikwerowa:

¹³tek wan wa jumandha ngo, en re en e mandha; kum ecopo kwere gire ngo.

¹⁴Poigi kum gin maeni, ng'ol igi i wang' Rwoth, kara ku gipiem piem kum lembe, ma kulokane mbe, ma biketho ju ma giwinjo gikier.

¹⁵Dong' itim kud amora m'inyuthri ko ni Mungu, ya in i ng'atu m'efoyo, jatic ma lewic umbe i wie, m'upoko lembe mandha cu.

¹⁶Endre dong' ikoc woko kum wec mananu mir acidi: kum gibisagu asaga ku cidho i lembe ma ayi Mungu mbe i kume,

¹⁷e lembe migi binyai pamir adhola: Humenayo giku Feleto de gini i kindgi;

¹⁸gi ju ma gikier kum lemandha, ku wacu ma giwacu ko ya cer ma ju m'utho cer ko daru kadhu, man ging'ielo yioyic mi jumoko woko.

¹⁹Ento ther ukungu lembe pa Mungu cungo ki, m'ebedo kud ayi mae, Rwoth uug'eyo ju ma gi jupare: man, dong' dhanu ceke kubang'gi kubang'gi ma gilwong'o nying Rwoth giwek tic ma en e tic mi bedopwe ngo.

²⁰Anie i ot ma dit tabu ku bedo tabu mi mola ma kwar kadi mi mola ma tar kende ngo, ento mi yen ku mir ulobo bende; moko bedo mi yung, moko ke m'umbe yung.

²¹Ka kumeno tek ng'atu moko lwokre gire kum giki maeni, ebibedo tabu mi jambyung, m'udwokre leng', m'uromo ku tic pa Rwoth, m'ubedo ayika ni tic ceke ma ber.

²²Ento dong' iring awanya ma rac mir ayada, man ilub tok tic ma ber, ku yioyic, ku mer, ku kwicwiny, karacelo ku ju m'ulwong'o Rwoth ku i adundegi ma leng'.

²³Ento kwer penji ma kite mbe, ku ma sang'na bende, m'ing'eyo ko nia ginyayu dhau.

²⁴Man ke jamiru pa Rwoth maku kud edhau, ento ebed yo ni dhanu ceke, ku ng'eyo rieko mi ponji, ku reyo lembe de i tielo,

²⁵ku ponjo ju ma piwu nge kugi ku molcwiny; kuno nyo Mungu bimio igi lokocwiny cil ku ng'eyong'ec mi lemandha,

²⁶kara giai gigi kud i uwic pa wonabali, m'edaru makugi ni ayeki ni yeny ma ie yeny.

2 Timoteo 3

¹Endre ing'ei mae, nia i ceng' mi kajik rundi nindo mi can biwok.

²Kum dhanu bibedo ma ng'atuman bimare gire en, man bimare gire en, gibibedo jumar sente, ku jukulula, ku ju ma gidodri wi juwagi, ku ju ma cayu cac, ku ju ma gi juco ni junyodogi, ku ju ma gifoyo foc ungo, ku ma leng' ungo de,

³ku ju ma mer mi wat umbe kugi, ku ju ma thegri ngo, ku ju ma gibalu abali de, ku ju ma kweri gigi ngo, ku ju ma kwiny de, ku ju m'udagu gin ma ber,

⁴ku juganda de, ku ju ma wigi tek, ku ju ma gitingri, ku ju ma gimaru migi anyong'a mananu ma sagu mer ma gimaru ko Mungu;

⁵ma gimoko kum ayi kwanyu koth Mungu, ento gikwero tegone: koc woko kum joni bende.

⁶Kum kind joni moko gi ju ma gimondo i udi lwe, man gimaku mon ni ayeki ma jukusegu ma giyeyo ter mi dubo, ma awanya ma rac ma mba mba ting'ogi,

⁷gi ju ma giponjo ng'eyo areri, ento gicopo tundo kum ng'eyong'ec mi lemandha ngo.

⁸Man calu yang' Yane giku Yambre gijai ni Musa, e joni bende gijai kum lemandha kumeca; co ma pidoic migi nyothre, ma girwinyo ndhu kum yioyic.

⁹Ento lembe migi bijik: kum lembe migi ma kite mbe biwok ngbeng' i wang' dhanu ceke, calu lembe mi joca bende nyuthre.

¹⁰Ento in re ilub tok ponji para, ku pira bende, ku yeny ma ia yeny, ku yic m'ayio de, ku mwonyo lembe de ma jumwonyo hai, ku mer m'amaru, ku twiocwiny de,

¹¹yau ragedo, ku can de; maeni m'anwang'u i Antiokia, ku i Ikonio, ku i Lustra de; thwo ragedo m'aciro: man Rwoth ulara kud i ie ceke.

¹²Andha, man dhanu ceke m'uyenyo gibed kud ayi Mungu i Kristu Yesu gibinwang'u ragedo.

¹³Ento dhanu ma rac ku ju ma guambri de gibisagri asaga, gibibombo abombi gin de jubibombogi.

¹⁴Ento dong' ibed ku lembe m'igamu ng'eyo con, ku maeni ma cwinyi kwio i kume, m'ing'eyo ko ju m'iponjo ng'eyo lembe i bang'gi;

¹⁵ya ugambre ma fodi i mukere ing'eyo lembagora ma leng' ma copo dwoki riek kum both ma juboth ko ku yioyic ma ni kum Kristu Yesu.

¹⁶lembagora ceke ma Mungu yuyo i wie ai ba Mungu man ke kulokane nuti mi ponji, mi nyuth ma junyutho ko dubo, ku mi twiny ma jutwinyo kojo de, ku mi ponji ma mi bedopwe:

¹⁷kara dhanu pa Mungu copo romo kakare, m'eyikre ndhu kum tic ceke ma ber kubang'gi kubang'gi.

2 Timoteo 4

¹Ang'olo iri i wang' Mungu, giku Kristu Yesu, m'ebipoko lembe mi ju ma kwo ku mi ju m'utho bende, man ku kanyuth pare m'ebinyuthre ko ku ker pare bende:

²yer lembe; tim tije i nindo ma juketho, kud i nindo ma juketho ngo bende; twiny twiny, juk juk, thok thok de, ku mwonyo lembe ceke ma jumwonyo hai man ku ponji de.

³Kum rundi biwok ma gibiciro ie ponji ma alili ngo; ento, gi ju ma ithgi woi swa kum lembe, gibicoko juponji i bang'gi gigi ma awanya ma rac migi cal cal;

⁴man gibibayu ithgi woko kum lemandha, e gibikier tok lembuda.

⁵Endre dong' ibed nger kum gin ceke, muli ku can, tim tic pa jayer lembe, keth tic peri timbre kakare.

⁶Kum an kawono jubekonja woko, man nindo mi ai para m'aa ko woko tundo.

⁷Adaru kiedo lwiny ma ber, adaru wot.h para atundo kajikne, agwoko yioyic bende:

⁸ugambre kawono jamkermiwic mi bedopwe, judaru kanu ira, ma Rwoth, ma japoklembe ma pwe, bimio ira i ceng' maeca; endre ira a kenda ngo, ento ni dhanu ceke bende m'umaru nyuth pare m'ebinyuthre ko.

⁹Tim k'amora ya ibin fodi nyanok i bang'a:

¹⁰kum Dema weka, m'amaru ng'om maeni ma kawono, man ecidho Tesaloniki; Kreske de cidho Galatia, Tito ke Dalmatia.

¹¹Luka kende m'udong' i bang'a. Cok Marko, wubin wukude; kum ebedo ni kuloka ira kum tim nr'etimo.

¹²Ento Tukiko adaru oro Efeso.

¹³Koti m'aweko Troa ba Karpo, ibin kude kan ibino, ku kitabu de, ma sagu ceke re waraga no.

¹⁴Iskander ma jathiedh nyunyu etima rac dit: Rwoth bimio ire rom ku tic pare:

¹⁵in bende ibed ku weng'i i kume; kum ejai dit kum lembe mwa.

¹⁶I cungo para m'alar acungo ng'atu moko mbe ma wacungo wakude, ento dhanu ceke giweka: ayenyo ku judwok lembene i wigi.

¹⁷Ento Rwoth re wacungo wakude, man emio ira tego; kara lembe mir anyong'a uyere dit ni kuma, kara Thekdhanumange de ceke giwinji: e aboth ku dhu umvor.

¹⁸Man Rwoth bibodha ni tic ma rac ceke, man ebigwoka cil i ker pare m'i polo: dwong' ubed ire rondo ku rondo. Amen.

¹⁹Moth Priskila, gikud Akula de, ku juot pa Onesiforo.

²⁰Erasto re dong' i Korinto: ento Trohmo aweke i Mileto ma kume lith.

²¹Tim k'amora ya ilar ibin ma fodi nindo mi koyo kuwok ungo. Eubulo de mothi, man Pudente, man Lino, giku Klaudia, kud umego de ceke.

²²Dong' Rwoth ubed ku cwinyi. Dong' bero bed i beng'wu.

Tito

Tito 1

- ¹Paolo, jamiru pa Mungu, man jakwenda pa Yesu Kristu calku yioyic mi ju ma Mungu goyo nying'gi, man ng'eyong'ec mi lemandha ma en e calku bedo ma ayi Mungu ni i kume,
- ²i genogen mi kwo ma rondo ku rondo, ma Mungu, ma kucop cwayu ndra ngo, ung'olo por yang' con;
- ³ento enyutho lembe pare i nindo pare gire i lemkwenda, juketho lembene i kora calku lembang'ola pa Mungu ma Jalar mwa;
- ⁴ni Tito, ma nyathin para mandha i yioyic m'uribowa: Bero ku kwiocwiny m'uai ba Mungu ma Wego ku Kristu Yesu ma Jalar mwa.
- ⁵Kum lembe nini aweki i Krete, kara iyik gin m'urem, man iketh judongo ku bang' adhura ceke, calu ang'olo iri;
- ⁶tek ng'atu moko adote mbe i wie, en e nico ma won dhaku acel, ma won nyithindho m'uyio, ma judotogi ngo nia gi jurop kadi juco.
- ⁷Kum jalieu kobedo ma adote mbe i wie be, calu jakurpiny pa Mungu; udhuko ngo, jang'ecwiny ma vur vur de ngo, jakwakwa ma wi pigulok ungo, jagoc ungo, jamar kuloka ma rac ungo;
- ⁸ento ebed ng'atu ma gwoko welo ber, ma jamar gin ma ber, ma pidoie nger, ma pwe, ma leng' de, ma kwere gire;
- ⁹ma cwinye cungo ki kum lembe mandha ma calku lemponji, kara ecopo juko juk ku ponji m'ulil, ecopo tuco wi jupiem bende.
- ¹⁰Kum dhanu ma juco gi dupa ma gi juwec mananu ku weg abombi, ju ma gi weg yaa ci dit ma kumeno,
- ¹¹ma jukojumi dhoggi be; ku ju ma giredho udi kpo, ma giponjo gin ma maku ku giponji, ni kuloka ma rac.
- ¹²Ng'atu acel m'i kindgi gigi, en e jabila migine, ewacu kumae, Jukrete gi jundra thiri thiri, gi yedi ma rac, gi jumbo ma kutim tic ungo.
- ¹³Lembatuca maeni en e andha. Kum kum lembe nini jukgi ku kwinyo, kara gibed i yioyic m'ulli,
- ¹⁴ma gikuciko ithgi ngo kum uda mi Juyahudi, ku lembang'ola mi dhanu m'ukier kum lemandha.
- ¹⁵Gin ceke leng' ni ju ma leng': ento ni ju m'ucido ma juyic ungo re gin moko mbe ma leng' igi; ento pidoic migi ku pidocwiny migi cido.

¹⁶Gituco nia ging'eyo Mungu; enke ku tic migi gikwere, gi ju ma judagu, man juco, man ku ba tic ma ber ceke en e gin moko ngo igi.

Tito 2

¹Ento dong' iyer lembe m'umaku ponji m'ulil:

²ya co m'uti gidhir wi ava gin ceke, gibed unibe lele, gibed ku pidoic ma nger, ku yioyic m'ulil, ku mari, ku twiocwiny:

³ya mon m'uti bende kumeno bedo migi bed m'umaku piny, ku gigob agobe, ku gibed andrej pigulok, gibed juponji mi gin ma ber;

⁴kara giponj mon ma thindho ku maru coggi, ku nyithindhgi bende,

⁵ya gibed ku pidoigi ma nger, gibed leng', gibed jutic i udigi, gibed ber ku dhanu, ma gibed ko wor ni coggi ma dhe, kara lembe pa Mungu kud ucidre;

⁶awobi bende kumeno jukgi ya gibed ku pidoigi ma nger;

⁷nyuthri giri i gin ceke ni japor mi tic ma ber, i ponji peri nyuth ma nyothre ngo, ma lele mbe i ie,

⁸ma wecne de lil, ma jucopo poko lembe ma rac i wie ngo; kara lewic umak ng'atu ma lem pare tung', kum lembe moko ma rac m'eyer piwa mbe kude.

⁹Ponj jumiru ya gibed wor ni judongo m'i wigi ma dhe, ya ginyai mutoro i igi i gin ceke; ku gidwok lembe;

¹⁰ku gibed ma cing'gi boco, ento ginyuth mandha ma ber ceke; kara giruk lemponji pa Mungu ma Jalar mwa i gin ceke.

¹¹Kum bero pa Mungu wok, m'ukelo both ni dhanu ceke,

¹²m'ubeponjowa, kara wakwer gin ma ayi Mungu mbe i kume kud awanya ma rac m'i ng'om, wabed nger man pwe man kud ayi Mungu i kumwa i ng'om ma kawono;

¹³ma wabekio ko genogen mi mugisa man nyuth mi dwong' pa Mungu ma dit ma Jalar mwa Yesu Kristu;

¹⁴m'emire gire piwa, kara ewarwa kud i camuco ceke, man elony dhanu ire gire ni piny pare ma dhe, m'ubedo kud ava tic ma ber.

¹⁵Yer lembe maeni, thok thok de, man juk juk ku ng'ol ceke. Ng'atu moko kud uvoni.

Tito 3

¹Poigi ya gibed wor ni jubim, ku weg ng'ol, ya giworgi, man gibed ayika ni tic ceke ma ber kubang'e kubang'e,

- ²nia ku giyer lembacidi kum ng'atu moko, ku gibed ku piem, gibed yo, ma ginyuth ko molcwiny ceke ni dhanu ceke.
- ³Kum wan bende naka wa jukusegu, wa juco, juwondowa de, ma watimo ni awanya ma rac ku mutoro ma kwonde tung' tung', wabedo de kud akece ku kumira, wabedo kud adegi, man wadagra.
- ⁴Ento ka bedober pa Mungu Jalar mwa, man mer pare m'amaru ko dhanu, uwoki,
- ⁵ku tic ma i bedopwe ngo, ma watimo wan, ento calku kisa pare ebodhowa, ni kum lwok mi nyol ma nyen man mi dwokonyen mi Tipo Maleng',
- ⁶m'ekonjo i wiwa k'abamba, ni kum Yesu Kristu Jalar mwa;
- ⁷kara, wan ma lembe m'i wiwa gonjre ku berone, wabed jucampacu calku genogen mi kwo ma rondo ku rondo.
- ⁸Maeni lembe mandha, e ayenyo iyer pi gin maeni ku tegocwinyi, kara ju m'uyio Mungu gipoi ya gibed ku tic ma ber. Gin maeni gi ber kulokane de nuti ni dhanu:
- ⁹ento koc kum penji ma kite mbe, ku yenyo kathekdhanu, man piem, ku kwa kwa ma kum cik; kum kulokane mbe man en e mananu.
- ¹⁰Ng'atu m'ujio piem ku yo ng'ei juk ma kwong'a ku mir arionde e dong' wukwere;
- ¹¹m'ing'eyo ko nia wagi ng'atu ma kumeno daru lokre, edubo de, m'epoko ko lembe rac i wie gire.
- ¹²Kan abioro Artema i beng'i, kadi Tukiko, ibin kud amora i bang'a Nikopoli: kum akeco ya abed kuca i nindo mi koyo.
- ¹³Yik woth pa Zena ma jaeuthecik gikud Apolo de mor mor, kara gin moko kud urem igi.
- ¹⁴Man wek dhanu mwa bende gimak ng'eyo timo tic ma ber kara can gin moko kud uneggi, kara nying'gi ma gicego kud ubed umbe.
- ¹⁵Ju ma gini i bang'a ceke gimothi. Moth ju m'umaruwa i yioyic ceke. Dong' bero bed kudu ceke.

Filemon

Filemon 1

- ¹Paolo, ma jakol pa Yesu Kristu, man Timoteo m'umegwa, ni Filemon ma jamer mwa ma wa jutic wakugi,
- ²man ni Aplia ma nyamegwa, man ni Arkipo ma asikari wadwa, man ni kanisa m'i ot peri:
- ³Bero iwu ku kwiocwiny m'uai ba Mungu ma Wegwa man Rwoth Yesu Kristu.
- ⁴Afoyo Mungu para thiri thiri, m'ayero ko piri i rwo para m'arwo,
- ⁵m'abewinjo ko pi mer peri, man pi yioyic m'ibedo ko yo ba Rwoth Yesu, man yo ba jumaleng' ceke;
- ⁶kara ripocwiny mi yioyic peri tim tic i ng'eyong'ec mi gin ceke ma ber kubang'gi kubang'gi ma ni i iwu, ni Kristu.
- ⁷Kum mutoro nega dit ku jukojuk de i mer peri, kum adunde jumaleng' uyepo ni kumi, umira.
- ⁸Kum kumeno, kadok a won tegocwiny kpo ni kum Kristu m'ang'ol ko iri lembe ma maku ang'ol,
- ⁹ento ni kum mer adong' akwei, kum abedo calu an a Paolo m'uti, man kawono a jakol bende pa Kristu Yesu:
- ¹⁰akwei kum nyathin para, ma Onesimo, m'anyolo nwang'u ani i kol,
- ¹¹ma yang' kuloka pare mbe iri, endre kawono dong' kuloka pare nuti iwa wakudi bende:
- ¹²m'adwoke i beng'i dho ku kume, lembene kumae, ya en nini en e adundena ku kite:
- ¹³m'ayenyo dit acere wabed wakude, kara etim ira kakeri i kol mi lembanyong'a ma juboth kudo:
- ¹⁴ento kan ambe ku lembe ma ii pido ayenyo ngo atim gin moko; kara bero peri kud ubed mir adhula, ento calu iyenyo.
- ¹⁵Kum kuno nyo wupokru kude nindo moko, kara wubed kude nja;
- ¹⁶calu jamiru kendo ngo, ento ma sagu jamiru, umego ma jamer, m'usagu dit ira, endre m'ulund usagu dit apila re iri, i kum man i Rwoth bende.
- ¹⁷Kum kumeno tek ikwana ya wa jutic wakudi, e dong' ijole calu an ku kita.
- ¹⁸Ento tek etimo rac iri kum gin moko, kadi tek ecamu banja peri moko, dwok banjane ba wel para;

¹⁹an a Paolo agoro gira ku cinga, abiculo wang'e: kum ayenyo ngo nik ayer iri re ya banja para ni i beng'i ma en e in ku kiti bende.

²⁰Eyo, umira, wek anyong'a nega i kumi i Rwoth: yep adundena i Kristu.

²¹Kum ageno woro peri ketho agoro iri, m'ang'eyo ko nia ibitimo ma sagu m'ayero iri.

²²Ento karacelo ku maeni doug' iyik kabedo ira bende: kum ageno ya ni kum rwo mu e jubidwoka i beng'wu.

²³Epafra, ma jakol wada i Kristu Y esu, umothi;

²⁴man Marko, Aristarko, man Dema giku Luka bende, ma wa jutic wakugi.

²⁵Bero pa Rwoth mwa ma Yesu Kristu bed ku cwinywu. Amen.

Juebrania

Juebrania 1

- ¹Mungu, ma yang' ubeduyero kwond lembe ni wego ku yo ma tung' tung' de ni kum jubila,
- ²i dong' nindo maeni eyero iwa i Wode, m'ekethe ni jacampacu mi gin ceke, piny bende ecwio ni kume;
- ³en m'e car m'ucare mi dwong' pare, man en e ayi mi kit kume, man gin ceke thierye ni kum lembe mi tego pare, kan etimo lwok mi dubo, ejany piny yo ku cing' ma yor acwic mi Dwong' ka ma malu;
- ⁴m'edaru doko ber hai ma sagu malaika calu enwang'u nying' ma cu ni kum camupacu ma sagu joca.
- ⁵Kum ni malaika makani m'eyero ire kumae, i nindo moko, In i Woda, I ceng' maeni anyoli? man kendo, Abibedo ire ni Wego, Man ebibedo ira ni Wodo?
- ⁶Man kan ekelo kayu kendo i ng'om ewacu kumae, E dong' malaika pa Mungu ceke girwo ire.
- ⁷Man pi malaika ewacu kumae, M'etimo malaika pare gidoko yamu, Man jutim pare ni lebmac;
- ⁸ento pi Wod re ewacu kumae, E Mungu, komker peri en e mi rondo ku rondo; Man uluth mi lebatira en e uluth mi ker peri.
- ⁹Imaru bedopwe, man idagu camuco; Ka kumeno Mungu, Mungu peri, ewiri ku mo Ku mo mir anyong'a ma sagu juwedu.
- ¹⁰Man, In, Rwoth, ku kwong'a itheko the ng'om, Man polo en e bodho mi chigi;
- ¹¹Gibinyothri; ento in idong' asu: Man gin ceke gibiti calu bongu ti;
- ¹²Man ibidologi calu kendi ma yo wi wagi, Calu kendi, man gibilokri: Ento in re i cahi acel, Man rundi peri bijik ungo.
- ¹³Ento malaika makani m'eyero pire nindo moko kumae, Jany yo ku cinga ma yor acwic, Maram aketh ko jukwoji dok ni kom mi tiendi.
- ¹⁴Gin ceke gi tipo mi timotim ungo, ma juorogi ya gitim tic pi ju ma bicamu pacu mi bothi?

Juebrania 2

- ¹Ka kumeno maku waketh cwinywa ma sagu kum lembe m'uwinjre, kara wiwa kud uwil i kume.
- ²Kum tek lembe m'uyere ni kum malaika ubedo ku tego, man dubo ceke kubang'e kubang'e ku camuco de unwang'u giramia ma pwe mi sukulia:

³e wabiboth nenedi, tek wagalu kum thwo both ma rokeni ngi? ma Rwoth ular ukwong'o yero, ma ju m'uwinjo uketho ecungo iwa:

⁴Mungu bende ginyutho gikugi, ku giranyutha ku musana man udul tego de, man ku giramia mi Tipo Maleng', calku yeny ma ie yeny gire.

⁵Kum eketho ng'om ma bibino, ma wayero pire ubed wor ni malaika ngo.

⁶Ento ng'atu acel e m'utuco kamoko, ewacu kumae, Dhanu en e girang'o, ma ii pido pire e? Kadi wod dhanu de, ma nia iliewe e?

⁷Iketho edok piny nyanok ma sagu malaika; Iketho jamkermiwic mi dwong' man yung i wie, Man ikethe wi tic mi cingi:

⁸Iketho gin ceke bed wor the tiende. Kum i kind ketho gin ceke wor ire, eweko gin moko ngo ma kubedo wor ire ngo. Ento kawono fodi waneno gin ceke jukuketho ubed wor ire ngo.

⁹Ento wanene ma judwoke piny nyanok ma sagu malaika, en e Yesu, ni kum sendri mi tho ma juketho jamkermiwic mi dwong' man yung i wie, kara ni kum bero pa Mungu e bil tho pi dhanu ceke kubang'gi kubang'gi.

¹⁰Kum emake, ma gin ceke gi pire, ma gin ceke de wok ni kume, i kelo m'ekelo ko wot dupa i dwong' ya eketh won both migi dok ndhu cu ni kum sendri.

¹¹Kum en m'edwoko jo leng' man ju ma judwokogi leng' ceke giai ba ng'atu acel: kum lembe nini lewic unege ngo nilwong'ogi umego,

¹²m'ewacu ko kumae, Abiewo nyingi ni juwada, I kind udul abiwero pak peri.

¹³Man kendo, Abiketho genogen para i ie. Man kendo, Nen, an ku nyithindho ma Mungu mio ira.

¹⁴Kum nwang'u nyithindho gi jurib ring'o ku rimo, en gire bende egamu maeno nino kumeca; kara ni kum tho ethir ng'atu ma jatego mi tho, ma en e wonabali;

¹⁵man kara egony dhanu ceke ma gi ng'eca ku ba rundi migi ceke ni kum lworo mi tho.

¹⁶Kum andha emio kony ni malaika ngo, ento emio kony ni kodhi Ibrahim.

¹⁷Kum kumeno emake ya juketh ebed calu utumin i gin ceke, kara edok ni jalam ma dit, ma won kisa mandha de i gin pa Mungu, kara eduny pi dubo mi dhanu.

¹⁸Kum nwang'u en gire esendre ma jubidhe, ecopo konyo ju ma jubidhogi.

Juebrania 3

¹Kum kumeno, umego ma leng', ma jurib mi lwong'o m'i polo, iwu pid pi Jakwenda man Jalam Madit mi lembatuca mwa, en e Yesu:

²ma en e mandha ni ng'atu m'ukethe, calu yang' Musa bende bedo i ot pa Mungu ceke.

- ³Kum jukwane ya eromo dwong' ma sagu Musa, calu jagomot bedo ku yung ma sagu yung mi ode.
- ⁴Kum ku ba udi ceke m'agoma dhanu gomo en: ento ng'atu m'ugomo gin ceke en e Mungu.
- ⁵Man andha Musa bedo mandha i ot pa Mungu ceke va jatic, mi lembatuca mi gin maeno ma biyere macen;
- ⁶ento Kristu re calu wod, wi ot pa Mungu; ma ode en e wan nini, tek wamaku tegocwiny mwa ki man kulula mi genogen mwa ku tego cil i kajikne.
- ⁷Kum kumeno, cil calu Tipo Maleng' uwacu kumae, Tin tek wubiwinjo dwande,
- ⁸Kud wudwok adundewu nwang', calu m'i ceng' camuco, Calu m'i ceng' muloic m'i yamba.
- ⁹Ka ma wegwu gimulo ia i ie ku ponj ma giponja ko, Man gineno tic para rundi pier ang'wen,
- ¹⁰Kum kumeno lembe ton i ia kum dhanum'utuk maeni, Man awacu kumae, Gidubo thiri thiri ku yo i adundegi: Ento ging'eyo yo para ngo;
- ¹¹Calu akwong'o i kwinyo para kumae, Gibimondo i yom para ngo.
- ¹²Wubed ku weng'wu, umego, kara adunde ma rac ma yioyic umbe i ie kud ubed i ng'atu moko mi kindwu, i kier ma jukier ko woko kum Mungu ma kwo:
- ¹³ento wujukru ceng' ku ceng', cil i nindo ma julwong'o Tin; kara ng'atu moko m'i kindwu cwinye kud udok nwang' kud abombi mi dubo:
- ¹⁴kum wan wadoko jugam waku Kristugi, tek wamaku thek ma genogen mwa thekre ko ki cil i kajikne:
- ¹⁵kinde ma lembe wacre kumae, Tin tek wubiwinjo dwande, Kud wudwok adundewu nwang', calu m'i ceng' camuco.
- ¹⁶Kum ng'a, m'ucamu co ma nwang'u gidaru winjo? eyo, dhanu ceke ma giai kud i Misiri ni kum Musa ngo?
- ¹⁷Man lembe ton i ie i kum ng'a rundi pier ang'weni? en e kum ju m'udubo, ma kumgi podho i yamba ngo?
- ¹⁸Man ekwong'o ni ng'a ya gibimondo ngo i yom pare, en e ni ju ma gicamu co ngo?
- ¹⁹E waneno nia gicopo mondo ngo kum yioyic m'umbe.

Juebrania 4

- ¹Ka kumeno, dong' lworu negwa, tek lembang'ola mi mondo i yom pare nuti ku jubin junwang' ng'atu moko m'i kindwu rem pire.

- ²Kum andha judaru yero lembanyong'a ma juboth ko iwa, cil calu gin bende: endre lembawinja kelo kuloka igi ngo, kum eribre ku yioyic ungo i ju m'uwinjo.
- ³Kum wan ma wayio wamondo i yom maeno; cil calu ewacre kumae, Calu akwong'o i kwinyo para, Gibimondo ngo i yom para: kadok tic udaru thum cil i kathek mi ng'om.
- ⁴Kum ewacu kamoko kumae pi ceng' abirone, Man Mungu yom i ceng' mir abirone ni tic pare ceke;
- ⁵man i ka maeni kendo kumae, Gibimondo ngo i yom para.
- ⁶Ka kumeno kum ebedo kakare ya jumoko bimondo i ie, man ju ma lembanyong'a ma juboth ko lar uyere igi gimondo ngo kum camuco migi,
- ⁷eng'olo nindo moko kendo kumae, Tinuni, m'ewacu ko i Daudi i nindo ma cen (cil calu elar ewacre), Tinuni tek wubiwinjo dwande, Kud wudwok adundewu nwang'.
- ⁸Kum tek Yocuwa mio igi yom, kuno di k'eyero pi nindo mange macen ungo.
- ⁹Ka kumeno yom mi sabatu bedo kakare pi dhanu pa Mungu.
- ¹⁰Kum ng'atu m'udaru mondo i yom pare eyom en gire bende ni tic pare, calu Mungu bende yom ni pare.
- ¹¹Ka kumeno dong' waketh cwinywa kum mondo i yom maeno, kara ng'atu moko kud ukier kum camuco m'upore ku maeni.
- ¹²Kum lembe pa Mungu e kwo, man etimo, man e bith ma sagu palamularu moko ma lake kun ku kun, m'ecobo ko cil ku poko ng'eyong'ec ku tipo, man ujonj ku mio ma yor i ie bende, man e yot kum ng'io pidoic ku lembapora mir adunde.
- ¹³Man giracwia pa Mungu mbe ma kunyuthre ngo i wang'e: endre gin ceke gi muneru man gibedo ayaba ngbeng' i wang' ng'atu ma wabedo ku lembe wakugi.
- ¹⁴Ka kumeno wan ma wabedo ku jalam ma dit ma dwong', m'ekadhu kud i polo, en e Yesu ma Wod Mungu, dong' wamak lembatuca mwa ki.
- ¹⁵Kum wakubedo ku jalam ma dit ungo ma can kunege ngo kum ng'ic ma wa ng'ic ko; endre ng'atu ma jubidhe kum gin ceke ma calu jubidho kowa, ere ma dubo mbe.
- ¹⁶Ka kumeno dong' wacoru ceng'ni kom mi bero ku tegocwiny, kara wajol kisa, man wanwang' bero m'ukonywa i nindo ma can ni i kumwa.

Juebrania 5

- ¹Kum ku ba jalam ma dit, ma jugamu i kind dhanu, jukethogi pi dhanu i gin ma pa Mungu, kara emi giramia ku lam de pi dubo:
- ²m'ecopo oyo lembe mi ju ma cobo ku ju ma kier, kum en gire bende eni i ng'ic;

³kum kumeno calu ewodho lam pi dhanu ca, ekoewodh pire gire bende kumeno de, pi dubo.

⁴Man ng'atu moko mbe m'ugamu yung maeni ire gire, ento kan elwongre ni kum Mungu, cil calu Harun.

⁵Kumeno Kristu bende yungre gire ngo ya jukethe ni jalam ma dit, ento ng'atu m'uyero ire kumae, In i Woda; Tin anyoli:

⁶calu eyero i kamange bende kumae, In i jalam mi nja Calu wagi pa Melkizedek.

⁷En ma i ceng' maeni mi kume, nwang'u ewodho rwo ni Mungu ku kwayukwac ma ku ywak ma tek ku piwang' ni ng'atu ma copo lare ni tho, m'ewinjre de ni kum lworu pare ma ayi Mungu ni i kume,

⁸kadok en e Wod, ento egamu ng'eyo woro ni kum gin m'esendre kudo;

⁹en ma judaru dwoke ndhu cu, edoko jathekboth ma rondo ku rondo ni ju ma giwore ceke;

¹⁰m'elwongre ku Mungu ni jalam ma dit calu wagi pa Melkizedek.

¹¹Wabedo ku lembe dupa ma wayer pire ma tuco there tek, kum wudoko udhing'.

¹²Kum ni kum nindo emaku wubed juponji, ento wuyenyo ya ng'atu moko ponjwu kendo ku ponji ma kwong'a mi lembatheka mi wec pa Mungu; man wudoko ni wagi ju ma can cak negogi, man cam m'alili re ngo.

¹³Kum ku ba dhanu ceke ma camu cak nwang'u eng'eyo lembe mi bedopwe ngo; kum en e mukere.

¹⁴Ento cam m'alili en e ni dhanu m'uteng'ni, gi ju ma ni kum timo ma gitimo ng'eyong'ec migi bedo ayika mi ng'io gin ma ber ku gin ma rac.

Juebrania 6

¹Kum kumeno wan ma waweko ponji ma kwong'a pa Kristu dong' wacwala ni dokocu ma ndhu; ma watheko ko the lokocwiny ma waweko ko tic m'utho kendo ngo, ku mi yioyic ma yo ba Mungu de,

²mi ponji mi baputisi, man mi ketho cing', man mi cer mi ju m'utho, man mi lembapoka ma nja.

³E maeni wabitimo, tek Mungu yio.

⁴Kum pi ju ma jumio igi der wang' acel, man m'ubilo girarnia maeni m'i polo, man juketho gibed jugam mi Tipo Maleng',

⁵man m'ubilo lembe ma ber pa Mungu, ku tego mi rundi ma biwok,

⁶e macen gilokri, e dwokogi nyen kendo ni lokocwiny copre ngo; kum giguro Wod Mungu kendo igi gigi, man gikethe ni lewic ma ngbeng'.

⁷Kum ng'om m'umadhu koth m'ucwi i wie wang' udul, man etwio dek ma romo ju ma jufure pigi, ejolo mugisa ba Mungu:

⁸ento tek etwio ukudho kud ucok, e jukwere man e ceng'ni ku kwong'; ma kajikne juwang'e ku mac.

⁹Ento, jumer, kadok wayero kumeno bende, wageno gin ma ber m'usagu maeno piwu, man gin m'ubedo karacelo ku both:

¹⁰kum Mungu en e won gondri ngo ma nia wie wil kum tic mu man mer ma wunyutho kum nyinge, kum wutimo ni jumaleng', man wubetimo asu.

¹¹Man wayenyo ya ku ba dhanu m'i kindwu ng'atuman unyuth morkume ma calcal mi pong' mi genogen cil i kajikne:

¹²kara kud wubed ku molcum, endre wubed jupor mi jucampacu mi lembang'ola ni kum yioyic ku twiocwiny.

¹³Kum kinde ma Mungu mio lembang'ola ni Ibrahim, kum ng'atu moko mbe m'usage m'ekwong' i kume, edong' ekwongre i kume gire,

¹⁴ewacu kumae, Andha mugisa abimio iri mugisa, ameda de abimedi.

¹⁵Man kumeno, kan edaru ciro ku twiocwinye, enwang'u lembang'olane.

¹⁶Kum dhanu kwong'o kwong' ku gin ma dwong' ma sagu: man i piem migi ma gipiemo ndri kubang'e kwong' en e kajik lembe ma ketho tegone.

¹⁷I lembe maeni Mungu, m'uyenyo enyuth ni jucampacu mi lembang'ola karamb lokringo mi lembapora pare eketho kwong' i diere;

¹⁸kara ni kum gin ario ma lokre ngo, ma i maeni cwayu ndra copre ngo ni Mungu, wabed ku juk ma tek, wan ma waringo wayenyo ko kaboth kara wamak genogen ma juketho i wang'wa;

¹⁹ma wabedo ko calu mangru mi ng'eyong'ec, ma en e genogen mandha ma mi tego de, man ma mondo i maeno ma ni i kusika mi bongu;

²⁰ma Yesu mondo keca piwa calu jawipiro mwa, m'edaru doko jalam ma dit ma nja ma wadi pa Melkizedek.

Juebrania 7

¹Kum Melkizedek maeni, ubimo mi Salem, jalam pa Mungu ma Malu Ngbir, m'erombo kud Ibrahim nwang'u ebedwogo m'ei i nek mir ubimo man emio ire mugisa,

²ma Ibrahim upoko ire apaje rni gin ceke (ma en e ma kwong'a, ku lembaloka, Ubimo mi bedopwe, man ke Ubimo mi Salem, ma en e, Ubimo mi kwocwiny;

- ³m'umbe won, m'umbe min, m'umbe ku thekwaru, ma thek ma ceng' thekre kudo mbe kude kadok kajik mi kwo de, ento judwoke calku Wod Mungu), m'ebedo jalam thiri thiri.
- ⁴Nie dong' iwu pid maram ng'atu maeni dit ko, ma Ibrahim, ma kwaru ma dit, umio ire apaje mi kum jambayeki ma cu.
- ⁵Man gin nini ma gi kind wot Lawi ma gijolo tic pa jalam lembang'ola ni i bang'gi ma gigamu ko apaje mi dhanu calku cik, thelebene, mi jupagi, kadok joni giai i pier Ibrahim:
- ⁶ento ng'atu ma thekwaru pare kwandre ngo m'ei ko i bang'gi egamu apaje bang' Ibrahim, man emio mugisa ire m'e won lembang'ola.
- ⁷Ento ma piembe mbe ng'atu ma nok unwang'u mugisa ba ng'atu m'usage.
- ⁸Man kakeni dhanu ma tho jolo apaje; ento keca acel, ma junyutho pire ya ebedo kwo.
- ⁹Man, calu eyere, ni kum Ibrahim cil Lawi de, m'ejolo apaje, ewodho apaje;
- ¹⁰kum fodi eni i pier won, ka girombo giku Melkizedek.
- ¹¹Nie tek dokocu ma ndhu nuti ni kum lamulam mi julam pa Lawi (kum dhanu gijolo cik ku the tije), nedi jalam mange wok kendo ma wagi pa Melkizedek, man ma jukwane ngo calu wagi pa Haruni?
- ¹²Kum lamulam mi julam lokre, e cik bende ukoulokre be.
- ¹³Kum ng'atu ma gin maeni yere pire en e ng'atu m'i suru mange, ma ng'atu moko mbe i ie m'utimo tic mi pemblam.
- ¹⁴Kum ebedo ngbeng' nia Rwoth mwa ai kud i Yuda; ma Musa kuyero gin moko ngo pi julam mi surune.
- ¹⁵Man gin ma wayero bedo ngbeng' ma sagu dit apila tek jalam mange wok calu wagi pa Melkizedek,
- ¹⁶ma judwoke jalam, i cik mi tego ma mi kum ungo, endre i tego mi kwo ma kajikne mbe:
- ¹⁷kum junyutho pire kumae, In i jalam mi nja Calu wagi pa Melkizedek.
- ¹⁸Kum juthiro lembang'ola ma kwong'a kum ng'ic pare man kum kuloka pare m'umbe
- ¹⁹(kum cik dwoko gin moko cu ma ndhu ngo), man jukelo i wie genogen ma ber m'usagu, ma wacoro ceng'ni Mungu ni kume.
- ²⁰Man kum kwong'o kwong' umbe ngo

- ²¹(kum gin andha judwokogi ni julam ma ku kwong' ungo; ento en re ku kwong' ni kum ng'atu m'eyero pire kumae, Rwoth ukwong'o man ebilokre gire ngo, In i jalam mi nja);
- ²²m'usagu bende Yesu doko mukwatu mi lembariba ma ber m'usagu.
- ²³Man gin judwokogi julam ma dupa andha, kum ni kum tho gicopo bedo ngo:
- ²⁴ento en, kum ebedo mi nja, ebedo ku lamulam pare rni julam ma lokre ngo.
- ²⁵Kum kumeno bende ecopo bodho ju ma gicoro ceng'ni Mungu ndhu ma gwei ni kume, kum ebedo mi nja kara ekwai pigi.
- ²⁶Kum jalam ma dit ma kumeni umaku wan, m'e leng', m'umbe abombi, m'ecido ngo, m'ekoire ku judubo, ma judode malu ma sagu polo;
- ²⁷can wodho lam ma ceng' ku ceng' unege ngo, calu julam ma dongo maeno, ma lar mio lam pi dubo pare gire, macen ke pi dubo mi dhanu: kum etimo maeni wang' acel pil, kan ewodhre gire.
- ²⁸Kum cik ketho dhanu gibed julam ma dongo ma gi ng'ic; ento lembe mi kwong' m'uwok yo ng'ei cik, eketho Wod, ma judwoke cu ma ndhu mi nja.

Juebrania 8

- ¹Nie i gin ma wabeyero, lembe ma dwong' e eni; Wabedo ku jalam ma dit ma wadi maeni, m'ejany yo ku ng'et komker ma yor acwic mi dwong' i polo,
- ²m'e jatim mi kamaleng', man mi hema mandha, ma Rwoth uguro re, dhanu ngo.
- ³Kum ku ba julam ma dongo ceke jukethogi kara giwodh giramia ku lam bende: kum kumeno dong' jalam ma dit maeni bende ukoubed ku gin m'ethier be.
- ⁴Nie tek en e ma wi ng'om, kuno di k'ebedo jalam ki ngo, kum ju ma giwodho giramia calku cik ginuti;
- ⁵ma gitimo maeni ma en e ayi ku tipo mi gin m'i polo, cil calu ma Musa poi ko ni kum Mungu kinde m'eyenyo etim hema: kum, Nen, ewacu, nia itim gin ceke calkud ayi gin ma junyutho iri wi got.
- ⁶Ento kawono enwang'u timotim ma dwong' hai ma sagu, calu en e jarib lembariba bende ma ber m'usagu, ma jung'ole wi lembang'ola ma ber m'usagu.
- ⁷Kum tek lembariba maeno ma kwong'a cungo ndhu cu, kuno di jukuyenyo kaka mir arionde ngo.
- ⁸Kum kan enwang'u erem, ewacu kumae, Nen, ceng' bibino, Rwoth uwacu, M'abitimo ie lembariba ma nyen ku ot pa Israel man ku ot pa Yuda;
- ⁹Ma calku lembariba m'atimo ku weggi ngo I ceng' m'amakugi ku cing' apeyo kogi woko kud i ng'om Misiri; Kum gibedo asu ngo i lembariba para, Man aparu pigi ngo, Rwoth uwacu.

¹⁰Kum maeni lembariba m'abitimo ku ot pa Israel Yo ku ng'ei ceng' maeno, Rwoth uwacu; Abiketho cik para i pidoigi, Man abigorogi wi adundegi bende: Man abibedo igi ni Mungu, Man gibibedo ira ni dhanu:

¹¹Man ku ba dhanu ceke ng'atu moko mbe ma baponjo wadi, Man ku ba dhanu ndri ng'atuman bi wacu ngo ni umin kumae, Ng'ei Rwoth: Kum dhanu ceke bing'eya, Ugambre kum ma thindho m'i kindgi cil ku ma dongone de.

¹²Kum kisa binega kum camuco migi, Man abipoi pi dubo migi kendo ngo.

¹³Kum ewacu kumae, Lembariba ma nyen, eketho ma kwong'a ti. Ento maeno ma kare bekadhu man m'ubeti e ceng'ni kadhu woko.

Juebrania 9

¹Nie cil lembariba ma kwong'a bedo ku lembapoka mi kisoma pa Mungu, man kamaleng' pare, kamaleng' m'i ng'om maeni.

²Kum juyiko hema, ma kwong'ane, ma ie ju thethala, ku mesa, man kwen m'anyutha; m'elwongre Kamaleng'.

³Man yor i ng'ei kusika mi bongu mir arionde, hema m'ulwongre Leng' mi Maleng';

⁴ma ie ju pemblam mi mola ma kwar rni gin ma ng'wice ng'ar, ku sanduk mi lembariba ma jumwono mola ma kwar gbur i kume ma ie ju alibi mi mola ma kwar ma ie ju mana, man musonglo pa Harun m'uloth, man ban mi lembariba;

⁵jukerubi mi dwong' gini i wie ma gibeumo kakisa ku tipo; ma wacopo yero pi ginduni ndri ngo kawono.

⁶Nie gin maeni ma juyiko kumeni, julam gimondo i hema ma kwong'a thiri thiri, ma gitimo ko tic mi kisoma;

⁷ento jalam ma dit kende e ma mondo i mir arionde, wang' acel pil i rundi acel, ma rimo mbe kude ngo, m'ewodho pire gire, man pi kier mi dhanu,

⁸e Tipo Maleng' unyutho maeni, nia yo mi kamaleng' fodunyuthie ngo, kinde ma hema ma kwong'a foducungo;

⁹ma en e lembapora mi nindo maeni; calku maeni juwodho giramia ku lam de ma copo dwoko jurwo cu ma ndhu ngo i gin mi pidocwiny,

¹⁰ma gi, (giracama man giramadha man giralwoka ma tung' tung') lembapoka mi kum, ma juketho cil i nindo mi yikolembe.

¹¹Ento Kristu m'udaru bino ni jalam ma dit mi gin ma ber ma bibino, ni kum hema ma dit ma bedo cu de m'usagu, ma jutimo ku cing' ungo, thelebene kumae, mi giracwia maeni ngo,

- 12**kadi ni kum rimb diegi ku nyithi dhiang' de ngo, endre ni kum rimbe gire, m'emondo wang' acel pil i kamaleng', m'edaru nwang'u war ma rondo ku rondo.
- 13**Kum tek rimb diegi ku thwoni dhiang', man ke vuru rni rwaya m'ukire wi ju m'ucido dwoko leng', cil ku dwoko kum leng':
- 14**e rimb Kristu, m'ewodhre gire ma mulima mbe ni Mungu kum Tipo Maleng' ma nja, bilwoko pidocwinywu ni tic m'utho kara wutim ni Mungu ma kwo sagu dit apila ngo?
- 15**Kum lembe nini en e jarib lembariba ma nyen, kara tho m'udaru timbre pi war mi dubo ma gini the lembariba ma kwong'a, ju ma julwong'ogi gijol lembang'ola mi camupacu mi nja.
- 16**Kum ka ma lembariba mi camupacu ni i ie, nwang'u tho pa ng'atu m'utimo lembaribane de ukoubedo nuti be.
- 17**Kum lembariba mi camupacu tegone bedo nuti nwang'u tho wok: kum tegone mbe tek ng'atu m'utime fodubedo kwo.
- 18**Kum kumeno cil lembariba ma kwong'a de jutheke ngo m'umbe rimo.
- 19**Kum kinde ma lembang'ola kubang'e kubang'e ceke yere ni kum Musa ni dhanu ceke calku cik, eting'o rimb nyathi dhiang' ku mi diegi de, karacelo ku pi man yuk rombo ma kwar man alagi, man ekiro wi kitabu gire man kum dhanu ceke,
- 20**ewacu kumae, Maeni en e rimo mi lembariba ma Mungu ng'olo iwu.
- 21**Man ke hema kud agulu mi timotim ceke ekiro kumeca ku rimo.
- 22**Man calku cik, avowacu, ya gin ceke julwoko ku rimo, man tek rimo ku cwir ungo, nwang'u rucoruc umbe.
- 23**Kum kumeno ayi mi gin m'i polo ukoubed alwoka be ku maeni; endre gin m'i polo gigi ku lam ma ber ma sagu maeni.
- 24**Kum Kristu kumondo i kamaleng' ma jutimo ku cing' ungo, ma calu ayi mi mandha; endre i polo gire, kara ewok kawono i wang' Mungu piwa:
- 25**kadi ma nia ewodhie gire wang' udul ungo, calu jalam ma dit ma mondo i kamaleng' ku ba rundi ku ba rundi ku rimo ma pare ngo:
- 26**tek ebedo kumeni ngo kuno di esendre wang' udul m'ugambre i thek ma ng'om uthekre ko: ento kawono enyuthre wang' acel pil i kajik rundi m'eketho ko dubo cen ni kum lam ma en gire.
- 27**Man kum ekethre ni dhanu ya githo wang' acel pil, man yo ng'ei maeni pokolembe;
- 28**kumeno Kristu bende, ma juwodhe wang' acel pil eyei dubo mi dhanu dupa, ebiwok wang' arionde, nge ku dubo, ni ju m'ukure, ni both.

Juebrania 10

- ¹Kum cik m'ebedo ku tipo mi gin ma ber ma bibino, ayi ginduni ku kite ngo, ku lam ma calacel ma ku ba rundi ku ba rundi, ma giwodho thiri thiri, ecopo dwoko ju m'ucoro ceng'ni cu ma ndhu ki ngo.
- ²Tek ebedo kumeno ngo nwang'u juweko wodho ngo? kum jurwo, ma judwokogi leng' wang' acel pil, cwinygi pido kendo ngo pi dubo.
- ³Ento i lam maeno juketho poi ma jupoi ko pi dubo ku ba rundi ku ba rundi.
- ⁴Kum ecopre ngo ya rimb thwoni dhiang' ku diegi ukab dubo woko.
- ⁵Kum kumeno kan ebino i ng'om, ewacu kumae, Lam ku giramia ayenyo ngo, Ento iyiko ira kum;
- ⁶Giramia m'awang'a ma dho man lam ma pi dubo de nyayu mutoro ii ngo:
- ⁷Alund awacu kumae, Nen, abino (I mbaya mi kitabu egore pira) Nitimo yeny m'iyenyo, E Mungu.
- ⁸Ma juwacu malu kumae, Lam ku giramia man giramia m'awang'a ma dho ku lam ma pi dubo de iyenyo ngo, kadok mutoro de negi ngo i kume (maeno ma juwodho calku cik),
- ⁹kan elund ewacu kumae, Nen, abino nitimo yeny m'iyenyo. Ekabu ma kwong'a ca woko, kara eketh mir arionde cungi.
- ¹⁰Ni kum yeny maeni m'eyenyo judwokowa leng' ni kum wodh m'ewodho ko kum Yesu Kristu wang' acel pil.
- ¹¹Man ku ba jniam ceke gicungo ku ba rupiny ku ba rupiny andha ma gitimo ko giratima giwodho ko lam de ma calacel wang' udul, ma copo kabu dubo ki ngo:
- ¹²ento en re, kan edaru wodho lam acel pi dubo ma nja, ejany yo ku cing' Mungu ma yor acwic;
- ¹³ugambre kawono m'ebekuro ko cil ma jubidwoko ko jukwoje ni kom mi tiende.
- ¹⁴Kum ni kum lam acel edwokogi cu ma ndhu mi nja gi ju ma judwokogi leng'.
- ¹⁵Man Tipo Maleng' bende nyutho iwa; kum kan edaru wacu kumae,
- ¹⁶Maeni en e lembariba m'abitimo kugi Yo ng'ei ceng' maeno, Rwoth uwacu: Abiketho cik para wi adundegi, Man abigorogi wi pidoic migi bende;
- ¹⁷Man dubo migi ku camuco migi abipoi pigi kendo ngo.
- ¹⁸Nie ka rucoruc rni maeni nuti, meca giramia ma pi dubo mbe kendo.
- ¹⁹Ka kumeno, umego, wan ma wa weg tegocwiny ma wamondo ko i kamaleng' ni kum rimo pa Yesu,

- ²⁰ni kum yo m'etheko iwa, yo ma nyen man mi kwo, ni kum kusika bongu, thelembene, kume;
- ²¹man kum wabedo ku jalam ma dwong' wiotpaMungu;
- ²²dong' wacoru ceng'ni kud adunde mandha i pong' mi yioyic ma adundewa bedo akira ni pidocwiny ma rac: ma kumwa de bedo alwoka ku pi ma leng',
- ²³dong' wamak lembatuca mi genogen mwa ki kara kud elokre; kum ng'atu m'ung'olo en e mandha:
- ²⁴man dong' iwa pidu piwa ku jukujuk ma ku mer ku tic ma dre de;
- ²⁵man ku wawek cokra giwa karacelo, ma calu kura mi jumoko, ento ajuka dong' wajukra; man ma sagu apila, ka waneno cenguni dHINGO.
- ²⁶Kum tek wadubo akakaka ku yo ng'ei jolo ng'eyong'ec mi lemandha, lam mi dubo dong' bedo nuti kendo ngo,
- ²⁷ento kuro pokolemba ma ku lworu, man kwinyo mi mac ma bicamu jupiem.
- ²⁸Ng'atu m'ucoro cik pa Musa cen etho ma kisa mbe ni kum jumulemba ario kadi adek:
- ²⁹e iwu wacu ya masendi ma jubing'olo ya urom ng'atu m'unyono Wod Mungu the tiende, m'ekwanu rimb lembariba m'edoko kudo leng' de ni gin ma leng' ungo, m'ecayu Tipo mi bero bende, bisagu dit ungo?
- ³⁰Kum wang'eyo ng'atu m'uwacu kumae, Culokwor en e para, abiculo. Man kendo, Rwoth bipoko lembe mi dhanu pare,
- ³¹Podho i cing' Mungu ma kwo en e gin mi lworu.
- ³²Ento iwu poi pi ceng' ma kwong'a, nwang'u der ucaru iwu, ma wuciro ie piem ma dit mi masendi;
- ³³ma moko, judwokowu ni giranena ni kum cac ku ruvwa; man mange ke, ma wuripo ko ku ju ma jutimogi kumeni.
- ³⁴Kum ngisi negowu kum ju ma gini i kol, man wuyio ku mutoro yak ma juyaku ko piny mu, ma wung'eyo ko nia wubedo ku jukupiny iwu giwu ma ber m'usagu ma kajikne de mbe.
- ³⁵Kum kumeno kud wubai tegocwiny mu, ma giramia mi sukulia pare dwong'.
- ³⁶Kum can twiocwiny ubenegowu, kara, wun ma wudaru timo yeny ma Mungu yeny, wujol leembang'olane.
- ³⁷Kum nindo dong' nyakathiklo, Ng'atu m'ubino ebibino, man ebigalu ngo.
- ³⁸Ento ng'atu ma pwe para bikwo ku yioyic: Man tek edok cen, mutoro binego ng'eyong'ec para i kume ngo.

³⁹Ento wan wa dhanu m'udok cen ni kanyoth ungo; ento mi yioyic cil ni both mi ng'eyong'ec.

Juebrania 11

¹Nie yioyic en e gin ma ketho tego kum gm ma jugeno pire, en e tegocwiny mi gin ma fokunen ungo.

²Kum junyutho lembe ni judongo i maeni.

³Ni kum yioyic wang'eyo nia ng'om ucwire ni kum lem pa Mungu, kum kumeno gin ma nen utimbre ngo kud i gin m'unyuthie.

⁴Ni kum yioyic Habil uwodho lam ma ber hai ni Mungu m'usagu pa Kain, man ni kum maeno junyutho pire nia en e ng'atu ma bedo pare cungo pwe, Mungu nyutho nyuth pi giramia pare man ni kum maeno kadok etho fodi ebeyero.

⁵Ni kum yioyic juting'o Enok kara kud enen tho; e junwang'e ngo, kum Mungu ting'e; kum junyutho pire ya ma fodi kating' pare kutundo ngo pire nyayu mutoro i Mungu:

⁶man ma yioyic umbe nyayu mutoro i ie copre ngo; kum ng'atu m'ubino ba Mungu maku ekoeyi be nia enuti, man e jamic mi ju ma giyenye.

⁷Ni kum yioyic Noa, ma Mungu poye pi gin ma fodi jukuneno ngo, ma lworro ma ayi Mungu ni i kume nege, eyiko avur kara ebodh ot pare; ni kum maeni egonjo ng'om, man edoko jacampacu mi bedopwe ma en e calku yioyic.

⁸Ni kum yioyic, ka julwong'o Ibrahim, eyio ecidh i ka m'ebijolo ni aba; man ecidho, m'eng'eyo ka m'acidho i ie ngo.

⁹Ni kum yioyic edoko umondo i ng'om mi lembang'ola, calu i ng'om ma pare gire ngo, m'ebedo ko i hema, gikud Isak man Yakobo, ma gi jucampacu, mi lembang'ola ma calacel karacelo gikude:

¹⁰kum ekio adhura maeni m'ubedo ku kathere, ma jagomne ku jatimne en e Mungu.

¹¹Ni kum yioyic cil Sara bende enwang'u tego m'enyolo ko nyodo ma nwang'u tego mi rundi pare kadhu, kum ekwanu ng'atu m'ung'olo lembe ya en e mandha:

¹²kum kumeno bende udni ma welne calu cero m'i polo, man calu kwio ma dhu nam, ma kwandre ngo, uai ba ng'atu acel man en de e calu avu.

¹³Maeni ceke githo i yioyic, ma fodi gikujolo lembang'ola ngo, endre anena ginenogi amotha de gimothogi ku bor, ma gidaru tucio nia gin umondo man juwoth i ng'om.

¹⁴Kum ju ma giyero wagi gin maeni ginyutho nia gibeyenyo kang'om migi gigi.

- ¹⁵Man andha tek gipido pi ng'om maeno ma giai i ie, kuno di kadok ma gidok ko wok igi.
- ¹⁶Ento kawono ava ng'om ma ber m'usagu negogi, ma en e m'i polo: kum kumeno lewic unego Mungu ngo i kumgi, ma nia julwong'e Mungu migi; kum eyiko adhura
- ¹⁷Ni kum yioyic, Ibrahim uwodho Isak, nwang'u jumule; eyo ng'atu m'ujolo lembang'ola kud anyong'a ewodho wode kulong';
- ¹⁸ndhu ng'atu ma jung'olo ire kumae, Kodhini bilwongre ni kum Isak:
- ¹⁹ekwanu ya Mungu copo ting'e, cil kud i tho ngi; kud i ie de ejole kendo calu i ayine.
- ²⁰Ni kum yioyic Isak umio mugisa ni Yakobo man Esau, cil pi gin ma bibino.
- ²¹Ni kum yioyic Yakobo, kinde m'ebetho, emio mugisa ni wot Yusuf kubang'gi; man erwo, m'etiele atiela wi uluth pare.
- ²²Ni kum yioyic Yusuf. kinde ma kajik pare dHINGO ceng'ni, eyero pi ai ma nyithindho pa Israel biai ko; man eng'olo lembe pi cogone.
- ²³Ni kum yioyic, kinde ma junyolo Musa, junyodo pare gikane dwi adek, kum gineno nia en e nyathin ma ber; man lworu negogi ngo kum lembang'ola p'ubimo.
- ²⁴Ni kum yioyic, ka Musa dongo, ekwero ku julwong'e wod Nyafarao;
- ²⁵m'efoyo ya eribre karacelo ku dhanu pa Mungu i masendi, sagu ma tek ebedo k'anyong'a mi dubo nindo moko;
- ²⁶m'ekwanu cac ma jucayu ko Kristu ni lonyo ma dwong' ma sagu piny m'akana mi Misiri: kum eneno ba giramia rni sukulia.
- ²⁷Ni kum yioyic eai i Misiri, ma lworu nege ngo kum kwinyo p'ubimo: kum eciro cir, calu m'ebeneno ng'atu ma nen ungo.
- ²⁸Ni kum yioyic ekwiro kadhukuwijo, ku kiro rimo, kara janyoth mi kayu kud umul kumgi.
- ²⁹Ni kum yioyic gikadhu kud i nam Makwar calu kud i ng'om m'uthwo: ma Jumisiri giponjo timo ci e gimwony.
- ³⁰Ni kum yioyic gang' mi Yeriko urwombre, yo ng'ei Iwor ma gilwore ko ceng' abiro.
- ³¹Ni kum yioyic Rahab ma won asara tho ngo karacelo ku ju ma gicamu co, kum ejolo julib ku kwicwiny.
- ³²E kan ayer ang'o kendo? kum nindo biromo ira ngo tek ayero pi Gideon, man Barak, man Samson, man Yeftha; man pi Daudi man Samwil ku pi jubila:

- ³³ma ni kum yioyic ginyono ker mir ubimo, gitimo bedopwe, ginwang'u lembang'ola, gimio dhu umvor,
- ³⁴gikwio wi tego mi mac, giboth ku lak palamularu, giai i ng'ic gidoko tek, gidoko jukero i ali, giriemo njuru asikari ma juwirok.
- ³⁵Mon gijolo avu dhanu migi ni kum cer: man jumange jusendogi ku remokum, ma giyio both migi ngo; kara ginwang' cer ma ber m'usagu:
- ³⁶man jumange jumulogi ku cac ku goc ma lith de, eyo, mange ke mi uno ku kol;
- ³⁷jucanyugi ku kidi, juthumo igi pu kud uligu, jubidhogi, junegogi ku palamularu: giwotho ku kendi mi lau rombe, ku mi lau diegi, gibedo jucan piny ma apila, gineno can, man jutimogi rac
- ³⁸(gi ber ma ng'om maeni romo kugi ngo), man gibewotho rr i ng'om ngele, kud i kind gudi de, i odcana de, man i odng'om de.
- ³⁹Man joni ceke, ma junyutho lembe pigi ni kum yioyic migi, gijolo lembang'olane ngo,
- ⁴⁰kum Mungu ketho iwa gin ma ber m'usagu, kara ku gidok cu ma ndhu nge ku wan.

Juebrania 12

- ¹Ka kumeno dong' wan bende, kum afuru mi jumulembe ma dit ma kumeni betiekowa, wawenyu ter ma pek kubang'e kubang'e, ku dubo ma rubowa tho tho kumeni, man dong' waringu ku rwiochwiny i kwaya ma juketho i wang'wa,
- ²ma wabeneno ko ba Yesu ma en e jathek ku jadar rni yioyic mwa, ma pi mutoro ma juketho i wang'e eciro yen m'athara, m'ecayu ko lewicne acaya man ejany yo ku cing' ma yor acwic rni komker pa Mungu.
- ³Kum dong' wupid pire en e ng'atu m'eciro piem ma kumeni mi judubo i kume gire, kara kud wuol, ma wuvoc ko i pidoiwu.
- ⁴Fodi wukuciro ngo ma ku rimo, ma wuii ko aiia kum dubo:
- ⁵man wiwu wil kum jukujuk m'ubeponjowu calku wot kumae, Woda, kud icai ponji ma Rwoth uponji ko, Kadi cwinyi kud uai kinde m'ejuki;
- ⁶Kum ng'atu ma Rwoth umaru eponje, Man efodo wot m'ejolo kubang'gi kubang'gi.
- ⁷En e pi ponji ya wuciro: Mungu timo i kumwu calku wot; kum wot makani ma won kuponje ngo?
- ⁸Ento tek ponji mbe kudu, ma dhanu ceke giribri i ie, nwang'u wu luk, wot ungo.
- ⁹Mange ke wabedo ku wegwa ma ku kum ma ponjowa, man wajwigra igi: esagu ngo ya wabed wor ni Won tipo, man wabed kwo?

- ¹⁰Kum gin andha giponjowa rni nindo moko calu ebedo ber i wang'gi; mana en re pi kuloka mwa, kara wabed jugam leng'cwiny pare.
- ¹¹Ku ba ponji ceke ma wabedo ko kawono ebedo calu en e mi mutoro ngo endre mi can; ento yo ku ng'eye ewodho nyinge mi kwiocwiny igi gi ju ma jutimogi kudo, cil nying' mi bedopwe.
- ¹²Kum kumeno ting' cing' m'uo i jeble, ku cong m'utho nding';
- ¹³man wutim yo ma atira ni tiendwu, kara maeno ma won abala kud ukier kud i yo, ento ma sagu ecangi.
- ¹⁴Wniub kwiocwiny kum dhanu ceke, man dwokrileng' ma ng'atu moko mbe m'umbe kudo ma bineno Rwoth:
- ¹⁵ma wubed ko ku weng'wu kara ng'atu moko kud urem kum bero pa Mungu; kara ulag akece kud uwok m'unyai can i iwu, man uketh dupa gicid ni kume;
- ¹⁶kara won tarwang' kud ubed nuti, kadi ng'atu ma rac caiu Esau, m'uioko camupacu pare gire ku cemo ma wang' acel.
- ¹⁷Kum wung'eyo nia yo ku ng'eye kan eyenyo ecam pacu mi mugisa, jukwere; kum enwang'u kamoko ngo m'elok ko pidoic pa won, kadok eyenye hai ku piwang'.
- ¹⁸Kum wubino ngo ba got ma jucopo mulo, man m'uwang' ku mac, man ni piny ma col bii, ku mudho, man wavuvu,
- ¹⁹ku dwand agwara, ku dwal mi lembe; ma ju ma giwinjo dwal maeno gikwayu ya ku juyer lembe moko mange igi;
- ²⁰kum winjo lembe ma jung'olo kumae cire igi ngo, Tek cil yedi mulo got, jubicanye ku kidi;
- ²¹man giranena maeno bedo ni lworu apila kumeno, ketho Musa wacu kumae, Lworu benega apila kuma bemiel de:
- ²²endre wun wubino ba got Sayuni, ni adhura de pa Mungu ma kwo, Yerusalem m'i polo, man ni udul malaika ma kwandre ngo,
- ²³ba cokri ma yu ku kanisa mi kayu ma jugoro i polo, man ni Mungu ma Japok mi jo ceke, man ni tipo mi weg bedopwe ma judwoko cu ma ndhu,
- ²⁴man ni Yesu ma jarib mi lembariba ma nyen, man ni rimo ma akira ma yero ber ma sagu pa Habil.
- ²⁵Wunen nia kud wukwer ng'atu m'ubeyero. Kum tek giboth ungo ka gikwero ng'atu m'utwong'ogi i ng'om, e wan ma walokra ku ba ng'atu m'utwong'owa kud i polo wabiboth ungo ma sagu dit:
- ²⁶ma dwalne yengo ng'om i nindo maeca: ento kawono eng'olo ewacu kumae, Ento wang' acel kendo abiyengo ng'om kende ngo, ento polo bende.

²⁷Man lembe maeni kumae, Ento wang' acel kendo, unyutho kabuwoko mi gin m'uyengre, calu mi gin m'ucwire, kara gin ma yengre ngo dong'.

²⁸Kum kumeno, wan ma wajolo ker ma copo yengre ngo, dong' wabed ku bero, ma watim ko ni Mungu wanyai ko mutoro i ie karacelo ku jwigri ku lworro ma ayi Mungu ni i kume:

²⁹kum Mungu mwa en e mac ma wang'u vi.

Juebrania 13

¹Wek mer mi utumego bed nuti asu.

²Wiwu kud uwil kum nyutho mer ni welo: kum ni kum maeno jumoko gwoko malaika ma jukung'eyo ngo.

³Wupoi pi ju ma gini i kol, calu wubedo atwia wukugi; ju ma jutimogi rac de, calu wun giwu bende wuni i kum.

⁴Wek gam ma jugambri ko bed ku yung i kind jo ceke, kavuto de kud ubed m'ecido: kum weg tarwang' man weg gier Mungu bipoko lembe rnigi.

⁵Bed agonya kum mer ma jumaru ko jukupiny; dong' cwinywu cung kum wagi gin ma wubedo ko: kum en gire ewacu kumae, Abiweki ki ngo, kadok akuna de abikuni ki ngo.

⁶Kum kumeno wawacu ku tegocwiny kumae, Rwoth en e jakonyna; abilworo ngo: Dhanu bitima nedi?

⁷Wupoi pi ju m'ubimo wiwu, dhanu ma giyero iwu lem pa Mungu; man ka wubepido pi kajik mi kura bedo migi ma gibedo ko kwo, wukwany ba yioyic migi.

⁸Yesu Kristu bedo calacel nyaworo ku tinuni, man rondo ku rondo de.

⁹Kud wuyeiru ku ponji ma tung' tung' ma naka jukuwinjo pire ngo: kum e ber ya adunde cung ku bero; ku giracama ngo, ma ju ma giwotho i ie ginwang'u kuloka ngo.

¹⁰Wabedo ku pemblam, ma ju ma rwo i hema gicopo camu maeno ngo.

¹¹Kum kum mi lim maeno ma rimo migi julam ma dit ukelo i kamaleng' pi dubo, juwang'u woko ku kagonjo.

¹²Kum kumeno Yesu bende, kara edwok dhanu leng' ni kum rimbe gire, esendre woko dhugang'.

¹³Ka kumeno dong' wawoku woko i bang'e i ng'ei kagonjo, ma wayeyu ko cac pare.

¹⁴Kum wabedo keni ngo kud adhura ma bedo, ento wayenyo adhura ma bibino.

¹⁵Ka kumeno dong' wawodh lam mi pak ni Mungu thiri thiri, lembene kumae, Nying' mi dendhok ma watuco ko nyinge.

- ¹⁶Ento wiwu kud uwil kum timo ber ku ribri de: kum lam ma kumeni nyayu mutoro i Mungu.
- ¹⁷Wuwor ju ma gibimo wiwu, wumond igi de: kum gikuro kum ng'eyong'ec mu calu ju ma biwodho wel; kara gitim maeni ku mutoro, ku can re ngo: kum maeni kuloka ngo iwu.
- ¹⁸Wurwo piwa: kum wageno andha nia wabedo ku pidocwiny ma ber, ma wabeyenyo wabed ko ber i gin ceke.
- ¹⁹Man akwayuwu ma sagu dit apila ya wutim maeni, kara judwoka i beng'wu pio ma sagu.
- ²⁰Nie Mungu mi kwicwiny, m'ekelo jakwac ma dit mi rombe kendo m'ecer ku kind ju m'utho ni kum rimo mi lembariba mi nja, en e Rwoth mwa ma Yesu,
- ²¹edwokwu cu ma ndhu i gin ceke ma ber kubang'gi kubang'gi kara wutim yeny ma ie yeny, m'ebetimo i iwu gin ma nyayu mutoro i wang'e, ni kum Yesu Kristu; dwong' ma nja ku nja ubed ire. Amen.
- ²²Ento akwayuwu, umego, wutwi cwinywu kum lem ponji: kum adaru goro iwu ku lembe ma nyanok.
- ²³Wung'ei nia umegwa ma Timoteo jugonyo; ma tek ebino fodi nyanok, wabinenowu wakude karacelo.
- ²⁴Wumoth ju ma gibimo wiwu ceke, ku jumaleng' ceke. Ju ma Italia gimothowu.
- ²⁵Dong' bero bed iwu kpo. Amen.

Yakobo

Yakobo 1

- ¹Yakobo, ma jamiru pa Mungu man pa Rwoth Yesu Kristu, ni dhanu apar wi ario mi Jumulal mba, moth iwu.
- ²Umego, tek wupodho i udul abidhe, wukwane ceke ni mutoro;
- ³ma wung'ei ko ya mulo yioyic mu nyayu twiocwiny.
- ⁴Man wek twiocwiny ubed ku tic pare ma ndhu cu, kara wubed ndhu cu man dho de, ma wurem i gin moko ngo.
- ⁵Ento tek ng'atu moko m'i kindwu rieke mbe kude, wek ekwai Mungu, ma mio ni dhanu ceke ku berocwinye, egamugi ku dhau de ngo; man ebimire ire.
- ⁶Ento wek ekwai i yioyic, cwinye kud ubed jiji: kum ng'atu ma cwinye jiji e calu mukura ma yamu leko ethore de.
- ⁷Kum ng'atuno ie kud upid nia nyo ebigamu gin moko ba Rwoth;
- ⁸ng'atu ma pidoie ario, m'ubelokre swa i yo pare ceke.
- ⁹Ento dong' umego ma nyaswaswa de ulule kum yung ma juyunge ko:
- ¹⁰jalonyo bende, kum jujwige: kum ebikadhu woko pami thiuboko m'i lum.
- ¹¹Kum ceng' dongo ku yamu ma lieth, man enero lum: e thiubokone podho, man ke bero mi kite nyothre: kumeno bende jalonyo birwinyo woko i woth pare.
- ¹²Ng'atu m'uciro abidhe mugisa kwanye; kum ka judaru mulo ie, ebinwang'u jamkermiwic mi kwo, ma Rwoth ung'olo ni ju m'umare.
- ¹³Ng'atu moko tek abidhe betime kud ewac kumae, Mungu bebidha en; kum dubo copo bidho Mungu ngo, en de ebidho ng'atu moko ngo:
- ¹⁴ento ku ba dhanu ceke ng'atuman abidhe time, nwang'u awanyane ma rac uting'e en, e abidhe bidhe.
- ¹⁵Awanyane ma rac, kan egamu ie, elund enyolo dubo: e dubone, kan eteng'ni, ekelo tho.
- ¹⁶Ku juwondwu, umego ma jumerna.
- ¹⁷Girania ceke ma ber kubang'gi kubang'gi man girania ceke ma ndhu cu kubang'gi kubang'gi, uai malu, uloro piny ku ba Wego mi der, ma lokri rr umbe kude, kadok tipopiny ma podho kum lokri rr.
- ¹⁸E enyolowa ku lembe mi lemandha, kara wabed ni landu mi mwoka mi ju m'ecwio.

- ¹⁹Umego ma jumerna, wung'eyo lembe maeni. Ento ku ba dhanu ceke wek ng'atuman ubed m'ewinj pio, ebed yo kum wec, kum kwinyo bende;
- ²⁰kum kwinyo mi dhanu timo bedopwe pa Mungu ngo.
- ²¹Kum kumeno wucor lemsasa ceke cen ku dubo m'udhir, man wujol lembe ma jupidho i iwu ku molcwinywu, ma copo bodho ng'eyong'ec mu.
- ²²Ento dong' wubed jutim lembe, man juwinj awinja kende ngo, ma wubewondru ko giwu.
- ²³Kum tek ng'atu moko e jawinj lembe awinja man e jatim lembe ngo, en e va ng'atu m'ubeneno wang'e ma junyole ko i kieu:
- ²⁴kum ebenendre gire, eciho woko de, e ndhu ndhu nica wie wil pir ayine maram ebedo ko.
- ²⁵Ento ng'atu m'ubeneno i cik ma ndhu cu, cik mi gony, m'ebetimo kumeno de asu, ma en e jawinj awinja kende ngo ma wie wil ento e jatim m'ubetimo, ng'atuni bibedo jamugisa kum tic m'etimo.
- ²⁶Tek ng'atu moko ie pido ya en e jakisoma, ma k'ecero lebe ngo enke ebewondo adundene, nwang'u kisoma pa ng'atuni en e mananu.
- ²⁷Kisoma m'alili ma cido de ngo i wang' Mungu mwa ma Wegwa e ee, ya julieu kic ku mon ma coggi tho i can migi, man ke gwok ma jugwokri ko gijo ni ng'om ma jukuvukri ngo.

Yakobo 2

- ¹Juwada, kud wubed ku yic pa Rwoth Yesu Kristu, Rwoth rni dwong', ma dhanu bedo tung' tung' i weng'wu.
- ²Kum tek ng'atu moko bino i kacokri mu ku lagith mi mola ma kwar, ku kendi ma ber de, man jacan bende mondo i ie ku kendi ma rac;
- ³e ng'atu m'ukendo kendi ma ber e ma bedo ber i weng'wu, man wuwacu kumae, Dong' ibed kakae i ka ma ber; ni jacan e ma wuwacu kumae, Cung kaca, kadi ibed the kom mi tienda;
- ⁴meni nwang'u wuketho dhanu bed tung' tung' i weng'wu i kindwu giwu ngo, man ke wudoko jupoklembe mi lembe ma rac ma iwu pido ngo?
- ⁵Wuwinji, juwada ma jumerna; Mungu foyo ju ma gi jucan m'i ng'om ungo ya gilony i yioyici, ma gibed ni jucampacu mi ker m'eng'olo ni ju m'umare?
- ⁶Ento wuranju jucan. Julonyo givoyowu ngo, man ke gin nica e ma giywayuwu i wang' kom mi pokolemba ngo?
- ⁷Gicido nying' mi yung ma wulwongru kudo ngo?

- ⁸Ento tek wuketho cik mi ker utimbre kakare, calku lembagora pa Mungu ma kumae, Dong' imar wat peri calu imeri giri, nwang'u wutimo dre:
- ⁹ento tek dhanu bedo tung' tung' i weng'wu, nwang'u wudubo, ma cik utuco wiwu ya wu judubo.
- ¹⁰Kum ng'atu ma tek biworo cik kpo, e kan acel ukier ire, meca edoko jadubo mi cik kpo.
- ¹¹Kum ng'atu m'uwacu kumae, Kud igier mon mi juwedu, e en nini e m'ewacu kumae bende, Kud ineg nek. Nie tek igiero mon mi juwedu ngo, enke inego neki, nwang'u idoko jadubo mi cik.
- ¹²Dong' lembe ma wuweco ku gin ma wutimo de ubed kumeno, calu dhanu ma jubipoko lembe migi ku cik mi gony.
- ¹³Kum pokolembé kisa pare mbe ni ng'atu m'unyutho kisa ngo: kisa behaire kum pokolembé.
- ¹⁴Kuloka en e ang'o, juwada, tek ng'atu moko wacu ya ebedo ku yioyic, enke tic umbe kude? yioyic nino copo bodhe?
- ¹⁵Tek umego kadi nyamego ebedo muneru man ke cemo mi ceng' ku ceng' umbe kugi,
- ¹⁶e ng'atu acel m'i kindwu wacu igi kumae, Wuci ma cwinywu kwio, kumwu de bed mor wuyeng' de; ento wumio igi gin ma cande ni i kumgi ngo; nwang'u kulokane en e ang'o?
- ¹⁷Cil kumeno yioyic de, tek ebedo ku tic ungo, en e avu i ie gire.
- ¹⁸Eyo, ng'atu moko biwacu kumae, Ibedo ku yioyic, an ke abedo ku tic: nyuth ira yioyic peri nge ku tic peri, an ke abinyutho iri yioyic para ku tic para.
- ¹⁹Iyio ya Mungu en e acel; itimo dre: pajogi bende giyio, kumgi de bemiel.
- ²⁰Ento iyenyo ing'ei, in i dhanu ma kiti mbe, nia yioyic ma tung' ku tic ebedo lule?
- ²¹Jugonyo lembe ma wi Ibrahim ma wegwa ku tic ungo, kum ethiero Isak ma wode wi pemblami?
- ²²Ineno ngo ya yioyic utimbre ku tic pare, man ku tic yioyic udoko ndhu cu?
- ²³lembagora pa Mungu de timbre kakare m'uwacu kumae, Man Ibrahim uyio Mungu, e jukwane ire ni bedopwe; man julwong'e jarim Mungu.
- ²⁴Wuneno nia ng'atu moko lembe m'i wie gonjre ku tic, man ku yioyic kende ngo.
- ²⁵Kumeno bende Rahab ma won asara lembe m'i wie gonjre ku tic ungo, kum ejolo jukwenda, man eorogi woko ku yo ku mange?
- ²⁶Kum calu kum nge ku cwiny en e avu, kumeno cil yioyic de ma nge ku tic en e avu.

Yakobo 3

- ¹Kindwu dupa kud ubed juponji, juwada, ma wung'eyo ko nia wabinwang'u lembapoka tek ma sagu.
- ²Kum i gin dupa wan ceke wakier. Tek ng'atu moko kier ungo i lembe, meca ng'atuca en e ng'atu ma bedo ndhu cu, m'ecopo twinyo kum ceke bende.
- ³Nie tek waketho gwang' mi kana i dhu kana kara giworwa, e watwinyo kumgi ceke bende.
- ⁴Nen, combo bende, kadok gi dit hai man julekogi ku yamu ma tek, jutwinyogi kud utwindi ma nyathigi, yo ka ma mubalia yenyoy.
- ⁵Kumeno leb bende en e wathkum ma nyanok, man elulo gin ma dit. Ei nen, thwo yen ma rokeno ngi jucwinyo ku nyathi mac ma rokeni!
- ⁶Leb de en e mac: leb en e ng'om dubo m'i kind wathkumwa, m'ecido kum ceke, man ke ecwinyo ulag nyodo, en ke gehena cwinye re.
- ⁷Kum dhanu rambu kwond yedi ceke ku winyo, ku gin ma lak i ng'om ku gin m'i nam bende, gidoko mol, man ke jugamu rambugi con:
- ⁸ento leb ng'atu moko mbe ma copo rambe edok mol; en e gin ma rac m'ubetimbre awe, epong' ku yath ma negojo.
- ⁹Wafoyo kude Rwoth ku Wego; wawkwong'o kude dhanu, ma jucwio kud ayi Mungu;
- ¹⁰mugisa ku kwong' de giai kud i dhok acel. Juwada, maku maeni kud ubed kumeno.
- ¹¹Kulo molo pi ma mit ku ma kec de kud i wang'e aceli?
- ¹²juwada, ulam copo cego ulemo, kadi ulok ke ulami? kadok pi mi kadu de copo wodho pi ma mit ungo.
- ¹³Ng'a ma riu i kindwu m'ung'eyo lembe? wek enyuth tic pare ku kwo pare ma ber ku molcwiny mi rieko.
- ¹⁴Ento tek wubedo ku kumira m'akeca ku koiri bende i adundewu, kud wuheru, kud wucwai ndra kum lemandha.
- ¹⁵Rieko maeni en e rieko m'uai malu loro piny ungo, ento en e m'i ng'om, mi kum m'anyola, pa wonabali.
- ¹⁶Kum ka ma kumira ku koiri ginuti ie, yakni ku tic ceke ma rac de ginuti.
- ¹⁷Ento rieko m'uai malu elar ebedo leng', macen mi kwicwiny, yo de, ma yot kum winjo lembe, pong' ku kisa ku nying' ma jucego, ma piem umbe, dhok ario de mbe.
- ¹⁸E nying' bedopwe jucoyo i kwicwiny ni ju m'unyayu kwicwiny.

Yakobo 4

- ¹Ali m'i kindwu giai kani ku rop bende? giai ba gin maeni ngo, cli bang' awanya kumwu m'ubekiedo i wathkumwu?
- ²Awanya ma rac ubenegowu, ere wubedo kudo ngo: wunego nek, man wuketho cwinywu hai kum piny, ento enwangre iwu ngo: wukiedo lwiny wutimo ali de; e wubedo kudo ngo, kum wupenjo ngo.
- ³Wupenjo, man wugamu ngo, kum wupenjo aleng'a, kara wulale i awanya mu.
- ⁴Wun wu weg gier, wung'eyo ngo nia bedo jarimb ng'om en e adegi ni Mungu? Kumeno ng'atu ma tek uyenyoye ebed jarimb ng'om nwang'u ekethre gire ni jadege pa Mungu.
- ⁵Kadi iwu pido ya nyo lembagora pa Mungu yero mananu? Cwiny maeno m'eketho ubed i iwa ava ubenege cil ku kumira?
- ⁶Ento emedo bero mange. Kum kumeno lembagora pa Mungu wacu kumae, Mungu gut kum jukuhaya, ento emio bero ni ju ma mol.
- ⁷Dong' wumond kumeno ni Mungu: ento wugut ni wonabali, e ebiringowu.
- ⁸Cor i vut Mungu, man ebicoro i vutwu. Wulog cingwu, wu judubo; man wulwok adundewu, wu ju ma pidoiwu ario.
- ⁹Dong' wusendru, can unegwu de, man wuywaki: wek ng'iero mu dok ni can, mutoro mu de ni adieng'acwiny.
- ¹⁰Dong' wujwigru giwu i wang' Rwoth, man ebiyungowu.
- ¹¹Kud wuyer nying juwedu ma ng'atuman uyer nying wadi man nying wadi, umego. Ng'atu m'uyero nying umego, kadi m'upoko lembe p'umin, nwang'u eyero kum cik, man epoko lembe wi cik: ento tek ipoko lembe wi cik, meca in i jatim cik ungo, ento in i japoklembe.
- ¹²Ng'atu acel kende ma en e jang'olcik man japoklembe, e en nini e m'ecopo laru m'ecopo nyotho bende: ento in i ng'a m'ipoko lembe pa wedu e?
- ¹³Aeno dong' kawono, wu jn ma wnwacu kumae, Tinuni kadi urwo wabacidho i adhura ma nyo, wabibedo keea de rnndacel, wabiloko kuloka, e wabigamu jupinyne:
- ¹⁴ento wung'eyo ngo maram urwo bibedo ko. Kwo peri en e girang'o? kum wun wu lietho ma duny, ma wok nyaswaswa ci, e elund elal woko.
- ¹⁵Maku wuwac kumae, Tek Rwoth uyio wabibedo kwo, man wabitimo gin mae kadi maeno.
- ¹⁶Ento kawono wuheru i alule mu: ahaye ma kumeno ceke e rac.

¹⁷Kumeno tek ng'atu m'ung'eyo timo ber, e kan etime ngo, meca edoko ni dubo ire.

Yakobo 5

¹Aeno dong' kawono, wu julonyo, wuywaki wugoi nduru de kum masendi mu ma biwok i kumwu.

²Jupiny mu nyothre, kendi mu de ungulu camu.

³Mola mu ma kwar ku mola mu ma tar de munyali camu: munyaline bibedo ni giranyutha i kumwu, man ebicamu kumwu pami mac. Wukanu piny m'akana mu i dhu kajik mi ng'om.

⁴Nen, sukulia mi jutic m'unyaru i podho mu, ma wutwonogi kud azindi, ubeywak: man ywak mi ju m'unyaru mondo i ith Rwoth mir udul.

⁵Wubedo abeda i ng'om, wunwang'u mutoro mu de; wucamu ma cwinywu kwio i ceng' mi nek.

⁶Wugonjo ng'atu ma pwe, wunege de; en de egut iwu ngo.

⁷Ka kumeno wutwi cwinywu, umego, cil i bino pa Rwoth. Nen, jatipodho bekuro nying' cam ma pire tek mi ng'om, m'etwio cwinye i kume, cil ma koth ma kwong'a ku macen de bicwi i wie.

⁸Wun bende dong' wutwi cwinywu; wuketh adundewu nyang': kum bino pa Rwoth udhingo.

⁹Umego, kud wung'ur kum juwedu ma ng'atuman ung'ur kum wadi man kum wadi, kara ku jupok lembe i wiwu: nen, japoklembe cungo dhugola.

¹⁰Umego, wuting' jubila ma giyero lembe ku nying Rwoth ni por mi masendi ku mi twiocwiny de.

¹¹Nen, walwong'ogi jumugisa gi ju ma giciro cir: wudaru winjo pi twiocwiny pa Yob, man wudaru neno kajik lembe pa Rwoth, maram Rwoth e won ngisi, ku kisa bende.

¹²Ento ma sagu wi gin ceke, juwada, kud wukwong' kwong', kadi ku polo, kadok ku ng'om, kadok ku kwong' mange de: endre wuwek eyo mu bed ndhu ni eyo, man ungo mu de ubed ndhu ni ungo; kara pokolembe kud upodh i wiwu.

¹³Ng'atu moko m'i kindwu besendre? wek erwo. Ng'atu moko anyong'a benege? wek ewer wer rni pak.

¹⁴Ng'atu m'i kindwu kume lithi? wek elwong' judongkanisa: man wek girwo pire, giwir mo i kume i nying Rwoth:

¹⁵man rwo ma ku yioyic bikeyo kum ng'atu ma kume lith, e Rwoth biting'e malu; man ke tek edubo lembe moko, jubiweko pire woko ire.

¹⁶Ka kumeno dong' wutuc dubo mu ng'atuman utuc ni wadi man ni wadi, man wurwo ma ng'atuman urwo pi wadi man pi wadi, kara kumwu kei. Kwac pa ng'atu ma pwe yire dit i ticne.

¹⁷Elia en e ng'atu ma ku kum calu wan, man erwo ma tek ya koth kud ucwi; e koth ucwi ngo i ng'om rundi adek ku dwi abusiel.

¹⁸Man ekwayu kendo; e polo coro koth, ng'om de cego nyinge.

¹⁹Juwada, tek ng'atu moko m'i kindwu wingre kum lemandha, e ng'atu moko dwoke;

²⁰wek eng'ei, nia ng'atu m'uloko jadubo kud i yo ma nwang'u ekier i ie, ebibodho kwo acel kud i tho, man ebiumo udul dubo dupa.

1 Petro

1 Petro 1

- ¹Petro, jakwenda pa Yesu Kristu, ni ju ma jugoyo nying'gi ma gi jubedo uii Jumulal mba ma gini i Ponto, ku Galatia, ku Kapadokia, kud Asia, man Bithuni,
- ²calku ng'eyong'ec ma Mungu ma Wego lar ung'eyo, i dwokrileng' mi Tipo, ni woro ku kir mi rimo pa Yesu Kristu: Bero ku kwicwiny umedre iwu.
- ³Mugisa ubed ni Mungu ma Won Rwoth mwa Yesu Kristu, menyolowa kendo calku kisa pare ma dit mi genogen ma kwo ni kum cer pa Yesu Kristu ma kind ju m'utho,
- ⁴ni camupacu ma nyothre ngo, ma cido de ngo, ma duny woko de ngo, ma jukanu iwu i polo,
- ⁵ma wubedo akura ku tego pa Mungu ni kum yioyic ni both m'ubedo ayika ma binyuthre i acoka nindo.
- ⁶Anyong'a negowu dit i gin maeni, kadok kawono mi nindo ma nyanok, tek ebeto kumeno, juketho can unegwu i abidhe ma kwonde tung' tung',
- ⁷kara mulo yioyic mu, ma pire tek ma sagu mola ma kwar ma nyothie kadok jumule ku mac, junwang'e ni pak ku dwong' ku yung i nyuth pa Yesu Kristu:
- ⁸ma wumare, ma fodi wukunene ngo; ma kadok wunene ngo kawono, ento ma wuyie, anyong'a negowu dit kud anyong'a mawecre ngo m'upong' ku dwong' de;
- ⁹ma wujolo ko kajik mi yioyic mu, ma en e both mi ng'eyong'ec mu.
- ¹⁰Pi both maeni jubila gisayu man giyenyo cu, ma giewo pi bero ma bibino i beng'wu:
- ¹¹ma giyenyo ko kanindo kadi karambnindo ma Tipo Kristu ma ni i igi nyutho pire, kan elar etuco pi sendri pa Kristu, ku dwong' ma bilubo toke.
- ¹²M'unyuthre igi, nia igi gigi ngo, ento iwu, gitimo gin maeni, ma kawono uyere iwu ni kum ju ma giyero iwu lembanyong'a ma juboth ko ku Tipo Maleng' ma juore kud i polo; ma malaika giyenyo ging'i i ginde.
- ¹³Kum kumeno ma wutwio ko thondh pier pidoiwu, wubed nger, wuketh genogen mu cu wi bero ma jubikelo iwu i nyuth pa Yesu Kristu;
- ¹⁴calu nyithindho mi woro, kud wuporu giwu kud awanya ma rac mu ma kwong'a mi cobo mu;
- ¹⁵ento calu ng'atu m'ulwong'owu e leng', wun giwu bende wubed leng' i kura ceke mi bedo mu;
- ¹⁶kum egore kumae, Wubibedo leng'; kum an a leng'.

¹⁷Man tek wulwong'e calu en e Wego, m'epoko lembe mi dhanu ng'atuman calku tic pare ma dhanu bedo ko tung' tung' ungo i wang'e, e wubed ku lworu i nindo mi bedo mu:

¹⁸ma wung'eyo ko nia juwaruwu, ku gin ma nyothre ngo, ku mola ma tar kadi mola ma kwar de ngo, kud i kura mi bedo mu ma kite mbe ma wunwang'u ba kwaruwu;

¹⁹ento ku rimo ma pire tek, calu pa nyathi rombo ma mulima kadi poyo de mbe i kume, en e rimb Kristu:

²⁰ma jular jung'eye andha ka fodi theng'om kucakre ngo, ento enyuthre i kajiknindo piwu,

²¹wun ma wu juyic i Mungu ni kume, m'eketho ecer kud i kind ju m'utho, emio ire dwong' de; kara yioyic mu ku genogen mu bed i Mungu.

²²Kum wudaru dwoko adundewu leng' i woro mu ma ba lemandha ni mer mir umego ma abombi mbe i ie, dong' wumeru k'amora ku i adunde:

²³ma junyolowu kendo ku kodhi ma nyothre ngo, ento ku kodhi ma kunyothie, ni kum lem pa Mungu, ma kwo ma bedo de.

²⁴Kum, Kum ceke calu lum, Dwong'ne ceke de calu thiu lum. Lum ner, man thiwe de oi:

²⁵Ento lembe pa Rwoth bedo rondo ku rondo. Maeni lembe mi lembanyong'a ma juboth ko ma juyero iwu.

1 Petro 2

¹Ka kumeno ka wubeketho akece ceke, kud abombi ceke, kud ambili, ku kumira, ku yeronying' de ceke cen,

²calu mukere ma junyolo kawono, dong' ava cak mi tipo ma awondi mbe i ie unegwu, kara wudong kude ni both;

³tek wubilo nia Rwoth e ber;

⁴ma wubino i bang'e, en e kidi ma kwo, ma dhanu kwere andha, ento ku ba Mungu en e ng'atu ma jugoyo wie, ma pire tek de,

⁵wun bende, calu kidi ma kwo, wugombru wi ot mi tipo, kara wubed ni lamulam ma leng', ma wuthiero ko lam mi tipo, ma yire ni Mungu ni kum Yesu Kristu.

⁶Kum maeni ni i lembagora pa Mungu kumae, Nen, aketho i Sayuni kidi ma dit ma wi gul, ma jugoyo wie, ma pire tek: E ng'atu m'uyio ire jubiketho lewic nege ngo.

⁷Ka kumeno pire ma tekne en e iwu wu ju m'uyio: ento ni wagi ju m'uyio ngo re kumae, Kidi ma jugomot gikwero, Eni juketho ni wi gul;

⁸man, Kidi ma redho jo, ku cana mi kier; kum gikier kum lembe, ma gi juco ko; ma yang' jukethogi kum maeno bende.

⁹Ento wun wu thekdhanu ma jugoyo nyingwu, lamulam mi ker, thek ma leng', dhanu mi piny ma dhe pa Mungu, kara wunyuth bero pare m'elwong'owu kud i mudho i der pare ma wang'wic:

¹⁰wun ma naka wu dhanu ngo, ento kawono wu dhanu pa Mungu: wun ma naka fodi wunwang'u kisa ngo, ento kawono wudaru nwang'u kisa.

¹¹Jumer, akwayuwu calu jubedo man juwoth, ya wuceru ni awanya ma rac mi kum, ma kiedo kum ng'eyong'ec;

¹²ma wubedo ko ku piwu ma ber i kind Thekdhanumange; kara, i lembe ma giyero ie nyingwu calu wu judubo, giyung Mungu i ceng' mi lieu, ni kum tic ma ber mu ma gineno.

¹³Wubed wor ni lembang'ola ceke ma dhanu ketho ni kum Rwoth: kadok ni ubimo, calu ng'atu m'usagu;

¹⁴kadi ni jubim, calu m'eoro pi culokwor kum judubo man ni pak ni ju m'utimo dre.

¹⁵Kum yeny ma Mungu yenyo bedo kumeno, nia ku timober wuketh dhanu ma cobo ma jukusegu de uling':

¹⁶calu wubedo agonya, man kud wuketh gony mu ni jambum mir akece, endre calu jurniru pa Mungu.

¹⁷Wuyung dhanu ceke. Wumar umego. Wulwor Mungu. Wuyung ubimo.

¹⁸Jutic, wubed wor ni judongo m'i wiwu ku lwooro ceke; ni jubero ku ju ma bedo yo de kendgi ngo, ento ni ju ma kwiny bende.

¹⁹Kum maeni e yire, tek ng'atu moko ciro can, esendre de ma there mbe, kum pidocwiny ma yo ba Mungu.

²⁰Kum tek wudubo, man judhongowu, wun de wutwio cwinywu i kume, e pak ma nedi ma wunwang'u pire? ento tek, ka wutimo dre, wusendru pire de, wutwio cwinywu de i kume, maeni yire ni Mungu.

²¹Kum jniwong'owu kum lembe nini: kum Kristu bende sendre piwu, m'eweko ko por iwu, kara wniub ba tiende:

²²m'etimo dubo ngo, kadok abombi de junwang'u ngo i dhoge:

²³ma, ka jucaye edwoko wang' cac de ngo; kan esendre, ecimo cim ungo; ento emire gire ni ng'atu m'upoko lembe pwe:

²⁴ma en gire eyeyo dubo mwa i kume wi yen, kara wan, ma watho ni dubo, wabed kwo ni bedopwe; ku goc pare wun wucangu.

²⁵Kum nwang'u wubekiewo calu rombe; ento kawono wudwogo ba Jakwac ku Jalieu mi ng'eyong'ec mu.

1 Petro 3

¹Wu mon bende, kumeno, wubed wor ni cogwu ma dhe; kara, tek jumoko woro lembe ngo, ma gibedo umbe lembe gilok cwinygi kum koth mondgi;

²ma gineno ko kothwu ma leng' ma mi lworu.

³Ma ruko kud ubed ruko ma yo woko mi kiedo yukwic, ku kendo mola ma kwar ma ie ju kidi ma pire tek, kadi ronyo girakenda bende;

⁴endre dong' ebed ng'atu m'ukandre mir adunde, i kendi ma nyothre ngo mi cwiny ma mol ku ma yo de, ma wel pinje dit i wang' Mungu.

⁵Kum con mon ma leng' bende, ma gigeno Mungu, girukri kumeca, ma giworo ko coggi ma dhe:

⁶calu Sara woro Ibrahim, m'elwong'e ko rwoth: ma wun wu nyithindhe kawono tek wutimo dre, ma ndiri moko kuketho wulworo en ungo.

⁷Wu cogmon de, kumeno, wubed ku mon mu calku ng'eyong'ec, ma wumio ko yung ni dhaku, calu ni agulu ma ng'ic ma sagu wu, calu wubedo jucampacu mi bero mi kwo karacelo; kara rwo mu kud ucere.

⁸Aha a, kewu ceke pidoiwu bed calacel, ju ma ngisi nego, ju ma mari calu umego, weg ngisi ma yo i adunde, ju ma pidoigi mol:

⁹ma culo wang' dubo ngo pi dubo, kadi ayany de pir ayany; ento ma tung' wucul mugisa; kum jniwong'owu ni maeni, kara wugam mugisa ni mucumbi.

¹⁰Kum, Ng'atu m'uyenyoy emar kwo, Man enen ceng' ma ber, Dong' ecer lebe ni gin ma rac, Dendhoge de kara ku giyer abombi:

¹¹Dong' elokre ku kum gin ma rac, man etim gin ma ber; Dong' eyeny kwicwiny, elub toke de.

¹²Kum wang' Rwoth ni wi weg bedopwe, Ithe de ni yo ba kwac migi: Ento ni ju m'udubo re Rwoth uketho wang'e i kumgi.

¹³E ng'a ma bitimowu raci, tek wubedo k'amora kum gin ma beri?

¹⁴Ento tek wusendru kum bedopwe, mugisa kwanyuwu: man lworu migi kud unegwu, kadok ang'aba de cwinywu kud ung'abre;

¹⁵ento wudwok Kristu leng' yo i adundewu calu Rwoth: ma wubedo ko ayika thiri thiri ma wudwok ko lembe ni dhanu ceke kubang'gi kubang'gi ma gipenjowu ku thelembe mi genogen ma ni i iwu, ento ku molcwiny man lworu:

¹⁶ma wubedo ko ku pidocwiny ma ber; kara, i maeni ma juyero nyingwu i kume, jubin juketh lewic umak ju ma gicayu kura bedo mu ma ber ma i Kristu.

¹⁷Kum en e ber m'usagu, nia wusendru pi timober sagu ma pi timorac, tek yeny pa Mungu yeny kumeno.

¹⁸Kum Kristu bende sendre kum dubo wang' acel pil, won bedopwe pi weg gondri, kara ekelwa ba Mungu; ma junege i kum, ento judwoke kwo i tipo;

¹⁹i maeni bende eciho eyero ni tipo ma i odkol,

²⁰ma yang' gicamu co, kinde ma mwonyolembe pa Mungu m'emwonyo hai ukuro i ceng' pa Noa, kinde ma jubeyiko avur, ka ma ju ma nok ni ie, thelebene, kwo abora, ma giboth ni kum pi:

²¹m'ubodho wun kawono calkud ayi mandha, en e baputisi, m'iketho cilo m'i kum cen re ngo, ento en e penji mi pidocwiny ma ber yo ba Mungu, ni kum cer pa Yesu Kristu;

²²m'eni yo ku cing' Mungu ma yor acwic, m'edaru cidho i polo; ma juketho malaika ku ng'ol ku tego de bed wor ire.

1 Petro 4

¹Ka kumeno kum Kristu sendre i kum, e wun giwu bende wutwi jambali mi pidoic ma calacel; kum en m'esendre i kum eweko dubo;

²kara ugambre kawono i dong nindo m'udong' kud wukwo i kum kud awanya ma rac mi dhanu, ento ku yeny ma Mungu yeny.

³Kum nindo m'ukadhu romo mi timo yeny mi Thekdhanumange, man ku wotho i tarwang', kud awanya ma rac, ku mer ku pigulok, ku cokri ma ku vul, ku cokri ma wi pigulok, ku lamu ayi gin m'acwia ma judagu:

⁴kum wukuringo wukugi ngo i thwo dubo ma calacel lembene wang'u igi hi, gidong' giyero piwu rac:

⁵ma gibimio wel ni ng'atu m'ubedo ayika mi poko lembe mi ju ma kwo ku ju m'utho bende.

⁶Kum pi lembe maeni yang' juyero lembanyong'a ma juboth ko cil ni ju m'utho de, kara jubin jupok lembe migi andha calku dhanu m'i kum, endre gibed kwo calku Mungu i tipo.

⁷Ento kajik mi gin ceke dhingo ceng'ni: ka kumeno wubed ku pidoiwu ma cu, wubed nger de ni rwo ni Mungu:

⁸ma sagu gin ceke wumeru i kindwu kud amora; kum mer umo udul dubo:

⁹ma wugwokru ko ma ng'ur umbe:

¹⁰calu ku ba dhanu ng'atuman ujolo girarnia, ma wutim ko i kindwu giwu, calu jukurpiny ma ber mi bero pa Mungu ma kwonde tung' tung';

- ¹¹tek ng'atu moko yero, eyer calu en e wec pa Mungu; tek ng'atu moko timo, etim calu mi tego ma Mungu mio: kara juyung Mungu i gin ceke ni kum Yesu Kristu, ma dwong' ku kero ubedo pare rondo ku rondo. Amen.
- ¹²Jumer, iwu kud uwang' kum muloic ma calu mac ma ni i kindwu, m'ubino i beng'wu, nimulo iwu, calu nia gin moko ma tung' utimbre i kumwu:
- ¹³ento kum wu jurib mi sendri pa Kristu, anyong'a negwu; kara i nyuth mi dwong' pare bende anyong'a negwu kud anyong'a ma dit apila.
- ¹⁴Tek jucayuwu kum nying' Kristu, mugisa kwanyuwu; kum Tipo mi dwong' ku Tipo pa Mungu ebedo i wiwu.
- ¹⁵Kum ng'atu moko m'i kindwu kud usendre kum en e janek, kadi jakwo, kadi jatim rac, kadi kum erodhre i lembe mi dhanu mange:
- ¹⁶ento tek ng'atu moko besendre kum en e Jakristu, lewic kud unege; ento dong' eyung Mungu nying' maeni.
- ¹⁷Kum nindo wok ma lembapoka thekre ie i ot pa Mungu: man tek elar ethekre i bang'wa, kajik mi ju m'uworo lembanyong'a ma juboth ko pa Mungu ngo ke bibedo nenedi?
- ¹⁸Man tek weg bedopwe giboth arida, e ng'atu ma ayi Mungu mbe i kume ku jadubo de gibinen kani?
- ¹⁹Kum kumeno dong' ju m'usendri bende calku yeny ma Mungu yeny giketh ng'eyong'ec migi i timober ni Jacwic mandha.

1 Petro 5

- ¹Ka kumeno ajuko judongo m'i kindwu, ma an de a jadit wedwu, man jamulembe mi sendri pa Kristu, ma an bende a jarib mi dwong' ma binyuthre:
- ²Wukwai udul pa Mungu ma ni i kindwu, wunen wigi de, ma jukucukowu acuka ngo, ento ni kum avane m'unegowu, calku yeny ma Mungu yeny; kadi kum kuloka ma rac de ngo, endre ku pidoic ma yot;
- ³kadi kud wurwodh arwodha wi ju ma jukethowu i wigi, endre wukethru ni por ni udul.
- ⁴E ka Jakwac ma dit binyuthie, wubigamu jamkermiwic mi dwong' ma duny woko ngo.
- ⁵Wu ju ma nok bende, kumeno, wubed wor ni judongo mu. Eyo, kewu ceke wuronjrn ku molcwiny, ma wutim ko ni juwedwu ng'atuman ni wadi man ni wadi: kum Mungu jul kum jukuhaya, ento emio bero ni ju ma mol.
- ⁶Ka kumeno wujwigrn the cing' Mungu ma tek, kara edodwu ka kakare tundo;
- ⁷ma wubol ko adieng'a cwinywu ceke i wie, kum ie bepido piwu.

⁸Wubed nger, wuki de; jakwojwu ma wonabali, calu umvor m'ubeywak, ubewotho ku ku ku, m'ebeyenyo ko ka ng'atu m'ecam:

⁹wujul ni ng'atuca ma wubed ko tek i yioyic mu, ma wung'eyo ko nia sendri ma calcal timbre ni juwedwu ma gini i ng'om.

¹⁰Man Mungu mi bero ceke, m'elwong'owu ni dwong' pare ma nja i Kristu, ka wudaru sendru nyanok, en ku kite ebidwokowu cu ma ndhu, ebiketho wunyang' de, ebiketho wudoko tek.

¹¹Kero bed ire rondo ku rondo. Amen.

¹²Agoro iwu ku lembe ma nyanok, aoro ku cing' Siluano, m'umegwa mandha, calu akwane abejuko man abetuco nia maeni en e bero mandha pa Mungu: wucung ki i ie.

¹³Ng'atu ma jugoyo nyinge wukugi, ma ni i Babeli, umothowu; ku Marko ma woda bende.

¹⁴Wumothru ku cwic mi mer. Kwiocwiny ubed i beng'wu ceke wu ju ma wuni i Kristu.

2 Petro

2 Petro 1

- ¹Simon Petro, jarniru man jakwenda pa Yesu Kristu, ni ju ma ginwang'u yioyic ma calacel ma pire tek karacelo kudwa i bedopwe pa Mungu mwa man Jalar Yesu Kristu:
- ²Bero iwu man kwiocwiny umedre iwu i ng'eyong'ec pa Mungu man pa Yesu Rwoth mwa.
- ³Kum tego pare mi Rucwic umio iwa gin ceke ma mi kwo ku bedo ma ayi Mungu ni kume, ni kum ng'eyong'ec pa Mungu m'ulwong'owa ni kum dwong' pare gire man bero;
- ⁴kum maeni emio iwa lembang'ola pare ma pire tek ma dwong' apila de; kara ni kum maeni wudok jurib mi kura Rucwic, ma wudaru both ni nyoth ma ni i ng'om ni kum awanya ma rac.
- ⁵Eyo, kum lembe maeni nini ma wumedo ko yor i beng'wu amora ceke, i yioyic mu wumed bero; man i bero mu ng'eyong'ec;
- ⁶i ng'eyong'ec mu ke kwerigijo; i kwerigijo mu ke twiocwiny; i twiocwiny mu ke bedo ma ayi Mungu ni i kume;
- ⁷i bedo ma ayi Mungu ni kume mu ke mer mi juwadijo; man i mer mu rni juwadijo ke mer.
- ⁸Kum tek gin maeni gi mu man gisagri, gibidwokowu ni nyap ungo kadi ma nia wukucego nyingwu ngo i ng'eyong'ec pa Rwoth mwa Yesu Kristu.
- ⁹Kum ng'atu ma gin maeni mbe kude en e abinga, m'eneno ko gin ma ceng'ni kende, ma wie wil kum lwok mi dubo pare ma con.
- ¹⁰Kum kumeno, umego, wutim kud amora m'usagu kara wuketh lwong'o mu ku goyo nyingwu cung tek: kum tek wutimo gin maeni, wubikier ki ngo:
- ¹¹kum kumeno jubimio iwu thwo mondo m'i ker ma nja pa Rwoth mwa ma Jalar Yesu Kristu.
- ¹²Kum kumeno abibedo ayika thiri thiri kara apoiwu pi gin maeni, kadok wung'eyogi, wucungo de i lemandha ma wubedo ko.
- ¹³Man ebedo ber ira, ma fodi ani i hema maeni, ya ayau kumwu apoi kowu;
- ¹⁴m'ang'eyo ko wanyu hema para bebino fodi nyanok, cil calu Rwoth mwa Yesu Kristu nyutho ira.
- ¹⁵Eyo, abitimo kud amora kara ku ba nindo ceke wucopo poi kum gin maeni yo ng'ei tho para.

¹⁶Kum wakulubo lembuda ngo ma jutheko ku rieko, ka waketho wung'ei tego ku bino pa Rwoth mwa Yesu Kristu, ento wan wa jumulembe ma ku wang' mi dwong' pare.

¹⁷Kum egamu ba Mungu ma Wego yung ku dwong', ka dwal ma kumeni wok i bang'e m'uai i Dwong' Madit kumae, Maeni Woda ma jamerna. ma mutoro nega i kume:

¹⁸man dwal maeni wan de wawinjo m'eai i polo. nwang'u wani kugi wi got ma leng'.

¹⁹Man wabedo ku lembila ma judwoko tek ma sagu; ka kumeno wutimo dre kum wuketho cwinywu kum lembene, calu ni thala m'uberieny i ka ma col, rama piny ru ko, man cerojobi wok i adundewu:

²⁰ma wular wung'eyo ko lembe maeni, nia lembila mi lembagora pa Mungu moko mbe ma copo loko calu ng'atu moko yenyo en gire.

²¹Kum lembila moko mbe ma fodubino ku yeny ma dhanu yenyo: ento dhanu yero lembe m'uai ba Mungu, ma Tipo Maleng' ucung'o kogi en.

2 Petro 2

¹Ento jubila mi ndra bende wok i kind dhanu, calu i kindwu bende juponji mi ndra bibedo nuti, ma gibikelo ponji mi ndra mi nyoth nyalwe, ma gikwero ko cil Rwoth m'ung'iewogi, ma gikelo ko nyoth pio i wigi gigi.

²Dhanu dupa de bilubo tok tim migi mi tarwang'; kum joni yo mi lemandha jubiyero pire rac.

³I kethocwiny ma giketho hai kum piny gibitimo i kumwu ku lembabombi kara ginwang' kuloka: ma pokolembe migi gambre con ugalu ngo, nyoth migi de nindo ngo.

⁴Kum tek Mungu weko malaika m'udubo ngo, ento ebologi i gehena, man ekethogi i vur mi mudho, ma jugwoko kogi cil ni pokolembe;

⁵man eweko ng'om ma con de ngo, ento egwoko Noa, m'e jayer mi bedopwe ku juabiro mange, kan ekelo pi ma dit m'uumo ng'om wi ju ma ayi Mungu mbe i kumgi;

⁶man ku loko adhura Sodom ku Gomora ni vuru, epoko lembe rac i wigi ku nyoth m'enyotho kogi, m'edwoko kogi ni por ni ju ma gibedo ma ayi Mungu mbe i kumgi;

⁷man ebodho Lot ma pwe, ma can unege dit kum bedo mi tarwang' mi judubo

⁸(kum ng'atu maeni ma pwe m'ebedo i kindgi, i neno ku winjo de, esendo ng'eyong'ec pare ma pwe ceng' ku ceng' ku tic migi ma cik uyio ngo):

- ⁹Rwoth ung'eyo maram elar ko ju ma ayi Mungu ni i kumgi ku i abidhe, m'egwok ko weg gondri de the masendi mi cing' pokolembe;
- ¹⁰ento ma sagu ju m'ulubo tok kum i awanya ma rac mir acidi, man m'ucayu kero. Ju ma wigi tek, m'udhuko, ma lworu cayu weg dwong' negogi ngo:
- ¹¹ento malaika, kadok gi dwong' ma sagu i tek ku tego, gikelo lembadote mi cac ungo i kumgi i wang' Rwoth.
- ¹²Ento joni calu giracwia pa Mungu ma rieko mbe kugi, ma junyologi yedi kende, ya jumak junyoth de, ma gicayu cac i lembe ma gikung'eyo there ngo, i nyoth migi gibinyothri andha,
- ¹³ma gisendri ko ku lem ma rac calu sukulia rni timorac; gi dhanu ma gikwanu cokri ku vul ma ku dieceng' ni mutoro, gi gin m'ucwinyo man mulima, ma gimer amera kud abombi migi i cemo migi mi mer ka wucamu wukugi;
- ¹⁴ma gieri kwa e m'upong'o wang'gi, ma gikucop ceri ngo ni dubo; ma gibidho ng'eyong'ec m'ucungo tek ungo; ma adundegi pido ru pi kethocwiny kum piny kwa; nyithindho mi kwong';
- ¹⁵ma giweko ko yo ma atira gikiewo, ma gikwanyu ko yo pa Balam wod Bosor, m'umaru sukulia mi timorac;
- ¹⁶ento jujuke kum dubo pare gire: kana m'ajuba weco ku dwand dhanu man eceru abelu pa jabila.
- ¹⁷Maeni kulo m'umbe pi, afuru m'uyerni ku wavuvu; ma jukanu igi col mi mudho.
- ¹⁸Kum, ma gibeweco thwo lembe m'uyenyo ma kite mbe, gibidho ju m'umaku ringo ju m'ubedo i kier kud awanya ma rac mi kum ni kum tarwang';
- ¹⁹ma ging'olo ko igi gony, kinde ma gin gigi gi jumiru mi nyoth; kum tek lembe voyo ng'atu moko, ebedo ni jamiru i lembene bende.
- ²⁰Kum tek, yo ng'ei both ni gin m'ucido m'i ng'om ni kum ng'eyong'ec pa Rwoth ku Jalar Yesu Kristu, ka gigapri i ie kendo man juvoyogi, bedo migi macen doko rac ma sagu ma kwong'a.
- ²¹Kum e ber igi ma sagu tek fodi gikung'eyo yo mi bedopwe ngo, ma tek, yo ng'ei ng'eye gidok cen kum leembang'ola ma leng' m'umire igi.
- ²²Etimbre igi calku lembabola mandha kumae, Gwok udok kendo ba ng'ok pare gire, min kul de m'ujom udok ninyambre i unzabu.

2 Petro 3

- ¹Jumer, maeni waraga mir arionde m'agoro iwu; i gin ario de ayau pidoiwu ma leng' ku ketho wupoi;

²kara wupoi kum lembe ma jubila maleng' ular uyero, ku lembang'ola pa Rwoth Jalar ni kum jukwenda mu:

³ma wung'eyo ko maeni, nia jucac gibibino ku cac i acokaceng', ma gibelubo tok awanya rnigi ma rac,

⁴ma giwacu de kumae, Lembang'ola mi bino pare nikani? kum, ugambre i ceng' ma kwaruwa gamu nindo i ie, gin ceke bedo calu ma yang' ugambre i thangambere mi giracwia pa Mungu.

⁵Kum wigi wil kum lembe nini aka, nia polo nuti ugambre con, ng'om de moko yo ng'ei pi man i pi, ni kum lembe pa Mungu;

⁶ni kum maeno ng'om ma nwang'u nuti umwony ku pi, enyothie;

⁷ento polo ma nuti kawono, ku ng'om de, jukanugi ni mac ni kum lembe ma calacel, jugwoko ni ceng' mi pokolembes man nyoth mi dhanu ma ayi Mungu mbe i kungi.

⁸Ento, jumer, wiwu kud uwil kum lembe acel maeni, nia ku ba Rwoth ceng' acel calu rundi rubanga, man rundi rnbanga calu ceng' acel.

⁹Rwoth galu ngo kum lembang'ola pare, calu jumoko kwanu galu; ento emwonyo lembe hai iwu, kum eyenyo ngo nia ng'atu moko rwiny, ento nia dhanu ceke gitund ba lokocwiny.

¹⁰Ento ceng' pa Rwoth bibino calu jakwo; ceng' nica polo bikadhu woko ku bamor ma dit, man giki m'i ie de biloi ni lietho mac ma wanga wanga, ng'om de ku tic ma ni ie biwang' pet.

¹¹Kum giki maeni biloi ceke kumeni, maku wubed dhanu ma kothwu nenedi? ku bedo ceke ma leng' man bedo ma ayi Mungu ni i kume,

¹²ma wuki kud ava ma dit bino mi ceng' pa Mungu, ma ni kum maeno polo ma mac ubewang'e biloi, giki ma ni ie de biloi ku lietho mac ma wanga wanga?

¹³Ento, calku lembang'ola pare, wabekio polo ma nyen ku ng'om ma nyen, ma bedopwe bedo i ie.

¹⁴Kum kumeno, jumer, kum wukio gin maeni, tim kud amora kara jubin junwang'wu ma cwinywu kwio, ma poyo mbe lembe de mbe i wiwu i wang'e.

¹⁵Man wukwan nia mwonyolembes ma Rwoth mwa mwonyo hai en e both; cil calu umegwa ma jamer Paolo bende, calku rieko m'umire ire, ugoro iwu;

¹⁶calu i waraga pare ceke bende, m'ebeweco i igi pi giki maeni; ma gin moko de nuti i igi ma ng'eyo there tek, ma ju ma cobo ku ju m'ucungo tek ungo giloke tung', calu giloko lembagora mange pa Mungu bende, ni nyoth migi gigi.

¹⁷Ka kumeno, jumer, wun ma wular wung'eyo gin maeni, wukuru, kara kier rni dubo kud uwingwu, wupodh de ku kum cungo tek mu.

¹⁸Ento wudong i bero ku ng'eyong'ec pa Rwoth mwa man Jalar Yesu Kristu. Dwong' ubed ire kawono man rondo ku rondo. Amen.

1 Yohana

1 Yohana 1

¹Maeno ma nuti ugambre ku kwong'a, maeno ma wawinjo, maeno ma waneno ku wang'wa, maeno ma waneno tel, ma cingwa de mulo, pi Lembe mi kwo ²(kwone de nyuthie, e wadaru neno, wanyutho lembe de, wayero iwu de pi kwo, kwo ma rondo ku rondo, m'ubedo ku Wego, man enyuthre iwa de);

³maeno ma waneno ma wawinjo de wayero iwu bende, kara wun bende wubed ku ripocwiny wakudu: eyo, man ripocwiny mwa ni karacelo ku Wego, man ku Wode Yesu Kristu;

⁴e wagoro gin maeni kara anyong'a mwa pong'.

⁵Maeni en e rwonglembe ma wawinjo i bang'e man wayero iwu de, nia Mungu en e der, man mudho tak de mbe i ie.

⁶Tek wawacu nia wabedo ku ripocwiny wakude enke wawotho i mudho, nwang'u wacwayu ndra, watimo lemandha de ngo:

⁷ento tek wawotho i der, calu en eni i der, nwang'u wabedo ku ripocwiny ma man ku wadi man ku wadi, man rimb Yesu ma Wode ubelonyowa ni dubo ceke.

⁸Tek wawacu nia dubo mbe kudwa, nwang'u wawondra giwa, lemandha de mbe i iwa.

⁹Tek watuco dubo mwa, en e mandha man pwe mi weko dubo mwa, mi lonyowa de ni gondri ceke.

¹⁰Tek wawacu nia wadubo ngo, nwang'u wadwoke ni jandra, lem pare de mbe i iwa.

1 Yohana 2

¹Nyithindho para ma thindho, agoro iwu lembe maeni kara kud wudubi. Man tek ng'atu moko dubo, wabedo ku Jakwai ba Wego, Yesu Kristu ma won bedopwe:

²man en e lam mi dubo mwa: mi mwa kende ngo, ento mi ng'om ngung' bende.

³Man kum maeni wang'eyo nia wang'eye, tek waworo cik pare.

⁴Ng'atu m'uwacu kumae, Ang'eye, enke eworo cik pare ngo, en e jandra, man lemandha mbe i ie:

⁵ento ng'atu m'uworo lem pare, mer pa Mungu doko ndhu cu i ie andha. Ku maeni wang'eyo nia wani i ie:

⁶ng'atu m'uwacu nia ebedo i ie maku en gire bende ewoth cil calu en de ewotho.

⁷Jumer, agoro iwu cik ma nyen ungo, ento cik ma con ma wubedo ko ugambre ku kwong'a: cik ma con en e lembe ma wuwino.

- ⁸Kendo, agoro iwu cik ma nyen, ma ginde andha i ie man i iwu; kum mudho bekadhu woko, der mandha de berieny kawono.
- ⁹Ng'atu m'uwacu nia eni i der enke edagu umin, nwang'u eni i mudho cil ku kawono de.
- ¹⁰Ng'atu m'umaru umin bedo i der, lembe moko de mbe i ie ma ketho jukier.
- ¹¹Ento ng'atu m'udagu umin eni i mudho, ewotho de i mudho, eng'eyo de ngo ka m'acidho i ie, kum mudho cido wang'e.
- ¹²Agoro iwu, nyithindho para ma thindho, kum dubo mu wekre iwu kum nyinge.
- ¹³Agoro iwu, wego, kum wung'eyo ng'atu ma nuti ugambre ku kwong'a. Agoro iwu, awobi, kum wuloyo ng'atu ma rac. Agoro iwu, nyithindho ma thindho, kum wung'eyo Wego.
- ¹⁴Agoro iwu, wego, kum wung'eyo ng'atu ma nuti ugambre ku kwong'a. Agoro iwu, awobi, kum wubedo tek, lembe pa Mungu de bedo i iwu, man wuloyo ng'atu ma rac.
- ¹⁵Kud wumar ng'om, kadok gin ma ni i ng'om. Tek ng'atu moko maru ng'om, nwang'u mer pa Mungu mbe i ie.
- ¹⁶Kum ceke ma ni i ng'om, awanya ma rac mi kum kud awanya ma rac mi wang' kud ayunga mi kwo maeni, en e pa Wego ngo, ento en e mi ng'om.
- ¹⁷Man ng'om ubekadhu woko kud awanya ma racne de: ento ng'atu m'utimo yeny ma Mungu yeny bedo rondo ku rondo.
- ¹⁸Nyithindho ma thindho, maeni en e acoka saa: man calu wuwinjo nia japiem Kristu bebino, e kawono jupiem Kristu dupa daru wok; kum maeni wang'eyo nia en e acoka saa.
- ¹⁹Giai i kindwa, ento gi mwa ngo; kum tek gi mwa, kuno di gidong' i bang'wa: ento giai, kara ginyuthri nia gi mwa ceke ngo.
- ²⁰Man wubedo ku wir m'uai ba Ng'atu Maleng', e wung'eyo gin ceke.
- ²¹Agoro iwu ngo nia kum wung'eyo lemandha ngo ento kum wung'eyo, man kum ndra mbe i lemandha.
- ²²Ng'a ma jandra ndhu ng'atu m'ukwero nia Yesu en e Kristu ngo ngo? Maeni en e japiem Kristu, ng'atu m'ukwero Wego ku Wod.
- ²³Ng'atu ma tek ukwero Wod ng'atuca bedo ku Wego ngo: ng'atu m'utuco Wod, ebedo ku Wego bende.
- ²⁴Ento wun re, wuwek maeno ma wuwinjo ugambre ku kwong'a bed i iwu. Tek maeno ma wuwinjo ugambre ku kwong'a bedo i iwu, wun bende wubibedo i Wod, man i Wego.

²⁵Maeni lembang'ola m'eng'olo iwa, cil kwo ma rondo ku rondo.

²⁶Gin maeni agoro iwu pi ju m'uyenyo gitel wiwu ariri swa.

²⁷Ento wun re, wir ma wujolo i bang'e bedo i iwu, man can ponji ma nia ng'atu moko ponj kowu negowu ngo; ento calu wir pare ponjowu pi gin ceke, man en e andha, en e ndra de ngo, man cil calu eponjowu, wubed i ie.

²⁸Kawono, nyithindho para ma thindho, wubed i ie; kara, tek ebinyuthre, wabed ku tegocwiny, man lewic kud unegwa i wang'e i bino pare.

²⁹Tek wung'eyo nia ebedo pwe, wung'eyo nia ku ba dhanu bende m'utimo bedopwe enyologi en.

1 Yohana 3

¹Wunen maram mer ma Wego maru kowa bedo ko m'emio iwa, ketho julwong'owa nyithindho pa Mungu; wabedo kumeno de. Kum lembe nini ng'om ung'eyowa ngo, kum eng'eye ngo.

²Jumer, kawono wa nyithindho pa Mungu, endre fodi enyuthre ngo nia wabibedo ni ang'o. Wang'eyo nia, tek ebinyuthie, wabibedo kalkude; kum wabinene cli calu ebedo.

³Man ku ba dhanu ceke m'ubedo ku genogen maeni i bang'e edwokre leng' gire, cil calu en e leng'.

⁴Ku ba dhanu ceke ma timo dubo etimo co bende; dubo de en e camuco.

⁵Man wang'eyo nia enyuthre kara ekab dubo woko; man dubo mbe i ie.

⁶Ng'atu ma tek ubedo i ie dubo ngo: ng'atu ma tek udubo meca nwang'u enene ngo, kadok ang'eya de eng'eye ngo.

⁷Nyithindho para ma thindho, kud wuyi ng'atu moko tel wiwu ariri swa; ng'atu ma timo bedopwe nwang'u ebedo pwe, cil calu en ebedo pwe:

⁸ng'atu ma timo dubo en e pa wonabali; kum wonabali dubo ugambre ku kwong'a. Kum lembe maeni Wod Mungu nyuthie, kara enyoth tic pa wonabali.

⁹Ng'atu ma tek Mungu nyole timo dubo ngo, kum kodhi pare bedo i ie: man ecopo dubo ngo, kum Mungu nyole.

¹⁰I maeni nyithindho pa Mungu nyuthii, man nyithindho pa wonabali: ng'atu ma tek timo bedopwe ngo nwang'u en e pa Mungu ngo, kadok ng'atu m'umaru umin ungo bende.

¹¹Kum maeni en e rwonglembe ma wawinjo ugambre ku kwong'a, nia dong' wamara:

¹²calu Kain ungo ma en e pa ng'atu ma rac, man enego umin. Man enege mir ang'o? Kum tic pare bedo rac, p'umin e m'ubedo pwe.

- ¹³Iwu kud uwang' lii, umego, tek ng'om udaguwu.
- ¹⁴Wang'eyo nia waai i tho wamondo i kwo, kum wamaru umego. Ng'atu m'umaru ngo bedo i tho.
- ¹⁵Ng'atu ma tek udagu umin nwang'u en e janek: man wang'eyo nia janek umbe ma bedo ku kwo ma rondo ku rondo i ie.
- ¹⁶Kum kumeni wang'eyo mer, kum emio kwo pare piwa: e maku wan bende wami kwo mwa pir umego.
- ¹⁷Ento ng'atu m'ubedo ku piny m'i ng'om. man eneno can piny unego umin. man eceru ngisi pare ue, mer pa Mungu bedo i ie nenedi?
- ¹⁸Nyithindho para ma thindho, ku wamar ku lembe, kadok ku dhok; endre ku tic man lemandha.
- ¹⁹Kum maeni wabing'eyo nia wan wa mi lemandha, man wabiketho adundewa kwio i wang'e:
- ²⁰kum tek adundewa poko lembe i wiwa rac, Mungu dwong' ma sagu adundewa, man eng'eyo gin ceke.
- ²¹Jumer, tek adundewa poko lembe i wiwa rac ungo, nwang'u wabedo ku tegocwiny yo ba Mungu;
- ²²man gin ma tek wakwayu wagamu i bang'e, kum waworo cik pare watimo de gin ma nyayu mutoro i wang'e.
- ²³Maeni de cik pare, nia wayi nying Wode Yesu Kristu, man wamara cil calu emio iwa cik.
- ²⁴Man ng'atu m'uwooro cik pare bedo i ie, en de ebedo i ie. Ku maeni de wang'eyo nia ebedo i iwa, ni kum Tipo m'emio iwa.

1 Yohana 4

- ¹Jumer, kud wuyi tipo ceke, ento wuponj tipo, tek giai ba Mungu, kum jubila mi ndra dupa cidho nge nge i ng'om.
- ²Kum kumeni waug'eyo Tipo pa Mungu: ku ba tipo ceke ma tuco nia Yesu Kristu daru bino i kum nwang'u en e pa Mungu:
- ³man ku ba tipo ceke ma tuco Yesu ngo nwang'u en e pa Mungu ngo: man maeni en e tipo japiem Kristu, ma wuwinjo pire nia ebebino; e kawono edaru wok i ng'om.
- ⁴Wun wu pa Mungu, nyithindho para ma thindho, man wuloyogi: kum ng'atu ma ni i iwu e dit ma sagu ng'atu ma ni i ng'om.
- ⁵Gin gi mi ng'om: kum kumeuo giyero calu mi ng'om, ng'om de winjog.

⁶Wan wa pa Mungu: ng'atu m'ung'eyo Mungu winjowa; ng'atu ma pa Mungu ngo winjowa ngo. Kum maeni wang'eyo tipo mi lemandha, ku tipo mi kier.

⁷Jumer, dong' wamara, kum mer en e pa Mungu; man ku ba dhanu ceke ma mer nwang'u Mungu nyole, man eng'eyo Mungu.

⁸Ng'atu ma mer ungo nwang'u eng'eyo Mungu ngo; kum Mungu en e mer.

⁹I maeni mer pa Mungu nyuthre iwa, nia Mungu oro Wode kulong' i ng'om kara wabed kwo ni kume.

¹⁰I maeni mer ungo, nia wamaru Mungu, ento nia emaruwa, eoro wode de bed ni lam mi dubo mwa.

¹¹Jumer, tek Mungu maruwa kumeno. maku wan bende wamara.

¹²Ng'atu moko mbe ma foduneno Mungu nindo moko: tek wamara, nwang'u Mungu bedo i iwa. man mer pare doko ndhu cu i iwa:

¹³ku maeni wang'eyo nia wabedo i ie en ke i iwa, kum emio iwa kum Tipo pare.

¹⁴E waneno man wanyutho lembe de nia Wego oro Wod ubed ni Jalar mi ng'om.

¹⁵Ng'atu ma tek bituco nia Yesu en e Wod Mungu, nwang'u Mungu bedo i ie, en de i Mungu.

¹⁶E wang'eyo wayio de mer ma Mungu bedo ko yor i bang'wa. Mungu en e mer; man ng'atu m'ubedo i mer nwang'u ebedo i Mungu, man Mungu de bedo i ie.

¹⁷I maeni mer udoko ndhu cu i bang'wa, kara wabed ku tegocwiny i ceng' pokolembe; kum calu ebedo, cil wan bende wabedo kumeno i ng'ombuni.

¹⁸Lworo mbe i mer: ento mer ma ndhu cu riemo lworo woko, kum lworo bedo ku masendi; man ng'atu ma lworo nege nwang'u edoko ndhu cu ngo i mer.

¹⁹Wamaru, kum elar emaruwa.

²⁰Tek ng'atu moko wacu kumae, Amaru Mungu, ma en ke edagu umiu, nwang'u en e jandra: kum ng'atu m'umaru umin ungo m'enenno, ecopo maru Mungu ngo m'enenno ngo.

²¹E cik maeni ma wabedo ko ai i bang'e, nia ng'atu m'umaru Mungu dong' emar umin bende.

1 Yohana 5

¹Ng'atu ma tek uyio nia Yesu en e Kristu nwang'u Mungu nyole: man ng'atu ma tek umaru janyodo nwang'u emaru ng'atu m'euyolo bende.

²Kum maeni wang'eyo nia wamaru nyithindho pa Mungu, ka wamaru Mungu watimo cik pare de.

³Kum maeni en e mer pa Mungu, nia wawor cik pare: man cik pare gi pek ungo.

- ⁴Kum gin ma tek Mungu nyolo eloyo ng'om: man maeni en e aloci m'uloyo ng'om, en e yioyic mwa.
- ⁵En e ng'a m'uloyo ng'om, ndhu ng'atu m'uyio nia Yesu en e Wod Mungu ngo?
- ⁶Maeni ng'atu m'ubino ku pi man rimo, ndhu Yesu Kristu; ku pi kende ngo, ento ku pi ku rimo de.
- ⁷Man en e Tipo ma nyutho lembe, kum Tipo en e lemandha.
- ⁸Kum juadek nuti ma ginyutho lembe, en e Tipo, man pi, man rimo: man adek maeni giribri i acel.
- ⁹Tek wajolo lembanyutha mi dhanu, lembanyutha pa Mungu dit m'usagu: kum lembanyutha pa Mungu e eni, nia enyutho lembe pi Wode.
- ¹⁰Ng'atu m'uyio ni Wod Mungu ebedo ku lembanyutha i ie: ng'atu m'uyio Mungu ngo eketho ebedo jandra; kum eyio lembanyutha ngo ma Mungu nyutho pi Wode.
- ¹¹Man lembanyutha e eni, nia Mungu mio kwo ma rondo ku rondo iwa, kwo maeni de ni i Wode.
- ¹²Ng'atu m'ubedo ku Wod ebedo ku kwo; ng'atu m'ubedo ku Wod Mungu ngo nwang'u kwo mbe kude.
- ¹³Agoro iwu gin maeni, kara wung'ei nia wubedo ku kwo ma rondo ku rondo, wu ju ma wuyio nying Wod Mungu.
- ¹⁴Man maeni tegocwiny ma wabedo ko yor i bang'e, nia, tek wakwayu gin moko calku yeny ma ie yeny, ewinjowa:
- ¹⁵man tek wang'eyo nia ewinjowa pi gin ma tek wakwayu, wang'eyo nia wabedo ku kwac ma wakwayu i bang'e.
- ¹⁶Tek ng'atu moko neno umin ubedubo dubo ma mi tho ngo, ebikwayu, man Mungu bimio ire kwo pi ju m'udubo ma mi tho ngo. Dubo nuti ma mi tho: awacu ngo nia ekwai pi maeni.
- ¹⁷Gondri ceke ci en e dubo: dubo nuti ma mi tho ngo.
- ¹⁸Wang'eyo nia ng'atu ma tek Mungu nyole dubo ngo; ento ng'atu ma Mungu nyole gwokre gire, e ng'atu ma rac mulo kume de ngo.
- ¹⁹Wang'eyo nia wa pa Mungu, man ng'om ngung' de vuto i ng'atu ma rac.
- ²⁰Wang'eyo de nia Wod Mungu bino, emio iwa ng'eyong'ec de, kara wang'ei ng'atu ma en e mandha, wabedo de i ng'atu ma en e mandha, ndhu i Wode Yesu Kristu. Maeni Mungu mandha, ku kwo ma rondo ku rondo.
- ²¹Nyithindho para ma thindho, wugwokru giwu ni ayi gin m'acwia.

2 Yohana

2 Yohana 1

- ¹Jadit ni dhaku ma jugoyo wie ku nyithindhe bende, m'amaru i lembe mandha; man an a kenda ngo, endre ku dhanu ceke ma ging'eyo lembe mandha bende;
- ²ni kum lembe mandha nini m'ubedo i iwa, man ebibedo i bang'wa nja:
- ³Bero, ku kisa, ku kwiocwiny bibedo i bang'wa, m'uai ba Mungu ma Wego, man Yesu Kristu, ma Wod Wego, i lemandha ku mer de.
- ⁴Anyong'a nega dit kum anwang'u nyithindho peri moko ubewotho ku lemandha, cil calu wajolo cik m'uai ba Wego.
- ⁵E kawono akwei, dhaku, calu ya agoro iri cik ma nyen ungo, ento maeno ma wabedo ko ku kwong'a, ya wamara.
- ⁶Man merne e eni, ya wawoth calku cik pare. Cikne e eni, cil calu ma wuwinjo ku kwong'a, ya wuwoth i ie.
- ⁷Kum weg awondi dupa giwok gimondo i ng'om, ndhu ju ma gituco ngo nia Yesu Kristu bino ku kum. Maeni en e jawondi man japiem Kristu.
- ⁸Dong' wubed ku weng'wu i kumwu giwu, kara kud wurwiny gin ma watimo, endre wunwang' sukulia m'ubedo dho.
- ⁹Ng'atu ma tek jawipiro ma en ke eni i ponji pa Kristu ngo, nwang'u Mungu mbe kude: ng'atu ma ni i ponji nini, e ng'atuni e m'ubedo ku Wego man Wod bende.
- ¹⁰Tek ng'atu moko bino i beng'i, ma k'ekelo ponji maeni ngo, kud ijole i ot peri, man kud imothe de:
- ¹¹kum ng'atu m'umotho nwang'u giribri gikude i tic ma rac pare.
- ¹²Kum abedo ku gin dupa m'agor iri, ayenyo ngo agor ku waraga man vino: ento ageno ya abibino i beng'i, kara ayer ma wanendra ku wang'wa, kara mutoro mu urom kakare.
- ¹³Nyithindho pa nyameru ma jugoyo wie gimothi.

3 Yohana

3 Yohana 1

- 1**Jadit ni Gayo ma jamer, m'amaru i lemandha.
- 2**Jamer, akwayu nia gin ceke bed miero iri man kumi de bed leng', cil calu ng'eyong'ec peri de bedo miero.
- 3**Kum anyong'a nega dit, kinde ma umego gibino ginyutho lemandha peri, cil calu ibewotho i lemandha.
- 4**Mutoro mange mbe i bang'a ma sagu maeni, ni lembe mi nyithindho para m'awinjo gibewotho i lemandha.
- 5**Jamer, itimo tic mandha ku ba tic ceke m'itimo ni ju ma gin umego man welo bende;
- 6**ma ginyutho mer peri i wang' kanisa: m'ibitimo ber tek ibiyiko woth migi calu eromo ku Mungu:
- 7**kum giwok woko ni kum Nying' nino, ma gigamu gin moko ngo ba Thekdhanumange.
- 8**Ka kumeno maku wajol wagi ju ma kumeno, kara wabed jutic karacelo pi lemandha.
- 9**Agoro lembe moko ni kanisa: endre Diotrefe, m'uyenyo ebed jawipiro, i kindgi de, ebejolowa ngo.
- 10**Ka kumeno, tek abino, abipoi kum tic pare m'etimo, m'ebeyero ko lembe ma rac i kumwa: man cwinye cungo kum maeni ngo, kadi en ku kite de ejolo umego ngo, man ju ma giyenyo de ekwerogi man ewodhogi woko kud i kanisa.
- 11**Jamer kud ikwany ba gin ma rac, endre ikwany ba gin ma ber. Ng'atu m'utimo ber en e pa Mungu: ng'atu m'utimo rac nwang'u fodi eneno Mungu ngo.
- 12**Demetrio bedo ku giranyutha mi dhanu ceke, ku mi lemandhane de: eyo, wan bende wanyutho; man in de ing'eyo nia lembe ma wanyutho en e andha.
- 13**Nwang'u abedo ku lembe dupa m'agor iri endre ayenyo ngo nik agor iri ku vino man kalamu mi vino:
- 14**ento ageno ya fodi nyanok abineni, man wabiweco ma wanendra ku wang'wa.
- 15**Dong' ibed ma cwinyi kwi. Jurimo gimothi. Moth jurimo ku nying'gi ku nying'gi.

Yuda

Yuda 1

- ¹Yuda, jamiru pa Yesu Kristu, m'umin Yakobo ni ju ma julwong'ogi, ma gi jumer i Mungu ma Wego, ma jugwoko de pi Yesu Kristu:
- ²Kisa man kwicwiny ku mer umedre iwu.
- ³Jumer, kinde m'abeponjo k'amora ya agor iwu pi both mwa ma wan ceke waribra i ie karacelo, e ia wacu ya akoagor iwu be m'abethoko kowu ya wnii alia pi yioyic ma jumio wang' acel pil ni jumaleng'.
- ⁴Kum jumoko nuti ma gimondo nyalwe, gi ju ma yang' jular jugoro pigi ni gonj maeni ma jugonjo kojo, gi ju ma ayi Mungu mbe i kungi, ma giloko bero pa Mungu mwa ni awanya ma rac, ma gikwero ko Jadit mwa ma acel kende ma Rwoth, Yesu Kristu.
- ⁵Nie ayenyo apoiwu, kadok wung'eyo gin ceke wang' acel pil, ya Rwoth, kan edaru laru dhanu m'ewodho kogi k'i ng'om Misiri, yo ku ng'eye enyotho ju m'uyio ngo.
- ⁶Man ke malaika de ma gigwoko ka ker migi gigi ngo, ento giweko kakagi m'umakugi, egwoko i kol ma nja ku nja the mudho, cil i lembapoka mi ceng' ma dwong' nini.
- ⁷Cil calu Sodom ku Gomora, man adhura m'i vutgi, ma gimiri gigi ni tarwang' calu joca bende timo ma gilubo tok kum ma tung' de, e jukethogi ngbeng' calu por, ma gibesendri ku masendi mi mac ma rondo ku rondo.
- ⁸E joni bende calu joca gicido kum i lek migi, gidwoko kero ni gin mananu, man gicayu weg dwong'.
- ⁹Ento Mikael ma en e malaika ma jadit, kinde ma giii giku wonabali epiemo pi kum Musa, cwinye tek ungo m'ekelo ko lembapoka mi cac i wie, ento ewacu kumae, Dong' Rwoth ujuki.
- ¹⁰Endre joni gicayu gin ma tek ging'eyo ngo: man gin ma ging'eyo ma ku kum ginyothri i ginde, calu yedi ma rieko mbe kugi.
- ¹¹Can i wigi! kum gikwanyu yo pa Kain, man gikonjri vur i kier pa Balam kara ginwang' sukulia, e girwinyo i piem pa Kora.
- ¹²Joni gi kidi m'upandre i cemo mi mer mu kinde ma wucamu wukugi, gi jukwac ma kakri gigi ma lworu mbe kugi; gin afuru ma pi mbe i igi, ma yamu cidho kudo; gi yen mi oro ma nyinge mbe, m'utho wang' ario, ma jufudho woko kud ulage;
- ¹³gi mukura m'i nam ma dhongo, ma gibedhuro lewic migi gigi; gi cero m'ubewire rr, ma mudho ma col bii kandre igi mi rondo ku rondo.

- ¹⁴Man Enok bende, ma ng'atu mir abirone yo ng'ei Adamu, eewo ni joni, ewacu kumae, Nen, Rwoth ubino ku jupare ma leng' rubanga apar,
- ¹⁵nipoko lembe wi ceke, man nipoko lembe wi ju ma ayi Mungu mbe kugi ceke kum tic migi ceke ma ayi Mungu mbe i kume, ma gitimo ma ayi Mungu mbe ko, man pi gin ma tek ceke ma judubo ma ayi Mungu mbe i kumgi giyero pire.
- ¹⁶Joni gi jung'ur, gi jupir, ma gilubo tok awanya migi ma rac (ma dhoggi yero lembe ma dit ma yenyo) ma dhanu bedo tung' tung' i wang'gi ni kum kuloka.
- ¹⁷Ento wun, jumer, wupoi pi lembe ma yang' alar ayero ni kum jukwenda pa Rwoth mwa ma Yesu Kristu;
- ¹⁸ya giwacu iwu kumae, I dong nindo jucac bibedo nuti ma gibewo tho ku lubo tok awanya migi ma rac ma ayi Mungu mbe i ie.
- ¹⁹Joni gi ju ma ginyayu pok ma jupokri ko, gi dhanu ma gilubo kum, ma Tipo mbe kugi.
- ²⁰Ento wun, jumer, ma wugombru giwu wi yioyic mu ma leng' kwe, ma wuberwo ko i Tipo Maleng',
- ²¹wukuru giwu i mer pa Mungu, ma wubekio ko kisa pa Rwoth mwa Yesu Kristu ni kwo ma rondo ku rondo.
- ²²Man bed ku kisa kum jumoko ma cwinygi jiji;
- ²³man wular jumoko, ma wuyudh kogi kud i mac; man bed ku kisa ku lwo ro kum jumoko; ma wudag ko cil kendi ma kume cwinyo ni kum kum.
- ²⁴Nie ni ng'atu ma copo kurowu kara kud wukier, m'ecopo kethowu wang' dwong' pare ma lembe mbe i wiwu i mutoro ma dit,
- ²⁵ni Mungu m'e kende ma Jalar mwa, ni kum Yesu Kristu ma Rwoth mwa, ire yung, ku dwong', ku kero man tego, m'ugambre por con, kawono de, man cil rondo ku rondo. Amen.

Lembanyutha

Lembanyutha 1

- ¹Lembanyutha pa Yesu Kristu, ma Mungu mio ire enyuth ni jumiru pare, cil gin ma fodi nyanok bikotimbre be: man eoro enyuthe ku malaika pare ni jatic pare Yohana;
- ²m'enyutho pi lembe pa Mungu, man pi lembatuca pa Yesu Kristu, cil gin ceke m'enido.
- ³Mugisa ni ng'atu m'usomo, man ni ju m'uwinjo lembila maeni man ni ju m'uworu gin m'ugore i ie de: kum nindone dhingo ceng'ni.
- ⁴Yohana ni kanisa abiro ma tie i Asia: Bero iwu man kwicwiny, m'uai ba ng'atu ma tie ma yang' de etie m'ebibino de: m'uai de ba Tipo abiro ma gini nyim komker pare;
- ⁵m'uai de ba Yesu Kristu, ma en e jamulembe mandha, m'e kayu mi ju m'utho, man jabim mir ubimo m'i ng'om. Ire m'amaruwa, m'egonyowa kud i dubo mwa ku rimbe;
- ⁶man eketho wabed ni ker, julam ni Mungu pare man Won; dwong' ku kero bed ire rondo ku rondo. Amen.
- ⁷Nen, ebino kud afuru; man ku ba wang' ceke binene, ku ju m'ucobe de; man thek ceke m'i ng'om biywak ire. Cil kumeno. Amen.
- ⁸An a Alfa kud Omega, Rwoth Mungu wacu, ng'atu ma tie ma yang' de etie m'ebibino bende, m'e Jategokpo.
- ⁹An a Yohana, m'umegwu man jarib wakudu i masendi ku ker ku twicwiny ma gini i Yesu, nwang'u ani i cula ma julwong'o Patmo, kum lembe pa Mungu man kum lembatuca pa Yesu.
- ¹⁰Nwang'u ani i Tipo i ceng' pa Rwoth, e awinjo dwal ma dit yor i ng'eya, calu mir agwara,
- ¹¹m'uwacu kumae, Gin m'enido, gor i kitabu man iore ba kanisa abiro: bang' Efeso, ba Smurna de, ba Pergamo de, ba Thuatera de, ba Sardi de, ba Filadehia de, man ba Laodikia bende.
- ¹²Man alokra nineno dwal m'uweco kuda. E kan alokra aneno thethala mi mola ma kwar abiro;
- ¹³man i kind thethala ng'atu acel ma calu wod dhanu, m'eronyo bongu lot wi tiende, ma kore de bedo atwia ku foto mola ma kwar.
- ¹⁴Man wie ku yukwie de gi tar pu tar pami yuk rombo, tar calu pei; nying wang'e de va lebmac;

¹⁵tiende de calu mola m'urieny, calu ma tek juwang'u i uka; dwande de calu ba pi dupa.

¹⁶Man cero abiro ni i cinge ma yor acwic: man palamularu ma lake bith kun ku kun uwok kud i dhoge: wang'e de va ceng' m'urieny i tego pare.

¹⁷E kan anene, apodho the tiende pami ng'atu m'utho. Man eketho cinge ma yor acwic i kuma, ewacu kumae, Lworo kud unegi; an a ma kwong'a ku ma cen de,

¹⁸man ng'atu ma Kwo; an ma nwang'u atho, man nen, abedo kwo mi rondo ku rondo, man abedo ku kifungula mi tho man mi Hadeya.

¹⁹Ka kumeno kieu gin m'ineno man gin ma tie, ku gin ma bitimbre macen;

²⁰giramung'a mi cero abiro m'ineno i cinga ma yor acwic, man mi thethala abiro mi mola ma kwar. Cero abirone gi malaika mi kanisa abiro: man thethala abirone gi kanisa abiro.

Lembanyutha 2

¹Ni malaika mi kanisa ma ni i Efeso kieu kumae: Ng'atu m'umaku cero abiro i cinge ma yor acwic, en e ng'atu m'uwotho i kind thethala abiro mi mola ma kwar ewacu gin maeni kumae:

²Ang'eyo tic peri, ku tic m'imuli kudo man twiocwiny peri, man nia bedo ku dhanu ma rac copre iri ngo, man imulo i ju ma gilwongri gigi jukwenda, enke gi kumeno ngo, man inwang'u nia gi jundra;

³man twiocwiny nuti i beng'i man iciro cir pi nyinga, man iol ungo.

⁴Endre lembe ni i ia i kumi, nia iweko mer peri ma kwong'a.

⁵Ka kumeno poi pi ka m'iai i ie kan ipodho, man ilok cwinyi itim tic ma kwong'a de; tek kumeno ngo abino i beng'i, man abikabu thethala peri woko kud i kakare, tek iloko cwinyi ngo.

⁶Ento lembe mae ni i beng'i, ya idagu tic mi Junikolai, ma an bende adagu.

⁷Ng'atu ma ithe nuti, dong' ewinj lembe ma Tipo yero ni kanisa. Ni ng'atu m'uloyo, abimie ecam kum yen mi kwo, ma ni i Paradis pa Mungu.

⁸Man ni malaika mi kanisa ma ni i Smurna kieu kumae: Ng'atu ma en e ma kwong'a ku ma cen de, m'etho, man ebedo kwo kendo ewacu gin maeni kumae:

⁹Ang'eyo masendi peri, ku canpiny m'unegi (ento ilony), ku lembacidi mi ju m'uwacu ya gi Juyahudi, man gi kumeno ngo, endre gi cokri pa Jok.

¹⁰Lworo kud unegi kum gin ma fodi nyanok ibisendri kudo: nen, wonabali ni ceng'ni bayu kindwu moko i odkol, kara jumul ko iwu; man wubibedo ku masendi ceng' apar. Dong' ibed mandha cil i tho, man abimio iri jamkermiwic.

- ¹¹Ng'atu ma ithe nuti, dong' ewinj lembe ma Tipo yero ni kanisa. Ng'atu m'uloyo ebinwang'u remo mi tho mir arionde ngo.
- ¹²Man ni malaika mi kanisa ma ni i Pergamo kieu kumae: Ng'atu m'ubedo ku palamularu ma lake bith kun ku kun uwacu gin maeni.
- ¹³Ang'eyo ka m'ibedo i ie, en e ka ma komker pa Jok ni ie; man imaku nyinga ki, man ikwero yioyic para ngo, cil i ceng' pa Antipa ma jamulembe para, ng'atu mandha para, ma junego i kindwu, ka ma Jok bedo i ie.
- ¹⁴Endre nyalembe moko ni i ia i kumi, kum jumoko ni i beng'i ma gimaku lemponji pa Balam, m'uponjo Balak ya ubol gin ma redho jo i wang' nyithindho pa Israel, ya gicam gin ma julamu ni ayi gin m'acwia, man nitimo tarwang' bende.
- ¹⁵E kumeno jumoko ni i beng'i bende m'umaku lemponji mi Junikolai kumeca.
- ¹⁶Ka kumeno dong' ilok cwinyi: tek kumeno ngo abino i beng'i pio, man abitimo ali i kungi ku palamularu m'i dhoga.
- ¹⁷Ng'atu ma ithe nuti, dong' ewinj gin ma Tipo yero ni kanisa. Ni ng'atu m'uloyo, abimio ire kum mana m'akana, man abimio ire kidi ma tar, man wi kidine nying' ma nyen m'ukieure, ma ng'atu moko mbe m'ung'eye ndhu ng'atu m'ujole.
- ¹⁸Man ni malaika mi kanisa ma ni i Thuatera kieu kumae: Wod Mungu, ma nying wang'e va lebmac, tiende de calu mola m'urieny, uwacu gin maeni kumae:
- ¹⁹Ang'eyo tic peri, ku mer peri man yioyic ku timotim man twiocwiny, man nia tic peri ma cen usagu ma kwong'a.
- ²⁰Endre lembe moko ni i ia i kumi, kum iweko dhaku ma Yezebel, m'elwongre gire jabila ma dhaku; man eponjo ewingo jumiru para de ya gitim tarwang', man gicam gin ma julamu ni ayi gin m'acwia.
- ²¹Man amio ire nindo ya elok cwinye; man eyenyo ngo ya elok cwinye kum tarwang' pare.
- ²²Nen, abole i kavuto, ku ju ma gigieri gikugi i masendi ma dit, tek giloko cwinygi ngo kum tic migi.
- ²³Man abinego nyithindho pare ku tho; man kanisa ceke gibing'eyo nia an a ng'atu ma sayu i ic kud adunde: man abimio iwu kubeng'wu kubeng'wu calku tic mu.
- ²⁴Ento ayero iwu, ni dongwu m'udong' i Thuatera, ma fodi wumbe ku ponji maeni, ma wung'eyo gin ma thuth pa Jok ungo, calu giwacu; abolo ter mange ngo i wiwu.
- ²⁵Ento maeno ma wubedo ko, wumak ki cil m'abino.
- ²⁶Man ng'atu m'uloyo, ku ng'atu m'ukuro tic para de cil i kajikne, abimie ng'ol wi thek:

²⁷man ebibimogi ku dul mi nyunyu, calu agulu pa jacwiagulu ng'eny nziki nziki; calu an bende ajolo ba Vwa;

²⁸man abimie cero mi rupiny.

²⁹Ng'atu ma ithe nuti, dong' ewinj gin ma Tipo yero ni kanisa.

Lembanyutha 3

¹Ni malaika mi kanisa ma i Sardi kieu kumae: Ng'atu m'ubedo ku Tipo abiro pa Mungu, man cero de abiro, uwacu gin maeni: Ang'eyo tic peri, nia nyingi nuti ya ibedo kwo, enke in avu.

²Dong' ibed ku weng'i, man iketh gin m'udong' ucungi, ma gini ceng'ni tho: kum fokanwang'u tic peri moko ngo m'udoko ndhu cu i wang' Mungu para.

³Ka kumeno dong' ipoi maram yang' ijolo man iwinjo de; man igwoke, ilok cwinyi de. Ka kumeno tek ikuro ngo, abibino calu jakwo, man saa m'abibino i ie i wi ibing'eyo ngo.

⁴Ento nyathi nyingi moko nuti i beng'i i Sardi m'ucido kendi migi ngo: man wabiwotho wakugi ku kendi ma tar; kum giromo.

⁵Ng'atu m'uloyo bironyo kendi ma tar kumeni; man abiruco nyinge woko kud i kitabu mi kwo ki ngo, man abituco nyinge i wang' Vwa, kud i wang' malaika pare.

⁶Ng'atu ma ithe nuti, dong' ewinj gin ma Tipo wacu ni kanisa.

⁷Man ni malaika mi kanisa ma i Filadellia kieu kumae: Ng'atu m'e leng', ng'atu ma en e andha, ng'atu ma kifungula pa Daudi ni i bang'e, ng'atu ma yabu man ng'atu moko mbe ma ciko, ma ciko de man ng'atu moko mbe ma yabu, uwacu gin maeni:

⁸Ang'eyo tic peri (nen, aketho dhugola m'ubedo ayaba i weng'i, ma ng'atu moko mbe ma copo ciko), ya nyathi tego moko ni i beng'i, man igwoko lembe para, man ikwero nyinga de ngo.

⁹Nen, amio ng'et cokri pa Jok, mi ju m'uwacu nia gi Juyahudi, enke gi kumeno ngo, ento gicwayu ndra; nen, abiketho gibino girwo de nyim tiendi, ging'ei de nia ameri.

¹⁰Kum igwoko lembe mi twiocwiny para, an bende abigwoki ni saa mir abidhe, saa maeno ma bibino wi ng'om ngung', nimulo i ju m'ubedo wi ng'om.

¹¹Abino pio: mak maeno m'ibedo ko ki, kara ng'atu moko kud umai jamkermiwic peri.

¹²Ng'atu m'uloyo, abikethe ni mbegi i hekalu pa Mungu para, man ebiwok woko ku keca kendo ngo: man abigoro nying' Mungu para i wie, man nying adhura pa Mungu para, ma Yerusalem ma nyen, m'uai i polo ba Mungu para loro piny, ku nyinga ma nyen an gira.

- ¹³Ng'atu ma ithe nuti, dong' ewinj gin ma Tipo wacu ni kanisa.
- ¹⁴Man ni malaika mi kanisa m'i Laodikia kieu kumae: Ng'atu ma Amen, m'e jamulembe mandha ma andha de, m'e thangambere mi giracwia pa Mungu, ewacu gin maeni:
- ¹⁵Ang'eyo tic peri, nia in i ng'ic kadok lieth de ngo: ayenyo ibed ng'ic kadi lieth.
- ¹⁶Kum kumeno kum i tang', man i lieth kadi ng'ic de ngo, abing'uli woko kud i dhoga.
- ¹⁷Kum iwacu kumae, An a lony, man alimo lonyo, man can gin moko mbe m'unega; m'ing'eyo de ngo nia in i jacan m'umbe mutoro de man m'umbe piny man abinga, muneru de:
- ¹⁸amio iri rieko nia ing'ieu mola ma kwar i bang'a m'uwang' i mac, kara idok m'i lony; ku kendi ma tar, kara ironjri, kara lewic mi muneru peri kud unen: man mo m'i wang' de m'iwir ko weng'i, kara inen.
- ¹⁹Ku ba ju m'amaru ceke, ajukogi man aponjogi: ka kumeno bed k'amora, man ilok cwinyi.
- ²⁰Nen, acungo dhugola man adwong'o: tek ng'atu moko winjo dwanda man eyabu dhugola, abimondo i bang'e, man wabicamu wakude, en de kuda.
- ²¹Ng'atu m'uloyo, abimie ejany kuda i komker para, calu an bende aloyo, man ajany waku Vwa i komker pare.
- ²²Ng'atu ma ithe nuti, dong' ewinj gin ma Tipo yero ni kanisa.

Lembanyutha 4

- ¹Yo ng'ei gin maeni aneno, man nen, dhugola yabre i polo, e dwal ma kwong'a m'awinjo, dwalne calu mir agwara m'ubeweco kuda, acel m'ubewacu kumae, Idh malu kue, man abinyutho iri gin ma bikotimbre be macen.
- ²E ndhu ndhu nica ani i Tipo. man nen, komker ukethie i polo, man ng'atu acel ujany wi komker;
- ³man ng'atu m'ujany enen va kidi ma tar m'urieny ku kidi ma kwar ngbo, danyu de nuti m'udhoko komker gbur, enen va kidi ma kite va lum.
- ⁴E komker pier ario wi ang'wen udhoko komkerne gbur; man aneno judongo pier ario wi ang'wen ujany wi komkerne, gironyo kendi ma tar; man jamkermiwic mi mola ma kwar ni i wigi.
- ⁵Man lukoth ku dwal ku morpolo giai ba komker. Man thala abiro mi mac ubeliel i wang' komker, ma gi Tipo abiro pa Mungu;

⁶man gin moko ni i wang' komker, ma calu nam mi kieu ma nen va kidi ma ie pelele; man i kind komkerne, kud i ng'et komkerne de, yedi ma kwo ang'wen ma wang'gi romo kumgi ceke yor i wang'gi ku yor i ng'eigi bende.

⁷Man yedi ma kwong'ane ayine pamir umvor, man yedi mir arionde ayine va nyathi dhiang', man yedi mir adege wang'e pa wang' dhanu, yedi mir ang'wende va acur m'uberingo.

⁸E yedi ang'wen ma kwone, ma bombgi abusiel abusiel kubang'gi nzu, wang'gi romo kumgi ceke ku yor i ie de: man kayom umbe igi dieceng' ku diewor, ma giwacu ko kumae, Leng', leng', leng', Rwoth Mungu, ma Jategokpo, ma yang' enuti man enuti m'ebibino de.

⁹Man ka yedi ma kwo bimio dwong' ku yung ku foyofoc ni ng'atu m'ujany wi komker, ni ng'atu m'ubedo kwo rondo ku rondo,

¹⁰judongo pier ario wi ang'wen bipodho piny i wang' ng'atu m'ujany wi komker, man gibirwo ire m'ebedo kwo rondo ku rondo, man gibibolo jamkermiwic migi wang' komker, ma giwacu ko kumae,

¹¹Eromo kudi, Rwoth mwa man Mungu mwa, ya igam dwong' man yung ku tego: kum icwio gin ceke, man gibedo nuti ni kum yeny m'iyenyo, gicwiri de.

Lembanyutha 5

¹Man aneno kitabu, ma jugoro ie ku yor i ng'eye de, m'emwondre ki kud ayi abiro, i cing' ng'atu m'ujany wi komker ca ma yor acwic.

²Man aneno malaika ma tek m'ubeyero ku dwal ma dit kumae, Ng'a m'uromo m'eyabu ko kitabu, m'ealu ko ayine de?

³Man ng'atu moko mbe i polo, kadi wi ng'om de, kadi the ng'om, ma copo yabu kitabune, kadi wie anena de.

⁴Man aywak dit, kum junwang'u ng'atu moko ngo m'uromo yabu kitabune, kadi wie anena de:

⁵man ng'atu acel ma kind judongo wacu ira kumae, Kud iywaki: nen, Umvor ma en e mi suru pa Yuda, Ulag Daudi, eloyo m'eyabu ko kitabune kud ayine abiro de.

⁶Man aneno Nyathi Rombo i kind komker man i kind yedi ma kwo ang'wen, man i kind judongo, ecungo, calu ma tek juthume, ma tunge abiro, wang'e de abiro ma gi Tipo abiro pa Mungu, ma juoro i ng'om yu.

⁷Man ebino, eting'e kud i cing' ma yor acwic pa ng'atu m'ujany wi komker ca.

⁸Man kan edaru ting'o kitabune, e yedi ma kwo ang'wen ku judongo pier ario wi ang'wen de gipodho piny wang' Nyathi Rombo, ma adungu ni kubang'gi nzu, ku tabu mi mola ma kwar ma gin ma ng'wice ng'ar upong' i ie, ma en e rwo mi jumaleng'.

⁹Man giwero wer ma nyen, giwacu kumae, Eromo kudi ya iting' kitabu, man ial ayine de: kum juthumi,man ing'iewo ni Mungu ku rimbi dhanu mi suru ceke kubang'gi, man dhok, man dhanu, man thek,

¹⁰man iketho gibed ni ker ku julam de ni Mungu mwa; man gibimo bim wi ng'om.

¹¹E aneno, man awinjo dwal mi malaika dupa m'utieko komker gbur man yedi ma kwo ku judongo; man welgi rubanga apar bang' rubanga apar, man rubanga rubanga swa;

¹²ma giwacu kumae, ku dwal ma dit, Eromo ku Nyathi Rombo ma juthume ya egam tego, ku lonyo, man rieko, man tek, man yung, ku dwong', man mugisa.

¹³Man giracwia pa Mungu nzu kubang'gi ma ni i polo, ku ma wi ng'om, ku ma the ng'om, ku ma wi nam, ku gin ceke ma ni i igi bende, awinjo gibewacu kumae, Mugisa, ku yung, ku dwong', man kero, ubed ni ng'atu m'ujany wi komker, man ni Nyathi Rombo, rondo ku rondo.

¹⁴E yedi ma kwo ang'wen giwacu, Amen. Man judongo gipodho piny man girwo.

Lembanyutha 6

¹Man aneno ka Nyathi Rombo alu ayi acel mir abirone, e awinjo acel m'i kind yedi ma kwo ang'wen m'uwacu kumae, calku dwal mi morpolo, Bin inen.

²E aneno, man nen, riuni ma tar, man ng'atu m'ubedo i wie umaku atum; man jumio ire jamkermiwic: man ewok woko m'ebeloyo, man niloyo.

³Man kan ealu ayi mir arionde, awinjo yedi ma kwo mir arionde wacu kumae, Bin inen.

⁴E riuni mange ma kwar ngbo wok woko: man ni ng'atu m'ubedo i wie jumio ire ya ekab kwiocwiny kud i ng'om, man kara ginegri gigi: man jumio ire palamularu ma dit.

⁵Man kan ealu ayi mir adege, awinjo yedi ma kwo mir adege wacu kumae, Bin inen. E aneno, man nen, riuni ma col; man ng'atu m'ubedo i wie mukero ni i cinge.

⁶Man awinjo calu dwal uwacu kumae i kind yedi ma kwo ang'wen, Mukero mi nganu mi denarius, man nganu ma tung' mukero adek mi denarius; man mo ku pigulok re kud wudubi.

⁷Man kan ealu ayi mir ang'wende, awinjo dwand yedi ma kwo mir ang'wende wacu kumae, Bin inen.

⁸E aneno, man nen, riuni ma foo: man ng'atu m'ubedo i wie, nyinge Tho; man Hadeya de lubo ng'eye. Man jumio igi ng'ol wi ng'et ng'om mir ang'wende, ya gineg ku palamularu, ku ndrui de, man ku thong'om, man ku yedi ma kwiny m'i ng'om.

⁹Man kan ealu ayi mir abije, aneno the pemblam kwo mi ju ma junego pi lem pa Mungu, man pi lembatuca ma gibedo kudo:

¹⁰man gikok ku dwandgi ma dit, giwacu kumae, Rokani, E Rwoth, m'i leng' andha de, ipoko lembe man iculo wang' rimbwa wi ju m'ubedo wi ng'om ungo?

¹¹Man jumio igi kendi ma tar ma lot kubang'gi nzu; man juwacu igi, nia gikogiyom tundu nindo ma nyanok, cil m'ebitimbre kakare kum jutic wagi bende man kum wedigi, ma jubinegogi calu gin.

¹²Man aneno kan ealu ayi mir abusiende, e digidi ma dit uyengre; man ceng' udoko col calu goniam yuk diel ma mujuga, man dwi ceke doko calu rimo;

¹³man cero mi polo podho wi ng'om, calu yen mir ulam oyo nyinge ma fokucek ungo ku yamu ma dit m'uyengre.

¹⁴Man polo kabre woko calu waraga m'ubedo adola; man gudi ku cula kubang'gi nzu ukabre ku kakagi.

¹⁵Man ju ma gin ubimo m'i ng'om, ku juker, ku jeko ma dongo, ku julonyo, man jutego, ku ng'eca man paker kubang'gi nzu gipondo gigi i odcana man i kidi mi gudi;

¹⁶man giwacu ni gudi man ni cana kumae, Podh i wiwa, umwa de kud i wang' ng'atu m'ubedo wi komker man ni kwinyo pa Nyathi Rombo:

¹⁷kum ceng' ma dwong' mi kwinyo migi wok; man ng'a ma copo cungo?

Lembanyutha 7

¹Yo ng'ei maeni aneno malaika ang'wen m'ucungo i gund ng'om ang'wen, ma gitwio yamu ang'wen mi ng'om, kara yamu moko kud ukot wi ng'om, kadi wi nam, kadi wi yath moko.

²Man aneno malaika mange idho ku yo ku ma ceng' wok i ie, m'ebedo kud ayi Mungu ma kwo: man ekok ku dwal ma dit ni malaika ang'wen ma jumio igi ya gitim ng'om ku nam de rac,

³ewacu kumae, Kud wutim ng'om rac, kadok nam, kadi yedhi, ma fodi wakuketho ayi ternyim jumiru pa Mungu mwa.

⁴Man awinjo wel ju ma juketho ayi i kumgine, rubanga dak acel ku pier ang'wen wi ang'wen, ma juketho ayi i kumgi kud i suru mi nyithi Israel kubang'gi nzu:

⁵Mi suru pa Yuda juketho ayi kum dha nu rubanga apar wi ario; Mi suru pa Ruben rubanga apar wi ario; Mi sura pa Gad rubanga apar wi ario;

⁶Mi suru pa Acer rubanga apar wi ario; Mi suru pa Naftali rubanga apar wi ario; Mi suru pa Manase rubanga apar wi ario;

⁷Mi suru pa Simeon rubanga apar wi ario; Mi suru pa Lawi rubanga apar wi ario; Mi suru pa Isakar rubanga apar wi ario;

⁸Mi suru pa Zabulon rubanga apar wi ario; Mi suru pa Yusuf rubanga apar wi ario; Mi suru pa Benyamin juketho ayi kum dhanu rubanga apar wi ario.

⁹Yo ng'ei gin maeni aneno, man nen, udul dhanu ma dit, ma ng'atu moko mbe ma copo kwanu, m'uai kud i thek ceke kubang'gi nzu man kud i suru ceke man kodhidhanu ku dhok, gicungo wang' komker man i wang' Nyathi Rombo, ma gironyo kendi ma tar ma lot, ku ndhendhe i cing'gi;

¹⁰man gikok ku dwandgi ma dit, giwacu kumae, Both ubed ni Mungu mwa m'ujany wi komker, man ni Nyathi Rombo.

¹¹Man malaika ceke gicungo gitieko komker gbur, ku judongo man yedi ma kwo ang'wen man gipodho arieba wang'gi nyim komker, man girwo ni Mungu,

¹²giwacu kumae, Amen: Mugisa, ku dwong', ku rieko, man foyofoc, ku yung, man tego, ku tek, ubed ni Mungu mwa rondo ku rondo. Amen.

¹³Man ng'atu acel ma kind judongo loko lembe, ewacu ira kumae, Maeni ma gironyo kendi ma tar ma lot e, gi ng'agi, man giai kani?

¹⁴Man awacu ire kumae, Rwoth para, ing'eyo. Man ewacu ira kumae, Maeni gi ju m'uai i masendi ma dit, man gilwoko kendi migi, gidwokogi tar de i rimo pa Nyathi Rombo.

¹⁵Ka kumeno gini i wang' komker pa Mungu; man gitimo ire dieceng' ku diwor i hekalu pare: man ng'atu m'ujany wi komker biguro hema pare i wigi.

¹⁶Kec binegogi kendo ngo, kadok rieupi de kendo ngo; kadok ceng' de bigoyogi kendo ngo, kadi lietho moko:

¹⁷kum Nyathi Rombo ma ni i kind komker ebibedo jakwac migi, man ebitelo wigi ba pi mi kwo ma dhenyni: man Mungu biyweyo piwang' pet kud i wang'gi.

Lembanyutha 8

¹Man kan ealu ayi mir abirone, piny uling' ti i polo i kinde mi ng'et saa acel.

²Man aneno malaika abiro m'ucungo wang' Mungu; man jumio igi agwara abiro.

³Man malaika mange bino cungo nyim pemblam, m'ebedo ku tabu mi mola ma kwar mir udok ma ng'wice ng'ar; man jumio ire udok ma ng'wice ng'ar dupa, kara emede ku rwo mi jumaleng' ceke wi pemblam mi mola ma kwar, ma ni i nyim komker.

⁴Man yiro mir udok ma ng'wice ng'arne, karacelo ku rwo mi jumaleng', uidho malu i wang' Mungu kud i cing' malaika.

⁵Man malaika ting'o tabu mir udok ma ng'wice ng'ar; man epong'e ku mac mi pemblam, man ebole wi ng'om: e m'ulubo maeno morpolo, ku dwal, man lukoth, ku digidi de.

⁶Man malaika abiro ma weg agwara giyikri gigi mi kudho agwara.

⁷Man malaika ma kwong'ane kudho agwara, m'ulubo maeno pei ku mac, m'ujebre ku rimo, man jubologi wi ng'om: man theng ng'om mir adege wang' pet, man mir adege mi yedhi de wang' pet, man lum ceke ma numu wang' pet.

⁸Man malaika mir arionde kudho agwara, e calu got ma dit ma mac ubewang'u jubolo i nam: man theng nam mir adege doko ni rimo;

⁹man theng yedi mir adege m'i nam utho, cil gin ma gi weg kwo; man theng combo mir adege nyothre.

¹⁰Man malaika mir adege kudho agwara, e cero ma dit uai kud i polo podho, m'ubewang' va ridhro, man epodho wi theng kulo mir adege, man wi pi ma dhenyni;

¹¹man nying' cerone julwong'o Yendadra: man theng pi mir adege doko ni yendadra; man dhanu dupa tho ku pige, kum judwokogi kec.

¹²Man malaika mir ang'wende kudho agwara, e jugoyo theng ceng' mir adege, ku theng dwi mir adege, man theng cero mir adege; kara theng piny mir adege yuthi, man rupiny kud ubed nuti ni theng piny mir adege, man diewor de kumeca.

¹³E aneno, man awinjo acur acel, m'eberingo i kor polo, m'ebewacu ku dwal ma dit kumae, Can, can, can, ni ju m'ubedo wi ng'om, kum dwal mange mir agwara mi malaika adek, ma gibikudho agwara macen.

Lembanyutha 9

¹Man malaika mir abije kudho agwara, e aneno cero m'uai i polo podho i ng'om: man jumio ire kifungula mi vur mi longro ma there mbe.

²Man eyabu dhu vur mi longro ma there mbe; e yiro thwogre kud i vur woko, calu yiro mir uka ma dit; man ceng' ku lietho de uyutho ni kum yiro mi vur.

³Man bonyo core i ng'om ku kind yiro; man jumio igi tego, calu ith m'i ng'om ubedo ku tego.

⁴Man juwacu igi ya ku gitim lum m'i ng'om rac, kadok gin moko ma numu, kadok yen moko, ndhu wagi dhanu ma ayi Mungu mbe ternyimgi kendgi.

⁵Man jung'olo igi ya ku gineggi, ento nia gimi ndiba igi dwi abic: man ndiba migi e calu ndiba pa ith, kan etong'o dhanu.

⁶Man i ceng' maeno dhanu biyenyo katho, ere gibinwang'e ki ngo; ava tho de binegogi, man tho biringogi.

- ⁷Man ayi bonyone va ayi riuni m'ubedo ayika mir ali; jamkermiwic ma calu mola ma kwar ni i wigi, wang'gi de calu wang' dhanu.
- ⁸Man yukwigi calu yuk wi mon, lakgi ke pa lak umvor.
- ⁹Man gibedo kud asikor, ma calu asikor mi nyunyu; man badwand bombgi calu badwand magali, mi riuni dupa m'uberingo dhu lwiny.
- ¹⁰Man yibgi de nuti calu mi ith, ku kwirne de; man tego migi ni i yibgi ma gitimo ko dhanu rac dwi abic.
- ¹¹Ubimo m'i wigi de nuti ma en e malaika mi longro ma there mbe: nyinge ma ku dhu Juebrania en e Nyoth, man ku dhu Juyunani ke nyingene Janyoth.
- ¹²Can ma kwong'ane daru kadhu: nen, Can ario mange bibino macen.
- ¹³Man malaika mir abusiende kudho agwara, e awinjo badwal acel m'uai i tung pemblam mi mola ma kwar ma ni i wang' Mungu,
- ¹⁴acel uwacu ni malaika mir abusiende ma won agwara kumae, Gony malaika ang'wen m'ubedo atwia dhu kulo ma dit ma Eufрати.
- ¹⁵Man jugonyo malaika ang'wen, m'ubedo ayika mi saa ku ceng' ku dwi man rundi, kara gineg theng dhanu mir adege.
- ¹⁶Man wel mi njuru weg riuni en e rubanga apar bang' rubanga apar wang' ario: awinjo welgi.
- ¹⁷Man aneno riuni kumeno ku ginmawokiwang', ku ju m'ubedo i wigi, ma gi weg asikor ma calu mi mac ku mi kidi ma col ku mi muganga: man wi riuni de calu wi umvor; man mac ku yiro ku muganga ubethwogre woko kud i dhoggi.
- ¹⁸Man ku masendi adek maeni junego theng dhanu mir adege, ku mac ku yiro man muganga, m'uthwogre woko kud i dhoggi.
- ¹⁹Kum tego mi riuni ni i dhoggi, man i yibgi: kum yibgine gi calu thwol, man wigi nuti; man gitong'o ku maeno.
- ²⁰Man dong' dhanu m'udong', ma junego ngo ku masendi maeni, giloko cwinygi ngo kum tic mi cing'gi, ya ku girwo ba pajogi, kud ayi gin m'acwia mi mola ma kwar, ku mi mola ma tar, ku mi mola, ku mi kidi, ku mi yen: ma kucop neno piny ungo, kadok awinja de giwinjo ngo, kadok awotha de giwotho ngo:
- ²¹man giloko cwinygi de ngokum nek migi kadok kum ajoga migi, kadok kum tarwang' migi, kadok kum kwalukwo migi.

Lembanyutha 10

- ¹Man aneno malaika mange ma tek uloro kud i polo, m'eronjre kud afuru; man dhanyu ni i wie, wang'e de calu ceng', man tiende va mbegi mi mac;

- ²man emaku nyathi kitabu m'ubedo ayaba i cinge: man eketho tiende ma yor acwic wi nam, ma yor acam ke wi ng'om;
- ³man ekok ku dwal ma dit, calu umvor m'ubeywak: man kan ekok, e morpolo abiro weco ku dwandgi.
- ⁴Man ka morpolo abiro weco ku dwandgi, ayenyo nik agor: man awinjo dwal uai i polo wacu kumae, Mwon ayi kum lembe ma morpolo abiro wacu, kud igorgi agora.
- ⁵Man malaika m'aneno cungo wi nam ku wi ng'om de ting'o cinge ma yor acwic malu yor i polo,
- ⁶man ekwong'o kwong' ku ng'atu ma bedo rondo ku rondo, m'ecwio polo ku giki m'i ie, ku ng'om man giki m'i ie, ku nam de man giki m'i ie, ya galu bidong' bedo nuti kendo ngo:
- ⁷ento i ceng' mi dwand malaika mir abirone, kinde m'eyenyo ekudh agwara, e giramung'a pa Mungu lund uthum, calku lembanyong'a m'eyero ni jumiru pare ma jubila.
- ⁸Man dwal m'awinjo ai i polo, awinje kendo m'ebeweco kuda, man ewacu kumae, Cidhi, ting' kitabu m'ubedo ayaba i cing' malaika m'ucungo wi nam ku wi ng'om de.
- ⁹Man acidho ba malaika, awacu ire nia emi ira nyathi kitabu. Man ewacu ira kumae, Ting'e, came; man ebidwoko ii kec, mana i dhogi re ebibedo lim lim va kic.
- ¹⁰Man agamu nyathi kitabu kud i cing' malaika, man acame; man ebedo lim lim i dhoga va kic: e kan adaru came ci, ia doko kec.
- ¹¹Man giwacu ira kumae, Ibikoewo kendo be wi kodhidhanu dupa ku thek man dhok man ju m'ubimo.

Lembanyutha 11

- ¹Man jumio ira undodi ma va uluth: man acel uwacu kumae, Ai, ipor hekalu pa Mungu, ku pemblam, ku ju m'urwo i ie.
- ²Man ponde ma yo woko kum hekalu weke woko, kud ipore; kum jumie ni thek: man gibinyono adhura ma leng' dwi pier ang'wen wi ario.
- ³Man abimio ni jumulembe para ario, man gibiewo ceng' rubanga acel ku dak ario ku pier abusiel, ma gikendo gonia.
- ⁴Maeni gi yen mir ulemo ario ku thethala ario, m'ucungo wang' Rwoth mi ng'om.
- ⁵Man tek ng'atu moko yenyo etimgi rac, mac ai kud i dhoggi man ecamu jukwojgi; man tek ng'atu moko biyenyo etimgi rac, ebikonegre kumeno be.

⁶Joni gi weg tego ma giciko ko polo, kara koth kud ucwi cil i ceng' mi lembila migi: man gi weg tego wi pi ma giloko kogi ni rimo, ma gigoyo ko ng'om de ku masendi kubang'gi nzu, ku ba nindo ceke ma giyenyo.

⁷Man ka gibidaru lembatuca migi, yedi m'uai i longro ma there mbe ebitimo lwiny kugi, ebiyoyogi de, man ebinegogi.

⁸Man avujgi vuto i gengi mir adhura ma dit, ma julwong'o Sodom ma ku tipo, man Misiri, ka ma juguro ie Rwoth migi bende.

⁹Man dhanu m'uai i kind kodhidhanu kud i suru ku dhok man thek gineno avujgi ceng' adek ku ng'ete, man giyio ngo nia juyik avujgi i odliel.

¹⁰Man ju m'ubedo wi ng'om anyong'a negogi i kumgi, man giketho mutoro; man gibioro giramia man ni wadi man ni wadi; kum jubila ario maeni gimio ndiba ni ju m'ubedo wi ng'om.

¹¹Man yo ng'ei ceng' adek ku ng'ete e lietho mi kwo m'uai ba Mungu mondo i igi, man gicungo wi tiendgi; e lworu ma dit upodho wi ju m'unenogi.

¹²Man giwinjo dwal ma dit m'uai i polo m'uwacu igi kumae, Wnidh kue. Man giidho i polo ku i afuru; man jukwojgi ginenogi.

¹³Man i saa maeno digidi ma dit uyengre, man theng adhura mir apaje podho; man dhanu rubanga abiro tho ku digidine: e dong' dhanu m'udong' lworu makugi, man gimio dwong' ni Mungu mi polo.

¹⁴Can mir arionde kadhu: nen, can mir adege bino pio.

¹⁵Man malaika mir abirone kudho agwara; m'ulubo maeno dwal ma dit i polo, man giwacu kumae, Ker m'i ng'om udoko ker pa Rwoth mwa, man pa Kristu pare: man ebibimo bim rondo ku rondo.

¹⁶Man judongo pier ario wi ang'wen, m'ubedo wang' Mungu wi komker migi, gipodho arieba wang'gi man girwo ni Mungu,

¹⁷giwacu kumae, Wafoi, E Rwoth Mungu, ma Jategokpo, m'inuti man yang' inuti; kum igamu tego peri ma dit, man ibimo bim.

¹⁸Man kwinyo nego thek man kwinyo peri wok, ku nindo ma jupoko ie lembe mi ju m'utho, man nindo ma jumio ie sukulia ni jumiru peri ma jubila, man ni jumaleng', man ni ju m'ulworo nyingi, ju ma thindho ku ju ma dongo; man ninyotho ju m'unyotho ng'om.

¹⁹Man juyabu hekalu pa Mungu ma ni i polo; man juneno sanduk mi lembariba pare i hekalu pare; man m'ulubo maeno lukoth, man dwal, ku morpolo, man digidi, ku pei ma dit.

Lembanyutha 12

- ¹Man giranyutha ma dit unen i polo: dhaku m'uronjre ku ceng', dwi de ni the tiende, man jamkermiwic mi cero apar wi ario ni i wie;
- ²ie de nuti; man eywak, m'ebesendre ku remokum mi nyodo, man eni i remokum m'enyol ko.
- ³E giranyutha mange nen i polo: man nen, ng'ec ma dit ma kwar, ma wie abiro tunge ke apar, man jamkermiwic abiro ni i wie.
- ⁴Man yibe telo theng cero mir adege m'i polo, man ebologi i ng'om: man ng'ec ucungo wang' dhaku ma ceng'ni nyol, kara kinde m'enyol emwony nyathin pare.
- ⁵Man enyolo wode, ng'atu ma nico, m'ebibimo thek ceke kud uluth mi nyunyu: man nyathin pare juting'e malu ba Mungu, man ba komker pare.
- ⁶Man dhakune ringo i yamba, ka ma kaka ma Mungu yiko ire ni i ie, kara jugwoke kuca ceng' rubanga acel ku dak ario ku pier abusiel.
- ⁷Man ali ni i polo: Mikael ku malaika pare gibecitimo ali ku ng'ec; ng'ec de gikiedo man malaika pare;
- ⁸man giloyo ngo, kadi kakagi de junwang'u kendo ngo i polo.
- ⁹Man jubolo ng'ec ma dwong' piny, en e thwol ma con, en ma julwong'e Wonabali man Jok, en m'e jawondi mi ng'om ngung'; jubole piny i ng'om, man malaika pare de jubologi piny gikugi.
- ¹⁰Man awinjo dwal ma dit i polo, m'uwacu kumae, Kawono both uwok, man tego man ker pa Mungu mwa, ku ng'ol pa Kristu pare: kum jubolo jagob utumegwa piny, en m'egobogi i wang' Mungu mwa dieceng' ku diewor.
- ¹¹Man givoye ni kum rimb Nyathi Rombo, man ni kum wec mi lembatuca migi; man gimaru kwo migi ngo cil ni tho.
- ¹²Ka kumeno anyong'a negwu, E polo, ku wun ma wubedo i igi de. Can ni ng'om ku nam de: kum wonabali loro piny i beng'wu, ma kwinyo ma dit ni i bang'e, m'eng'eyo ko nia nindo dong' ire nyanok kende.
- ¹³Man ka ng'ec uneno nia jubole piny i ng'om, enyayu ragedo kum dhaku m'unyolo nyathin ma nico.
- ¹⁴Man jumio bomb acur ma dongo ario ni dhakune, kara ering i yamba i kakare, ka ma jugwoke i ie pi nindo, man ungu nindo, man ng'et nindo, kud i wang' thwol.
- ¹⁵Man thwol uthwogo pi ma calu kulo kud i dhoge i tok dhakune, kara kulone mole.
- ¹⁶Man ng'om ukonyo dhakune, ng'om de ng'amu dhoge emwonyo ko kulo ma ng'ec uthwogo kud i dhoge.

¹⁷Man kwinyo nego ng'ec dwanya kum dhakune, man ecidho nitimo lwiny ku kodhi dhakune m'udong', m'ugwoko lembang'ola pa Mungu, m'umaku lembatuca pa Yesu Kristu de:

Lembanyutha 13

¹Man ecungo wi kwio ma dhu nam. Man aneno yedi ai i nam, ma tunge apar wie ke abiro, man jamkermiwic apar ni wi tunge, man nying' mir acidi ni i wie.

²Man yedine m'aneno ayine pamir ayi ng'u, man tiende pa tiend wai, dhoge ke pami dhu umvor: man ng'ec umio tego pare ire, ku komker pare, ku ng'ol ma dit.

³Man aneno wie acel calu juthume ni tho; man rem mi tho pare kei: man i ng'om ngung' uwang' lii kum yedine;

⁴man girwo ni ng'ec, kum emio ng'ol pare ni yedi; man girwo ni yedine, giwacu kumae, Ng'a ma calu yedi maeni? man ng'a ma copo kiedo lwiny kude?

⁵man jumio ire dhok ma yero gin ma dit ku lembacidi; jumio ng'ol de ire m'etim ko tic pare dwi pier ang'wen wi ario.

⁶Man eng'amu dhoge mi lembacidi kum Mungu, m'ecid ko nyinge, ku hema pare, cil ju m'ubedo i polo.

⁷Man jumio ire ya etim lwiny ku jumaleng', eloi kogi de: man jumio ire ng'ol wi suru kubang'gi kubang'gi ku dhanu man dhok man thek.

⁸Man dhanu ceke m'ubedo wi ng'om birwo ire, ma nying'gi kugore ngo i kitabu mi kwo pa Nyathi Rombo ma juthumo ugambre i thek ma ng'om uthekre ko.

⁹Ng'atu ma tek ithe nuti, dong' ewinji.

¹⁰Tek ng'atu moko en e jathebkol, e ecidho i kol: tek ng'atu moko binego ku palamularu, en de jubikonege be ku palamularu. Twiocwiny ku yioyic mi jumaleng' ni keni.

¹¹Man aneno yedi mange ai i ng'om uidho malu; tunge ario calu pa nyathi rombo, man eweco calu ng'ec.

¹²Man etimo ku ng'ol ceke pa yedi ma kwong'ane i wang' yedine. Man eketho ng'om ku ju m'ubedo i ie de girwo ni yedi ma kwong'ane, ma rem mi tho pare kei.

¹³Man etimo giranyutha ma dit, kara eketh cil mac uai i polo ulor i ng'om i wang' dhanu.

¹⁴Man ebombo ju m'ubedo wi ng'om ni kum giranyutha ma jumio ire etim i wang' yedi; m'ewacu ko ni ju m'ubedo wi ng'om, ya gitim ayi yedi m'ubedo ku rem ma jutong'e ko ku palamularu man ebedo kwo.

¹⁵Man jumio ire ya eyui lietho ire, cil ni ayi yedine, kara ayi yedine weci, kara dhanu ceke de ma girwo ngo ni ayi yedine juneggi.

¹⁶Man eketho ceke, ma thindho ku ma dongo, man julonyo ku jucan, man paker ku jumiru, ya juthei kiedo i cing'gi ma yor acwic, kadi i ternyimgi;

¹⁷man kara ng'atu moko bed umbe ma copo ng'iewo gin moko ire kadi ma loko gin moko, ndhu ng'atu ma kiedo ni i kume, en e nying' yedine kadi wel mi nyinge.

¹⁸Maeni rieko. Ng'atu ma won ng'eyong'ec, dong' ekwan wel yedine; kum en e wel ng'atu moko: man wel pare en e dak abusiel ku pier abusiel wi abusiel.

Lembanyutha 14

¹E aneno, man nen, Nyathi Rombo cungo wi got Sayuni, ku dhanu rubanga dak acel ku pier ang'wen wi ang'wen, ma nyinge, ku nying Won de, ugore ternyimgi.

²Man awinjo dwal m'uai i polo, pami dwand pi dupa, man calu dwand morpolo ma dit: man dwalne m'awinjo ubedo calu jubodho m'ubegoyo adungu migi:

³man giwero calu en e wer ma nyen i wang' komker, man i wang' yedi ang'wen ma kwo ku judongo: man ng'atu moko mbe ma copo ng'eyo weje ndhu dhanu rubanga dak acel ku pier ang'wen wi ang'wen, ma gi ju ma jung'iewogi kud i ng'om.

⁴Joni gi ju ma gicido ngo ku mon; kum gi ju ma sumba. Joni gi ju ma gilubo Nyathi Rombo ku ba ka m'ecidho i ie ceke. Joni jung'iewogi kud i kind dhanu, ya gibed ni landu mwoka ni Mungu man ni Nyathi Rombo.

⁵Man junwang'u ndra ngo i dhoggi: lembe de mbe i wigi.

⁶Man aneno malaika mange m'uberingo i kor polo, m'e won lembanyong'a ma nja m'eyero ni ju m'ubedo wi ng'om, man ni thek ceke ku suru ku dhok man dhanu;

⁷man ewacu ku dwal ma dit, Wulwor Mungu, man wumie dwong': kum saa mi pokolembe pare wok: man wurwo ni ng'atu m'ucwio polo ku ng'om ku nam ku kulo ma dhenyni bende.

⁸Man mange, malaika mir arionde, m'ulubo ng'eye, ewacu kumae, Babeli ma dit, upodho, upodho m'eketho thek ceke gimadhu pigulok mi kwinyo mi tarwang' pare.

⁹Man malaika mange, mir adege, ulubo ng'eigi, m'ewacu ku dwal ma dit kumae, Tek ng'atu moko rwo ni yedi kud ayine de, man ejolo kiedo ternyime kadi i cinge,

¹⁰en bende ebimadhu kum pigulok mi kwinyo pa Mungu, m'ubedo ayika m'ajeba ngo i kikombe mi ng'ecwiny pare; man jubimie ndiba ma ku mac man muganga i wang' malaika maleng', man i wang' Nyathi Rombo:

¹¹man yiro mi ndiba migi idho malu rondo ku rondo; man yom umbe igi dieceng' ku diwor, gi ju m'urwo ni yedi kud ayine de, ku ju m'ujolo kiedo mi nyinge.

¹²Keni en e twiocwiny mi jumaleng', gi ju ma giworo lembang'ola pa Mungu, ku yioyic pa Yesu.

¹³Man awinjo dwal m'uai i polo wacu kumae, Kieu kumae, Mugisa ni ju m'utho m'utho i Rwoth ugambre kawono: eyo, Tipo wacu, kara giyom ni tic migi ma gimuli kudo; kum tic migi lubogi.

¹⁴E aneno, man nen, afuru ma tar; man aneno ng'atu m'ubedo wi afurune calu wod dhanu, ma jamkermiwic mi mola ma kwar ni i wie, man uligu ma bith ni i cinge.

¹⁵Man malaika mange ai i hekalu, ekok ku dwande ma dit ni ng'atu m'ubedo wi afuru kumae, Or uligu peri, man inyar: kum saa mi nyar uwok; kum mwoka mi ng'om ucek hai.

¹⁶Man ng'atu m'ubedo wi afuru bolo uligu pare i ng'om; man ng'om unyare.

¹⁷Man malaika mange ai i hekalu m'i polo, en bende e won uligu ma bith.

¹⁸Malaika mange ai kud i pemblam, en e ng'atu ma won tego kum mac; man elwong'o ku dwal ma dit ni ng'atu ma won uligu ma bith, ewacu kumae, Or uligu peri ma bith, man icok njuru nying ulok m'i ng'om; kum nyinge poicek.

¹⁹Man malaika bolo uligu pare i ng'om, man ecoko nying ulok m'i ng'om, man ebole i pany pigulok, pany ma dit mi pigulok, mi kwinyo pa Mungu.

²⁰Man pany pigulok juyoke woko ng'ei adhura, man rimo ai kud i pany pigulok, cil ni utwindi mi riuni, cil ungolo dak ang'wen.

Lembanyutha 15

¹Man aneno giranyutha mange i polo, ma dit ku ma wang'u ijo, malaika abiro ma weg masendi abiro, m'udong' cen, kum i igi kwinyo pa Mungu thum.

²Man aneno gin ma calu nam mi kieu m'ujebre ku mac: ku ju m'uloyo kum lembe mi yedi, man kum ayi pare, man kum wel nyinge, gicungo dhu nam mi kieu, man gi weg adungu pa Mungu.

³Man giwero wer pa Musa ma jamiru pa Mungu, ku wer pa Nyathi Rombo, giwacu kumae, Tic peri gi dwong' ma wang'u ijo de, E Rwoth Mungu, ma Jategokpo; yo peri bedo pwe man audha de, in Ubimo mi nja.

⁴Ng'a ma lworu binege ngo, E Rwoth, ma k'ebiyungo nyingi de ngo? kum in i kendi e m'i leng'; kum thek ceke bibino man gibirwo i weng'i; kum tic peri mi bedopwe udaru nyuthre.

⁵E yo ng'ei gin maeni aneno, man hekalu mi hema mi lebatuca mi polo yabre:

⁶e malaika abiro ma gibedo ku masendi abiro giwok kud i hekalu, ma gironyo kidi ma pire tek, ma leng' m'uriang'ni de, ma korgi bedo atwia ku foto mi mola ma kwar.

⁷Man ng'atu acel ma kind yedi ang'wen ma kwo umio ni malaika abiro tabu abiro mi mola ma kwar ma kwinyo pa Mungu pong' i igi, en m'e kwo rondo ku rondo.

⁸Man hekalu pong' ku yiro m'uai ba dwong' pa Mungu, man ba tego pare; man ng'atu moko mbe ma copo mondo i hekalu, ma fodi masendi abiro mi malaika abiro ku thum ungo.

Lembanyutha 16

¹Man awinjo dwal ma dit uai kud i hekalu, uweco ni malaika abiro kumae, Wucidhi, wukonj tabu abiro mi kwinyo pa Mungu i ng'om.

²Man ma kwong'ane cidho, man ekonjo tabu pare i ng'om; man edoko ni vur ma rac ma remo dit wi dhanu ma weg kiedo pa yedi ma girwo ni ayine de.

³Man mir arionde konjo tabu pare i nam; e edoko ni rimo calu mir avu dhanu; man ku ba ng'eyong'ec ceke mi kwo githo, cil gin ma ni i nam.

⁴Man mir adege konjo tabu pare i kulo man wi pi ma dhenyni; man edoko ni rimo.

⁵Man awinjo malaika mi pi wacu kumae, In i pwe, in m'i nuti man yang' de inuti, in m'i Ng'atu Maleng', kum ipoko lembe kumeno:

⁶kum githwogo rimb jumaleng' ku mi jubila de, imio igi rimo gimadhi: eromo kugi de.

⁷Man awinjo pemblam uwacu kumae, Eyo, E Rwoth Mungu, ma Jategokpo, lembapoka peri en e andha pwe de.

⁸Man mir ang'wende konjo tabu pare wi ceng'; man jumio ire ewang' ko dhanu ku mac.

⁹E dhanu wang' ku lietho ma dit: man gicido nying' Mungu m'e won tego wi masendi maeni; man giloko cwinygi ngo nimie dwong'.

¹⁰Man mir ahije konjo tabu pare wi komker pa yedi; e ker pare cido bii; man gikayu lebgi kum remokum,

¹¹man gicido Mungu m'i polo kum remokum migi ku vur migi; man giloko cwinygi de ngo kum tic migi.

¹²Man mir abusiende konjo tabu pare wi kulo ma dit, en e kulo Eufrate; e pige dwono kau, kara yo yikre ni ubimo m'uai yo nyangu.

¹³Man aneno tipo m'ucido adek ma calu ungwal uai kud i dhu ng'ec, man i dhu yedi, man i dhu jabila mi ndra:

¹⁴kum gi tipo pajogi, ma gibetimo giranyutha; ma gicidho woko bang' ubimo m'i ng'om ngung', nicokogi karacelo ni lwiny mi ceng' ma dwong' pa Mungu, ma Jategokpo.

¹⁵(Nen, abino va jakwo. Mugisa ni ng'atu m'ukio, m'ugwoko kendi pare de, kara kud ewoth muneru, man ginen lewic pare.)

- ¹⁶Man gicokogi karacelo i ka ma julwong' o ku dhu Juebrania Armagedon.
- ¹⁷Man mir abirone konjo tabu pare i lietho; e dwal ma dit uai i hekalu, kud i komker, uwacu kumae, Etimbre:
- ¹⁸e lukoth, ku dwal, ku morpolo ginuti; man digidi ma dit de yengre, yau digidi ma dit ma kumeno fodi uwok ungo i ng'om por ma dhanu gamu bedo ko i ng'om ngi, digidi ma tek kumeni ngi.
- ¹⁹Man adhura ma dwong' upokre ni ng'ete adek, man adhura mi thek upodho; man Babeli ma dit jupoi pire i wang' Mungu, ya jumi ire kikombe mi pigulok mi kwinyo mi kwinyo pare.
- ²⁰Man ku ba cula ceke giringo woko, man gudi de nwangre kendo ngo.
- ²¹Man pei ma dit, ku ba pei ceke pekne va lelo, uai i polo loro piny wi dhanu: man dhanu gicido Mungu kum masendi mi pei; kum masendine e dit apila.

Lembanyutha 17

- ¹Man acel m'i kind malaika abiro ma weg tabu abiro ubino, uweco kuda, ewacu kumae, Bin kue, abinyutho iri pokolembe pa dhaku ma won asara ma dit m'ubedo wi pi dupa;
- ²m'ubimo m'i ng'om gitimo kugi tarwang', man ju m'ubedo wi ng'om jumerogi ku pigulok mi tarwang' pare.
- ³Man etera cen i Tipo cil i yamba: man aneno dhaku m'ubedo wi yedi ma kwar ngbo, m'epong' ku nying' mir acidi, ma wie abiro tunge ke apar.
- ⁴Man dhakune ronjre uluga man kwar ngbo, m'erukre de ku mola ma kwar ku kidi ma pire tek man kidi ma i upal, m'emaku kikombe mi mola ma kwar i cinge ma gin mir adegi pong' i ie, cil gin m'ucido mi tarwang' pare,
- ⁵man nying' ugore ternyime kumae, GIRAMUNG'A BABELI MA DIT, MEG WEG ASARA MAN MI GIN MIR ADEGI M'I NG'OM.
- ⁶Man aneno dhakune mer ku rimb jumaleng', ku rimb ju m'utho pi Yesu. Man kan anene, ia wang' lii ku wang'nic ma dit.
- ⁷Man malaika wacu ira kumae, li wang' lii nedi? Abiyero iri pi giramung'a pa dhakune, man pi yedi m'uyeye, ma wie abiro tunge ke apar.
- ⁸Yedi m'ineno yang' enuti, man embe: man edhingo ai i longro ma there mbe, m'acidho ko i kanyothri. E ju m'ubedo wi ng'om igi biwang' lii, gi ju ma nying'gi kugore ngo i kitabu mi kwo ugambre i thek ma ng'om uthekre ko, ka gineno yedi, maram yang' enuti, man embe, man ebibino.
- ⁹Maeni pidoic ma won rieko. Wic abiro gi gudi abiro, ma dhakune bedo i wie:

- ¹⁰man gin ubimo abiro; abic upodho, acel nuti, mange ke fodi uwok ungo; man kan ewok, ebikobedo nyanindo moko be.
- ¹¹Man yedi ma naka nuti, ma dong' embe e, en nini bende en e mir aborane, man en e kind abiro man ecidho i kanyothri.
- ¹²Man tung apar m'ineno gin ubimo apar ma fodi gikujolo ker ungo; endre gijolo ng'ol calu ubimo, karacelo ku yedi, kind saa acel.
- ¹³Joni gibedo ku pidoic acel, man gimio tego migi ku ng'ol migi de ni yedi.
- ¹⁴Joni gibitimo lwiny kum Nyathi Rombo, Nyathi Rombo de biloyogi, kum en e Rwoth mi rwodhi, man Ubimo mir ubimo; man ju ma gibedo gikugi de gibiloyo gikugi, ma gi ju ma julwong'ogi jugoyo wigi de gi mandha de.
- ¹⁵Man ewacu ira kumae, Pi m'ineno, ka ma dhaku ma won asara bedo ca, en e kodhidhanu, man udul dhanu, man thek, man dhok.
- ¹⁶Man tung apar m'ineno, ku yedi, maeni bidagu dhaku ma won asara, man gibiweke lwe man muneru, man gibicamu ring'kume, man gibiwang'e pet ku mac.
- ¹⁷Kum Mungu ketho i adundegi nia gitim pidoie, man gidok ma pidoigi acel, man gimi ker migi ni yedi, cii ma lembe pa Mungu timbre ko kakare.
- ¹⁸Man dhakune m'ineno en e adhura ma dit, m'ebimo wi ubimo m'i ng'om.

Lembanyutha 18

- ¹Yo ng'ei gin maeni malaika mange ai i polo loro piny, m'e won ng'ol ma dit; man ng'om ucare ku der mi dwong' pare.
- ²Man ekok ku dwande ma tek, ewacu kumae, Babeli ma dit, upodho, upodho, man edoko ni kabedo mi pajogi, man kol mi tipo m'ucido kubang'gi nzu, man kol mi winyo m'ucido ma judagu kubang'gi nzu.
- ³Kum ni kum pigulok mi kwinyo mi tarwang' pare thek ceke gipodho; man ju m'ubimo m'i ng'om gitimo tarwang' kude, man jukuloka m'i ng'om gidoko julonyo ni kum tego mi jambayunga pare.
- ⁴Man awinjo dwal mange ai i polo, wacu kumae, Wuwoki, dhanu para, wuwok kud i ie, kara kud wuribru ki ku dubo pare, man kara kud wujol kum masendi pare:
- ⁵kum dubo pare tundo cil i polo, man Mungu poi pi camuco pare.
- ⁶Wumi ire cil calu emio, man wumi ire wang' ario calku tic pare: i kikombe m'ejebo i ie, jeb ire wang' ario.
- ⁷Wumi ire ndiba ku can kumeni ma rom ku yung m'eyungre ko, man dhetho mi yeny ma ie yeny: kum ewacu yo i adundene kumae, Abedo ubimo ma dhaku, man an a dhaku ma cwara tho ngo, man abineno can ki ngo.

- ⁸Ka kumeno i ceng' acel masendi pare biwok, tho, ku can, man ndru; man ebiwang' kot ku mac; kum Rwoth Mungu m'upoko lembe pare e tek.
- ⁹Man ju m'ubimo m'i ng'om, m'utimo tarwang' kude m'ubedo i ayunga ceke de gikugi, gibiywak ku goyo nduru i wie, ka gineno yiro mi wang' m'ewang' ko,'
- ¹⁰ma gicungo ko ku bor ni lworo mi ndiba pare, ma giwacu ko kumae, Can, can, adhura ma dwong', Babeli, adhura ma tek! kum i saa acel pokolembe peri wok.
- ¹¹Man jukuloka m'i ng'om giywak man can unegogi i kume, kum ng'atu moko mbe m'ung'iewo jambkuloka migi kendo;
- ¹²jambkuloka mi mola ma kwar, ku mi mola ma tar, man kidi ma pire tek, man kidi ma i upal, ku bongu ma nwang' ma nwe nwe, man uluga, man bongu mir ukoko, man kwar ngbo; ku yen ceke ma ng'wice ng'ar, man agulu ceke kubang'gi mi laklic, man agulu ceke kubang'gi ma jutimo ku yen ma pire tek, man mi mola, ku nyunyu man kidi ma tar de;
- ¹³kud apoka yen ma lim lim, ku gin ma jwa jwa, kud udok ma ng'wice ng'ar ma juwang'u, ku mo mir awira, ku mo ma ng'wice ng'ar, ku pigulok, man mo ma acama, ku mogo ma yom, ku nganu, ku dhiang', man rombe; man ku kuloka mi riuni ku magali ma tiende ario ku dhanu ma ang' iewa; ku kwo mi dhanu.
- ¹⁴Man nying' ma pidoic peri yenyoy dit gipiei iri, man gin ceke ma naka gi jambruko ku jambayunga de girwinyo iri, e jubinwang'ugi kendo ki ngo.
- ¹⁵Jukuloka mi ginduni, ma gilony ni kume, gibicungo ku bor ni lworo mi ndiba pare, ma giywak can de negogi;
- ¹⁶ma giwacu ko kumae, Can, can, adhura ma dwong', en m'eronjre ku bongu ma nwang' ma nwe nwe kud uluga man kwar ngbo, man m'erukre ku mola ma kwar ku kidi ma pire tek ku kidi ma i upal!
- ¹⁷kum i saa acel thwo lonyo ma rokeni ngi juketho edong' lwe. Man weg combo ceke kubang'gi, ku dhanu ceke kubang'gi m'uwotho ka moko ku wi pi, ku jutic mi combo, ku dhanu ceke ma ginwang'u kuloka migi ni kum nam, gicungo ku bor,
- ¹⁸man gikok ka gineno yiro mi wang' m'ewang' ko, giwacu kumae, Adhura ma nedi ma calu thwon adhura maeni?
- ¹⁹Man giketho utur i wigi, gikok kumae, ku ywak man can, giwacu, Can, can, adhura ma dit, ma i ie dhanu ceke ma gibedo ku combo migi i pi juketho gilony ni kum lonyo pare! kum i saa acel juketho edong' lwe.
- ²⁰Anyong'a negwu i kume, in i polo, ku wun wu jumaleng', man wu jukwenda, ku wu jubila; kum Mungu poko lembe mu i wie.
- ²¹Man malaika ma tek uting'o kidi calu en e pom ma dit man ebole i nam, ewacu kumae, Babeli, adhura ma dit bipodho ku podho ma mbwom kumeni, jubiredhe piny, man ebinwangre kendo ki ngo.

²²Man dwand jubodlio mir adungu ku jubodho mi wer man jubodho mir ungbalu man jubodho mir agwara gibiwinjri kendo ki ngo ii; man jabodho, mi tic ceke ma tek nuti, gibinwangri ii ki ngo; man ba dwand pom biwinjre kendo ii ki ngo;

²³man der mi thala birieny kendo ki ngo ii; man ba dwand won ambadha ku pa mugole de biwinjre kendo ki ngo ii; kum jukuloka peri naka gi juker m'i ng'om; kum thek ceke bombe ni kum ajoga peri.

²⁴Man i ie junwang'u rimo mi jubila man mi jumaleng', man mi ceke ma junego wi ng'om.

Lembanyutha 19

¹Yo ng'ei gin maeni awinjo dwal calu en e dwal ma dit mir udul dhanu ma dit i polo, m'uwacu kumae, Haleluya; Both, man dwong', ku tego, gi pa Mungu mwa:

²kum pokolembe pare gin andha man pwe; kum epoko lembe pa dhaku ma won asara ma dit, en m'enyotho ng'om ku tarwang' pare, man eculo wang' rimb jumiru pare i cinge.

³Man wang' arionde giwacu kumae, Haleluya. Man yiro pare idho malu rondo ku rondo.

⁴Man judongo pier ario wi ang'wen ku yedi ma kwo ang'wen girum man girwo ni Mungu m'ubedo wi komker, giwacu kumae, Amen; Haleluya.

⁵Man dwal uai i komker, uwacu kumae, Wupak Mungu mwa, wu jumiru pare ceke, wu ju m'ulwore, ma thindho ku ma dongo.

⁶Man awinjo calu en e dwal mir udul dhanu ma dit, man calu dwand pi dupa, man calu dwand morpolo ma tek m'uwacu kumae, Haleluya: kum Rwoth Mungu mwa, ma Jategokpo ubimo bim.

⁷Dong' anyong'a negwa wabed ku mutoro ma dit de, man dong' wamiu dwong' ire: kum ambadha pa Nyathi Rombo wok, man dhaku pare daru yikre gire.

⁸Man emire ire nia eronjre gire ku bongu ma nwang' ma nwe nwe, ma riang'ni, ma leng' de: kum bongu ma nwang' ma nwe nwe en e tic mi bedopwe mi jumaleng'.

⁹Man ewacu ira kumae, Kieu kumae, Mugisa ni ju ma julwong'ogi ni cemo mir uthieno mir ambadha pa Nyathi Rombo. Man ewacu ira kumae, Maeni lemandha pa Mungu.

¹⁰Man apodho piny the tiende nirwo ire. Man ewacu ira kumae, Kud itim kumeno: an a jatic wedu wakudi ku juwedu de ma gibedo ku lembatuca pa Yesu: rwo ni Mungu: kum lembatuca pa Yesu en e tipo mi lembila.

¹¹Man aneno polo yabre; man nen, riuni ma tar, ku ng'atu m'ubedo i wie ma julwong'e Mandha man Andha; man i bedopwe epoko lembe man etimo lwiny.

¹²Man wang'e calu lebmac, man jamkermiwic dupa ni i wie; man ebedo ku nyinge m'ugore ma ng'atu moko mbe m'ung'eyo ndhu en gire.

¹³Man eronjre ku kendi ma juvong'o rimo i kume; ma nyinge julwong'o Lembe pa Mungu.

¹⁴Man njuru asikari m'i polo gilubo ng'eye ku wi riuni ma tar, ma gironjri ku bongu ma nwang' ma nwe nwe, ma tar ma leng' de.

¹⁵Man palamularu ma bith uwok kud i dhoge, kara egoi kudo thek: man ebibimogi kud uluth mi nyunyu: man ebinyono pany mi lak kwinyo pa Mungu, ma Jategokpo.

¹⁶Man ebedo ku nyinge m'ugore wi kendi pare man wi bambe kumae, UBIMO MIR UBIMO, MAN RWOTH MI RWODHI.

¹⁷Man aneno malaika acel m'ucungo i ceng'; man ekok ku dwande ma dit, m'ewacu ni winyo ceke m'uringo kor polo kumae, Wubin wucokru karacelo ni cemo ma dwong' mir uthieno pa Mungu;

¹⁸kara wucam ring ju ma gin ubimo, man ring ju ma gi jego, man ring dhanu ma dongo, man ring riuni ku mi ju m'ubedo i wigi, ku ring dhanu ceke, paker ku jumiru bende, ju ma thindho ku ju ma dongo de.

¹⁹Man aneno yedi, ku ju ma gin ubimo m'i ng'om de, ku njuru asikari migi, ma gicokri karacelo nitimo lwiny kum ng'atu m'ubedo wi riuni, man kum njuru asikari pare bende.

²⁰E jumaku yedine, ku jabila mi ndra bende karacelo kude m'etimo giranyutha i wang'e, m'ebombo kudo ju m'ujolo kiedo pa yedi man ju m'urwo ni ayine de: gin ario jubologi ma kwo i nammac ma wang' ku muganga:

²¹donge m'udong' de junego ku palamularu pa ng'atu m'ubedo wi riuni, en e palamularu m'uwok kud i dhoge: man winyo ceke giyeng' ku ringgi.

Lembanyutha 20

¹Man aneno malaika ai i polo loro piny, m'ebedo ku kifungula mi longro ma there mbe ku nyoro ma dit de i cinge.

²Man emaku ng'ec, ma thwol ma con, ma en e Wonabali ku Jok, man etwie mi rundi rubanga acel,

³gibole de i longro ma there mbe, e giciko dhoge, man gimwono ayi i wie, kara kud ebomb thek kendo, cil ma rundi rubanga thum ko: yo ng'ei maeni jubikogonye be mi nindo ma nyanok.

⁴Man aneno komker, ku ju m'ujany i wigi, man pokolembe mire igi: man aneno kwo mi ju ma juthumo wigi pi lembatuca pa Yesu, man pi lembe pa Mungu, man

wagi ju ma girwo ngo ni yedi, kadok ni ayine, ma gijolo kiedo ngo ternyimgi kud i cing'gi de; man gibedo, gibimo de giku Kristugi rundi rubanga acel.

⁵Dong' ju m'utho gikwo ngo cil ma rundi rubanga acel uthum ko. Maeni en e cer ma kwong'ane.

⁶Ng'atu m'ubedo ku maka pare i cer ma kwong'ane mugisa kwanye e leng' de: tho mir arionde mbe ku tego wi ju maeni; endre gibibedo julam pa Mungu ku pa Kristu, man gibibimo gikugi rundi rubanga acel.

⁷Man ka rundi rubanga acel uthum, jubigonyo Jok kud i kol pare,

⁸man ebiwok woko nibombo thek ma gini i gund ng'om ang'wen, Gog ku Magog, nicokogi karacelo mi lwiny: welgi va kwio ma dhu nam.

⁹Man giidho malu gicori wi kalac mi ng'om, man gitieko kagonjo mi jumaleng', kud adhura ma jumaru de: e mac uai i polo loro piny, man ecamugi.

¹⁰Man wonabali m'ubombogi jubole i nammac ku muganga bende, ka ma yedi ku jabila mi ndra bende gini ie; man jubimio igi ndiba dieceng' ku diewor rondo ku rondo.

¹¹Man aneno komker ma tar m'ulwar, ku ng'atu m'ujany i wie de, man ng'om ku polo de giringo wang'e; man kakagi nwangre ngo igi.

¹²Man aneno ju m'utho, ju ma dongo ku ju ma thindho, ma gicungo wang' komker; e juyabu kitabu: man juyabu kitabu mange de, ma en e kitabu mi kwo: man jupoko lembe mi ju m'utho ku gin m'ugore i kitabune, calku tic migi.

¹³Man nam uwodho ju m'utho ma ni i ie: man tho ku Hadeya de giwodho ju m'utho ma ni i igi: man jupoko lembe migi kubang'gi kubang'gi ng'atuman calku tic pare.

¹⁴Man tho ku Hadeya de jubayugi i nammac. Maeni en e tho mir arionde, ma en e nammac.

¹⁵Man tek ng'atu moko junwang'u nyinge kugore i kitabu mi kwo ngo, jubaye i nammac.

Lembanyutha 21

¹Man aneno polo ma nyen ku ng'om de ma nyen: kum polo ma kwong'a ku ng'om de ma kwong'a gikadhu woko; man nam umbe kendo.

²Man aneno adhura ma leng', Yerusalem ma nyen, m'ebeloro m'eai kud i polo ba Mungu, ma juyike calu mugole m'urukre ni nico pare.

³Man awinjo dwal ma dit uai i komker uwacu kumae, Nen, hema pa Mungu ni karacelo ku dhanu, man ebibedo kugi, man gibibedo dhanu pare man Mungu ku kite bibedo karacelo kugi, ni Mungu migi:

- ⁴man ebiyweyo piwang' pet kud i wang'gi; man tho bibedo nuti kendo ngo; kadok can, kadi ywak, kadok remokum de bibedo nuti kendo ngo: gin ma kwong'a daru kadhu.
- ⁵Man ng'atu m'ubedo wi komker uwacu kumae, Nen, adwoko gin ceke nyen. Man ewacu kumae, Kieu: kum lembe maeni gi mandha gin andha de.
- ⁶Man ewacu ira kumae, Gidaru timbri. An a Alfa kud Omega, ma thangambere ku kajik. Abimio kum pi ma dhenyni mi kwo k'abamba ni ng'atu ma rieupi nege.
- ⁷Ng'atu m'uloyo ebilagu gin maeni; man abibedo Mungu pare, man ebibedo woda.
- ⁸Ento ni julworo, ku ju ma gi juyic ungo, ku ju ma gi gin mir adeg, ku juneg nek, ku weg tarwang', ku weg jogi, ku ju ma rwo ni ayi gin m'acwia, ku jundra ceke bende, maka migi bibedo i nam ma wang' ku mac ku muganga bende; ma en e tho mir arionde.
- ⁹Man acel ma kind malaika abiro ma gi weg tabu abiro, ma ginur ku masendi abiro macen ubino; man eweco kuda, ewacu kumae, Bin kue, abinyutho iri mugole, ma dhaku pa Nyathi Rombo.
- ¹⁰Man eyeya i Tipo ba got ma dit ma wiu, man enyutho ira adhura ma leng' Yerusalem, m'uaiki polo ba Mungu ubeloro piny,
- ¹¹m'ebedo ku dwong' pa Mungu: derne calu mi kidi ma pire tek hai, calu en e kidi ma jukite ma pil pil, ma leng' calu kidi ma ie pelele:
- ¹²ma gang'ne nuti ma dit ma wiu; dhugolane apar wi ario, man malaika apar wi ario ni kum dhugolane; man nying' ugore i wie, ma gi nying' suru apar wi ario mi nyithindho pa Israel:
- ¹³yo nyangu dhugola adek; yor ariwa ma malu dhugola adek; man yor ariwa ma piny dhugola adek; man yo reto de dhugola adek.
- ¹⁴Man the gang' mir adhurane apar wi ario, man i wigi nying' apar wi ario mi jukwenda apar wi ario pa Nyathi Rombo.
- ¹⁵E ng'atu m'uweco kuda ebedo kud undodi mi mola ma kwar ni jampor m'eporo ko adhurane, ku dhugolane de, ku gang'ne de.
- ¹⁶Man gund adhurane ang'wen rom rom, kaborne rom ku kalacne: man eporo adhurane kud undodi, ungolo rubanga adek: kaborne ku kalacne ku kadongone de girom rom.
- ¹⁷Man eporo gang'ne, bol dak acel ku pier ang'wen wi ang'wen, calku jampor mi dhanu, thelembene, pa malaika.
- ¹⁸Jamgom mi gang'ne en e kidi ma jukite ma pilpil: man adhurane en e mola ma kwar ma leng', calu kieu ma leng'.

¹⁹The gang' mir adhurane bedo aruka ku kidi ma pire tek ma kwonde ceke tung' tung'. There ma kwong'ane en e kidi ma jukite ma pil pil; mir arionde, kidi ma tek ma ie nen uluga: mir adege, kidi ma tar ma kume thumo; mir ang'wende, kidi ma calu lum;

²⁰mir abije, kidi ma foo; mir abusiende, kidi ma kwar ngbo; mir abirone, kidi ma ie nen ma rieny calu mola ma kwar; mir aborane, kidi ma col calu nam; mir abung'wende, kidi ma ie nen ma calu lum; mir apaje, kidi m'uluga ma fraa; mir apar wi acende, kidi m'uluga ma furafura; mir apar wi arionde, kidi ma pilipili.

²¹Man dhugolane apar wi ario gi kidi apar wi ario ma i upal; dhugolane kubang'gi kubang'gi nzu en e mi kidi acel ma i upal: man gengi mir adhurane en e mola ma kwar ma leng', calu kieu ma ie nen.

²²Man aneno hekalu i ie ngo: kum Rwoth Mungu ma Jategokpo, ku Nyathi Rombo de, gi hekalune.

²³Man adhurane can ceng' umbe i kume, kadok mi dwi de, nia urieny i wie: kum dwong' pa Mungu care, man thalane en e Nyathi Rombo.

²⁴Man thek biwotho i derne: man ju m'ubimo m'i ng'om bikelo dwong' migi i ie.

²⁵Man dhugolane bibedo acika ki ngo ku dieceng' (kum diewor bibedo umbe keca):

²⁶man gibikelo dwong' man yung mi thek i ie:

²⁷man gin moko m'ucido, kadi ng'atu ma timo gin mir adegi ku ndra de, bimondo i ie ki ngo: ndhu ju ma jugorogi i kitabu mi kwo pa Nyathi Rombo kendgi.

Lembanyutha 22

¹Man enyutho ira kulo mi pi mi kwo, ma rieny calu kidi ma ie pelele, m'ei kud i komker pa Mungu man pa Nyathi Rombo,

²i die gengine. Man ng'et kulo kun ku kun yen mi kwo nuti, m'ecego nyinge ma tung' tung' apar wi ario, m'ecego ko nyinge ku ba dwi: man ith yende en e mi cangu thek.

³Man kwong'o kwong' bidong' bedo umbe kendo: man komker pa Mungu ku pa Nyathi Rombo bibedo i ie: jumiru pare de gibitimo ire;

⁴man gibineno wang'e; nyinge de bibedo ternyimgi.

⁵Man diewor bidong' bedo umbe kendo; man can der mi thala, kadok mi ceng' de binegogi ngo; kum Rwoth Mungu bimio igi der: man gibibimo bim rondo ku rondo.

⁶Man ewacu ira kuma, Lembe maeni gi mandha gin andha de: Rwoth, Mungu mi tipo mi jubila, eoro malaika pare unyuth ni jumiru pare gin ma fodi nyanok bikotimbre be.

- ⁷Man nen, abino pio. Mugisa ni ng'atu m'uworu lembe mi lembila mi kitabu maeni.
- ⁸An a Yohana a ng'atu m'uwinjo m'uneno de gin maeni. Man kan awinjo aneno de, apodho piny nirwo the tiend malaika m'unyutho gin maeni ira.
- ⁹Man ewacu ira kumae, Nen kud itim maeni: an de an a jatic wedu ku mi juwedu ma jubila, ku mi ju m'uworu lembe mi kitabu maeni: rwo ni Mungu.
- ¹⁰Man ewacu ira kumae, Kud imwon ayi kum lembe mi lembila mi kitabu maeni; kum nindo dhingo.
- ¹¹Wek ng'atu m'ugondre, utim gin m'ugondre asu: ng'atu m'ucido de, wek juketh ecid asu: man ng'atu ma pwe, wek etim bedopwe asu: man ng'atu maleng', wek juketh ebed leng' asu.
- ¹²Nen, abino pio; man sukulia para ni i bang'a, m'amio ni dhanu ceke kubang'gi nzu ng'atuman calku tic pare.
- ¹³An a Alfa kud Omega, ma kwong'a man ma cen, thangambere man kajik.
- ¹⁴Mugisa ni ju m'ulwoko kendi migi, kara gibed ku ng'ol ma gibin ko ba yen mi kwo, ma gimond ko ku i dhugola i adhura.
- ¹⁵Yo woko gwogi, man weg jogi, ku weg tarwang', ku juneg nek, ku ju ma lamu ayi gin m'acwia, ku kwai dhanu ceke m'umaru ndra m'utimo de.
- ¹⁶An a Yesu aoro malaika para nituco iwu gin maeni ni kanisa. An a ulag man nyakwar Daudi, cero ma rieny, mi rupiny.
- ¹⁷Man Tipo ku mugole giwacu, Bin. Man ng'atu m'uwinjo, dong' ewac, Bin. Man ng'atu ma rieupi nege, dong' ebin: man ng'atu m'uyenyo, dong' egam pi mi kwo k'abamba.
- ¹⁸Atuco ni dhanu nzu m'uwinjo lembila mi kitabu maeni kumae, Tek ng'atu moko bimeddo wi lembe maeni, Mungu bimeddo ire masendi m'ugore i kitabu maeni:
- ¹⁹man tek ng'atu moko bikabu kum lembe mi kitabu mi lembila maeni, Mungu de bikabu maka pare kud i yen mi kwo, man kud i adhura ma leng', ma pire gore i kitabu maeni.
- ²⁰Ng'atu m'utuco gin maeni wacu kumae, Eyo, abino pio. Amen. Bin Rwoth Yesu.
- ²¹Bero pa Rwoth Yesu ubed ku jumaleng'. Amen.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil